

**INSTITUTIONES
THEOLOGICAE
AD USUM
SEMINARIORUM.
AUTHORE...**

15. F. 7.
15. 7. 187

18
18
XXIV

JUVENIX

J. J.

1784

INSTITUTIONES
THEOLOGICÆ
AD USUM
SEMINARIORUM.

AUTHORE
GASPARE JUENIN,

Oratorii Gallicani Presbytero, & in
Seminario Eminentiss. Cardinalis DE
NOAILLES Archiepiscopi Parisien-
sis, Sacræ Theologiæ Professore.

*Editio Veneta anterioribus multò auctior,
& accuratior.*

TOMUS PRIMUS.



VENETIIS,
Apud PAULUM BALLEONIUM.

M. DCCIV.

Superiorum Permissu, ac Privilegiis.

EMINENTISSIMO
ECCLESIAE PRINCIP
LUDOVICO ANTONIO
DE NOAILLES.

S.R.E. CARDINALI,
ARCHIEPISCOPO PARISIENSI,
Duci ac Pari Franciæ, Regionum
Ordinum Commendatori, &c.



IUUM est, EMINEN-
TISSIME CARDINA-
LIS, & multis quidem
nominibus Tuum, hoc
Institutionum Theologicarum
Opus, quod denuò prodire in lu-
cem sub Eminentia Tuæ ambit
Auspiciis. Etsi enim jam ab ali-
quot annis editum ad usum Semi-

EPISTOLA.

nariorum fuerat; idem tamen media plus parte auctum, longèque accuratius recognitum crevit, etiam iubente Te. Adeòq; in fundo velut tuo, hoc est in Sammagloriano, renatus quasi, excultusque tandem est fructus ille, non minùs obsequii mei, quàm laboris ac studiorum meorum.

Primùm quidem, ut verum fatear, in hocce Opere fuerat mihi proposita Institutio Clericorum, qui in Seminariis Regimini Congregationis Oratorii commissis, ad omnia Ecclesiæ munia informantur. Et iis, ut prodessem, quantum in me esset, & officii mei pars prima, & summa votorum fuit. Ac deindè cum intellexissem, in aliis quoque non paucis, etiam exteris, easdem Institutiones non sine fructu, certè aliqua cum Illustrissimorum Episcoporum approbatione legi; consiliis jussuque plurimorum è Gallicano, nec non Romano Clero Præfulum, etiam, quod omnium instar est, Auctoritate Tua, EMINENTISSIME PRINCEPS ECCLESIAE; major denique mihi venit fiducia, easdem recognos-

scen-

E P I S T O L A.

scendi & augendi plurimum, ac ipsis quærendi Patronum illum, cujus sub tutela & favore, Editio hæc nova felicius prodiret.

Cujusnam autem Patrocinium (si non confidentius audeo) titulis potioribus optarem ego precarerque ? Ad hoc certè sperandum invitabat singularis illa & continua benignitas Eminentiae Tuæ erga Nos & Nostra ; qua scilicet Congregationem Oratorii velut à teneris annis nosse ac fovere assuesti . Illius nempe & perspecta Tibi jamdudum ac probè nota sunt, Instituti ratio omnis, ac devotum ad omnia Ecclesiæ ministeria sub nutu & auctoritate Episcopali obsequium.

Ad audendum quoque me compulit meritorum in Nos Tuorum præsens ubique, omniumque nostrum infixus gratis animis sensus . Quem si palàm profiteri, ac cæterorum ex eadem Congregatione Sodalium uno nomine, uno velut ore, una mente, uno pectore, publicum facere licebit per Te mihi, hoc qualicumque venerationis, gratique obsequii argumento ; illum non studiorum mo-

E P I S T O L A.

dò ac laborum , sed vitæ totius meæ fructum longè uberri-
mum , jucundissimumque puta-
vero .

Sed quod prætereà me movit
ad expetendum huic meo Ope-
ri Tuum , EMINENTISSIME
DOMINE , Patrocinium ; offe-
rebat se mihi vitæ totius Tuæ ad
exemplum & admirationem hu-
manitatis , comitatis , modestiæ ,
beneficentiæ , pietatis , Religionis
& virtutum omnium , ratio in-
stituta , adeò par sibi tamque con-
stans ab adolescentia tua , ut jam
rum appareret , Te talem postea
futurum , qualem nunc suspicit
Ecclesia omnis .

Deindè plenissima illa doctri-
næ sanctioris ubertas , ingenio par-
ta felici , longo labore acquisita ;
tum invicta Disciplinæ Ecclesia-
sticæ servandæ , tuendæ , purgan-
dæ firmitudo animi , cum ama-
bili suavitate morum conjuncta ;
ad sacrorum denique Canonum
formam composita norma viven-
di , ab omni luxu semota , mensa
frugalis , familia optimè constitu-
ta , convictus ubique dignitati &
Officio Pastoralis semper consen-
tiens ;

E P I S T O L A.

tiens; illa, inquam, omnia velut practicae cujusdam Theologiae documenta mihi visa sunt ad imitandum longè meliùs, efficaciusque proponenda instituendis ad usum & decus Ecclesiae Tyronibus Clericis; certè pondus additura Præceptionibus nostris Theologicis.

Et quid mirum, si talem à Te, EMINENTISSIME CARDINALIS, institui nunc videmus (& vident boni omnes cum gaudio) usum tuarum Dignitatum? Ad illas nempe viam Tibi fecere, non Illustrissimæ Gentis nobilitas, non Patris ac Fratrum clarissimorum eximia, seu armis, seu virtutibus, ac in primis studio Religionis, cultu pietatis, fide & amore in Regem, quæsita merita tot nobilitata titulis, tot aucta Dignitatibus; sed virtutes egregiæ Tuæ eidem Augustissimo Principi, sicut gestorum immortalium gloria Maximo, ita meritorum æstimatione semper æquissimo, probatæ & ornatae.

At Deus bone! qualis ad Episcopalem Dignitatem ingressus fuit tuus! Ad hanc, vocante cœ-

EPISTOLA.

lo, postulante Ecclesia, præter illam morum innocentiam, præter illas tum naturæ, tum gratiæ opes, præter excellentiam scientiæ Ecclesiasticæ longo studiorum cursu comparatam, præter usurpatas disciplinæ, pietatisque exercitationes in Seminariis; modestiam etiam animi onus & honorem pertinaciter refugientis non fictam attulisti; ad eandem vix denique, tam raro, quàm laudabili exemplo, accedens coactus.

In obeundis porrò Episcopalis Officii muneribus, quæ maxima sunt, inter Orationum divina exercitia, inter Sacra jugi usu & eximio sensu pietatis facienda; inter annuos meditandi causa secessus, atque pastorales labores; distribuisti tempus tam constanti & æquabili semper tenore; ut Te & tua Deum inter & homines partitus, absolutum Pontificem ad formam ab Apostolo traditam, hac nostra ætate exhibueris. Invisere charissimum gregem solitus, docere ipse animos rudes, ministrare Sacra petentibus, monere errantes, erigere lapsos, solari afflictos, opem indigentibus ferre, nul-

E P I S T O L A.

nullo tempore destitisti ; ubique laborum patiens , licèt parùm firma valetudine , ubique indefessa cura vigilans , ubique erga singulos comis , severus ubi opus , nemini unquam acerbus , bonis omnibus favens .

Hæc fuerant Episcopalis Dignitatis in Catalaunensi Diœcesi regenda velut tentamenta quædam , & ad ampliorem denique Dignitatem , hoc est , ad graviores curas , ad majorem longè laborem quasi præludia . Sic nimirum divina providente benignitate , communi bono Ecclesiæ Parisiensis , ad illam Augustissimam Sedem es vocatus . Hinc procul cupiditatis , ambitionis , favoris suspicio omnis . Ad illam utilitas non Tua , sed Ecclesiæ illius advocantis Te & votis à Deo communibus efflagitantis (quam unam mutandæ Sedis causam legitimam statuere sacri Canones) Te , inquam , nihil suspicantem , nedum tale aliquid desiderantem , imò reluctantem & invitum , ut jam olim , traduxit plaudentibus omnibus bonis ; sola mœrente Catalaunensi Sponsa Ecclesia , à qua avul-

E P I S T O L A.

sus vix tandem es . Et illud quidem desiderium Sponsi amissi non alio potuit solatio levare , nisi suffecto in locum tuum , hoc est , in communionem supplementumq; amoris ac laboris , Illustrissimo dignissimoque Fratre germano , eodem simillimo Tui .

In illo autem dignitatis , seu veriùs , curarum incremento , quid de Tua vivendi ratione admodum immutatum est ? nisi quod novo ardore , nova solitudine , sic commissam Tibi illam propè immensam Ecclesiam regis , ut fermè solus sufficias omnibus , vix Tibi uni prospicias . Pro superi ! in una Diœcesi , vel potiùs in Urbe una , quæ velut quoddam compendium numerosissimum Regni totius est , quanta Ovium copia , varietas , dignitas ! Has tamen omnes animo , cura , amore complecteris . His omnibus continuò impendis monita , documenta , exhortationes , consilia , voce , scriptis , præsentia ; & quod longè majus est , exemplo rectè vivendi . Sed quod maximum Tuæ in omnes charitatis argumentum , precibus ad Deum assiduis , ut fructus ejus-

E P I S T O L A.

ejusdem Tuæ charitatis quàm uberrimos percipiant, Pastor optimus exoras.

Qua autem prudentiæ vigilantia, qua varietate sollicitudinum, qua constantiæ æqualitate ad Fidei tuendam integritatem, ad Religionis promovendum augmentum, ad Disciplinam morum servandam, repurgandamque doctrinam, * ad cultum ac nitorem Sacrorum restituendum, ad Ministrorum Ecclesiæ ordinandum decentem convictum, ad pacem conciliandam inter dissidentes, ad compescendos coercendosq; animos inquietos; cogitationes omnes tuas, consilia omnia, auctoritatem omnem referas, ecquis est in universa Ecclesia, qui jam nesciat? Testes sunt, præter alia plurima, Pastorales illæ tuæ tam multæ, tam excellentes, tam cœlesti doctrina refertæ Constitutiones, tot Statuta, tot Mandata, tot Rescripta, Apostolicis digna temporibus. Adeò in illis non tam Te ipsum, PASTOR OPTIME IDEMQUE DOCTISSIME, loquentem audire videmur; quàm ore tuo divinæ Scripturæ oracula,

* Vide
Rituale
Parisiense recès.

E P I S T O L A.

facrorum Conciliorum effata, sanctorum Patrum scita promere se videntur & explicare .

Quid dicam de tua in concionando, ubi utilitas & salus ovium postulat, seu cum gregem invis, seu cum cœtus Sacerdotum statis temporibus convocas, de tua, inquam, ubertate doctrinæ, suavitate sermonis, rerum gravitate? Nusquam aliàs eloquitur digniùs Evangelica veritas. Quid de familiari convictu? Ibi accessus facilis & patens omnibus fiduciam alloquendi, oris & vultus gratia reverentiam; elegantia, dignitas, prudentia in dictis suasionem efficiunt. Ibi omnia pietatem, modestiam, benignitatem ita spirant, ut quisque aut melior, aut eruditior, aut magis amans officii; nemo cum tristitia, nemo sine solatio, aut subsidio à Te abscedat; audire enim omnes etiam patienter, in promptu respondere tam varia sciscitantibus, spem & animos relevare, alios consiliis, alios juvare facultatibus, omnibus denique omnia fieri.

2. Cor. 11. *Præter illa, quæ extrinsecus sunt, instantia tua quotidiana, soli-*

E P I S T O L A.

Sollicitudo omnium Ecclesiarum,
 quæ Diœceseos ambitu continen-
 tur; etiam interioribus sacrarum
 Virginum secessibus continuò ad-
 vigilans, ne qua se insinuet, aut
 relaxandæ religiosæ disciplinæ,
 aut pietatis imminuendæ occasio,
 * per Constitutiones præcavisti
 sapientia, discretionem, suavitatem
 mirabiles. Sic olim Cyprianos,
 Ambrosios, Augustinos, & hac
 nostra ætate Salesios, & optimos
 ac sanctissimos quosque Pastores,
 ad exhibendas Sponso Christo
 Sponsas dignissimas ea potior cura
 tenebat.

Vid. Mā-
 dat. de di-
 sciplina à
 Virgini-
 bus Deo
 sacris
 servada.

Sed neque oves errantes è sinu
 quondam Ecclesiæ avulsas, pate-
 ris carere fructibus verè Catholi-
 cæ tuæ Charitatis. Nam ut ad Fi-
 dei unitatem revertantur; rever-
 sæ, ut in Fide stent; & in Eccle-
 siæ pascua revocatæ, divinis sacrae
 doctrinæ pabulis nutriantur; fa-
 vore, præsidio, asylo, eruditio-
 ne, & per Teipse & per idoneos &
 doctos viros provides. Hæc sunt
 omnia, quæ Tibi, EMINENTIS-
 SIME CARDINALIS, amorem
 atq; venerationem in omnium et-
 iam Exterorum animis conciliant.

Vide E-
 pistolam
 pastoralē
 ad rec. as-
 cōversos
 ab hæresi
 ad fidem.

Hæc

EPISTOLA.

Hæc vidit , hæc miratus est
Episcopalis vitæ tuæ decora LU-
DOVICUS MAXIMUS . Hæc
ipsa , ut novo splendore orna-
rentur , perfecit . Hæc eadem
sanctissimus, si quis unquam aliàs,
Pontifex INNOCENTIUS XII.
cui benè nota fuerant , auxit Pur-
puræ honore amplissimo . Emi-
nentissima illa verò Dignitas , quæ
præmium virtutum tuarum sicut
ornamentum fuit ; & ad quam ,
raro certè exemplo , nihil hujus-
modi cogitans , alieno tantum ju-
dicio es provectus , nihil addidit
moribus tuis , nisi modestiam ma-
jorem , vehementius studium Re-
ligionis . Cujus quidem recentius
etiam argumentum est , quòd no-
vissimis his diebus nullum genus
errorum , novarumque opinio-
num , vel turbare Ecclesiam , vel
mores corrumpere , vel infirmare
disciplinam attentavit ; quod non
statim ^a doctrina & auctoritate ,
vel ipse represseris ; vel in Comi-
tiis nuper generalibus Cleri Galli-
cani , quibus non semel præfuisti ,
author & suasor non fueris hoc
ipsum comprimendi gravissimis
Censuris .

^a Vide
Instru-
ctionem
Pastora-
lem de
prædesti-
natione
& gratia.

^a Hinc

EPISTOLA.

^a Hinc repurgata moralis Theologia, quam his postremis temporibus, ut Alexander VII. agebat, prava ingeniorum licentia & subtilitas corruperant; ^b hinc perniciosum quoddam orationis pseudo-mythicæ commentum, tot malorum fecunda radix & corruptelarum caput, in Gallia Te autore excisum est.

Hinc ^c deindè orandi modus legitimus per eundem Te gregi præscriptus tuo, *Ut lex supplicandi legem statueret credendi*, ita monente quondam Cœlestino I. repudiatis ac proscriptis, quæ sinceram Fidem, solidamque Pietatem adulterabant, precationum quarumdam vanis formulis, iisque superstitiosis.

Hinc denique per Te sua Ecclesiæ jura, sua sanctissimo Episcoporum Ordini dignitas, sua libertas Clero vel aucta, vel servata; dum apud Regem Religiosissimum pro communi causa, ^{*} tam liberè (nam quando aliàs meliùs, quàm sub optimo Principe Episcopum libertas decet?) quàm sapienter, quàm disertè agis, ea qua vales gratia apud eun-

^a Vide Mandatū de promulgandis Cleri Gallicani decretis.
^b Vid. Instructio-
nē past.
de perfe-
ctione
Christia-
na, cōtra
Pseudo-
mystico-
rum illu-
siones.
^c Vide
Mandatū
de preca-
tionum
lib.&c.

^{*} Vide
Orationē
apud Re-
gem post
Comitia
genera-
lia habi-
tam.

E P I S T O L A.

eundem , qui Te amat suadentem semper recta , & libenter audit.

Quæ profectò in Ecclesiam Gallicanam merita præclara novis iisque præclarioribus in universam Ecclesiam meritis nuper cumulaſti , dum eligendi causa supremi illius Pastoris Romam evocatus , ut optimus Pontifex eligeretur, feliciter procuraſti unus cum plurimis ; & quam electus Dignitatem pertinaci modestia recusabat , tandem precibus , etiam lacrymis victus tuis , hanc ut subiret , præ multis unus effeciſti . Hoc magno scilicet beneficio Ecclesiam sic Tibi devinxisti universam : sic totius Eminentissimi Ordinis præclara de Te judicia retu- liſti : sic Pontificem ipsum maximum eximia opinione tuarum virtutum ad amorem Tui ita conciliaſti , ut tanti Te faciat , quanti Tu illum , dum ipsum judicaſti dignissimum honorum fastigio supremo . Sic denique videris hac tempeſtate unus cum paucissimis , qui benè merendi instrumentis , quæ pro loco , pro dignitate , amplissimisque virtutibus , in Te
ma-

EPISTOLA.

maxima sunt, utaris numquam nisi ad effundendam bonitatem tuam in plurimos; & qui in sublimi positus, eò tantum præsis pluribus, ut prosis singulis.

Illius certè Beneficentiæ tuæ, EMINENTISSIME PRINCEPS ECCLESIAE, partem non medio-cremad nos, qui gregis portio Tui minima sumus, pervenire sentimus in dies. Patiatur hoc modestia tua, quod officii nostri ratio, quod æquitas, quod Religio ipsa non patitur silere nos; & quod, citrà suspicionem omnem adulationis, palàm fateri, si non ingrati audire velimus, nos debere etiam vox publica conclamabit: beneficio nos tuo & non obscuro favori oportere acceptum referre, si quid fermè temporibus his novæ lucis nostræ Congregationi affulserit. Quis enim de illa malè sentire jam velit, qui de illa intelligat, quid Tu sentias; & qui Te, & tua norit secunda de nobis judicia? Quorum vel illud unum, inter cætera, argumentum præclarius edidisti, quàm ut, vel tacentibus nobis, nesciri possit, aut taceri; quum
duo

EPISTOLA.

duo celeberrima Seminaria dudum nobis credita ad regendum, nova auctoritatis ac gloriæ accessione decorasti : ut in illis, quæ præcipua cura nobis per Te incumbit, portionem gregis tui Tibi charissimam ea doctrina morum instituamus, quæ futuris aliquando in Ecclesia, vel magistris, vel ministris conveniat ; * nec jam manus iis imponere formides, quos multo tempore probatos, populo Tibi credito spes quondam daturos non magis documenta, quàm exempla piè vivendi.

* Vide
Mand. de
Seminariis & sacris
Ordinationibus.

Felices nos ! si ea fide & sedulitate officium nostrum fungimur, quæ expectationi de nobis Tuæ faciat satis. Eò certè vota nostra, eò consilia, eò studia & labores contendunt ; ut & ministerium, pro ratione Instituti nostri, impleamus, & Eminentiæ Tuæ judicio, seu favore, non omninò videamur indigni.

At me quoque feliciorē ! cui pars est aliqua officii hujus deman- data sub auspiciis tuis, EMINENTISSIME DOMINE ; si juxta mentem & voluntatem tuam, il-
lam

EPISTOLA.

Iam ipsam Doctrinam plena fide ,
uti spero , exposuero præceptionibus
meis Theologicis ; & Disciplinam
pariter morum publicis , seu * colla-
tionibus à Te constitutis puram &
defecatam , tanquam è divinis
haustam fontibus Scripturæ , Con-
ciliorum ac Patrum , Clericis præ-
ter mea merita copiosè confluentibus
tradidero . Tunc denique votorum
meorum mensuram implese me ratus ,
non aliud sperem Tibi jucundius
monimentum posse offerre venerationis
meæ perpetuæ .

* Vide
Mandatū
de publi-
cis Colla-
tionibus
circamo-
res habē-
dis.

EMINENTIÆ TUÆ,

*Humillimus , obsequentissimus , de-
votissimus servus* GASPAR
JUNIN , Orat. DOM. JESU
Sacerdos .

PRÆ-

P R Æ F A T I O .

NE longa te præfatione morer, Erudite Lector, hæc paucis habeto de nova hac Institutionum Theologicarum Editione. Quæ paucis abhinc annis Lugduni primum prodiit, & postmodum in exteris regionibus, ementitis prælis bis excusa est; hanc nunc denique auctiorem, accuratiùsque exaratam, sub auspiciis longè melioribus do in publicum. His enim accessere Tractatus de Locis Theologicis, id est, de Scripturis Sacris generatim, de Traditione Ecclesiastica, de Conciliis communiter; deindè singulatim de iis, quæ decem supra octo numerantur, ac præcipuè de Tridentino, quorum omnium explicantur à me Canones. Postea de Auctoritate Ecclesiæ & Episcoporum, nec non de Universitatum judiciis circa quæstiones Fidei & morum; postremò de divinis Attributis, sanctissima Trinitate, Angelis, aliisque rebus Theologicis disputandum institui, quæ exercitiis & doctrinæ Seminariorum materiam satis amplam præberent, idque juxta methodum ac mentem Divi Thomæ; nec non de aliis Quæstionibus, quæ ad doctrinam Ecclesiasticam attinent. Imò & argumenta plurima, quæ primitus fuerant velut compendiosè tradita, nunc stylo liberiore, novisque rationum & auctoritatum momentis fir-

firmata , latiùsque pertractata explicantur . Et quamvis in hoc Opere nihil aliud mihi propositum fuisset , quàm Clericorum , qui in Seminariis degunt , Institutio ad haurienda purioris Theologiæ præcepta : illa tamen omnia , quæ hac continentur Editione , ea rerum ubertate aucta , ea methodo conscripta sunt , ut studiis etiam eorum , qui ad gradus Theologicos in Academiis cupiunt promoveri , possint plurimùm subservire.



INDEX

I N D E X.

DISSERTATIO I. De <i>existentia & essentia Theologia.</i>	pag. 1.
DISSERTATIO II. De <i>objecto Theologia.</i>	5
DISSERTATIO III. De <i>proprietatibus Theologia.</i>	10
QUÆSTIO I. <i>Ad quem mentis habitum Theologia reducatur.</i>	ibid.
Caput I. <i>Vtrum Theologia sit scientia.</i>	11
Caput II. <i>Vtrum Theologia sit scientia speculativa, vel practica.</i>	15
Caput III. <i>Vtrum Theologia sit scientia subalternata scientia beatorum.</i>	18
Caput IV. <i>Vtrum Theologia sit sapientia.</i>	22
QUÆSTIO II. <i>Vtrum Theologia sit certior scientiis naturalibus.</i>	24
QUÆSTIO III. <i>Vtrum Theologia sit habitus supernaturalis.</i>	27
QUÆSTIO IV. <i>Vtrum Theologia sit necessaria.</i>	30
DISSERTATIO IV. De <i>Locis Theologicis.</i>	40
QUÆSTIO I. De <i>Scriptura Sacra.</i>	41
Caput I. De <i>veritate Sacra Scriptura.</i>	ibid.
Caput II. De <i>Scripturarum integritate.</i>	42
Caput III. De <i>Scripturarum authoritate.</i>	48
Caput IV. De <i>Scripturarum authore.</i>	52
Caput V. De <i>Scripturarum Canone.</i>	55
Articulus I. De <i>Canone Iudaorum.</i>	56
Articulus II. De <i>Canone Catholicorum.</i>	63

I N D E X.

- §. I. *Quinam libri semper fuerint in Canone Catholicorum.* ibid.
- §. II. *Quinam libri non semper fuerint in omnium Ecclesiarum Canone.* 65
- §. III. *Quinam libri jam sint in omnium Ecclesiarum Catholicarum Canone.* 69
- §. IV. *De Scripturarum Canone apud hereticos recepto.* 74
- §. V. *Solvuntur argumenta, quæ ab hæreticis obijciuntur adversus hodiernum Ecclesie Catholice Scripturarum Canonem.* 76.
- Caput VI. *De lingua, qua scripti sunt libri Canonici.* 79
- Articulus I. *Qua lingua à Prophetis & Apostolis scripti sint libri Canonici.* ibid.
- Articulus II. *Vtrum Ecclesia nunc habeat genuinos Prophetarum & Apostolorum textus.* 81
- Caput VII. *De Scripturarum versionibus.* 85
- Articulus I. *Quot olim fuerint veteris testamenti versiones Græcæ.* ibid.
- Articulus II. *De versione Septuaginta Interpretum.* 89
- §. I. *Explicantur, quæ spectant ad historiam versionis lxx. Interpretum.* 90
- §. II. *De autoritate versionis lxx. Interpretum.* 95
- Articulus III. *De versionibus Latinis.* 99
- §. I. *De Latinis Bibliorum versionibus antiquioribus.* 100
- §. II. *De Bibliorum versionibus latinis editis ab Hieronymo.* 101
- §. III. *De Bibliorum versionibus latinis editis* tis

I N D E X.

<i>tis elapso proximè sæculo.</i>	106
§.IV. <i>De vulgata versione latina.</i>	108
<i>De authore vulgatae versionis latina.</i>	ibid.
<i>Quam olim habuerit, & nunc habeat aucto- ritatem vulgata latina versio.</i>	112
<i>Explicatur Concilii Tridentini decretum circa vulgatae editionis authenticitatem.</i>	115
§. V. <i>De vernaculis bibliorum versionibus.</i>	120
Articulus IV. <i>Quid inferri debeat ex iis , quæ de textu hebraico, græco, vulgata edi- tione dicta sunt.</i>	123
Caput VIII. <i>De Scripturarum sensu.</i>	124
Articulus I. <i>De multiplici scripturarum sen- su in genere.</i>	125
Articulus II. <i>De sensu litterali.</i>	126
Articulus III. <i>De sensu mystico.</i>	128
Articulus IV. <i>De sensu accommodatio.</i>	131
Articulus V. <i>Ad quem spectat tradere ger- manum scripturae sensum.</i>	134
Caput IX. <i>De singulis in specie libris Cano- nicis.</i>	141
Articulus I. <i>Proponitur idea singulorum li- brorum veteris testamenti.</i>	ibid.
§.I. <i>De libris legalibus veteris testamenti.</i>	142
§.II. <i>De libris historicis veteris testamenti.</i>	143
§.III. <i>De libris sapientialibus veteris testa- menti.</i>	146
§.IV. <i>De libris prophetis veteris testamen- ti.</i>	147
Articulus II. <i>Proponitur idea singulorum li- brorum novi testamenti.</i>	152
§.I.	

I N D E X.

§.I. De quatuor Evangeliiis.	153
§.II. De Aëtibus Apostolorum.	154
§.III. De Canonicis Epistolis.	155
§.IV. De Apocalypsi.	160
QUÆSTIO II. De traditione.	161
Caput I. Vtrum sint aliqua traditiones divinae.	163
Caput II. Vtrum traditio sit locus, ex quo peti possit certum pro fide & moribus argumentum.	169
Caput III. De regulis, quibus divina traditio discernitur ab humana.	173
QUÆSTIO III. De Conciliis.	182
Caput I. De Conciliis in genere.	ibid.
Articulus I. Ad quem spectet Conciliorum convolutio.	183
Articulus II. Quinam ad Concilia vocari debeant.	196
Articulus III. Quis debeat praesse Conciliis.	203
Articulus IV. De Conciliorum auctoritate.	213
Solvuntur, quae contra Conciliorum infallibilitatem ex Scriptura & Patribus obijciuntur.	218
Solvuntur, quae obijciuntur ex Concilio Iudeorum adversus Christum.	220
Solvuntur argumenta petita ex Apostolicis, ac Eliberitanis Canonibus.	221
Solvitur argumentum petitum ex Ephesino II. Concilio.	223
Solvitur argumentum desumptum ex Concilio Ariminese.	224
Solvitur argumentum petitum ex sexto generali Concilio.	226
Tom. I.	B Sol-

I N D E X.

<i>Solvitur argumentum petatum ex septimo Concilio generali .</i>	233
<i>Solvitur argumentum petatum ex personis, ex quibus constant Concilia .</i>	234
<i>Articulus V. Vtrum Concilia sint Ecclesie necessaria .</i>	235
<i>Caput II. De Conciliis generalibus in specie .</i>	243
<i>Articulus I. De Concilio Nicano I.</i>	ibid.
<i>§.I. De tempore & Episcopis Concilii Nicani I.</i>	244
<i>§.II. De causa Nicani I. Concilii.</i>	245
<i>§.III. Quid definitum fuerit in Concilio Nicano I.</i>	248
<i>§.IV. An omnes, qui Nicana synodo adfuerant, ipsi subscripserint .</i>	249
<i>§.V. De Canonibus Nicanis .</i>	251
<i>De numero & auctoritate Canonum Nicenorum .</i>	ibid.
<i>Explicantur Nicani Canones .</i>	253
<i>Articulus II. De Concilio Constantinopolitano I.</i>	267
<i>§.I. De causa Constantinopolitani I. Concilii .</i>	268
<i>§.II. Quid definierit Concilium Constantinopolitanum I.</i>	269
<i>§.III. De Canonibus Concilii Constantinopolitani I.</i>	270
<i>§.IV. Vtrum Concilium Constantinopolitanum I. sit Concilium generale .</i>	273
<i>Articulus III. De Concilio Ephesino I.</i>	274
<i>§.I. De causa Concilii Ephesini I.</i>	ibid.
<i>§.II. De convocatione & praside Ephesini I. Concilii .</i>	275
<i>§.III. Vtrum Concilium Ephesinum I. haberi</i>	ri

I N D E X.

<i>ri debeat pro Concilio generali.</i>	277
§.IV. <i>De Canonibus Ephesini I. Concilii.</i>	279
Articulus IV. <i>De Chalcedonensi Concilio.</i>	280
§.I. <i>De causa Concilii Chalcedonensis.</i>	ibid.
§.II. <i>De actis Concilii Chalcedonensis.</i>	282
§.III. <i>De Canonibus Concilii Chalcedonensis.</i>	284
Articulus V. <i>De Concilio Constantinopolitano II.</i>	285
§.I. <i>De causa Concilii Constantinopolitani II.</i>	286
§.II. <i>De actis Concilii Constantinopolitani II.</i>	288
§.III. <i>De convocatione & preside Concilii Constantinopolitani II.</i>	290
§.IV. <i>De auctoritate Concilii Constantinopolitani II.</i>	291
Articulus VI. <i>De Concilio Constantinopolitano III.</i>	293
§.I. <i>De causa Concilii Constantinopolitani III.</i>	294
§.II. <i>De iis, quæ acta sunt in Concilio Constantinopolitano III.</i>	297
§.III. <i>De convocatione & preside Concilii Constantinopolitani III.</i>	299
Articulus VI. <i>De Concilio Nicæno II.</i>	301
§.I. <i>De causa Concilii Nicæni II.</i>	ibid.
§.II. <i>De actis Concilii Nicæni II.</i>	304
§.III. <i>De Canonibus Concilii Nicæni II.</i>	306
§.IV. <i>De convocatione & preside Concilii Nicæni II.</i>	307

I N D E X.

Articulus VIII. <i>De Concilio Constantinopolitano IV.</i>	308
§.I. <i>De causa Concilii Constantinopolitani IV.</i>	ibid.
§.II. <i>De actis Concilii Constantinopolitani IV.</i>	310
§.III. <i>De Canonibus Concilii Constantinopolitani IV.</i>	314
§.IV. <i>De convocatione & præsede Concilii Constantinopolitani IV.</i>	319
Articulus IX. <i>De Concilio Lateranensi I.</i>	321
§.I. <i>De causa, convocatione, & præsede Concilii Lateranensis I.</i>	ibid.
§.II. <i>De actis & Canonibus Concilii Lateranensis I.</i>	323
Articulus X. <i>De Concilio Lateranensi II.</i>	326
§.I. <i>De causa & actis Concilii Lateranensis II.</i>	327
§.II. <i>De Canonibus Concilii Lateranensis II.</i>	328
Articulus XI. <i>De Concilio Lateranensi III.</i>	332
§.I. <i>De causa Concilii Lateranensis III.</i>	333
§.II. <i>De Canonibus Concilii Lateranensis III.</i>	335
Articulus XII. <i>De Concilio Lateranensi IV.</i>	340
§.I. <i>De causa & actis Concilii Lateranensis IV.</i>	341
§.II. <i>De Canonibus, seu capitulis. Concilii Lateranensis IV.</i>	342
Articulus XIII. <i>De Concilio Lugdunensi I.</i>	346
§.I.	

I N D E X.

- §.I. *De causa, actis, & Canonibus Concilii Lugdunensis I.* ibid.
- §.II. *De Canonibus, convocatione, & praeside Concilii Lugdunensis I.* 349
- Articulus IV. *De Concilio Lugdunensi II.* 350
- §.I. *De causa, convocatione, praeside Concilii Lugdunensis II.* ibid.
- §.II. *De actis, & Canonibus Concilii Lugdunensis II.* 351
- Articulus XV. *De Concilio Viennensi.* 354
- Articulus XVI. *De Concilio Constantiensi.* 357
- §.I. *De convocatione, ac praeside Concilii Constantiensis.* 358
- §.II. *De causa Concilii Constantiensis.* ibid.
- §.III. *De actis Concilii Constantiensis.* 361
- §.IV. *Virum Concilium Constantiense sit œcumenicum.* 364
- Articulus XVII. *De Concilio Basileensi.* 366
- §.I. *De causa & actis Concilii Basileensis.* ibid.
- §.II. *Virum Concilium Basileense sit œcumenicum.* 370
- Articulus XVIII. *De Concilio Florentino.* 377
- §. I. *De causa & actis Concilii Florentini.* 378
- §.II. *De iis, quæ Florentinum synodum subsequuta sunt.* 383
- §.III. *Virum Concilium Florentinum sit œcumenicum.* 386

Articulus XIX. *De Concilio Tridentino .*

389	
§. I. <i>De causa Concilii Tridentini .</i>	ibid.
§. II. <i>De actis Concilii Tridentini .</i>	392
<i>De actis sessionum I. II. III. & IV. .</i>	ibid.
<i>De actis sessionis V. .</i>	393
<i>De actis sessionis VI. .</i>	396
<i>De actis sessionis VII. .</i>	402
<i>De actis sessionum VIII. IX. X. XI. XII. .</i>	
<i>& XIII. .</i>	408
<i>De actis sessionis XIV. .</i>	412
<i>De actis sessionis XV. .</i>	419
<i>De actis sessionis XXI. .</i>	ibid.
<i>De actis sessionis XXII. .</i>	422
<i>De actis sessionis XXIII. .</i>	428
<i>De actis sessionis XXIV. .</i>	433
<i>De actis sessionis XXV. .</i>	439
§. III. <i>Vtrum Concilium Tridentinum sit</i> <i>Concilium Oecumenicum .</i>	448
QUÆSTIO IV. <i>De Ecclesia .</i>	455
Caput I. <i>De nomine Ecclesie .</i>	ibid.
Caput II. <i>De essentia Ecclesie .</i>	456
Caput III. <i>De membris Ecclesie .</i>	459
Articulus I. <i>Vtrum soli prædestinati sint Ec-</i> <i>clesie membra .</i>	460
Articulus II. <i>Vtrum soli baptizati sint in Ec-</i> <i>clesia .</i>	465
Articulus III. <i>Vtrum vera Ecclesia ex solis</i> <i>justis constet .</i>	466
Articulus IV. <i>Vtrum publici heretici , ma-</i> <i>nifesti schismatici sint in Ecclesia .</i>	473
Caput IV. <i>De notis Ecclesie .</i>	490
Articulus I. <i>De unitate Ecclesie .</i>	ibid.
Articulus II. <i>De sanctitate Ecclesie .</i>	495
Articulus III. <i>De Catholicitate Ecclesie .</i>	501
Ar-	

I N D E X.

Articulus IV. *De Apostolicitate Ecclesie.* 508

Caput V. *De proprietatibus Ecclesie.* 520

Articulus I. *De visibilitate Ecclesie.* ibid.

Articulus II. *De indefectibilitate Ecclesie.* 524

Articulus III. *De Ecclesia infallibilitate.* 530

QUÆSTIO V. *De Romano Pontifice.* 534

Caput I. *Vtrum & quo jure Romanus Pontifex primatum habeat in Ecclesia.* ibid.

Caput II. *Vtrum Romani Pontificis judicium sit locus theologicus.* 549

QUÆSTIO VI. *De Episcopis* 552

QUÆSTIO VII. *De auctoritate Patrum.* 556

Caput I. *De auctoritate unius, plurium, omnium Patrum.* 557

Caput II. *De cautionibus in legendis, aut laudandis Patribus, adhibendis.* 561

QUÆSTIO VIII. *De auctoritate scholasticorum.* 564

QUÆSTIO IX. *De historia humana.* 568

QUÆSTIO X. *De ratione naturali.* 572

DISSERTATIO V. *De propositionum censuris.* 579

QUÆSTIO I. *De propositione hæretica.* 581

QUÆSTIO II. *De propositione erronea.* 584

QUÆSTIO III. *De propositionibus scandalosa & blasphema.* 587

QUÆSTIO IV. *De propositionibus male sonante, & piarum aurium offensiva.* 589

QUÆSTIO V. *De propositionibus temera-*

I N D E X.

<i>ria, & seditiosa.</i>	590
QUÆSTIO VI. <i>De propositionibus suspecta de heresi, sapiente heresim, heresi proxi- ma.</i>	593
QUÆSTIO VII. <i>De propositionibus improba- bili, & damnabili.</i>	596
DISSERTATIO VI. <i>De Theologiae par- tibus.</i>	599



Approbatio DD. PIROT , Doct̃oris Sorbonici , Ecclesiæ & Academiæ Parisiensis Cancellarii , & Eminentissimi Cardinalis DE NOAILLES Archiepiscopi Parisiensis , in spiritualibus & temporalibus Vicarii Generalis .

HAs Theologicas Institutiones , à viro peritissimo & divinis in litteris summe exercitato compositas , antehac tum cum primū editæ sunt , accuratè legimus , magnoque eas rerum sacrarum studiosis adjumento esse posse censuimus : nec nostra nos fefellit opinio . Has ipsas denuò edendas recens non parum auctas , novoque imprimis de locis Theologicis tractatu instar præmii apposito illustratas , iterum ex officio evolvimus , fidemque facere possumus , majorem iis ex additione lucem , roburque majus accessisse . Eas speramus in adibus Clero informando institutis , ad quarum potissimum commodum , ut ipsa præferebat operis inscriptio , sunt elaboratæ , fore plurimum utiles . In Sorbona die Augusti prima anni millesimi septingentesimi .

PIROT .

NOI RIFORMATORI

Dello Studio di Padova.

HAvendo veduto per la fede di revisione, & approvatione del Padre Fr. Raimondo Asperti Inquisitore, nel Libro intitolato : *Institutiones Theologicae ad usum Seminariorum*, Auctore Gaspare Iuenin, Oratorii Gallicani Presbytero, non vi essere cos'alcuna contro la Santa Fede Cattolica, e parimente per attestato del Segretario nostro, niente contro Principi, e buoni costumi, concedemo licenza à Paolo Baglioni, che possi esser stampato, osservando gl'ordini in materia di Stampe, e presentando le solite copie alle pubbliche Librarie di Venezia, e di Padova.

Dat. 26. Luglio 1703.

(Ferigo Marcello Proc. Rifor.

(

(Martin Zorzi Rifor.

Agostino Gadaldini Segr.

IN-



INSTITUTIONES
THEOLOGICÆ
AD USUM
SEMINARIORUM.

PROLEGOMENA.



Æc Prolegomena non levis sunt momenti; nempe in eis differitur de Existentiâ, Essentiâ, Objecto, Proprietatibus, Locis, & Divisione Theologiæ.



DISSERTATIO PRIMA.

De Existentiâ & Essentiâ Theologiæ.

Not. 1. **T**heologia secundum nominis etymologiam idem est ac sermo de Deo: nam Θεός Deum, & λόγος sermonem, latine significat.

Not. 2. Qui de Deo est sermo, vel solo lumine naturali nititur, vel habetur ex simplici & nudâ revelatione, vel per discursum ex revelatione deducitur. Si primum, ille sermo dicitur theologia naturalis; ejusmodi verò fuit imper-

2 Instit. Theolog. Prolegomena.

fecta Dei, rerumque divinarum cognitio, quam nonnulli philosophi gentiles olim compararunt, & nunc etiam comparant metaphysici. Si secundum, ille de Deo sermo, est virtus theologica quæ fides dicitur; nempe per fidem mens adhæret alicui veritati propter authoritatem Dei revelantis. Si tertium, idem ille sermo est habitus, qui simpliciter & sine addito theologia nuncupatur.

Not. 3. Certum est, existere theologiam sumptam duplici priore sensu. Et quidem primò existit theologia sumpta pro cognitione Dei, quæ solo rationis lumine comparatur, ut patet in metaphysicis; patet etiam ex Apostolo, qui ad Romanos scribens, asserit, veteres philosophos Deum ex creaturis cognovisse, ob idque fuisse reos, quòd sic cognito debitum cultum non exhibuerint: *Cum, inquit, cognovissent Deum, non sicut Deum glorificaverunt, aut gratias egerunt.* Existit secundò theologia sumpta pro cognitione Dei ex simplici revelatione: quippè innumeri sunt homines catholici, ac proinde qui articulis de personarum trinitate in divinis, & de incarnationis mysterio adhærent propter solam authoritatem Dei revelantis: igitur difficultas potest esse tantum de theologiâ sumptâ in tertio sensu, seu, prout est cognitio conclusionum quæ ex veritatibus expressè revelatis eliciuntur.

CONCLUSIO I. Existit theologia sumpta pro disciplinâ, quæ ex veritatibus expressè revelatis infert alias, quæ non sunt expressè revelatæ.

Probatur 1. Existit ea disciplina, quâ Patres olim usi sunt: Atqui eâ, de quâ est quæstio, olim usi sunt, ut videre est in Athanasio, Hilario, qui ex eo quòd Verbum in scripturis appelletur Deus, dicatur omnia operari cum patre, unigenitus illius filius, & ex aliis ejusmodi locis intulerunt contra Arianos, ipsum esse consubstantialia æternò Patri. Videre est etiam in Augustino aliisque

La-

Latinis Patribus, qui tum ex hac petitione orationis Dominicæ: *Fiat voluntas tua*, tum ex aliis Ecclesiæ precibus, tum ex his Christi verbis apud Joannem, *Sine me nihil potestis facere*, concluderunt contra Pelagianos, gratiam esse necessariam ad singulos pietatis actus, ad ipsum etiam initium fidei. Videre est iterum in Cyrillo Alexandrino, qui ex eo quod Christus in Euangelio tribuat sibi, quæcumque Verbo divino propria sunt, colligit contra Nestorium, unam tantum esse in ipso personam, ac Mariam Virginem verè ac propriè esse Deiparam. Videre est pariter in Leone Magno, qui in Epistolâ ad Flavianum, tum ex passionibus humanis quas scriptura tribuit Christo, tum ex miraculis aliisque ejusmodi locis concludit contra Euthicem, duas post unionem hypostaticam naturas à se invicem distinctas in Christo remansisse. Videre est quoque in Patribus sexti Concilii generalis, qui ex eo quod tum Scriptura, tum Traditio expressè definiant, Christum esse Deum simul & hominem, contra Monothelitas concluderunt, esse duplicem in Christo voluntatem, divinam nimirum & humanam. Videre est tandem in Patribus Tridentinæ synodi, qui ex Scripturæ locis qui actibus fidei, spei & charitatis expressè adscribunt influxum in impii justificationem, concluderunt contra Lutheranos, impium iis actibus disponi ad recipiendam gratiam sanctificantem, ex quâ per peccatum exciderat.

Probatur 2. Existit disciplina quam adhibent hodierni theologi, ut conclusiones eliciant ex veritatibus quæ expressè, aut in scripturâ, aut in traditione revelatæ sunt; quæ quidem conclusiones in eo differunt ab iis quæ mox in prior probatione relatæ sunt, quod Ecclesia nondum expressio aliquo decreto definierit, eas rectè ac necessariò inferri aut ex scriptura, aut ex traditione; exempli gratiâ, quod hominis dependentia, quæ in scripturis asseritur, importet necessitatem.

4 Instit. Theolog. Prolegomena.

fitatem auxilii physicè voluntatem determinantis ad quævis, tum naturalia, tum supernaturalia pietatis opera: quòd locus de dilectione, quâ Deus in Scripturis dicitur persecutus fuisse Jacob, antequam aliquid boni aut mali egisset, gratuitam prædestinationem ad gloriam importet necessariò: quòd ex præcepto de Deo diligendo ex toto corde, ex totâ animâ, ex totis viribus, sequatur necessariò debitum naturale referendi ad Deum omnes omninò actiones deliberatas. Atqui ea disciplina est theologia propriè dicta: ergo reverà existit.

Iis de theologiæ existentia præmissis, agendum est de illius essentia, seu, proferenda est definitio, in quâ contineatur; quippè docent logici, definitionem explicare rei definitæ essentiam per genus & differentiam.

CONCLUSIO 2. Theologia rectè definitur habitus mentis, quo cognoscuntur res divinæ, quæ ex revelatis, sive mediatè, sive immediatè deducuntur.

Probatur, ac simul explicatur mox data definitio. Theologia 1. per hæc verba, *Habitus mentis quo cognoscuntur res divinæ*, convenit, tum cum metaphysicâ, tum cum fide: utraque nimirum versatur circa res divinas: 2. Per hæc alia, *Quæ ex revelatis deducuntur*, differt & à metaphysicâ & à fide: nam metaphysica agit de rebus divinis, prout lumine naturali cognosci possunt, ut sunt Dei existentia, nonnullaque illius attributa; fides verò versatur circa res expressè revelatas, & quidem sine discursu: nempe fides est mera ac simplex adhæsiō revelatis. 3. Hæc alia verba, *Deducuntur sive mediatè, sive immediatè*, ideò addita sunt, quòd ad conclusionem theologicam non requiratur, ut præmissæ, ex quibus infertur, sint immediatè & explicitè revelatæ; sed sufficit, ut ex revelatis deductæ sint, aut saltem ex unâ revelatâ: seu, satis est ad theologicam conclusionem, ut una

ex

ex præmissis ultimatè resolvatur in fidem, hoc est, articulum immediatè & explicitè revelatum.



DISSERTATIO SECUNDA.

De Objecto Theologiae.

Not. I. **O**bjectum, ex logicis, duplex est; materiale, & formale. Materiale est res ipsa, circa quam potentia aut habitus versantur: formale verò est forma, seu, formalitas, quam potentia aut habitus attingunt in objecto materiali; v. g. paries est objectum materiale visionis, formale est parietis color. Hinc patet, quòd materiale per se & ratione sui non attingatur, sed tantum ratione objecti formalis.

Not. 2. In quolibet habitu præter objectum, tum materiale, tum formale, reperitur motivum, seu medium, per quod attingit objectum sibi proprium; sic autoritas Dei revelantis est motivum assensus quem fides præbet revelatis: sic lux est medium, per quod visus attingit colorem. Illud verò motivum, illud medium à scholasticis vocari solet objectum formale quo.

Not. 3. Veritas aliqua dupliciter dici potest revelata. Primò explicitè & immediatè, hoc est, in se ipsâ: sic revelatum est, quòd Deus sit trinus in personis, quòd Christus verè sit homo: secundò implicitè & mediatè; cum nimirum ex aliâ explicitè & immediatè revelatâ deducitur, sicut ex istâ propositione: *Christus est homo*, hæc alia concluditur: *Ergo Christus habet humanam voluntatem*.

Iis, quæ mox observata sunt, præmissis, ea omnia quæ pertinent ad objectum theologiæ, tribus conclusionibus expendenda sunt.

CONCLUSIO I. Objectum materiale theologiæ

6 **Instit. Theolog. Prolegomena.**
logiæ sunt Deus ipse, & res quæ ad Deum aliquo modo referuntur.

Probatur. Ex observatis, objectum materiale alicujus disciplinæ est res illa, de quâ agit: Atqui theologia agit de Deo, ut fert ipsa nominis etymologia, agit quoque de iis quæ ad Deum referuntur, vel tanquam effectus ad causam, ut angelus, homo, aliæque creaturæ; aut tanquam medium ad finem, ut sunt actus humani, aut tanquam instrumentum, animatum quidem & præcipuum, sicut est Christus ad hominis lapsi sanctificationem, vel inanimatum, ut sunt Sacramenta, per quæ gratia sanctificans producit.

CONCLUSIO 2. Objectum formale theologiæ est ipsa divinitas.

Probatur. Ex dictis, objectum formale est forma seu ratio, quam habitus primò & per se quærit & attingit in objecto materiali: sic debita in actibus humanis rectitudo, idè est objectum formale disciplinæ moralis, quòd primò & per se à morali disciplinâ quærat. Atqui ipsa divinitas sic se habet respectu theologiæ; nempe divinitatem quærit, tum in Deo considerato in se, hoc est, prout est unus & trinus, tum considerato extra se, seu, prout est aut creator, aut ultimus finis, aut reparator creaturæ rationalis; idè de creaturis agit, quòd sint quædam participatio divinitatis; ideo de Sacramentis tractat, quòd quidpiam divinum, sed participatum contineant; idè tandem differit de multis rebus quæ non sunt Deus ipse, quòd ad divinitatis cognitionem, quam ex primario suo fine quærit, nonnihil conferant.

CONCLUSIO 3. Medium per quod theologia attingit suum objectum formale, seu, ipsam divinitatem, hoc est, prout scholastici loquuntur, objectum formale *quo* theologiæ, est virtualis & mediata revelatio.

Probatur. Ex iis quæ observata sunt, illud est

Differt.II. *De Objecto Theologiæ.* 7

est medium, motivum, objectum formale quo, per quod disciplina attingit objectum, tum materiale, tum formale, circa quod versatur: Atqui theologia attingit suum objectum, tum materiale, tum formale, per virtuales & mediatam revelationem; siquidem attingit utrumque quatenus habet connexionem cum iis quæ immediatè & explicitè revelata sunt, seu, quatenus ex iis per legitimam ratiocinationem deducitur; nempe, ut præcedenti quæstione dictum est, per id solum à fide & metaphysicâ discrepat. Sed connexio illa, ea deducibilitas nihil sunt aliud quàm virtualis, quàm implicita, quàm mediatæ revelatio; nam quod ex explicitè & immediatè revelatis legitimè deducitur, in iis virtualiter, seu, tanquam in causâ, continetur.

Confirmatur argumentum ex Epiphanio, qui Hæresi 31. asserit, quòd theologia *expoliat ac explicet, quæ enigmatum quibusdam involucris obsecta sunt, & ad commune fidei institutum accommodet.*

Objicies 1. Deus nullo modo est objectum theologiæ: nam illud non est objectum alicujus disciplinæ, cujus existentia illi non præsupponitur: Atqui existentia Dei non præsupponitur theologiæ; nempe illud non præsupponitur theologiæ, quod ab eâ demonstratur: Sed existentia Dei demonstratur à theologiâ: ergo nullo modo est illius objectum.

Resp. 1. dist. min. Existentia Dei tanquam authoris naturæ, non præsupponitur theologiæ, transeat minor; tanquam authoris gratiæ, secundum quam rationem pertinet ad theologiam, neg. min. Nempe theologia supponit suum principium, hoc est, fidem, quæ simpliciter ac sine ullâ prorsus probatione credit existentiam Dei tanquam authoris supernaturalis.

Resp. 2. neg. simpliciter & absolutè minorem propositionem. Ad ejus verò probationem resp. dist. min. Existentiâ Dei à theologiâ demon-

8 Instit. Theolog. Prolegomena.

monstratur per medium sibi extrinsecum, conc. min. per medium sibi intrinsecum, neg. min. Theologia non ex propriis principiis, sed ex principiis metaphysicæ, seu, effectibus creatis & rationibus ordinis naturalis, demonstrat Dei existentiam; non verò ex principiis sibi intrinsecis, seu, ex fide: nihil autem impedit, quin aliqua disciplina existentiam sui objecti probeat ex alienis principiis; nec inde sequitur, quòd objectum illud sit posterius disciplinâ quæ circa illud versatur.

Objicies 2. Nulla omninò res, alia à Deo, est objectum theologiæ: Si quæ enim alia esset, illius objectum, esset maximè Verbi incarnatio: Atqui incarnatio Verbi non est objectum theologiæ; siquidem Patres theologiam apponunt disciplinæ quæ tractat de Incarnatione, aut rebus aliis quæ non sunt Deus ipse, quamvis ad eum tanquam ad causam efficientem, aut tanquam ad finem ultimum referantur: Nè (ait Basiliius ep. 141.) *in theologiam, id est in ea quæ divinitatis propria sunt, intenti, Assumptiois mysterium contemnimus*. Eòdem spectat hæc verba Cyrilli Alexandrini in hanc sententiam: *In propria venit, quæ Joannis 1. legitur: Valdè appositè ad sermonem de incarnatione progreditur, ac subinde transit à mera theologia ad explicandam dispensationem Incarnationis, quam propter nos gessit filius*. Hinc constat, cur Patres solum ex quatuor Evangelistis Joannem appellarerint theologum; id nimirum ideo factum est, quòd Joannes filii divinitatem apertè expresse, quam reliqui non adeò disertè declararunt.

Resp. 1. dist. hanc propositionem, Patres theologiam sumptam extrinsecè ex vi nominis, seu secundum etymologiam, opponunt disciplinæ quæ tractat de Verbi incarnatione, conc. sumptam intrinsecè, seu, secundum suam naturam, neg.

Resp. 2. Patres locis quæ objecta sunt, sumere vocem hanc *Theologia*, secundum præcipuam illius

Differt.II. *De Objecto Theologiae.* 9

Ius partem, secundum quam haud dubie agit de solo Deo in se sumpto; non sumere verò secundum partes minus præcipuas quas complectitur.

Objicies 3. Mediata, virtualis, implicita revelatio, non est motivum, medium, seu (ut loquuntur logici) objectum formale quo theologiae: nam objectum formale quo debet esse ita specificum, hoc est, ita proprium, ut nulli alteri disciplinæ conveniat; quippè per illud essentialiter differre debet à quavis aliâ disciplinâ: Atqui mediata, virtualis, implicita revelatio non est hujusmodi: scilicet convenit fidei; nam ideo fides adhæret his articulis: *Verbum divinum est consubstantialia patri, Christus habet humanam & divinam voluntatem*, quod contineantur in aliis articulis immediate & expresse revelatis.

Resp. dist. hanc propositionem: Ideò fides adhæret iis articulis, quòd sint revelati, abstrahendo, an sint implicitè, aut explicitè revelati, conc. præcisè quòd mediatè, implicitè, sint revelati, neg. Fides per se non curat de mediatâ, aut immediatâ revelatione; nimirum ut præbeat consensum, satis est, ut certa sit Deum aliquem articulum revelasse. Hinc patet, articulos de consubstantialitate Verbi cum Patre, de duplici voluntate in Christo, esse conclusiones theologicas & simul articulos fidei in theologo catholico, simplices verò articulos fidei in catholico qui theologiam nescierit: nempe in isto non perpenduntur, prout contenti in aliis articulis, secus autem ab illo.



DISSERTATIO TERTIA.

De Proprietatibus Theologiae.

QUæremus hîc 1. ad quem mentis habitum theologia reducatur : 2. an sit certior aliis omnibus disciplinis : 3. utrùm sit supernaturalis : 4. utrùm sit necessaria.

Q U Æ S T I O P R I M A.

*Ad quem mentis habitum theologia
reducatur.*

Not. I. **E**X logicis, quinque sunt mentis habitus, Intelligentia, Sapientia, Scientia, Prudentia & Ars. Intelligentia versatur circa prima principia, & quidem absque discursu ; hinc illa duo : *Quodlibet est, vel non est . Bonum est amandum, & malum est fugiendum ;* sunt objectum intelligentiæ. Sapientia agit de rebus, non quidem per proximas earum causas, sed per altissimas & remotiores: sic rex dicitur sapiens, quòd in latis à se decretis præcipuè attendat ad altiores, & remotiores causas, ut sunt Reipublicæ splendor, ac tranquillitas; non attendat autem ad proximiores, ut sunt bonum, vel quies hujus, aut illius civis in particulari. Scientia (ut à philosophis sumitur) est cognitio certa & evidens per discursum comparata ex causis proximis. Prudentia versatur circa ea, quæ hîc & nunc, hoc est, in particularibus circumstantiis, agenda sunt; v. gr. an habito respectu præsentis rerum status, bellum in hostes moveri debeat, an verò paci studendum sit. Ars est de facti-

Differt.III.*De Proprietatib.Theol.* 11

ctibilibus, seu de operibus, quæ per potentias extrinsecas, ut sunt manus, pedes, fieri solent.

Not.2. Certum est, theologiam non esse artem, cum non versetur circa factibilia; nec prudentiam, cum non tractet de iis, quæ in particularibus circumstantiis agenda sunt; nec intelligentiam, cum non sit cognitio primorum principiorum, hoc est, quæ lumine naturali, & sine discursu cuique nota sunt: Itaque expendendum superest 1. an sit scientia: 2. qualis sit scientia: 3. an sit quoque sapientia.

C A P V T I.

Vtrum Theologia sit scientia.

CONCL. **T**heologia est vera scientia.

Probatur 1. Theologia est una ex quinque virtutibus intellectus, cum hominem inclinet, tum ad cognitionem veri, tum ad boni praxim: Sed (ut patet ex dictis) theologia nec est intelligentia, nec ars, nec prudentia: ergo est aut sapientia, aut scientia. Si autem est sapientia, erit quoque scientia, cum (ut inferius observabitur) sapientia propriè dicta sit etiam vera scientia.

Probatur 2. Theologia potest considerari, vel in beatis, vel in viatoribus: Atqui in utroq; illo statu est vera scientia: Et quidem 1. in beatis, cum ex iis, quæ clarè vident in Verbo, & quæ nos viatores credimus, alia concludant; unde in eo statu tum conclusiones theologicæ, tum eorum principia sunt certa, & evidentia: 2. in viatoribus est evidentia consequentiæ, seu theologi viatores clarè vident, conclusiones, quas inferunt ex articulis revelatis, certò ac necessariò ex eis sequi. In iisdem viatoribus est quoque summa certitudo consequentis, seu conclusionum, quas ex revelatis necessariò sequi judicant: nec mirum; nam in viatoribus summa repe-

12 Instit. Theolog. Prolegomena.

reperitur certitudo principiorum, ex quibus conclusiones theologicæ deducuntur. Unde sic conficitur argumentum. Ad scientiam propriè dictam hæc duo sufficiunt, evidentia consequentiæ, seu connexionis, quam cōclusio habet cum suis principiis, & certitudo consequentis, seu veritatis, quæ ex principiis infertur: Atqui illa duo reperiuntur in theologis viatoribus, ac proindè theologia in eis vera est, ac propriè dicta scientia.

Objicies 1. Scientia, ex Aristotele, est cognitio certa, & evidens, comparata per discursum: Atqui theologia non est ejusmodi in hominibus viatoribus; siquidem est obscura cognitio; quod quidem sic ostenditur: Ea cognitio est obscura, quæ sequitur ex aliquo principio obscuro, quia (ut fert logicorum axioma) conclusio semper sequitur debiliorem partem; hoc est, si una ex præmissis alicujus syllogismi est, aut dubia, aut obscura, conclusio erit etiam, aut dubia, aut obscura; idque continget etiam, ubi altera ex præmissis erit certa & evidens: Atqui theologia in hominibus viatoribus sequitur semper ex aliquo principio obscuro; nam theologia est quoddam aggregatum conclusionum, quæ ex fide, quam sciunt omnes obscuram esse cognitionem, deducuntur.

Respondent nonnulli post S. Thomam 1. p. q. 1. art. 1. distinguendo majorem. Scientia est cognitio certa & evidens, aut in se, aut in superiore scientiâ, concedunt maj. in se tantum, negant majorem. Distinguunt similiter minorem: Atqui theologia, quæ est in hominibus viatoribus, non est ejusmodi; hoc est, non est evidens in se, concedunt minorem, non est evidens in scientiâ superiore, negant minorem. Nempè illi scholastici contendunt, theologiam viatorum esse evidentem in beatorum theologiâ, quæ quidem superior est theologiâ viatorum. Nec mirum, inquit, cum beati clarè videant in Verbo Principia, veritates nimirum revelatas, quas via-

to-

tores credunt, & ex quibus inferunt suas conclusiones: Ad scientiam autem propriè dictam, satis est (inquiunt illi theologi) ut illius principia à superiore aliquâ scientiâ evidenter cognoscantur: probant, & simul suam responsionem illustrent argumento à simili. Optica, inquiunt, & musica sunt scientiæ propriè dictæ, quamvis optici principia in geometriâ tantum, & principia musicæ in arithmeticâ tantum evidentiâ sint.

Verum licet ea responsio probet theologiam in se sumptam, hoc est, abstrahendo à subjecto, in quo reperitur, esse scientiam, non probat tamen esse scientiam in viatoribus; sicut musica non est scientia in eo, qui non callet arithmeticam.

Respondent ad idem argumentum alii theologi, quibus subscribimus, dist. maj. Scientia, quæ sequitur ex principiis ordinis naturalis, qualem Aristoteles definiit, debet esse cognitio evidens, conc. maj. quæ sequitur ex principiis fidei, ut reverà ex iis sequitur theologia viatorum, neg. maj. Ideò scientia, quæ sequitur ex principiis ordinis naturalis, debet esse evidens, quòd alioquin non habitura sit certitudinem; nam certitudo scientiæ petitur ex certitudine, quæ habetur de principiis; nulla autem habetur certitudo de principiis ordinis naturalis, nisi illa principia sint evidentiâ. E contra theologia de suis principiis, propter Dei revelantis auctoritatem, quâ nituntur, certissima est, quamvis ea principia evidenter non cognoscat.

Confirmatur mox data responsio ex eo, quòd ideò in sciente requiritur evidentiâ, quòd necesse sit, ut sit imperturbabilis & immobilis in suâ scientiâ: Atqui theologus propter certitudinem, quam habet de suis principiis, est prorsus imperturbabilis & immobilis in suâ scientiâ, seu in conclusione, quam clarè videt sequi ex fidei principiis: *Habet nimirum fidei* (Augustino teste epist. 222.) *oculos suos, quibus quodam modo videt verum esse, quod nondum videt, & quibus*

14 Instit. Theolog. Prolegomena.

bus certissimè videt, nondum se videre, quod credit.

Objicies 2. Habitus, qui versatur circa singularia, non potest esse scientia, eò quòd objectum scientiæ debeat esse immutabile, sicut ipsa scientia est immutabilis : Atqui theologia versatur circa singularia, ut sunt Christi conceptio in utero B. Virginis Mariæ, Incarnatio Verbi, aliaque plurima facta, quæ theologia ex articulis explicitè revelatis colligit : ergo, &c.

Resp. dist. maj. Si illa singularia non subsint divinæ revelationi, conc. maj. si illi subsint, neg. maj. Ratio est, quia revelatio tribuit theologo summam certitudinem respectu rerum singularium ; eam verò certitudinem non tribuunt philosopho, aut cuivis alteri scienti, principia lumine naturali cognita ; nec enim ea principia sunt de rebus singularibus, ac contingentibus, sed tantum de universalibus & necessariis.

Objicies 3. Tritum est apud philosophos & theologos axioma : *Quòd de eadem veritate simul esse non possint fides & scientia.* Atqui falsum esset illud axioma, si theologia esset scientia propriè dicta ; nam hæc propositio : *Christus habet humanam voluntatem*, est conclusio theologica deducta ex hoc articulo immediatè revelato : *Christus est homo* ; ac proindè est conclusio scientifica : est etiam articulus fidei expressè definitus in sextâ generali synodo, quæ habita est contra Monothelitas.

Resp. dist. maj. Scientia, quæ sit evidens, non potest esse simul cum fide, conc. maj. nam obscuritas fidei tolleretur per evidentiam scientiæ : Scientia, quæ sit obscura, non potest esse cum fide, neg. maj. Ratio est, quia scientia certa & obscura (qualem supponimus esse theologiam) nihil habet, quod sit oppositum certitudini, & obscuritati fidei.

C A P U T II.

Utrum Theologia sit scientia speculativa, vel practica.

Not.I. **S**cientia, alia est merè speculativa, alia merè practica, alia partim speculativa, & partim practica. Prior (ut aiunt logici) sistit in contemplatione sui objecti; altera ordinatur ad operationem; tertia præter objecti sui speculationem, voluntatem dirigit ad operandum.

CONCLUSIO. Theologia est scientia speculativa simul, & practica.

Probatur 1. Theologia est speculativa; nempe sistit planè in contemplatione sui objecti primarii, quod est Deus, unus in naturâ, & trinus in personis: neque enim aliud, quàm divinæ naturæ, & divinarum personarum cognitionem sibi proponit: est 2. practica, cum hominis voluntatem dirigat, ac inclinet ad praxim: actibus nimirum humanis præscribit regulas, quibus creatura rationalis ad Dei ultimi finis possessionem pervenire possit.

Confirmatur 1. Theologia (ut infrà dicetur) cæteris omnibus scientiis præeminet; ac proinde earum vim, ac officia eminenti quodam modo complectitur; quæ enim (aiunt phycici) in inferioribus divisa sunt, collecta sunt in superioribus. Atqui inter virtutes, & mentis sunt aliquæ, quæ speculativæ sunt, aliæ verò practicæ: Ergo theologia est eminenter utrumque simul.

Confirmatur 2. Theologia, ex dicendis, est vera sapientia. Sapientia verò non solum Dei naturam, ac proprietates contemplatur, sed prætereà docet illius cultum, ac proinde movet, & dirigit ad praxim. Eo principio nixi Patres contenderunt antiquorum philosophiam non fuisse sa-

pietiam : neque enim , inquiebant , disciplina quæ sistit in jejuna divinitatis contemplatione , meretur sapientiae nomen : *Philosophia* (verba sunt Lactantii lib. 4. Institutionum cap. 2. *quia veram religionem , id est , summam pietatem non habet , non est vera sapientia . Vbi autem sapientia cum religione inseparabili nexu cohæret , utrumque verum esse necesse est , quia & colendo sapere debemus , id est , sentire quid nobis , & quomodo sit colendum , & in sapiendo colere , id est , re & actu quod scierimus , implere .*

Objicies 1. Practicum , & speculativum sunt differentiae , quæ sibi invicem opponuntur specificè , quippè oriuntur ex diverso specie objecto , sicut visus & auditus . Atqui differentiae , quæ specificè opponuntur , non possunt convenire eidem habitui , sicut nec eidem generi , ut patet in animali , quod quidem idè non potest esse simul rationale , & irrationale ; quod rationale , & irrationale sint differentiae , quæ specificè opponuntur .

Resp. 1. distin. min. Differentiae quæ opponuntur specificè non possunt convenire eidem habitui secundum eundem respectum considerato , conc. min. Secundum diversum respectum considerato , neg. min. Speculativum convenit theologiae , prout versatur circa Deum , ut est in se , practicum verò , ut est ultimus finis , quem creatura rationalis potest consequi per virtutis exercitium , & peccati fugam . Hinc patet practicum , & speculativum , non dici de theologia secundum idem ; ac proinde in casu , de quo agitur , specificè non opponi .

Resp. 2. distin. min. Differentiae quæ opponuntur specificè non possunt convenire eidem habitui , si ille habitus non habeat objectum infinitum , conc. min. Si habeat objectum infinitum , neg. min. Infinitum , quale est objectum theologiae , cum eminenter includat plurium objectorum perfectiones , continet multiplicem differe-

Differt. III. *De Proprietatib. Theol.* 17

ferentiam specificam ; ac proindè non est absurdum, quòd habitui, qui circa illud objectum infinitum versatur, multiplex differentia specifica conveniat.

Objicies 2. Quilibet actus theologicus non est simul practicus, & speculativus : ergo nec ipse theologiæ habitus est simul practicus, & speculativus. Consequentia patet ex eo, quòd quilibet actus includere debeat quamlibet differentiam essentialem habitus à quo procedit.

Resp. conc. ant. neg. conseq. Ad cujus probationem, dist. hanc propositionem : Quilibet actus &c. si se extendat ad totum, & adæquatum objectum habitus, conc. Si ad partiale tantum, & inadæquatum, neg. Idque patet in operationibus animæ rationalis, quæ licèt ab unâ, & eâdem potentiâ oriantur, sunt tamen diversæ speciei, eò quòd objecta specie diversa attingant, ut videre est in operatione rationali, & sensitivâ.

Objicies 3. Nulla est veritas in theologia, quæ ad praxim non dirigat : ergo theologia est scientia merè practica. Probatur ant. Si quæ essent veritates, quæ ad praxim non dirigerent, essent præsertim illæ, quæ versantur circa divina mysteria, ut sunt Mystera Trinitatis, & Incarnationis. Atqui ea etiam mysteria ad praxim dirigunt ; quippè theologus eorum mysteriorum cognitione utitur, ut suas operationes rectè instituat.

Resp. dist. ant. Nulla est, &c. quæ ad praxim non dirigat, aut per se, aut per accidens, conc. ant. per se, neg. ant. Ratio est, quia ut habitus sit omninò practicus, requiritur ut omnes veritates circa quas versatur, *per se*, seu ex primario fine ad praxim dirigat, id verò, seu, ad praxim dirigere, licèt per accidens, hoc est, ex intentione theologi operantis convenire possit singulis veritatibus theologicis, non convenit tamen per se, hoc est, ex primario fine singularum veritatum theologicarum.

CAPUT III.

Virum Theologia sit scientia subalternata scientiæ Beatorum.

Not. **S**cientia, sive speculativa, sive practica, duplex est: subalternans, & subalternata. Prior demonstrat alterius principia: posterior ab illâ mutuatur suorum principiorum tum certitudinem, tum evidentiam. Sic arithmetica est subalternans respectu musicæ, & vicissim musica est subalternata respectu arithmeticæ; quippe arithmetica agit de numeris, qui sunt principia soni, circa quem musica versatur; unde (ut fert tritum axioma:) *Ibi incipit musicus, ubi desinit arithmeticus.*

CONCLUSIO. Theologia improprie quidem, sed non proprie, & in rigore, est subalternata scientiæ Beatorum.

Probatur prior pars. Ad subalternationem improprie dictam, duæ tantum conditiones requiruntur: prior, ut scientia subalternans sit superior subalternatâ; posterior, ut subalternata ordinetur ad comparandam subalternantem. Atqui scientia Beatorum est superior theologiâ viatorum, & ista ad illius consecutionem ordinatur: ergo &c.

Probatur altera pars. In Beatis duplex est scientia, prior est scientia Beata, seu, ea per quam sine discursu Beati clarè vident in Verbo, quæ hic obscure per fidem cognoscimus; posterior est ea, per quam Beati ex veritatibus clarè in Verbo cognitis, alias veritates per discursum colligunt. Atqui theologia viatorum neutri ex iis Beatorum scientiis proprie, & in rigore subalternatur. Si quidem ad subalternationem proprie dictam requiritur, 1. ut principia subalternantis, & subalternatæ sint omninò diversa, ita ut conclusio-

nes,

nes, quæ in scientiâ subalternante sunt demonstratæ ab eâdem scientiâ subalternante, sint principia scientiæ subalternatæ . Id videre est in medicina respectu physicæ ; nam medicina, eò quòd sit subalternata, physicæ respectu, pro suis principiis habet conclusiones quas physica demonstrat ; unde invaluit hoc axioma : *Ibi incipit medicus, ubi desinit physicus* . Requiritur 2. ut objectum scientiæ subalternatæ sit inferius, seu, contractius objecto scientiæ subalternantis, idque per contractionem aliquam accidentalem, ut patet in Musica, cujus objectum, seu, numerus sonorum, minùs latè patet, quàm objectum Arithmeticæ, quippè Arithmetica versatur circa numerum, abstrahendo à sonoro & non sonoro, hoc est, utrumque complectitur, sonorum scilicet, & non sonorum .

Atqui neutra ex iis conditionibus hîc habet locum . Nam 1. principia scientiæ, quæ est in Beatis, & principia theologiæ, quæ est in viatoribus, non sunt diversa; nempe utriusque principia non alia sunt, quàm divina revelatio; nec enim, aut Beatis, aut viatoribus aliquid de Deo innotescit, nisi per revelationem, obscuram quidem in istis, evidentem verò in illis . 2. Theologiæ objectum, seu veritas, quæ ex revelatione per discursum colligitur, non minùs est objectum scientiæ, quæ reperitur in Beatis, quàm illius, quæ reperitur in nobis viatoribus, sive illa Beatorum scientia sit discursiva, sive non sit discursiva: ergo theologia, propriè & in rigore philosophico, non subordinatur scientiæ Beatorum .

Objicies 1. Principium scientiæ Beatorum est revelatio clara & evidens, principium verò theologiæ viatorum est revelatio obscura . Objectum scientiæ Beatorum est veritas obscura, cum inferatur ex obscurâ revelatione: objectum verò scientiæ Beatorum est veritas clara, quæ per discursum colligitur ex evidenti revelatione, aut quæ per

visionem beatificam habetur sine discursu. Atqui illa differentia obscuritatis, & evidentiae, tum in principio scientiarum, tum in illarum objecto, satis est ut una proprie, & in rigore subalternetur alteri: ergo &c.

Resp. conc. maj. neg. min. Ratio est, quia differentia, quæ reperitur inter principia scientiæ subalternantis, & scientiæ subalternatæ, debet *per se* convenire principiis scientiæ subalternatæ, ut patet in principiis arithmeticiæ, & musicæ. Verùm theologiæ nostræ principiis, seu, divinæ revelationi, obscuritas non convenit *per se*, sed tantum *per accidens*, nimirum ratione subjecti, hoc est, hominum in terris adhuc degentium statui. Ratio est 2. quia obscuritas aliqujus conclusionis non extendit ipsam conclusionem; ac proindè non efficit, ut objectum theologiæ, quæ est in viatoribus, sit magis extensum, quàm objectum scientiæ, quæ reperitur in beatis. Confirmatur ex eo, quòd obscura cognitio non se teneat ex parte objecti, sed tantum ex parte subjecti cognoscentis, proindèque non efficit, ut vel accidentaliter differat ab eo, quod est clarè, ac evidenter cognitum. Ad subalternationem tamen illa accidentalis differentia requiritur ex parte objecti, quod attingitur à scientiâ subalternatâ, ut superius ostensum est exemplo musicæ, respectu arithmeticiæ cui subalternatur.

Objicies 2. Theologia viatorum, eò modo se habet ad scientiam beatorum, quo se habet perspectiva ad geometriam, & musica ad arithmeticiam: Atqui perspectiva est *proprie* subalternata geometriæ, & musica arithmeticiæ: ergo viatorum theologia *proprie* subalternatur theologiæ beatorum. Probatur major autoritate S. Thomæ, qui 1. par. quæst. 1. art. 2. sic loquitur: *quædam sunt, quæ procedunt ex principiis notis lumine superioris scientiæ, sicut perspectiva procedit ex principiis notificatis per geometriam, & musica ex principiis per arithmeticiam notis. Et hoc modo*

do sacra doctrina est scientia , quia procedit ex principiis notis lumine superioris scientiæ , quæ scilicet est scientia Dei & Beatorum . Unde sicut musicus credit principia tradita sibi ab arithmetico , ita doctrina sacra credit principia revelata sibi à Deo .

Resp. dist. maj. Theologia eo modo se habet secundum aliquid , ad scientiam beatam , quo se habet perspectiva ad geometriam , conc. maj. Se habet secundum omnia , neg. maj. Theologia in eo est similis perspectivæ , quod sicut perspectiva est inferior geometriæ , sic theologia est inferior scientiæ Beatorum ; idque non secundum differentiam , quæ se teneat ex parte theologiæ sumptæ in se , & à parte rei , sed secundum cognitionis modum , obscuritatem nimirum , quæ se teneat ex parte cognoscentis .

Nec aliud loco in objectione relato voluit S. Thomas : nimirum non comparat cognitum à viatoribus cum objecto cognito à Beatis , sed tantum comparat modum , quo viatores cognoscunt cum modo cognoscendi Beatorum : ille autem modus est evidens in Beatis , obscurus verò in viatoribus : Hoc modo , inquit , sacra doctrina est scientia , quia procedit ex principiis notis lumine superioris scientiæ , quæ scilicet est scientia Dei , & Beatorum . Præterea S. Doctor non asserit , quod conclusiones scientiæ , quæ est in Beatis , sint principia scientiæ , quæ est in viatoribus : id tamen , in adversariorum sistemate , debuisse asserere , cum , ut jam dictum est , ibi incipiat scientia subalternata , ubi desinit subalternans : sed hoc unum tradit ; nempe , quod sicut musicus debet sua principia arithmetico , ita theologus sua debet , non quidem scientiæ Beatorum , sed divinæ revelationi : Ita , inquit , doctrina sacra credit principia revelata sibi à Deo .

CAPUT IV.

Virum Theologia sit Sapientia.

CONCL. **T**heologia est habitus, qui sapientia dicitur.

Probatur 1. Sapientia est cognitio rerum per altissimas causas; nempe, per id differt à scientia, quæ de rebus agit per causas proximas; sic physica demonstrat corpus esse divisibile, eò quòd sit extensum. Atqui theologia est cognitio rerum per altissimas causas; Dei nimirum, & eorum, quæ ad ipsum referuntur, aut tanquam ad causam, aut tanquam ad finem ultimum, & quidem per revelationem, quæ haud dubiè causa est altissima.

Probatur 2. Proprium est sapientiæ ferre iudicium de rebus omnibus, juxta illud Apostoli 1. ad Corinth. 2. *Spiritalis homo judicat omnia, & ipse à nemine judicatur*; nec id mirum est. Cum enim sapiens, res omnes in altioribus, seu in universalibus principiis consideret, ad ipsum de rebus omnibus iudicium spectat: atqui theologia de rebus omnibus judicat, nulla quippè res est, quæ ad Deum, aut tanquam ad causam, aut tanquam ad finem ultimum non referatur: hinc non solum infert conclusiones ex articulis fidei, sed expendit etiam principia aliarum scientiarum: judicat nimirum ea falsa esse, si repugnent veritatibus à Deo revelatis: ipsorum etiam articulorum fidei credibilitatem explicat, declarat, definit.

Objicies 1. Ille habitus non est sapientia, qui aliundè supponit sua principia: qui enim ea supponit aliundè, tantum abest, ut ordinet, ac dirigat, quod proprium est sapientiæ, quin potius ordinetur, ac dirigatur: atqui theologia supponit sua principia aliunde, ex scientia nimirum Beatorum, cujus conclusiones sunt principia theologiæ viatorum.

Resp. 1.

Resp.1. dist. maj. Ille habitus non est sapientia, qui aliundè, seu ex humanâ alia scientiâ supponit sua principia, conc. maj. qui ex scientia divina, neg. maj. Theologia, secundùm auctores, quibus placet eam propriè subalternari scientiæ Beatorum, supponit quidem sua principia aliundè, sed cum scientia cui subalternatur, sit divina, non impedit, quin theologia sit vera sapientia.

Resp. 2. neg. min. Nec enim (ut articulo superiore dictum est) alia sunt principia scientiæ Beatorum à principiis theologiæ viatorum; unde falsum est, quòd illius conclusiones sint istius principia.

Objicies 2. Vera sapientia debet probare principia omnium scientiarum; nam universalis habitus debet probare principia particularium habituum: atqui theologia non probat, hoc est, non demonstrat principia omnium scientiarum; neq; enim agit de mathematicæ, aut medicinæ principiis: ergo theologia non est vera sapientia.

Resp. dist. maj. Si illæ scientiæ sint ejusdem cum eâ generis, conc. maj. Si non sint ejusdem generis, neg. maj. Hinc patet theologiæ, non esse demonstrare scientiarum naturalium principia, licèt multùm inferiora sint theologiæ principio, seu divina revelatione.

Objicies 3. Idem habitus non potest esse scientia simul, & sapientia; cùm enim sapientia, & scientia sint membra in quæ philosophi dividunt habitum, necesse est, ut sibi invicem opponantur, quia non valet divisio, nisi in membra sibi invicem opposita. Sed theologia est vera scientia: ergo non potest esse sapientia.

Resp. neg. maj. Ad cujus probationem, dist. ant. Sapientia & scientia dividunt habitum tanquam totum potentiale in suas potentias, conc. ant. Tanquam totum integrale in sua membra, aut tanquam genus in suas species, neg. ant. Partes, quæ dividunt totum potentiale, ut est habitus,

debent quidem differre, sed non debent opponi : sic intellectus & voluntas, in quæ anima tanquam totum potentiale dividitur, differunt quidem, sed sibi invicem non opponuntur : hinc nihil impedit, quin theologia sit scientia, quatenus est cognitio certa per discursum comparata, & simul sit sapientia, quatenus res certò cognoscit per divinam revelationem, quæ est altissimum cognitionis medium; seu, ut alii loquuntur, altissima causa.

Q U Æ S T I O II.

Utrum Theologia sit certior scientiis naturalibus.

Not. **C**ertitudo se tenet, vel ex parte objecti, vel ex parte subjecti: prior certitudo sumitur ab immutabilitate, & immobilitate rei, quæ cognoscitur: posterior petitur ab adhæsione intellectus cognoscentis.

CONCLUSIO. Theologia aliis scientiis naturalibus certior est certitudine, tum objecti, tum subjecti.

Probatur prior pars. Ex observatis, certitudo objectiva scientiæ petitur ex immutabilitate, & immobilitate objecti circa quod versatur: atqui objectum theologiæ, seu Deus, majorem habet immutabilitatem, & immobilitatem, quam cætera entia cujuscumque sint ordinis, ut suo loco de Dei immutabilitate differentes ostendemus.

Probatur altera pars. Theologia sumpta ex parte subjecti dicit firmum, ac constantem intellectus assensum veritati, quæ ex revelatione necessario deducitur: atqui ille assensus constantior est, ac firmior eo, quem intellectus præbet in aliis scientiis naturalibus. Nam assensus eo
fir-

firmior est, ac constantior, quò firmior est causa, à quâ oritur, hoc est, quò firmitus est medium, per quod intellectus ad eum determinatur: atqui illa causa est certior eâ, quæ in aliis scientiis naturalibus intellectum movet, ac determinat ad assensum: ea nempe causa est divina revelatio, cui falsum subesse nequit; cum è contra lumen naturale, quod in aliis scientiis est causa movens, ac determinans ad assensum, decipi possit, *multò certior est homo* (inquit hìc S. Thomas art. 2. ad 2.) *de eo quod audit à Deo, qui falli non potest, quàm de eo, quod videt propria ratione, quæ falli potest.*

Objicies 1. Ideò asseritur assensum theologicum esse certiozem assensu scientifico, quòd medium, per quod theologia ad eum determinatur, sit certius medio, per quod philosophus determinatur ad assensum scientificum: atqui illa ratio nulla est. Siquidem falsum non magis subesse potest evidentix, quæ est medium assensus scientifici, quàm divinæ revelationi, quæ est medium assensus theologici: alioquin enim Deus creator frustraretur sine sibi proposito, ideò nempe lumen naturale indidit homini, ut per illud veritatis cognitionem certò consequatur: eam tamen certò non consequeretur, si lumen naturale falli posset.

Resp. ad 1. neg. min. Ad 2. neg. Hanc propositionem: quod Deus alioquin sine sibi proposito frustraretur: Nam in pœnam peccati potest permittere, licet actu non permittat, ut id quod intellectui videtur evidens, sit omninò falsum: è contra, quâcumque factâ hypothesi, permittere non potest, ut revelatum non sit verum, neque enim quidquam potest contra veritatem, cum seipsum negare non possit; ac proindè revelatum magis distat à falso, quàm id quod videtur evidens.

Objicies 2. Assensus necessarius, certior est assensu libero: ille enim negari non potest ab intel-

tellektu : sic intellectus non potest non adhærere huic propositioni : *Totum est majus sua parte* : ista è contra, assensus nimirum liber , negari potest ab intellectu : atqui assensus scientificus, est necessarius , assensus verò theologus est liber : ergo ille certior est isto .

Resp. dist. maj. Assensus necessarius , est certior libero , si assensus liber oriatur ex medio probabili , & opinativo , conc. maj. Si oriatur ex medio prorsus infallibili , ut contingit in assensu theologico , neg. maj. Ideò assensus liber in disciplinis naturalis ordinis non est æquè certus , ac assensus necessarius , quia semper oritur ex medio probabili , quod proindè non extorquet assensum ; at id locum non habet in assensu verè theologico , cum assensus theologicus oriatur ex medio prorsus infallibili , divinà scilicet revelatione .

Objicies 3. Quod ab intellectu excludit omnem prorsus dubitationis motum , certius est eo cum quo stat aliquis dubitationis motus : atqui assensus scientificus excludit ab intellectu omnem dubitationis motum , qui tamen motus stat cum assensu theologico ; tam enim stat cum assensu theologico , quàm cum illius principio , fide nimirum : sed dubitationis motus stat cum fide , licet fides illud expugnet : ergo &c.

Resp. conc. maj. dist. secundam partem minoris . Motus dubitationis stat cum assensu theologico per accidens , conc. min. per se , neg. min. Ideò theologus , & credens nonnunquam experiuntur aliquos dubitationis motus , quòd semper satis non attendant ad divinam revelationem , sed aliquando attendant ad difficultates , quæ contra fidem ex humanâ ratione nascuntur : hoc nempe , ait Hilarius lib. 8. *humana mens solum sapit, quod intelligit* . Chrysostomus tom. 2. de incomprehensibili , sic etiam loquitur : *Sapientia quam à Christo docti sumus* .

mus, est proprias ratiocinationes, conversa ad revelationem mentis acie, rabide furentes comprehendere.

Objicies 4. S. Thomas asserit assensum theologicum, non tam in nobis esse firmum, quam assensus scientificus: ergo tantum abest, ut majorem habeat certitudinem, quin habeat multo minorem.

Resp. dist. ant. S. Thomas asserit, &c. Idque contingit per accidens, conc. ant. Quod nempe intellectus humanus non satis comprehendat divinæ revelationis vim ac virtutem, ad eamque non satis attendat; Id contingit per se, seu, ex naturâ causæ assensus theologici, neg. ant. Eam solutionem innuunt hæc S. Doctoris verba: *Ad primum dicendum, quod nihil prohibet, id quod est certius secundum naturam, esse quoad nos minus certum propter debilitatem intellectus nostri.*

Q U Æ S T I O III.

Virum Theologia sit habitus supernaturalis.

Not. 1. **N**ON est hic quæstio de theologiâ sumptâ secundum suum principium: certum est enim, quod sic accepta, sit omnino supernaturalis; cum illud principium non sit, ut superius dictum est, aliud à fide: Igitur difficultas est de theologiâ sumptâ pro conclusione deductâ ex aliquo fidei articulo.

Not. 2. Nonnulli theologiam sumptam in ultimo illo sensu contendunt esse supernaturalem, tum quod habeat causam ordinis supernaturalis, scilicet fidem, tum etiam quod naturalis discursus, qui reperitur in argumento theologico, non sit causa productiva assensus theologici, sed me-

ra

28 Instit. Theolog. Prolegomena.

ra conditio requisita, ut revelatio ratiocinantem determinet ad assensum.

CONCLUSIO. Theologia est habitus merè naturalis.

Probatur. Quod acquiritur per actus merè naturales, est omninò naturale. Siquidem, ut aiunt philosophi, forma, & medium per quod acquiritur, sunt ejusdem ordinis, ut patet in igne & calore, per quem forma ignis acquiritur: atqui theologia acquiritur per actus merè naturales, nempe per librorum lectionem, varias speculationes, plurimos discursus, similiaque exercitia; nec enim à Spiritu Sancti infusione theologiæ peritia expectari solet, quemadmodum expectari solent gratiæ gratis datæ, ut sunt donum miraculorum, prophetiæ, & alia ejusmodi.

Respondent adversarii discursum, ad theologiam requiri, non tanquam causam illius productivam, sed tanquam conditionem, sine quâ non: non est verò necesse, ut conditio, sine quâ non, ejusdem sit ordinis cum forma, ad quam est via; id nempe videre est in verbi Dei auditu, qui præcedit conversionem infidelis, nec enim ille auditus est supernaturalis, sicut ipsa hominis infidelis conversio.

Sed gratis fingitur actus illos, quorum meminit argumentum, & ipsum discursum se habere respectu assensus theologici per modum meræ conditionis, sine qua non. Nam 1. illi actus se habent per modum causæ in aliis scientiis; cur verò theologia ab iis scientiis quoad illud caput excipitur? 2. Si essent conditio non causa, Deus posita illâ conditione semper conferret auxilium supernaturale ad eliciendum assensum theologicum, semper enim elicitur. Sed unde habent adversarii, quòd Deus impiis etiam hominibus, à quibus posita fuit illa conditio, auxilium supernaturale largiatur?

Objicies 1. Illa scientia est supernaturalis, quæ
ha-

Differt. III. De Proprietatib. Theol. 29

habet causam supernaturalem, nam effectus sequitur naturam suæ causæ: atqui causa theologiæ est supernaturalis, divina nimirum revelatio: ergo, &c.

Resp. distin. maj. illa scientia, &c. quæ habet causam proximam supernaturalem, conc. maj. Causam remotam tantum, neg. min. Distinguo pariter min. Atqui causa remota theologiæ est supernaturalis, conc. min. Causa proxima, neg. min. Nam causa proxima theologiæ est virtualis revelatio, seu connexio, quam aliqua veritas habet cum articulo expressè revelato; illa verò virtualis revelatio, seu judicium de connexione, quam aliqua propositio habet cum articulo expressè revelato, non est aliquid supernaturale, sed merus effectus rationis, à quâ connexio illa per discursum apprehenditur.

Objicies 2. Ille habitus est supernaturalis, cujus certitudo est supernaturalis: neque enim proprietas est superioris ordinis, quàm sit res, cujus est proprietas. Sed theologiæ certitudo est supernaturalis, cum, ut supra dictum est, ea certitudo sit major certitudine omnium aliarum scientiarum naturalium; nec majoris illius certitudinis ratio aliundè desumi non possit, quàm ab illius supernaturalitate.

Resp. conc. maj. neg. min. Ad cujus probationem dico falsum esse, quòd majoris illius certitudinis ratio aliundè desumi non possit, quàm à supernaturalitate: petitur nimirum à connexione, quam theologia habet cum fide, seu articulo expressè revelato; ea autem connexio, ut jam fuit observatum, est secundum se omnino naturalis.

Q U Æ S T I O I V.

Virum Theologia sit necessaria.

Not. 1. **N**ecessarium aliud est absolutum , & aliud per respectum ad finem . Prius est illud, quod nullo modo, nullo tempore potest se aliter habere , ut Deum existere, hominem esse animal mente præditum; posterius est illud, quod requiritur ad certum finem consequendum : hîc de illo non agimus , sed de isto tantum ; seu , quæstio est utrùm theologia sit necessaria ad consequendam salutem .

Not. 2. Necessarium per respectum ad finem est duplex, unum necessitate præcepti, aliud necessitate medii . Prius est illud , quo res aliqua ideò est necessaria, quòd sit præcepta , sic actualis peccatorum confessio homini post baptismum lapsò est ad salutem necessaria; nam quamvis homo lapsus sine eâ salvari possit , si nempe non adsit sacerdos cui confiteatur , tamen salutem non consequetur , si eam gravi suâ culpâ lubens omittat . Posterius necessarium, est illud sine quo finis haberi nequit ; eâ necessitatis specie contritio est necessaria homini lapsò .

Not. 3. Necessarium necessitate medii dupliciter dicitur, vel simpliciter, vel secundum quid . Illud ad finem comparandum ita requiritur , ut finis sine eo, juxta ordinariam Dei providentiam haberi non possit: istud verò requiritur, non ad finem simpliciter, & absolutè comparandum, sed tantum ad eum faciliùs consequendum .

Not. 4. Theologia tripliciter sumi potest : 1. pro aliquâ cognitione supernaturali , sive sit fides , sive sit aliquid aliud. Sumi potest : 2. pro habitu, aut actu quo infertur conclusio ex articulo expressè revelato : 3. pro methodo illâ ad
quam

quam pluribus abhinc sæculis theologia redacta est à S. Joanne Damasceno , à Petro Lombardo , qui vulgò dicitur Magister sententiarum , à S. Thomâ Aquinate , quæque passim theologia scholastica nuncupatur . Iis præmissis , aliquot statuendæ sunt conclusiones , ut solvatur difficultas , de quâ agitur in hâc tertiæ dissertationis quæstione quartâ .

CONCLUSIO 1. Theologia sumpta pro aliquâ Dei cognitione supernaturali , est cuique adulto necessaria necessitate medii ad salutem consequendam .

Probatur 1. Fides cuique adulto est necessaria necessitate medii , ut docent in tractatu de fide , ubi laudant hæc Apostoli ad Hebræos scribentis verba : *sine fide impossibile est placere Deo* . Laudant quoque hanc Christi sententiam , *qui non crediderit condemnabitur* . Laudant etiam Tridentini Concilii locum , quo sessione nimirum 6. cap. 8. dicitur quod , *fides sit humanæ salutis initium , fundamentum & radix omnis justificationis , quod sine eâ nemini unquam contigerit justificatio* . Atqui fides est supernaturalis cognitio Dei : ergo theologia sumpta pro aliquâ Dei cognitione supernaturali est , cuique adulto necessaria necessitate medii ad salutem consequendam .

Probatur 2. Homo est conditus ad finem supernaturalem , intuitivam scilicet , & claram Dei visionem : ergo indiget aliquâ Dei cognitione , per quam ad finem illum dirigatur : atqui ad id satis non est cognitio naturalis ; neque enim habet proportionem cum illo sublimi fine : ergo requiritur Dei aliqua cognitio supernaturalis .

CONCLUSIO 2. Theologia sumpta pro disciplinâ , quæ conclusiones infert ex articulis immediatè revelatis , non est cuique fideli , aut necessitate præcepti , aut necessitate medii necessaria ad consequendam salutem .

Probatur 1. Nullum , aut in scripturâ , aut in tra-

32 Instit. Theolog. Prolegomena.

traditione, aut in Ecclesiæ decretis extat præceptum, quo quisq; fidelis jubeatur studere theologiæ in sensu, quo est quæstio; nec immeritò, quippè perpauci sunt ejus studii capaces, & inter capaces non sunt plures, quibus id per otium liceat. 2. Constat innumeras mulierculas, plures plebeios homines salutem consequi, quamvis disciplinæ, de quâ agitur, nusquam operam derint.

CONCLUSIO 3. Theologia sumpta pro disciplinâ, quæ conclusiones infert ex articulis revelatis, Ecclesiæ corpori absolutè necessaria est ad defensionem, & explicationem fidei.

Probatur 1. Apostolus ad Ephesios scribens, docet Christum dedisse Apostolos, Prophetas, Evangelistas, Pastores ad consummationem sanctorum, in opus ministerii, in ædificationem corporis Christi: ergo ex Christi institutione debent esse in Ecclesia, tum Pastores, à quibus fideles regantur, tum Doctores, à quibus doceantur: Atqui nec Pastores, nec Doctores possunt imposito sibi munere perfungi, si non sint theologi. Nempè id oneris exigit, ut fideles doceantur non tantùm articulos fidei expressè contentos in scripturis, sed etiam pleraque mysteria, quæ ex articulis expressè contentis in scriptura colliguntur, ut sunt Christi divinitas, Trinitas personarum, necessitas gratiæ ad pietatis opera. Id muneris exigit etiam, ut populi doceantur multas veritates, quæ ad praxim pertinent, quæque tum ex decalogo, tum ex aliis expressis scripturæ locis inferuntur. Ejus generis sunt multa, quæ ad amorem, ut par est, Deo exhibendum, juramenti religionem, reddendum parentibus honorem pertinent. Nam quantum circa ea capita fideles errare possint, quotidiano experimento comprobamus. Idque compertum est ex quibusdam hujusce ætatis casuistis, qui periculosos, ac noxios errores circa decalogum scribere, quique ob id apud Summos Pontifices, & om-

& omnes fermè orbis Episcopos malè audierunt : ergo, &c.

Probatur 2. Ecclesiæ necessaria est disciplina, quæ fidei articulos explicet, plerumq; enim per-obscuri sunt, ut innuit Petrus epist.2. cap.3. ubi asserit, nonnulla contineri in epistolis Pauli, non parum difficilia intellectu. Ecclesiæ necessaria est disciplina, quæ contra scripturæ corruptores germanum illius sensum assignet, ac defendat; nempe jubet Apostolus, ut id Episcopi sedulò curent : *Oportet, inquit ad Titum, Episcopum sine crimine esse. . . amplectentem eum, qui secundum doctrinam est, fidelem sermonem, ut potens sit exhortari in doctrina sanâ, & eos, qui contradicunt arguere.* Atqui ea disciplina non alia est, quàm theologia: theologiæ nimirum est conferre ad invicem scripturæ loca, ut fidem explicet; multis argumentationibus eruere, quid ex scripturis necessariò sequatur; ostendere quænam doctrina, doctrinæ ab Apostolis traditæ opposita sit: ergo Ecclesiæ corpori theologia sumpta in sensu, de quo in conclusione, necessaria est, tum necessitate medii, tum necessitate præcepti.

Confirmantur, quæ hætenùs dicta sunt. Primò, exemplo Christi, qui theologiâ sæpè usus est, seu argumentatus est ex Scripturis, tum ut probaret suam à Patre missionem, tum ut suam divinitatem assereret, tum ut legem moralem ab impiis Phariseorum traditionibus purgaret. Confirmari possunt 2. exemplo Apostolorum, qui quidem toti sunt in suis epistolis, ut argumentis ex antiquo testamento depromptis adstruant Evangelii veritatem. Confirmari possunt 3. exemplo Patrum, qui & privatis in Scriptis, & in Conciliis œcumenicis fidem contra hæreticos defendunt rationibus desumptis, ex variis Scripturarum textibus.

Probatur 3. Ecclesiæ simpliciter, & absolute necessaria est scientia, per quam homines crassioris, & tardioris ingenii doceantur ea, quæ de Deo
co-

34 Instit. Theolog. Prolegomena.

cognoscere debent; neque enim per se, seu proprio Marte id possunt ejus generis homines: *Impossibile est*, ait S. Thomas, *quod omnes consequantur per viam rationis*, id quod est de Deo necessarium ad cognoscendum: atqui ea scientia est ipsamet theologia, quæ per viam faciliorem, quam per argumenta à ratione petita, nempe per revelationem, de Dei proprietatibus discutitur: quippe neminem reperire est, quantumcumque sit hebes, qui per extrinseca motiva credibilitatis capax non sit judicandi, an veritates quædam sint revelatæ, necne: ubi autem adfuerit illud judicium, uno veluti momento quæcumque de Deo scitu necessaria sunt, consequetur, simpliciter nimirum, & sine ulla discussione, adhaerendo articulis, quos per motiva credibilitatis certò cognoverit esse revelatos.

Probatur 4. Quæ de Deo per solùm rationis lumen cognoscuntur, plerumque variis erroribus obnoxia sunt: quot enim errores (ut advertit Chrysostomus hom. 5. in priorem epistolam ad Corinth.) de supremo illo ente non protulit philosophia, quæ sola ratione nitebatur? Necessaria est igitur theologia, quæ divinæ revelationi innixa, pura reddat, ac integra, quæ humana ratio de Deo cognoscit.

Confirmatur duplex postremum argumentum ex Patribus, qui expressè asserunt rationem sibi relictam, levius debere consuli circa ea, quæ ad Deum spectant: à Deo discendum est, inquit Hilarius lib. 5. *quid de Deo intelligendum sit*, quia non nisi se authore cognoscitur. Subscribit Cassianus lib. 4. de Incarn. cap. 4. *Æquum est*, ait, *ut de agnitione illius ipsi credamus*, cujus scilicet totum est, quod de eo credimus, quia agnosciturque Deus ab homine non potuit, nisi agnitionem sui ipsi tribuisset.

CONCLUSIO 4. Theologia scholastica, nec necessitate medii, nec necessitate præcepti est Ecclesiæ necessaria.

Pro-

Probatur prior pars . Theologia scholastica, non magis est Ecclesiæ necessaria his temporibus, quàm fuerit antiquitus, seu duodecim prioribus sæculis: Atqui antiquitus nullo modo fuit Ecclesiæ necessaria; nec enim, tunc in usu fuit apud Scriptores Ecclesiasticos, nimirum absque illius ope pastores oves sibi creditas docuerunt fidem, Concilia astruxere germanum scripturarum sensum, doctores expugnarunt, quæ tunc exortæ sunt hæreses, ac quæ tunc natæ sunt, morum corruptelas; nempè scholastica theologia originem debet suam Petro Lombardo Episcopo Parisiensi, quem vulgò dicunt Magistrum sententiarum, quique labente sæculo duodecimo floruit.

CONCLUSIO 5. Theologia scholastica Ecclesiæ Catholicæ perutilis est.

Probatur . Theologia scholastica tria dicit:

1. philosophiæ, ac præsertim dialecticæ usum: 2. complectitur strictas orationes, quæ syllogismis continentur: 3. dicit methodum, ad quam tum Petrus Lombardus, tum S. Thomas eam reducere, in distinctiones nimirum, quæstiones, articulos, conclusiones, probationes, objectiones, & alia ejusmodi, quæ passim occurrunt in scholasticorum libris. Atqui theologia, prout ea omnia complectitur, perutilis est Ecclesiæ, quod quidem sic per partes ostenditur.

Primò. Philosophia suppeditat notionem rerum, quæ ex articulis fidei concluduntur: explicat v. gr. quid sit Processio, quid Generatio, quid Hypostasis, quid Natura, quid Libertas, & alia hujusmodi, quæ frequenter in fidei confessionibus occurrunt.

Secundò. Dialectica est ars, quâ facilè, & absq; lapsus periculo unum ex alio deducitur; utilis est igitur Ecclesiæ, ut faciliùs, & tutiùs veritates quasdam, aut ad mysteria, aut ad moralem spectantes inferat ex fide.

Tertiò. Per strictam orationem, quæ syllogismis

36 Instit. Theolog. Prolegomena.

mis continetur, humana mens clariùs videt connexionem, quam habent cum fide propositiones, quas Ecclesia, aut fidelibus explicat, aut defendit adversùs hæreticos.

Quartò. Methodus ad quam tum Petrus Lombardus, tum S. Thomas doctrinam sacram exigunt, nempe disputando de essentiâ, de existentia, de causis, de proprietatibus subjecti quod pertractant, confusionem & æquivocationem tollit ab ideis, quæ subjecto tribuuntur. Quis igitur dubitet, quin Ecclesiæ aliquod argumentum pertractanti methodus illa perutilis sit?

Confirmantur illæ probationes ex SS. Patribus. Antiqui Patres in exponendis, aut defendendis fidei dogmatibus, philosophiâ usi sunt: v. gr. ex ideâ, quàm de generatione philosophia tradit, concluderunt contra Arianos Verbum esse Patri æterno consubstantialia, hoc nimirum argumento, in quo major propositio est merè philosophica, usi sunt: *Quod secundum substantiam ab alio generatur, ejusdem est cum generante substantia. Atqui ex Scripturis, Verbum à Patre generatur. Ergo Verbum est ejusdem cum Patre substantia.*

Apud Patres in usu frequenti fuit dialectica. Ex illius regulis Basilii, & Gregorius Nyssenus in suis contra Eunomium operibus dissolvunt captiosa, & intricata argumenta, quibus hæreticus ille contra fidem utebatur. Idem Basilii ad primum caput Isaia, sic dialecticam prædicat: *Facultas dialectica muri instar est dogmatibus, quòd ea non sinit facile diripi, & quorumlibet incursionem patere.* Augustinus lib. 3. de doctrinâ Christianâ cap. 31. hisce verbis ejusdem dialecticæ usum commendat: *Sed disputationis disciplina ad omnia genera questionum, quæ in litteris sanctis sunt, penetranda & dissolvenda plurimum valet. Tantum ibi cavenda est libido rixandi, & puerilis quedam ostentatio decipiendi adversarium.* Eodem ferè modo loquuntur alii Patres.

*Solvuntur quæ contra scholasticam Theologiam
objiciuntur.*

Objicies 1. Theologia scholastica utitur humanæ philosophiæ principiis : atqui tantum abest, ut humanæ philosophiæ principia sint utilia Ecclesiæ, quin potius ei noceant, quam maximè : ergo ipsi quoque nocet scholastica theologia.

Probatur minor . Patres asserunt ex philosophiâ natas esse omnes fermè hæreses. Asserunt ex Platonis commentis eas prodiisse, quæ prioribus sæculis Ecclesiam vexarunt , Simonianorum nempè, Valentinianorum, Marcionitarum, Manichæorum. Docent eas, quæ post tertium sæculum exortæ sunt , debere suam originem Aristotelicis dogmatibus . Hinc Ambrosius ad Psalm. 118. docet Christianos debere imprimis cavere à philosophiâ: *Nihil nobis , inquit , cum philosophiâ, ne fidem nostram per elementa mundi hujus traducat à vero . Ne quis assertionem nostram per philosophiam nostram deprædetur : sic enim Arianos in perfidiam ruisse cognovimus , dum Christi generationem putant usus hujus sæculi colligendam . Reliquerunt Apostolum , sequuntur Aristotelem : ergo &c.*

Resp. ad 1. neg. min. Ad 2. distin. ant. Patres asserunt omnes fermè hæreses ex philosophiâ prodiisse per accidens, conc. ant. Prodiisse per se, neg. ant. Philosophia hæreses per accidens peperit, seu, ex quorundam hominum iniquitate, qui aut ejus axiomatibus usi sunt, ut impugnarent fidei principia ; aut qui illius argumentis dederunt primas partes , cum secundas tantum obtineant ; aut qui contenderunt nihil credi debere, quod philosophia capere, probareque non possit: *In homine carnali (inquit Augustinus serm. 147. de tempore) tota regula intelligendi est consuetudo cernendi , quod solent videre credunt , quod non solent , non credunt.*

Objicies 2. Apud Antiquos innumeræ sunt sen-

38 Instit. Theolog. Prolegomena.

sententiæ contra dialecticam . 1. Tertullianus de Præscript. cap. 7. scribit Catholicos ab hæreticis differre , quòd ipsi præ manibus habeant Aristotelis dialecticam : illi è contra Dominum in simplicitate quærant . 2. Ambrosius lib. 1. de fide Tertulliano , hisce verbis subscribit : *Omnem vim venenorum suorum* , inquit de Arianis agens , *in dialecticâ disputatione constituunt . Sed non in dialecticâ complacuit Deo saluum facere populum suum* . 3. Augustinus serm. 87. de tempore , docet cinifes , quibus tertiâ plagâ Ægyptii vexati sunt , designare dialecticæ artis astutiam , vel hæreticorum calliditatem . Ergo , ex Patribus , dialectica non est utilis Ecclesiæ .

Resp. conc. ant. disting. conseq. Non est utilis per accidens , seu propter abusum , conc. ant. per se , & secundum substantiam , neg. ant. Peccarunt hæretici , quòd divinam revelationem , aut scripturis , aut traditione contentam arte dialecticâ convellere tentarint . Piè è contra Catholici utuntur illius regulis , ut ex articulis expressè revelatis inferant alios , qui in eis mediatè , ac virtualiter continentur .

Præterea , quamvis ad perscrutandas scripturas , (ut Joannis 25. jubemur à Christo) satis esset humana ratio , antequam hæreses prodiissent , non satis est modò post eorum ortum ; quippè nunc indigent theologi dialecticæ regulis , ut hæreticorum iis abutentium sophismata dissolvant . Iis (ut jam observatum est superiùs) utiliter contra Eunomium , & contra alios suæ ætatis hæreticos Patres usi sunt .

Objicies 3. Theologia scholastica scatet innumeris quæstionibus & ridiculis , & inutilibus . Pleraq; quæ sunt tantùm de possibili , expendit : ergo Ecclesia nullum fructum percipit ex theologia scholasticâ .

Resp. 1. Id quod objicitur , oriri ex defectu , non quidem ipsius theologiæ scholasticæ , sed scholasticorum , qui , cùm ea uti debeant ad
ex-

explicandam fidem, abutuntur ut chymeras fingant: hincque fit, ut graves alioquin quæstiones reducant ad puras eliquationes metaphysicas. Ad id eos auctores juvat quidem scholastica, non tamen per se, sed per accidens tantum.

Resp. 2. quæstiones quasdam metaphysicas de possibili, de modo rei, nec non novas aliquas nonnunquam perutiles esse, ut fides plenissime explicetur; imò aliquando quæstiones illæ novæ, sunt necessariæ propter hæreticos, qui novas, & antea inauditas difficultates movent: *Didicimus* (ait Augustinus lib. 2. de dono perseverantiæ cap. 2.) *singulas quasque hæreses intulisse Ecclesiæ proprias quæstiones contra quas diligentius defenderetur Scriptura divina, quàm si nulla talis necessitas cogeret.*

Ejusdem effatipraxim videre est in Patribus, qui Sabellianismum, Arianismum, Nestorianismum oppugnarunt; nempe coacti fuerunt subtilia quædam, & nova discutere, ut iis, ac similibus erroribus obviam irent. Idem videre est in Concilio Remensi, quod coactum est contra Abaelardum essentiam divinam realiter distinguentem ab attributis. Idem quoque in Concilio Florentino, ubi contra Græcos actum est de Spiritus Sancti processione à Patre & Filio; tunc enim necessariò disputandum fuit de conceptibus objectivo, & formali, de relatione, de principii unitate, & aliis similibus.

Objicies 4. Scholastica theologia utitur multis terminis barbaris, qui theologum maximè decent, ut sunt istæ voces, *Materialiter*, *Formaliter*, *Reduplicativè*, *Metaphysicè*, *Entitas*, *Formalis ratio*, *Proprietas personalis*, *Quidditas*, & aliæ similes; imò nonnunquam solecismis gloriatur, ut est terminus iste, *Opus operatum*, quem adhibent scholastici cum de sacramentis agunt. Ergo &c.

Resp. conc. ant. nego conseq. Ratio est 1. quia

Tom. I.

D iis

iis terminis , alioquin barbaris , conjunctæ sunt ideæ , quibus mysteria clarè , & absque æquivocatione explicantur . Ex iis scholasticis terminis nonnulli adhibiti sunt à Sacrà Tridentinâ-Synodo , ubi de justificatione disserit : aliqui alii jam multorum sæculorum usu confirmati sunt : qui ergo aliis uti vellet , id tentaret quod vir , qui receptum in aliquo regno idioma , in aliud mutare conaretur : *Dicamus ergo sanerat pro saneratur* (ait Augustinus ad Psalm. 36.) *non timeamus fœdulas grammaticorum , dum tamen ad veritatem solidam , & certiozem perveniamus . Reprehendit qui intelligit , ingratus quia intellexit .*



DISSERTATIO QUARTA.

De Locis Theologicis.

Not. 1. **L**Ocorum theologicorum nomine intelliguntur fontes quidam , ex quibus Theologia eruit argumenta , quibus utitur , vel ut fidem explicet , vel ut adstruat regulas morum , vel ut tum fidem , tum morum regulas liberet ab hæreticorum hominum , aliquorumq; etiam Catholicorum proprio genio indulgentium corruptelis.

Not. 2. Decem præcipui sunt loci Theologici : Scriptura Sacra : Traditio : Concilia : Judicium Romani Pontificis : Ecclesiæ Catholicæ consensus : Auctoritas Patrum : Scholasticorum : Historiæ : Humana ratio . De singulis hæc in dissertatione seorsim est agendum .

QUÆSTIO PRIMA.

De Scriptura sacra.

HAc in quæstione dicemus de Sacra Scripturæ veritate, integritate, auctoritate, auctore, canone, linguâ originali, versionibus, sensibus.

CAPUT PRIMUM.

De veritate Sacra Scriptura.

Not. **H**ic veritatis nomine non intelligitur sententiarum, quæ in scripturis continentur, conformitas cum veritate, sed intelligitur realitas, seu quæritur utrùm Scripturæ, quæ dicuntur Sacra, sint libri veri, prout verum opponitur supposito.

CONCLUSIO. Scripturæ, quæ dicuntur Sacra, non sunt libri suppositi, sed omninò veri.

Probatur. Eæ Scripturæ non sunt libri suppositi, sed omninò veri, qui exarati fuerunt ab iis auctoribus, quibus tribuuntur, & iis circiter temporibus, quibus scripti feruntur: atqui Scripturæ, quæ Bibliis continentur, exaratæ fuerunt ab iis auctoribus, quibus tribuuntur, & scriptæ iis circiter temporibus, quibus scriptæ feruntur: ergo non sunt libri suppositi, sed omninò veri.

Major propositio constat, nec enim alio argumento probari potest Commentarios Cæsaris, opera Ciceronis, Augustini, non esse libros suppositos, sed veros, quàm quod quovis sæculo adscripti fuerint auctoribus, quorum nomen præferunt, existimatumq; sit ea esse scripta iis

circiter temporibus, quibus scripta feruntur.

Itaque probatur minor. Judæi qui Moysis ætate vixerunt, Pentateuchum suis posteris tradidere tanquam germanum illius fœtum, quamvis recenseat scelera ab iis in deserto commissa. Qui Prophetis coætanei fuerunt, eorum libros, tanquam ab illis Prophetis scriptos natis suis, ac popularibus commendarunt. Eâdem ratione in libros novi testamenti gesserunt se Christiani, qui audierunt Apostolos; idem pariter præstiterè, qui conspexerunt oculis priores Apostolorum discipulos; & sic proximâ, & continuatâ serie ad nostra usque tempora factitatum est.

Hinc factum est, ut Judæorum synagoga ad nos usque detulerit antiqui testamenti libros: hinc etiam Ecclesia Christiana à suis incunabulis ad hæc tempora pro genuinis, ac veris habuit omnes ferè libros, qui Bibliis continentur. Loca quibus id evincitur, proferentur inferiùs cum dicemus de Librorum Sacrorum Canone. Hinc igitur necessariò concluditur, vel nullius hominis testimonium valere ad faciendam de facto aliquo fidem, vel certissimum esse, quod proferatur pro veritate Scripturarum, quæ Bibliis continentur.

C A P U T II.

De Scripturarum integritate.

Not. **S**cripturæ Sacræ continentur, vel vetere, vel novo Testamento: dicendum est ergo de integritate Scripturarum, tum veteris, tum novi testamenti.

CONCLUSIO I. Scripturæ veteris Testamenti, integræ sunt quoad partes substantiales.

Probatur. Si quoad partes aliquas substantiales depravatae essent veteris testamenti scripturæ, ea depravatio facta fuisset à Judæis: atqui
ab

ab eis facta non fuit : ergo scripturæ veteris testamenti non sunt quoad partes substantiales corruptæ . Probatur minor . Nec fuerunt corruptæ ante Christum, nec post Christum : ergo reverà corruptæ non fuerunt .

Primò corruptæ non fuerunt ante Christum . Nam si reverà corruptæ fuissent , corruptionem illam, tanquam maximum crimen Scribis, Phariseis, ac reliquis Judæis Christus exprobrasset ; ut rectè hisce verbis observat Hieronymus ad cap. 6. Isaïæ : *Nunquam Dominus & Apostoli, qui cetera crimina agunt in Scribis & Phariseis, de hoc crimine, quod erat maximum reticissent .* Atqui eam corruptionem Christus nusquam exprobravit ; imò Scripturarum integritatem tanquam indubitatam Christus supponit, dum Joannis 5. ad scrutandas Scripturas auditores suos hortatur, necnon Matthæi 23. ubi hæc habet : *Super Cathedram Moysis sederunt Scribæ, & Pharisei, quæcumq; ergo dixerint vobis facite .* At non fuisset hortatus ad scrutandas corruptas quoad substantiam scripturas .

Secundò . Scripturæ veteris testamenti quoad substantiam corruptæ non fuerunt à Judæis post Christum natum ; nam quæ à Domino, & ab Apostolis ex veteri testamento laudata sunt, eodem planè modo in nostris codicibus leguntur .

Præterea si Judæi malitiosè depravassent Scripturas veteris testamenti, id egissent præcipuè in vaticiniis de Christo, & in locis, quæ agunt de præcipuis religionis Christianæ capitibus : atqui eas non corruperunt, aut in vaticiniis de Christo, aut in locis ad præcipua religionis capita spectantibus ; siquidem in iis tum vaticiniis, tum locis, aut non differunt à nostris Scripturis Judæorum codices, aut si differant in aliquibus, ea discrimina nullius ferè sunt momenti . Præterea codices Hebræorum sæpè magis favent mysteriis religionis Christianæ, quàm codices Latini & Græci, quibus Christiani passim

44 Instit. Theolog. Prolegomena.

antuntur, v. gr. Psal. 2. ubi Græci, & Latini codices legunt: *Apprehendite disciplinam, ne irascatur Dominus*, in Hebræis est: *Osculamini filium, ne irascatur*, quæ quidem lectio, ut patet, magis nobis pro Christo favet, quàm prior.

Confirmantur, quæ hætenùs dicta sunt. 1. Si aliqua substantialis depravatio facta fuisset à Judæis in libris legalibus, eam illis objecissent Samaritani, qui Moyfis libros secum detulerant, cum à Roboamo ad Jeroboamum defecerant. Si verò apud Samaritanos facta fuisset ea legis depravatio, id passi non fuissent Prophetæ Regni Israel, idque etiam illis exprobrassent sacerdotes, qui in Regno Juda permanserant. 2. Cum in singulis familiis, saltem Tribus Levi, utpotè Altaris ministerio consecrata, essent sacri codices, & ubique terrarum eos Judæi penès se haberent, impossibile fuisset, ut fieret substantialis, in aliquibus capitibus corruptio, quin eam aliqui observassent, illique obstitissent pro viribus. Illud autem argumentum eò majoris est ponderis, quòd Judæi incredibili zelo, ac reverentiâ ferrentur in legem, & reliquos libros sacros, ita ut, Josepho teste, lib. 1. contra Appionem, parati fuerint semper mortem obire potius, quàm vel unum apicem in sacris codicibus immutare. Hinc Augustinus lib. 15. de civitate Dei cap. 13. meritò asserit Judæos, nec potuisse, nec voluisse sacros codices depravare: *Anne, inquit, credibile est, ipsos codicibus suis voluisse cripere veritatem, ut nobis eriperent auctoritatem, vel per totum orbem dispersos potuisse in hoc conspirare, nullo contradicente?*

Confirmantur iterùm ea omnia, ex eo quòd repugnet Dei in suam Ecclesiam providentiæ, quòd passus fuerit substantialem in aliquibus capitibus depravationem fieri à Judæis in sacros codices veteris testamenti, quippè ex iis petuntur invictissima argumenta pro Christianæ religionis veritate; unde Augustinus lib. 15. de civit.

civit. Dei cap. 46. observat ideò Dei providentiam permisissè, ut Judæi per totum orbem dispergerentur, ut ubique proferrent monumenta nostræ fidei : *Vt Judæi*, inquit, *tanquam capsarii nostri libros nostros circumferrent, ut cum pagani non credunt, quæ nos de Christo prædicta fuisse dicimus, quasi à nobis essent conficta, mitamus eos ad inimicos fidei nostræ Iudæos, qui libros nostros circumferunt, quibus eadem habentur, quæ nos prædicamus.*

CONCLUSIO 2. Scripturæ novi testamenti sunt integræ quoad partes substantiales.

Probatur 1. Quæ probant librorum testamenti veteris integritatem, probant etiam integritatem librorum novi testamenti. 2. Libri novi testamenti iidem sunt, & eodem modo in rebus, quæ ad fidem, aut mores spectant, reperiuntur apud sectas, alioquin sibi infensissimas : ergo depravari non potuerunt in rebus ad fidem, aut mores spectantibus ; nam si à Catholicis tentata fuisset ea depravatio, eam illis hæretici mox improbrassent ; si autem ab hæreticis, crimen arguissent Catholici. 3. Nec tempus, nec modus, nec auctores depravationis, de quâ agitur, proferri possunt : fictitia est ergo ejusmodi depravatio. 4. Episcopi tum in Conciliis œcumenicis, tum in suis Diœcesibus detexissent graves illas scripturarum corruptiones, si quæ alicubi tentatæ fuissent, imò & singuli ferè sacerdotes, cum in Hæris Canonicis nonnihil ex Sacra Scripturâ legere teneantur.

Ex iis, quæ hucusque dicta sunt, sequitur necessariò, codices qui sacri sunt Ecclesiæ Christianæ, eosdem esse quoad substantiam, quos Moyses, Prophetæ, Matthæus, Marcus, Lucas, Joannes, Paulus, Petrus, Judas, Jacobus conscripsere ; ac proindè, cum editi à sanctis illis hominibus libri, sint fidei, ac morum norma, ad eos quos Ecclesia habet penès se, fides ac mores exigi debent. Sed de eo argumento dicetur inferius.

Solvuntur adversariorum argumenta.

Objicies 1. Ideò asseritur Judæos non depravasse libros veteris testamenti quoad partes essentielles, quòd id fuerit impossibile: atqui reverà fuit possibile; nam Judæi ubique dispersi, adstricti erant decretis Rabbiorum, qui in Palæstinâ primùm, postea Babylone judicabant de rebus ad religionem spectantibus: ii verò Rabbini in odium Ecclesiæ Christianæ faciliè consentire potuerunt in sacrorum codicum depravationem: ergo in omnes Judæorum synagogas irrepere potuit aliqua, etiam substantialis depravatio.

Resp. neg. min. Ratio est, 1. quia moraliter est impossibile, ut Rabbini, qui ex toto orbe confluebant in Palæstinam, & Babylonem, ut synedrium agerent, consenserint, nullo prorsus excepto, in corruptionem, de quâ est quæstio. 2. Non in Judæorum tantùm, sed & in Christianorum manibus erant codices veteris testamenti; ac proindè Christiani corruptelam illam Judæis exprobrassent, si eam vel tentare fuissent auli. 3. Detur adversariis Rabbinos, absolutè loquendo, potuisse depravare sacros codices, certum tamen eos actu non depravasse; nam quamvis nugatorias, & ineptas expositiones tradiderint, tamen usque ad superstitionem, verborum legis, & prophetarum corticem servarunt.

Objicies 2. Multa errata irreperunt in sacros, tum veteris, tum novi testamenti codices, v. gr. in codicibus, quibus Judæi nunc utuntur, hæc habentur Genesi 8. *Corvus egrediebatur, & reversebatur*, cum tamen Lxx. Vulgata latina, & omnes Patres legant: *Non reversebatur*.

Resp. 1. dist. ant. Ireperunt errata, quæ non sunt contra fidem, & mores, conc. ant. Quæ sunt contra fidem, aut mores, neg. ant. Ea autem levioris momenti errata à Judæis malitiosè facta non fuerunt, cum non sint ex iis capitibus, in
qui-

quibus à Christianis dissentiunt, sed aut scribarum incuriâ, aut casu aliquo alio fortuito contingere. Fusiùs exponetur ea solutio, ubi de vulgatæ latinæ editionis auctoritate dicetur.

Resp. 2. ex eo, quòd sint in rebus parvi momenti diversæ, imò & contrariæ lectiones in Judæorum codicibus, non sequi Christianorum codicum lectionem hodiernam, esse semper, ac quovis in casu præferendam codicibus Judæorum; unde Bellarminus docet non defuisse Biblia Latina, quæ legerunt, ut est in Hebræo: *Corvus egrediebatur, & revertebatur*. Sed de diversis lectionibus, si quæ occurrant, dicetur inferiùs.

Objicies 3. Judæi fatentur loca quædam aliter olim lecta fuisse, ac habent hodierni codices, quibus ipsimet in synagogis utuntur: ergo depravati fuerunt hodierni Judæorum codices. Probatur antecedens. Consentiunt Rabbini nonnulla mutata fuisse à sapientibus, & inserta codicibus hodiernis; illas verò mutationes vocant correctiones scribarum.

Resp. 1. cum Bellarmino, fictitiâ esse correctionem illam, quàm Judæi prædicant.

Resp. 2. cum nonnullis aliis correctionem factam fuisse ab Esdra, ac posterioribus Prophetis, qui libros Sacros post captivitatem Babylo-nicam recognovere, quique, collatis inter se antiquis codicibus, restituerunt germanam lectionem, quæ in hodiernis codicibus reperitur; unde si aliter, ac nunc in aliquibus codicibus lectum est olim, erratum erat, quod Esdras Propheta, & Judæorum synagoga cortexere.

Confirmatur. Omnia quæ nunc extant exemplaria Hebraica, legunt secundum illas correctiones. Præterea omnes antiquæ versiones, etiam quæ ante Christum exaratae sunt, continent eas mutationes, in iisq; cum Hebræis codicibus consentiunt: id nimirum videre est in versione lxx. & vulgatâ Latina.

Objicies 4. Justinus Martyr in dialogo cum

D 5 Try-

48 Instit. Theolog. Prolegomena.

Tryphone, Irenæus libr. 3. cap. 24. nonnullique alii Judæos accusarunt de sacrorum codicum depravatione: ergo non sunt integri veteris testamenti codices, etiam quoad substantiam.

Resp. 1. Intelligi posse laudatos patres de depravatione quoad aliquas lectiones: probabile nimirum est, ubi duplex erat lectio, quorum una magis favebat Christianis, Judæos in eorum odium alteram suis codicibus inservisse; quæ quidem, cum discreparet ab ea, quam in sua Græca versione Septuaginta secuti fuerant, mirum non est, quod Ecclesia Christiana, quæ eâ versione utebatur, Judæos arguerit, quod scripturas depravasset.

Resp. 2. cum Vvaltono patres, de quibus in argumento, non loqui de ipsa synagoga Judæorum: eodem enim modo quoad substantialia se habent ejus Biblia quo nostra; sed loqui de Theodotione, & Symmacho, qui ubi à Christianismo ad judaismum defecissent, versionibus suis sacros codices depravarunt.

C A P U T III.

De Scripturarum auctoritate.

CONCL. I. **S**cripturæ veteris testamenti, quæ Bibliis continentur, sunt divinæ auctoritatis, seu, sunt ipsummet Dei verbum; ac proinde omnino infallibiles.

Probatur. Scripturæ veteris testamenti sunt, vel legales, vel historicæ, vel propheticæ, vel sapientiales: atqui omnes eæ Scripturæ sunt auctoritatis divinæ: ergo &c.

Prior minoris propositionis pars, seu libros legales esse auctoritatis divinæ, sic ostenditur. Illi libri sunt auctoritatis divinæ, qui conscripti sunt ab homine, qui divinitus ad eos scribendos missus est: atqui libri legales conscripti sunt
ab

ab homine, Moyse nimirum, qui ad eos scribendos divinitus missus est : ergo divinæ sunt auctoritatis.

Major constat, neque enim permittere potest Deus falsum aliquid eloqui eum, quem populi legislatorem constituit; unde probatur minor. Illius missio fuit divina, quæ veris miraculis confirmata est: atqui Moylis missio veris miraculis confirmata fuit: ergo fuit divina. Probatur minor. Miracula quæ in Pentatheuco dicuntur patrata à Moyse, verè ab eo patrata fuerunt: neque enim ipse Moyse, quem ex dictis supponimus authorem Pentatheuchi, ea miracula finxit, retulitque in librum, ut apud populares suos sibi conciliaret auctoritatem. Si enim Moyse fictis miraculis proposuisset Judæos decipere, rem omninò stultam vir, alioquin prudentissimus, tentasset, ut sequentibus momentis ostendi potest.

Primo. Ut consilium suum ad optatum finem perduceret, imponendum fuisset innumeræ propemodum populorum multitudini, cui tantum abest, ut aliquando adulatus fuisset, quin sæpiùs exprobrasset incredulitatem, ingratum animum, seditiones, blasphemias, adulteria, aliaque ejusmodi facinora, quibus sese in deserto commacularat.

Secundò. Ejusmodi naturæ erant illa miracula, ut illusioni obnoxia esse non possent: quippè inter ea recensentur flumina in sanguinem conversa, productio ranarum, quæ omnium Ægyptiorum domos pervaserant: locustæ, quæ omnes agros fuerant depopulatæ: primogenitorum omnium apud Ægyptios mors inopinata, quæ eadem nocte contigerat: divisio maris rubri, ut Israelitis panderet viam, & ut eorum hostes postea deglutiret: columna ignea, quæ noctu prælucebat ambulancibus: manna quod per quadraginta annos pluit de cælo, cum in deserto alimenta deessent: Core, Darhan, & Abiron

in pœnam impiæ temeritatis viventes sepulti in terra, quæ sinum suum aperuit.

Tertio. Ex illis portentis Moyses sumit argumentum orationum omnium, quas habuit ut Judæos eorum oculatos testes sæpè ad legis observationem hortaretur.

Quarto. Idem Moyses festa instituit ad perpetuam illorum miraculorum memoriam; præcepitque Israelitis, ut visa à se prodigia posteris commendarent.

Nec valet eorum responsio qui dicunt maleficos Ægyptiorum patrasse etiam miracula, nec tamen inde colligi posse quoddèi nomine egerint. Non valet, inquam, nam licèt malefici Ægyptiorum, in nonnullis portentis illuserint populorum oculis, non potuerunt tamen illudere in omnibus portentis, quæ Moyses peregit: unde Exodi cap. 8. hæc habentur, *Feceruntque similiter malefici incantationibus suis, ut educerent sciniphes, & non potuerunt & dixerunt malefici ad Pharaonem; digitus Dei est hic.*

Altera pars minoris, seu, libros historicos veteris testamenti esse divinæ auctoritatis, sic probatur. Ii libri divinæ sunt auctoritatis, quos tanquam libros auctoritatis divinæ venerata est antiqua Judæorum synagoga: atqui antiqua Judæorum synagoga libros historicos veteris testamenti venerata est tanquam libros auctoritatis divinæ: ergo &c. Minor certa est, relati scilicet erant in Judæorum canonem libri historici veteris testamenti; & nunc ubique terrarum à Judæis habentur pro canonicis: major verò probatur ex eo quodd ante Christum synagoga Judæorum esset vera Dei Ecclesia; ac proinde in dirimendis fidei controversiis omnino infallibilis: hinc Christus nunquam Judæos arguit quodd illis historicis libris divinam auctoritatem ascriberent, imò nonnullos tanquam divinos laudavit.

Tertia pars ejusdem minoris propositionis probatur, seu libros propheticos conscriptos fuisse
Dei

Dei instinctu & auctoritate, ostenditur ex eventu quo docemur ea, quæ prædixerant, quæque ferè ex hominum arbitrio pendebant fuisse completa, ut patet de regno tribus Judæ, Genes. 49. de annorum 70. captivitate, de Cyri regis nomine, & in Judæos quos liberaret benevolentia, Isajæ 45. Tractant illud argumentum S. Augustinus lib. 12. de Civitate Dei cap. 10. & lib. 13. contra Faustum cap. 12. necnon epistolâ 14. S. Gregorius homilia 1. de adventu; Origenes cap. 1. lib. 4. de principiis.

Quarta pars ejusdem minoris ostenditur ex duplici capite. *Primò.* Morum regulæ, quæ libris sapientialibus continentur, purissimæ sunt, nihilque admixtum habent terreni; nimirum hominem separant à creatis omnibus, imò & à seipso, ut veritatis, quæ Deus est, cognitioni, & amor totum se tradat. 2. Libri Sapientiales, qui continentur in canone Judæorum, habiti sunt pro divinis ab eorundem Judæorum synagogâ: unde nonnulli, ut jam dictum est, in novo testamento à Christo & ab Apostolis laudati sunt.

Ex iis, quæ hucusque dicta sunt, invictè demonstratur veritas nostræ conclusionis, seu, singulos veteris testamenti libros, qui erant in canone Judæorum, esse divinæ auctoritatis.

CONCLUSIO 2. Libri Novi testamenti, qui bibliis continentur, divinæ sunt auctoritatis.

Probatur. Illi libri sunt divinæ auctoritatis, qui conscripti sunt ab iis qui divinitus missi sunt ad prædicandum Evangelium: atqui libri novi testamenti conscripti fuerunt à viris qui divinitus missi sunt ad prædicandum Evangelium: ergo libri novi testamenti qui bibliis continentur, divinæ sunt auctoritatis.

Major patet quia eos qui primùm divinitus missi sunt ad prædicandum Evangelium, oportuit esse viros maximè sanctos & omninò infallibiles, seu qui nec decipi, nec decipere potue-

tuerint ; alioquin Deus malè consulisset sanctitati, & veritati, quas Ecclesiæ ab eis ædificandæ conferre decreverat ; unde probatur minor . Ii divinitus missi sunt , qui in suæ missionis confirmationem vera patraverunt miracula : neque enim vera miracula, cum à Deo sint , fieri possunt in mendacii confirmationem : atqui scriptores librorum novi testamenti in suæ missionis confirmationem vera patrarunt miracula, ea nimirum, quæ in novo testamento referuntur ; neque enim supposititii sunt libri novi testamenti, cum pro veris habiti sint, & Apostolorum temporibus, & proximè ad nos usque sequentibus ætatibus ; quippè laudantur , tum ab Apostolorum coetaneis, tum à proximè subsequen- tibus scriptoribus, ut videre est in Ignatio, Polycarpo, Irenæo, Justino, Athenagorâ, Tertulliano, Origene, Cypriano. Si autem supposititii non sunt illi libri, impossibile est, ut falsa sint facta, quæ in eis referuntur ; alioquin stultè omninò egissent Apostoli, ac discipuli facta illa in confirmationem fidei referentes coram iis, qui ibidem dicuntur fuisse eorundem factorum oculati testes ; stultè pariter egissent tot homines, alioquin sapientissimi, qui pro factorum illorum veritate mortem libentissimè subierunt.

C A P U T IV.

De Scripturarum auctore.

Not. **H**Oc in articulo quæstio est, 1. de principali scripturæ auctore, 2. de instrumentali, seu de iis hominibus, quorum operâ conscripti sunt Bibliorum libri. Conferent ea, quæ hic dicuntur ad eorum confirmationem, quæ capite superiore dicta sunt.

CONCLUSIO I. Deus est principalis auctor scripturarum, quæ Bibliis continentur.

Pro-

Probatur. Earum scripturarum Deus est principalis author, quæ divinæ sunt authoritatis; neque enim alicui libro authoritas divina aliunde potest evinci, quàm ex eo, quòd Deus sit illius author: atqui ut ostensum est superiori articulo, libri scripturarum, quæ Bibliis continentur, divinæ sunt authoritatis: ergo &c.

Quæres 1. quo sensu Deus dicatur scripturarum principalis author.

Resp. eo sensu, quòd eas Apostolis, & discipulis suggesserit, ac dictando quasi adspirarit: *Ipse hæc*, inquit Gregorius Magnus præfat. in librum Job scripsit, *qui hæc scribendo dictavit, ipse scripsit, qui & illius operis inspirator extitit*. Eam doctrinam hausit Gregorius Magnus ex hisce verbis 2. Petri cap. 1. *Non voluntate humana allata est aliquando prophetia, sed Spiritu Sancto inspirati locuti sunt sancti Dei homines*.

Quæres 2. quomodo Deus dictarit Biblia.

Resp. Deum eo sensu dictasse Biblia, quòd Sacrorum Scriptorum mentem, voluntatem & manum multò perfectiùs, quàm solent homines, qui quædam Scribis dictant, affecerit.

Et quidem 1. mentem affecit tribuendo earum rerum, quæ dictavit cognitionem, vel immediate eam imprimendo menti, vel mediatè per sensus nimirum. 2. Voluntatem movit, inspirando, excitando, impellendo, ut vellent fideliter exscribere, quæ menti revelata fuerunt. 3. Manui adfuit, ne rem pro re, verbum pro verbo, litteram pro litterâ scriberent. Necessaria autem fuit ea singularis Dei in sacrum Scriptorem protectio, ut quævis incogitantia, & error vitarentur.

CONCLUSIO 2. Homines fuerunt instrumentalis Bibliorum causa.

Probatur. Ii sunt instrumentalis Bibliorum causa, quibus Deus præcipuus, ut dictum est, eorum author, usus est, ut ea scriptis mandaret: atqui Deus hominibus usus est, ut Biblia scriptis

ptis mandaret, Moyse nimirum Prophetis, Apostolis & Discipulis.

Quæres 1. an omnia, quæ scripta sunt in Bibliis, divinitus dictata sunt.

Resp. id quod quæritur negasse duplicis generis homines.

Primò, quidem olim Anomæi (ut videre est apud Epiphanium Hæresi 76.) nuper Erasmi Annot. 2. in caput 2. Matthæi, contenderunt à Prophetis, Euangelistis, aliisque Sacris Scriptoribus, nonnulla interdum scripta fuisse secundum hominem, hoc est, in quibus aut memoria lapsi sint, aut minùs certa conscripserint.

Secundò. Extiterunt alii, qui asseruerunt Bibliorum authores vera quidem semper scripsisse, sed non omnia ex motu, & inspiratione Spiritus Sancti, quippè aiebant, sunt aliqua, quæ Spiritus sancti majestatem non decent, ut illud 2. ad Timoth. 4. de *penula*, quam Paulus ait se Troade reliquisse, necnon illud Tobix cap. 11. de cane Tobix, caudam movente.

Sed dicendum est falsum esse omninò duplex illud responsum. Ratio est, quia si quid, vel minimum, sit in Scripturis, de quo dubitari possit, an Spiritu Sancto dictante scriptum sit, nullum erit Scripturæ caput, de quo idem dubium esse non possit, sicque ex Augustino lib. 1. de doctrina Christi cap. 27. *tota Scripturarum vacillaret authoritas, ideòque & fides nostra*.

Ad argumentum verò petatum ex rebus, quas adversarii contendunt non decere Dei majestatem, dicendum est, eas Dei nec bonitate, nec majestate esse indignas, quia cum majoribus conjunguntur, & suam aliundè habent utilitatem; nonnunquam enim sunt circumstantiæ, quibus facta redduntur certiora.

Quæres 2. An Bibliorum Scriptores liberè scripserint.

Respondent nonnulli Sacros Scriptores à Spiritu Sancto ita correptos fuisse, ac incitatos, ut libe-

liberè quidem libertate voluntatis, sed non libertate indifferentiæ scripserint; hoc est voluntariè quidem eos scripsisse, sed non ita, ut potuerint non scribere.

Respondent alii, quibus subscribimus, Scriptores Sacros liberè scripsisse Biblia. 1. Id Origenes lib. 3. de principiis cap. 2. variis argumentis probat. 2. Deus solet hominibus tanquam instrumentis uti modo, qui eorum naturæ congruit: per eas igitur liberas ex parte hominum actiones operatur. 3. Facilitas tum loquendi, tum scribendi, quâ donati sunt Bibliorum authores, summam quidem, ac maximè perspicuam in eorum mente rerum cognitionem arguunt, sed non important in voluntate scribendi necessitatem. 4. Ubertius, ac efficax auxilium, quo Spiritus Sanctus adjuvit Scriptores Sacros, cum voluntatis libertate cohæret, quàm maximè, ut docent theologi in tractatû de gratia.

Nec alicujus est momenti, quod objicit Abulensis, Moysen nempe si liber fuisset, nunquam hoc elogium de seipso scripturum fuisse: *Erat enim Moyses vir mitissimus*. Nam id scripsit Moyses, tum ex peculiari afflatu Spiritus Sancti, tum ex speciali Dei præcepto: afflatus autem ille, præceptum illud cohærent cum arbitrii libertate.

C A P U T V.

De Scripturarum Canonem.

Not. 1. **C**anon sumitur primò pro norma, ad quam ars aliqua, vel opus exigitur, eo sensu ecclesiasticæ sanctiones vocantur Canones. Sumitur secundo pro rerum quarumdam numero, seu chatalogo, sic in Concilio Laodicæno cap. 24. chatalogus Clericorum, qui ministrant in Ecclesia, dicitur Canon.

Not. 2.

Not. 2. Certum est Scripturas Sacras esse canonicas utroque mox tradito sensu : sunt enim primò, tum fidei, tum morum norma : Secundò, certo ac determinato numero, seu catalogo continentur ; idque ostenditur ex Augustino, qui lib. 2. de Baptismo contra Donatistas cap. 6. sic loquitur : *Afferamus divinam stateram de Scripturis sanctis tanquam de thesauris dominicis ; hæc etiam habet idem S. Pater lib. 5. contra Cresconium cap. 31. Salubri vigilantia Canon Ecclesiasticus constitutus est, ad quem certi Prophetarum, & Apostolorum libri pertineant, quos omninò judicare non audeamus, & secundum quos de cæteris, vel fidelium, vel infidelium libris liberè judicamus.* Ostenditur iterum ex Concilio Tridentino, quod sessionem quintam, sic inscribit : *Decretum de Canonicis Scripturis ; earum catalogum indicem appellat : sacrorum, inquit, librorum indicem huic decreto adscribendum censuit.* In decreti calce sic, recensito eorum indice, loquitur : *Si quis libros ipsos integros..... pro sacris, & canonicis non susceperis..... anathema sit.*

Not. 3. Scripturarum Canon sumptus, ut mox dictum est, pro catalogo, seu indice librorum Sacrorum, hoc est, qui divinæ sunt auctoritatis, alius fuit Judæorum, alius Catholicorum, alius Hæreticorum : de triplici illo Canone subsequentibus articulis est à nobis dicendum.

ARTICULUS I.

De Canone Judæorum.

Not. 1. **H**ic methodi causâ quæremus : 1. quot libros complectatur Judæorum Canon : 2. an olim plures, quàm nunc sint, continuerit : 3. à quo confectus fuerit ille Canon.

CON-

CONCLUSIO I. Judæorum Canon, nec plures, nec pauciores, quàm viginti duos libros complectitur.

Probatur I. Nec plures, nec pauciores libri sunt in Canone Judæorum, quàm Josephus, vetus Ecclesia Christiana, hodierna Judæorum synagoga recensent: atqui Josephus, vetus Ecclesia Christiana, hodierna Judæorum synagoga; nec plures, nec pauciores, quàm viginti duos libros recensent in Judæorum Canone: ergo nec plures, nec pauciores sunt, quàm viginti duo.

Minor propositio sic per partes ostenditur. *Primò* Josephus quem, cum sacerdos esset, fugere non potuit, quinam essent apud suam gentem libri Canonici, lib. I. contra Appionem conceptis terminis asserit omnia, quæ ad suam gentem spectarent, duobus tantum supra viginti libris contineri. *Secundò* Origenes apud Eusebium lib. 6. historiæ cap. 23. Synopsis, quæ tribuitur Athanasio, Epiphanius lib. I. Hæresi 8. S. Hilarius præfatione in Psalm. Hieronymus in prologo galeato definiunt apud Judæos viginti duos tantum libros extare, qui existimentur esse divinæ autoritatis. *Tertiò* nec plus, nec minus, quàm viginti duos, hodiernorum Judæorum Biblia complectuntur.

Objicies. Melito Sardenfis apud Eusebium hist. lib. 4. cap. 26. scribit Judæorum Canonem complecti viginti quatuor libros Sacros: Epiphanius Hæresi 8. numerat in eodem Canone libros viginti septem: ergo malè asseritur, quòd sint tantum viginti duo.

Resp. conced. ant. neg. conseq. Ratio est, quia scriptores in argumento laudati nonnullos ex libris, de quibus loquitur Josephus, in duos aut plures partiuntur: è contra Josephus libros, quos illi authores partiuntur, tanquam unum numerat.

Qui cum Josepho sentiunt, seu qui viginti tantum duos veteris testamenti libros numerant,
po-

ponunt, *primò* libros Moysis quinque, *secundò* prophetarum libros octo, nimirum, Josue, Judices cum Ruth, *tertiò* Samuelis duos velut unum librum, *quartò* Regum duos velut unum, id est, tertium, & quartum, *quintò* Isaiam, *sexto* Jeremiam cum Threnis, *septimò* Ezechielem, *octavò* librum unum duodecim minorum prophetarum, *nonò* hagiographos libros novem, scilicet, Job, David, Proverbia, Ecclesiastem, Canticum Canticorum, Danielelem, Paralipomena, Esdræ duos, ut unum, & Estherem.

Qui autem viginti quatuor constituunt, avelunt Ruth à libro Judicum, & Threnos à Jeremiâ; sicque duos libellos adjungunt duobus viginti superioribus.

Qui verò viginti septem recensent, tripliciter id agunt. Nam *primò* S. Epiphanius libro de pond. & mens. ex Psalterio libros quinque constituit, & adjungit Threnos, & epistolam Baruch, *secundò* duobus & viginti supra numeratis addit Ruth, libros duos regum, unum ex Paralipomenis, ex Esdrâ unum, *tertiò* idem S. Pater Hæresi 8. suis cum numeris omnes veteris testamenti libros recenset: *quinque Moysis*, *sextus Josue*, *septimus Indices*, *octavus Ruth*, *nonus Job*, *decimus Psalterium*, *undecimus Proverbia*, *duodecimus Ecclesiastes*, *decimustertius Canticum*, *decimusquartus Regum primus*, *decimus quintus*, *decimus sextus*, *decimus septimus*, *Regum secundus*, *tertius*, *quartus*, *decimus octavus Paralipomenon primus*, *decimus nonus Paralipomenon secundus*, *vigesimus Isaias*, *vigesimus primus duodecim Prophetæ minores*, *vigesimus secundus Ieremias*, *vigesimus tertius Ezechiel*, *vigesimus quartus Daniel*, *vigesimus quintus Esdræ primus*, *vigesimus sextus Esdræ secundus*, *vigesimus septimus Esther*; hætenus Epiphanius.

CONCLUSIO 2. Olim apud Judæos plures erant libri, quàm nunc sint in eorum Canones, & essent Josephi temporibus.

Pro-

Probatur, Scripturæ recensent libros, qui jam non sunt in Canone Judæorum: ii autem viginti numerantur. Primus, liber *Bellorum domini*, Num. 21. secundus, liber *Iustorum*, seu liber *Recti*, Josue cap. 10. tertius, liber *Verborum*, seu rerum gestarum *Salomonis*, 3. Reg. cap. 11. quartus, liber *Verborum Regum Israel*, 3. Reg. cap. 14. quintus, liber *Verborum Regum Iuda*, ibidem, sextus *Samuelis libri*, 1. Paralip. capite ultimo, septimus, alius quidam *Samuelis liber*, 1. Reg. cap. 10. octavus *Nathanis*, 1. Paralip. cap. 29. nonus *Gad Prophetæ*, ibidem, decimus *Abiæ Prophetæ*, 3. Reg. cap. 5. undecimus *Adonis Prophetæ*, 2. Paralip. cap. 9. duodecimus *Iehu Prophetæ*, 2. Paralip. cap. 20. decimuster- tius *Chozai Prophetæ*, 2. Paralip. cap. 33. deci- musquartus *Salomonis triamillia Parabolarum*, 3. Reg. cap. 4. decimusquintus *Salomonis Can- tica quinquies mille*, ibidem ex textu græco se- ptuaginta, & ex vulgatâ editione, sed ex latinâ ad textum Hebræorum correctâ, *Cantica quinque su- pramille*, decimussextus *Salomonis physica*, ibi- dem, decimusseptimus, liber *Enoch*, ut ex Ju- dæ epistolâ collegit S. Augustin. lib. 15. de civit. cap. 23. decimusoctavus, epistola *Elia Prophetæ*, 2. Paralip. cap. 21. decimusnonus *Ieremiæ descri- ptiones*, 2. Mach. 2. vigesimus *Ioannis Hircani li- ber dierum*, 1. Mach. cap. ult.

Libris quos ex scripturâ hætenus recensui- mus addi possent, 1. liber *Eldal*, & *Medad*, apud Athanasium in synopsi. 2. In eadem syno- psi, ultrâ centum, & quinquaginta *Psalms*, *Psa- lmus unus*, qui legitur in græcis exemplaribus, & in græcorum horologio. 3. In eadem syno- psi, pluribusq; aliis authoribus *testamentum Moy- sis*, reperitur.

Quæres 1. an libri, qui mox recensiti sunt, aliquando fuerint Canonici apud Judæos.

Resp. quadruplicem esse de propositâ quæ- sitione authorum sententiam.

Prima

60 Instit. Theolog. Prolegomena.

Prima Origenis, qui præfatione in Cantica, dubitat an libri, de quibus agitur, fuerint aliquando Canonici.

Secunda, Joannis Drusii, qui epist. 101. censet eos fuisse sacros, sed negat fuisse Canonicos.

Tertia, quæ est Serarii, docet nonnullos ex iis libris fuisse Canonicos, sed non omnes.

Quarta, est S. Augustini, qui docet eos libros, nec sacros fuisse, nec Canonicos: sic enim loquitur libr. 18. de civit. Dei cap. 38. Nec enim videri debet, quod suspecta habeantur, quæ sub tantæ antiquitatis nomine proferuntur; quando quidem in ipsa historia regum Judæ, & regum Israel, quæ res gestas continet, de quibus eidem Scripturæ Canonice credimus, commemorantur plurima, quæ ibi non explicantur, & in libris aliis inveniri dicuntur, quos Prophetæ scripserunt, & alicubi eorum quoque prophetarum nomina non tacentur, nec tamen inveniuntur in Canone, quem populus Dei recipit. Cujus rei, fateor, causa me latet, nisi quod ego existimo, etiam ipsos, quibusea, quæ in autoritate religionis esse deberent, sanctus utique spiritus revelabat; alia, sicut homines historicâ diligentia; alia, sicut prophetas inspiratione divinâ scribere potuisse, atque hæc ita fuisse distincta, ut illa tanquam ipsis, ista verò tanquam Deo per ipsos loquenti, judicarentur esse tribuenda, ac si illa pertinerent ad ubertatem cognitionis, hæc ad religionis autoritatem, in quâ autoritate custoditur Canon; præter quem, si qua jam etiam sub nomine verorum prophetarum scripta proferuntur, nec ad ipsam copiam scientiæ valent, quoniam utrùm eorum sint, quorum esse dicuntur incertum est, & ob hæc eis non adhibetur fides, maximè his, in quibus etiam contra fidem librorum Canonicorum quædam leguntur, propter quod ea illorum non esse apparet: hætenus S. Doctor.

Ex iis S. Augustini verbis patet S. Doctorem
asse-

asserere, 1. nonnullos ex iis libris fuisse à Prophetis conscriptos, 2. se nescire, cur relati non sint in antiquum Judæorum Canonem, 3. verisimilem esse Prophetas eos scripsisse, ut homines, non autem ut Prophetas, 4. eos libros propter rationem mox allatam pertinuisse non ad religionis auctoritatem, sed ad cognitionis libertatem.

Quæres 2. an ii libri, de quibus in præcedenti quæstione, jam extent alicubi, & cur, si non extent, tandem perierint.

Resp. ad 1. eos libros nullibi jam extare; ita nimirum docent Catholici, Hæretici, Judæi, ut Abenezra in Num. cap. 21. Hinc concluditur *librum Reffi, & librum Bellorum Domini*, qui hodie sunt apud Hebræos, à recentioribus Rabbiniis conscriptos fuisse: ille quidem à R. Tham, iste à Ralbag.

Resp. ad 2. mirum non esse in sententiâ S. Augustini, quòd illi libri perierint, cum ex eo S. Doctore, ad religionis auctoritatem non pertinerent; unde etiam mirum non est, cur in novo testamento nusquam citentur: mirum pariter non est, cur divinâ providentiâ eos perire passa fuerit.

CONCLUSIO 3. Esdras author est Judæorum Canonis.

Probatur. Ille est author Canonis Judæorum, qui in unum corpus redegit, ordinavitque libros Sacros: atqui Esdras in unum corpus redegit, ordinavitque libros sacros; id nimirum docere videntur Chrysostomus hom. 8. in epistolam ad Hebræos, Hilarius, & Theodoretus præfatione in Psalm. sed ante eos Irenæus lib. 3. cap. 25. Tertullianus libro de habitu mulierum, Clemens lib. 1. Stromatum.

Quæres 1. num ante Esdræ tempora non extaret apud Judæos aliquis Scripturarum Canon.

Resp. ante Esdræ tempora extitisse quidem apud

62 Instit. Theolog. Prolegomena.

apud Judæos libros sacros, qui ante ipsum scripti fuerant; sed in unum scripturarum Canonem, seu chatalogum ex ordine redacti non fuerant.

Quæres 2. quo sensu Esdras dicatur Judaici Canonis author?

Resp. circa propositam quæstionem esse duplicem sententiam.

Prima eorum est, qui docent 1. universam Scripturam sacram periisse tempore captivitatis Babylonice; nempè in urbis excidio, & incendio templi. Docent 2. eam ab Esdra absque ullius exemplaris ope, solo Spiritus sancti afflatu, fuisse per quadraginta dies dictatam quinque viris, qui summâ celeritate excipiebant, quæ ab Esdra proferebantur. Nituntur ii authores capite 14. libri quarti Esdræ, ubi eorum opinio expressis verbis asseritur.

Alterâ sententia eorum est, qui censent non omnia scripturarum exemplaria extitisse in Templo Jerosolymitano cum à Chaldæis combustum est; ac proinde non omnia tunc periisse; & consequenter Esdræ eo sensu esse Judaici Canonis authorem; quod cum esset Scriba doctus, collatis inter se pluribus exemplaribus, errata correxerit, quæ per Scribarum, aut incuriam, aut imperitiam in sacros libros irreperant, tum etiam, quod (ut jam dictum est) scripturas in unum corpus ex ordine redegerit.

Nos secundæ illi opinioni subscribimus. Nam 1. quartus Esdræ liber, cujus testimonio prior sententia nititur, tantum abest, ut sit Canonicus, quin potius pluribus in locis Judaicis fabulis refertus sit. 2. Quis in animum inducat suum, incenso Jerosolymorum templo, nullos sacros codices apud privatos Judæos remansisse, & præsertim apud Ezechielem, Daniele, Jeremiam, Aggæum, Zachariam, Mardocheum, & ipsum Esdræ, aliosque pios, præsertim ex Tribu Levi, qui tunc in humanis agebant, & quibus cordierat Dei lex.

Quæ-

Quæres 3. An Canon quem Esdras correxit, ab Esdrâ tantum suam authenticitatem habuerit.

Resp. negat. authenticitatem nimirum suam habuit Canon ille ab synagogâ Judæorum, quæ tunc in amplissimum cœtum coacta, Esdrinum Canonem probavit: id innuunt laudati superiùs Patres: id quoque videre est in Rabbiorum operibus.

ARTICULUS II.

De Canone Catholicorum.

Not. 1. **C**atholicorum Canon spectari potest, vel respectu librorum veteris testamenti, vel respectu librorum novi testamenti.

Not. 2. Ecclesia Catholica spectari potest, vel in prioribus sæculis, vel in hisce posterioribus, hoc est, vel ante Concilii Tridentini tempora, vel post tempora Concilii Tridentini.

§. I.

Quinam libri semper fuerunt in Canone Catholicorum.

CONCLUSIO I. In omnibus Ecclesiis Catholicis, scripturarum Canon quovis sæculo hodie veteris testamenti libros complexus est; Pentateuchum Moysis, librum Josue, Judicum, Ruth, Regum quatuor, Paralipomenon duos, Esdræ & Nehemiæ duos, Job, Psalterium 150. Psalmorum, Proverbia, Ecclesiastem, Canticum Canticorum, Prophetas majores quatuor, Prophetas minores duodecim.

Probatur. Eos libros semper complexus est Canon omnium Ecclesiarum Catholicarum, quos omnes omnino Ecclesiæ Catholicæ semper agnoverunt divinæ esse authoritatis: atqui omnes

Tom. I.

E om-

64 Instit. Theolog. Prolegomena.

omnino Ecclesiæ semper agnoverunt libros, de quibus in conclusione, esse divinæ authoritatis : ergo semper eos complexus est Ecclesiæ Catholicæ Canon.

Minor propositio ostenditur, 1. testimonio Summorum Pontificum: quotquot enim à Christo, ad hæc usque tempora recensuere divinos veteris testamenti libros, eorum omnium meminerunt, de quibus agitur in conclusione: idque videre est in Innocentii Papæ I. epistola 3. quæ est ad Exuperium Tolosanum; videre est etiam in Gelasii I. decreto de libris sacris. Idem evincitur ex pluribus Conciliis, Laodicæno nimirum Canone 59. Carthaginensi III. Canone 47. Tridentino sess. 2.

Ostenditur 2. autoritate Patrum. Græci eos libros laudant tanquam divinos, Origenes apud Eusebium libr. 6. historiæ cap. 18. ipse etiam Eusebius libr. 3. historiæ cap. 25. Athanasius in synopsi, Cyrillus Jerosolymitanus catechesi 4. Patres Latini iisdem libris divinam authoritatem tribuunt, Hieronymus tum in prologo Galeato, tum in epistolâ ad Paulinum de studio scripturarum, ad Rufinum in explicatione symboli Augustinus libr. 2. de doctrina Christi. cap. 8. Iis autem Latinis Patribus præverat Hilarius præfatione in Psalmos.

CONCLUSIO 2. In omnibus Catholicis Ecclesiis Scripturarum Canon hosce novi testamenti libros, quovis sæculo complexus est, Evangelia Matthæi, Marci, Lucæ, Joannis, Acta Apostolorum; omnes Pauli epistolas, eâ tantum exceptâ, quæ est ad Hebræos; duas epistolas canonicas, videlicet Petri unam, Joannis alteram.

Probatur eodem argumento, quo asserta fuit præcedens conclusio, autoritate nimirum Summorum Pontificum, Conciliorum, Patrum tum Latinorum, tum Græcorum, qui in præcedentis conclusionis testimonium laudati sunt; nempe

pè ii Pontifices, ea Concilia, ii Patres libros, de quibus est hîc quæstio retulerunt in Ecclesiæ Canonem iisdem locis, quæ ibidem laudata sunt.

§. I I.

Quinam libri non fuerint semper in omnium Ecclesiarum Canone.

CONCLUSIO. Plures libri, qui nunc sunt Sacri, non fuerunt semper in omnium Ecclesiarum Canone, nimirum Hester, Baruch, Danielis pars, Tobias, Judith, Sapientia, Ecclesiasticus, Macchabæorum primus & secundus, Marci, Lucæ, Joannis, partes quædam, epistola ad Hebræos, epistola Jacobi, posterior Petri; prima Joannis particula, secunda & tertia Joannis, epistola Judæ, Apocalypsis.

Probatur conclusio. Eos libros quovis sæculo complexus non est omnium Ecclesiarum Canon, de quorum autoritate nonnulli Patres, nonnullæ Ecclesiæ olim dubitarunt; atqui nonnulli Patres, nonnullæ Ecclesiæ dubitarunt de autoritate librorum, de quibus agitur in conclusione: ergo omnium Ecclesiarum Canon eos libros, quovis sæculo complexus non est. Minor propositio ostenditur per partes.

Primò. Tres gravissimi scriptores, Estheris librum rejecerunt ex Canone, nempe Melito Sardinensis apud Eusebium lib. 4. hist. cap. 26. Athanasius in synopsi, Gregorius Nazianzenus in suo de genuinis scripturis carmine.

Præterea inter eos, qui Estheris libro divinam autoritatem tribuerunt, nonnulli negarunt septem postrema capita esse genuinas ejusdem libri partes; unde putarunt eas, tanquam adulterinas, ab ipso libro refecari debere. In ea sententiâ fuisse Hieronymum colligitur ex ejus in hunc librum præfatione; nempe ait se ex He-

66 Instit. Theolog. Prolegomena.

bræo in Latinum vertisse librum illum, prout in Hebraicis exemplaribus legitur: at in Hebraicis exemplaribus ea capita non reperiuntur, ipso Hieronymo teste, qui monet, se non ex Hebræis codicibus, sed ex vulgatâ editione deprompsisse septem illa capita. Hieronymo ante Concilium Tridentinum subscribere Nicolaus Lyranus, Dionysius Carthusianus, Cardinalis Cajetanus in suis in hunc librum commentariis; imò & post Concilium Tridentinum Sixtus Senensis libro 1. & 8. Biblioth. S.

Secundò. Liber Baruch à Hieronymo non est habitus pro Canonico: sic enim loquitur S. Doctor præfatione in Jeremiam: *Librum autem Baruch notarii ejus, Jeremiæ, qui apud Hebræos nec legitur, nec habetur, prætermisimus.* Idem S. Doctor eum pariter prætermittit in suo Prologo Galeato, ubi veteris testamenti libros recenset. Hieronymo adhæsit inter Catholicos Joannes Driedo lib. 1. de scripturis & dogmatibus Ecclesiasticis, cap. ult.

Tertiò. Judæi resecant ex Danielis libro hymnum trium puerorum, qui habetur cap. 3. nec non Susannæ historiam, quæ legitur cap. 13. & historiam draconis, quem Daniel interfecisse dicitur cap. 14. Hebræis eo in capite adhærere videtur Hieronymus præfatione in Daniele, ubi sic loquitur: *Hæc idcirco refero, ut difficultatem vobis Danielis ostenderem, qui apud Hebræos, nec Susannæ habet historiam, nec hymnum trium puerorum, nec Belis, draconisque fabulas, quas nos, quia in toto orbe dispersæ sunt, vero anteposito, easque jugulante, subjecimus, ne videremur apud imperitos magnam partem voluminis detruncasse.* Julius Africanus apud Eusebium hist. lib. 6. cap. 13. Susannæ historiam rejicit tanquam adulterinam. Subscribit Joannes Driedo lib. 1. de scripturis & dogmatibus Ecclesiasticis cap. ult.

Quartò. Libros Tobix, Judith, Sapientiæ, Macchabæorum, Hieronymus expungit ex Canone:

none : hæc enim habet in Prologo Galeato : *Hic prologus, Scripturarum quasi Galeatum principium, omnibus libris quos de Hebræo vertimus in Latinum, convenire potest; ut scire valeamus, quidquid extra, hoc est, inter Apochrypha esse ponendum: Idcirco Sapientia, quæ vulgò Salomoni adscribitur, & Iesu filii Sirach liber, & Iudith, & Tobias, & Pastor, non sunt in Canone, Machabæorum primum librum Hebraicum reperi, secundus, Græcus est. Eum verò duplicem Machabæorum librum inter Canonicos non recenset in eodem prologo, ubi textit Canonicorum chatalogum. Hieronymo præiverat Melito Sardenfis apud Eusebium hist. lib.6. Athanasius in synopsi, Concilium Laodicænum Canone 59.*

Quintò. Ultimum caput Marci non fuisse ab omnibus, etiam Catholicis, receptum Hieronymi tempore, scribit ipsemet Hieronymus in epistolâ ad Hedibiam quæstione 3. Hoc autem fundamento nitebantur, quòd olim inserta essent quædam, quæ Manichæismum redolerent; ista nimirum verba: Et illi satisfaciebant, dicentes seculum istud iniquitatis, & incredulitatis substantia est, quæ non sinit per immundos spiritus veram Dei apprehendi virtutem, idcirco jam nunc revela justitiam tuam. Ita Hieronymus lib.2. contra Pelagianos ante medium.

Sextò. Quidam olim in dubium revocarunt historiam de sudore Christi sanguineo, angelicâ apparitione, & consolatione, quæ Lucæ 22. legitur. Eorum qui sic opinati sunt, meminit Hieronymus lib.2. contra Pelagianos.

Septimò. Adulteræ mulieris historiam, quæ legitur Joannis 8. capite, non fuisse olim certæ fidei, Erasmus, ex Eusebio, scribit in hujus loci annotatione.

Octavò. Contendunt aliqui, dubium olim fuisse, an hæc verba, quæ habentur capite ultimo 1. epistolæ Joannis: Tres sunt, qui testimonium dant in cælo, Pater, Verbum, & Spiritus san-

Aut, & hi tres unum sunt, genuina sint Joannis verba Rationes, quibus illud dubium nitebatur videre est apud Erasmum in hujusce loci annotatione.

Nonò. An epistola ad Hebræos Pauli esset, & an in Canonem referri deberet, dubitarunt quidam veteres, Hieronymo teste, qui in epistola ad Paulinum sic loquitur: *Paulus Apostolus ad septem scribit Ecclesias: octava enim ad Hebræos, à plerisque extra numerum ponitur*. Ex iis, qui epistolæ de quâ agitur, divinam auctoritatem tribuebant, nonnulli dubitarunt, an Barnabæ, Lucæ, Pauli, aut alterius esset Apostoli. Hæc de ea scribit Hieronymus in chatalogo scriptorum Ecclesiasticorum: *Epistola autem, quæ fertur ad Hebræos, non ejus, Pauli, creditur propter styli, sermonisque distantiam, sed vel Barnabæ juxta Tertullianum, vel Lucæ Evangelistæ juxta quosdam, vel Clementis, Romanæ postea Ecclesiæ Episcopi, quem aiunt sententias Pauli proprio ordinasse, & ornasse sermone*. Idem tamen Hieronymus censet eam epistolam esse ipsiusmet Pauli; hæc enim verba mox laudatis subjicit: *Vel certè, quia Paulus scribebat ad Hebræos, & propter invidiam sui apud eos nominis, titulum, in principio salutationis amputaverat, scripserat ut Hebræus Hebræis Hebraicè, id est, suo eloquio disertissime, ut ea quæ eloquenter scripta fuerant in hebræo, eloquentius verterentur in græcum, & hanc causam esse, quòd à cæteris Pauli epistolis discrepare videatur*. Cajetanus paulò ante Concilium Tridentinum iis adhæsit, quibus olim fuit dubium, an ad Hebræos epistola ipsiusmet esset Pauli.

Decimò. Epistolam Jacobi, postremam Petri, secundam & tertiam Joannis, epistolam Judæ olim non fuisse ab omnibus Ecclesiis admittas, testatur Eusebius histor. lib. 2. cap. 23. sciendum est, inquit, quòd à nonnullis non recipiantur. De Jacobi epistolâ hæc habet Hieronymus in chatalogo scriptorum Ecclesiasticorum: *Unam*

tan-

tantum scripsit epistolam, quæ de septem catholicis est, quæ & ipsa ab alio quodam sub nomine ejus edita asseritur, licet paulatim, tempore procedente obtinuerit authoritatem. Asserit ibidem laudatus author, quod Petri secunda à plerisque, ejus esse negetur, propter styli cum priore dissonantiam, de Judâ hæc ibidem ait: At Judas frater Jacobi parvam quidem, quæ de septem catholicis est, epistolam, reliquit; & quia de libro Enoch, qui apocryphus est, in eâ assumit testimonium, à plerisque rejicitur. Idem in eodem catalogo asserit dubitasse nonnullos veteres de secunda, & tertia epistolâ Joannis.

Vndecimò. Apud Eusebium, Cajus quidam, antiquus scriptor, censuit Apocalypsim esse Cerinthi hæretici factum, Eusebio teste lib. 3. hist. cap. 28. Dionysius Alexandrinus apud eundem Eusebium lib. 7. cap. 23. libri quidem divinam authoritatem agnoscit, sed dubitat, num sit Joannis Apostoli, an alterius Joannis. Concilium Laodicenum eundem librum non retulit in suum scripturarum Canonem. Hieronymus in epistolâ ad Dardanum, testatur plures è veteribus græcis de Apocalypseo authoritate dubitasse.

§. III.

Quinam libri jam sint in omnium Ecclesiarum Catholicorum Canone.

CONCLUSIO. In omnibus Ecclesiis Catholicis, scripturarum Canon complectitur, 1. eos omnes libros, qui erant in veteri Canone Judæorum, 2. eos quoque complectitur, de quibus nonnulli dubitarunt, an essent in Judæorum Canone, Baruch nimirum, & Estherem, 3. hosce libros continet, Sapientiam, Tobiam, Judith, Ecclesiasticum, primum & secundum Machabæorum, quos certum est non fuisse in hebrai-

cis Judæorum Bibliis : 4. Euangelia quatuor , Acta Apostolorum , & eas epistolas Canonicas , de quarum authoritate nusquam inter chatolicos dubitatum est : 5. eas etiam epistolas , de quibus nonnullæ Ecclesiæ quondam dubitarunt , Joannis Apocalypsim , & eorum librorum partes , de quibus aliquod olim fuit dubium .

Probatur ex Concilio Tridentino , quod sessione 4. sic loquitur : Sacrorum verò librorum indicem huic decreto adscribendum censuit.... Sunt verò infrascripti, testamenti veteris, quinque Moysis, id est, Genesis, Exodus, Leviticus, Numeri, Deuteronomium, Josue, Judicum, Ruth, quatuor Regum, duo Paralipomenon, Esdræ primus, & secundus, qui dicitur Nehemias, Tobias, Judith, Esther, Job, Psalterium Davidicum centum quinquaginta Psalmorum, Parabolæ, Ecclesiastes, Canticum Canticorum, Sapientia, Ecclesiasticus, Isaias, Jeremias cum Baruch, Ezechiel, Daniel, duodecim Prophetæ minores, id est, Osee, Joel, Amos, Abdias, Jonas, Micheas, Naum, Abacuch, Sophonias, Aggæus, Zacharias, Malachias, duo Macchabæorum, primus, & secundus : Testamenti novi, quatuor Euangelia, secundum Matthæum, Marcum, Lucam, & Joannem, Actus Apostolorum à Lucâ Evangelistâ conscripti, quatuordecim epistolæ Pauli, ad Romanos, duæ ad Corinthios, ad Galatas, ad Ephesios, ad Philippenes, ad Colosenses, duæ ad Thessalonicenses, duæ ad Timotheum, ad Titum, ad Philemonem, ad Hebræos, Petri Apostoli duæ, Joannis Apostoli tres, Jacobi Apostoli una, Judæ Apostoli una, & Apocalypsis Joannis Apostoli. Definit præterea sacra Synodus, eos libros cum suis partibus Canonicos esse, idque credendum præcipit sub anathematis pœnâ : *Si quis autem, inquit, libros ipsos integros cum omnibus suis partibus, prout in Ecclesia Catholica legi consueverunt, & in veteri vulgatâ editione habentur, pro sacris, & Canonicis non susceperit, anathema sit.*

Quæ-

Quæres 1. An mox laudatus Scripturarum Canon primùm à Concilio Tridentino conditus fuerit.

Resp. negativè. Ratio est, quia expressis terminis reperitur in epistolâ tertiâ, quam Innocentius Papa ad Exuperium Tolosanum scripsit anno 400. Reperitur etiam in Concilio Carthagenensi quarto, cui interfuit Augustinus, quodque anno 419. celebratum est; in decreto Gelasii edito Romæ in Concilio Septuaginta Episcoporum, in Augustini epistolâ 235. Sed advertendum est, laudatos Patres in Jeremiâ complexos fuisse librum Baruch.

Quæres 2. Utrùm post definitionem Concilii Carthagenensis post Innocentii I. & Gelasii decretum, esset de fide, quòd libri, qui recensentur in decreto Concilii Tridentini, essent Canonici.

Resp. videri, quòd Concilium Carthagenense habitum post datam ab Innocentio ad Exuperium epistolam, non censuerit fuisse tunc de fide, quòd ii omnes libri essent Canonici. Nimirùm jubet, ut editus à se de sacris libris Canon, in Occidentem deteratur, quòd à Romano Pontifice, & aliis Occidentalibus Episcopis confirmetur: *Hoc etiam, inquit, fratri & consacerdoti nostro Bonifacio (tunc Romano Pontifici) vel aliis earum partium Episcopis in confirmando isto Canone innotescat, quia à Patribus ista accepimus legenda.* Sed cur Romano Episcopo, & aliarum Sedium Occidentalium Episcopis, probandum Canonem suum direxissent Carthagenensis Concilii Patres, si ipsis persuasum fuisset, esse de fide libros quos recenset, jam tunc fuisse Canonicos?

Confirmatur. In Galliis ignota non erant, tum Innocentii, tum Concilii Carthagenensis decreta, Prosperi & Hilarii temporibus. Verùm tunc in Galliis non videbatur esse de fide, quòd omnes libri, de quibus est quæstio, referri deberent in Scripturarum divinarum Canonem; scribunt nempè Prosper, & Hilarius ad Augustinum,

Massilienses causatos fuisse, hoc testimonium : *Raptus est, ne malitia mutaret intellectum*, non esse alicujus ponderis, eò quòd Sapientiæ liber, ex quo desumptum est, non haberetur, ut Canonici : *Quod*, inquit Augustin. lib. de prædest. SS. cap. 14. *à me quoque positum*, testimonium, *fratres ipsos ita respuisse dixistis, tanquam non de libro Canonico adhibitum*. Cardinalis Cajetanus, paucis ante Concilium Tridentinum annis, scripsit, non alios libros referri debere in Canonem, quàm quos in eum Hieronymus retulit ; *ad S. Hieronymi limen* (inquit in fine suorum in veteris testamenti libros Commentariorum) *reduci debent*, *Tobias, similesq; alii libri*. Ita verò censuere, Cajetanus, Massilienses, Patres quarti Concilii Carthaginensis, & plures alii veteres, quòd dubitarent, an ubique promulgatum, ac receptum esset Innocentii de libris Canonicis decretum.

Quæres 3. Utrùm etiam ante Innocentii Pape tempora, seu, an tribus prioribus sæculis, omnes libri quos Concilium Tridentinum retulit in Canonem, essent Canonici, hoc est, an divinæ essent authoritatis?

Resp. eos omnes libros Apostolorum temporibus fuisse Canonicos, hoc est, Apostolis, ac primitivæ Ecclesiæ fuisse persuasum, eos libros divinitus fuisse conscriptos, ac proindè fuisse divinæ authoritatis. Ratio est, quia alioquin, nec ab Innocentio, nec à Conciliis, referri potuissent in Canonem; siquidem Ecclesia non potest aliud credendum fidelibus proponere, quàm quod Apostolis fuit revelatum, nempe ipsis omnes omnium articulorum revelationes creditæ sunt, nec novæ aliquæ post eorum tempora factæ sunt Ecclesiarum Pastoribus.

Nec obstat, quod de illorum librorum authoritate nonnulli dubitarint antiquitùs, ut patet ex iis, quæ diximus, agentes de libris, qui apud omnes Ecclesias non erant olim in scriptu-

pturarum Canone . Nam id contigit, quòd illis authoribus satis perspecta non fuerit eo in capite Apostolorum, ac primitivæ Ecclesiæ sententia ; è contra perspecta erat aliis : hincque factum est , ut aliqui contenderent eos libros non esse Canonicos, alii verò docerent reverà esse Canonicos.

Quæres 4. Quam legem, quam regulam, quarti ac posteriorum sæculorum Ecclesia servaverit, ut referret in Canonem libros , quos secundi , tertii, & quarti sæculi aliqui Patres in eum non retulerant.

Resp. Ecclesiam accuratè expendisse traditionem Patrum, qui præcesserant, ac factò illo examine , judicasse communem traditionem illorum Patrum ferre , libros illos ab Apostolis , primitivâque Ecclesiâ, habitos fuisse pro Canonicis : in eo autem examine servavit regulam, quam hisce verbis tradit Augustinus lib. 2. de doctrina Christiana cap. 8. *In Canonicis autem scripturis, Ecclesiarum Catholicarum, quam plurimum auctoritatem sequatur, inter quas sanè illæ sunt, quæ Apostolicas Sedes habere, & epistolæ accipere meruerunt. Tenebit igitur hunc modum in Scripturis Canonicis, ut eas, quæ ab omnibus accipiuntur Ecclesiis Catholicis, præponat eis, quas quædam non accipiunt. In eis verò, quæ non accipiuntur ab omnibus, præponat eas, quas plures, gravioresque accipiunt eis; quas pauciores, minorisque auctoritatis Ecclesiæ tenent. Si autem alias invenerit à pluribus, alias à gravioribus, quamquam hoc facile invenire non possit, æqualis tamen auctoritatis eas habendas puto.*

De Scripturarum Canone apud hæreticos recepto.

CONCLUSIO. Non unus fuit antiquitas, nec est modò apud Hæreticos Scripturarum Canon.

Probatur. Scripturarum Canon non fuit olim, nec est modò idem apud eos, qui libros rejecerunt, quos alii admittebant tanquam Canonicos: atqui è veteribus, ac hodiernis Hæreticis, nonnulli rejecerunt, rejiciuntque libros, quos alii admittebant olim, & nunc admittunt tanquam Canonicos: ergo, &c. Minor! probatur enumeratione eorum, qui olim Ecclesiam vexarunt, & nunc etiam vexant.

Primò. Simoniani, Basilidiani, Marcionitæ, omnes veteris testamenti libros, quòd à Deo malo dictatos censerent, respuebant, apud Irenæum lib. 1. cap. 20. Iis adhæserunt Manichæi apud Epiphanium Hæresi 66.

Secundò. Nonnulli apud Philastrium in catalogo hæreseon, expungebant Ecclesiastem ex Canone, quia censebant, à Salomone compositum fuisse, cum amore mulierum esset depravatus: Propter eandem rationem, eodem Philastrio teste, cap. 133. alii negarunt, Cantica Cantorum librum esse sacrum.

Tertiò. Gentiles, Augustino teste, lib. 2. Retract. cap. 16. asseruerunt quidem Evangelia ab Apostolis conscripta fuisse, sed contenderunt eos ex suo in Christum amore, dedita operâ, fabulas pro veris narrationibus scripsisse.

Quartò. Nonnulli apud Augustinum Hæresi 30. recipiebant quidem Evangelia Matthæi, Marci, Lucæ, sed rejiciebant Joannem. Ebion, Irenæo teste, lib. 1. cap. 26. solum Evangelium Matthæi probabat. Cerinthus apud eundem Irenæum

neum lib.3. cap.11. utebatur solo Marci Euangelio . Apud Marcionem , ut author est Tertullianus , solus Lucas, sed mutilus, & corruptus, erat in pretio .

Quintò . Actorum librum è numero sacrorum librorum expungebant , Cerinthus apud Philastrium cap.36. Cerdo apud Tertullianum lib. de præscript. Tatianus apud Eusebium lib. 4. histor. cap.29. Manichæus apud Augustinum, lib. de utilitate credendi , cap.3.

Sextò . Marcion, teste Epiphanio Hæresi42. rejecit Pauli epistolas ad Titum , & Timotheum ; nonnulli quasdam alias epistolas Pauli, humano, non divino spiritu dictatas censebant, & præsertim eam, quam scripsit ad Philemonem, apud Augustinum lib.2. contra adversarium legis, & Prophetarum .

Septimò . Hæretici, qui elapso proximè sæculo vexarunt Ecclesiam, deleverunt ex Scripturarum Canone, omnes veteris testamenti libros , qui non reperiuntur in antiquo Canone Judæorum; Baruch nimirum, Tobiam, Judith, Ecclesiasticum, Sapientiam, ambos libros Macchabæorum; ita post Lutherum, Martinus Kemnicus in examine sessionis quartæ Concilii Tridentini, Calvinus lib.1. Instit. cap.11. lib.2. cap.5. lib.3. cap.5.

Deleverunt quoque Pauli epistolam ad Hebræos . Lutherus in prologo hujus epistolæ contendit eam nec Pauli esse, nec alterius Apostoli; asserit eam continere nonnulla, quæ Evangelicæ & Apostolicæ doctrinæ contraria sint . Subscribit Kemnicus in examine sessionis quartæ Concilii Tridentini. Calvinus Instit. lib.1. cap.8. §.216. docet epistolam, de quâ agitur, esse verè Apostolicam, sed dubium esse, an Pauli sit, an alterius Apostoli .

Deleverunt etiam epistolas, Jacobi , Judæ , secundam Petri, secundam & tertiam Joannis . Ita Lutherus in prologis harum epistolarum , Kem-

nicus

nicius & Centuriatores Magdeburgenses, Centur. 1. lib. 2. cap. 4. col. 56. Omnes tamen eas epistolas Calvinus in suum Canonem retulit.

Deleverunt tandem Apocalypsim, nempe Lutherus in antiquiore præfatione novi testamenti ait, se Apocalypsim, neque pro Prophetico, neque pro Apostolico libro recipere: Luthero adhæsit Kemnicus. Aliud tamen visum est Magdeburgensibus, quippè Centuriâ primâ lib. 2. cap. 4. col. 56. à Luthero deficiunt, docentque cum Calvino Apocalypsim esse librum divinitus conscriptum, ac proindè referendum esse in scripturarum Canonem.

§. V.

*Solvuntur argumenta, quæ ab hæreticis ob-
jiciuntur adversus hodiernum Eccle-
siae Catholicae Scripturarum
Canonem.*

Not. Hoc in paragrapho proponuntur. 1. Argumenta, quibus hæretici probare nituntur eos tantum veteris testamenti libros, debere referri in Canonem, qui erant in Canone Judæorum. 2. Proponuntur ea, quæ obijciuntur adversus quemque librum in particulari, additum à catholicis Canoni Judæorum.

Obijcies 1. Concilium Tridentinum non potuit Canonicos declarare libros, qui non erant in Canone Judæorum: ergo &c. Probatur antecedens. Ut Concilium potuerit Canonicos declarare libros, qui non erant in Canone Judæorum, oportuit ut cognoverit eos esse Canonicos, aut ex revelatione, aut ex traditione: atqui neutrum dici potest: Non primum; quippè post Apostolorum tempora non admittuntur novæ revelationes in iis, quæ ad fidem spectant, alio-

alioquin condiposſent novi articuli fidei, quos Apoſtoli ignoraffent, quod eſt hæreticum.

Non ſecundum, quia ut Concilium Tridentinum illos libros declararet Canonicos, oportuit ut judicaret Eccleſiam Catholicam ſemper, ſeu quovis ſæculo, illos libros ſaltem implicite pro Canonicis agnoviſſe: atqui Concilium Tridentinum id judicare non potuit; nempè judicare non potuit Eccleſiam prioris ſæculi agnoviſſe libros illos pro Canonicis, nam Eccleſia prioris ſæculi id non ſcivit per peculiarem revelationem, neque etiam per Judæorum traditionem, cùm Judæi libros, de quibus agitur, nuſquam retulerint in ſuum Canonem: ergo &c.

Reſp. ad 1. neg. ant. ad 2. Dico Concilium non judicaſſe libros, de quibus agitur, eſſe Canonicos ex revelatione, ſed ex cujuſvis ſæculi Eccleſiarum traditione.

Ad 3. Nonnulli reſpondent, Eccleſiam Chriſtianam prioris ſæculi, pro Canonicis accepiſſe ab ipſis Judæis libros, de quibus eſt hæc controverſia: erant nimirum in Bibliis Judæorum Alexandrinorum, & omnium Helleniſtarum, ſeu Græcè loquentium: in pretio pariter erant apud Judæos Hebræos, ſeu Hebraicè, aut Syriacè loquentes; ubi enim Joſephus lib. 1. contra Appionem, aſſeruit eſſe apud Judæos viginti duos libros divinos, de aliis addidit, eos non ſimili fide dignos eſſe, propter minùs accuratam prophetarum ſucceſſionem: Ideò verò Joſephus, ait illos libros non ſimili cum prioribus fide dignos eſſe, quòd in priorem Scripturarum Canonem ab Eſdra conditum relati non eſſent, ſed in poſtერიorem editum poſt Alexandri Magni tempora occasione Sadducæorum, qui nonniſi quinque libros Moyſis admittebant.

Reſpondent alii ad idem tertium argumentum, nec Hebræos, nec Helleniſtas, habuiſſe *explicite* libros, de quibus agitur, pro Canonicis, ſed tantum *implicite*, hoc eſt, ſynagogam nullum de

co-

eorum auctoritate decretum tulisse ; quod tamen postea tulerunt Apostoli , ex peculiari Spiritus Sancti revelatione . Illud autem iudicium reverà ab Apostolis latum fuisse , Concilium Tridentinum , ad Augustini normam , de quâ superiùs dictum est , collegit ex continuâ sæculorum omnium traditione .

Illi responso favet Augustinus lib. 18. de civitate Dei cap. 36. *Libros , inquit , Machabæorum non Iudæi , sed Ecclesia pro Canonicis habet . Sic etiam loquitur in speculo : Non sunt omit-
tendi & hi libri , quos quidem ante Salvatoris adventum constat esse conscriptos ; sed eos non receptos à Iudæis , recepit tamen ejusdem Salvatoris Ecclesia .*

Objicies 2. Plures antiqui expunxerunt ex Canone Christiano libros Baruch, Sapientiæ, Ecclesiastici, Tobia, ambos Macchabaicos. Expunxit nimirum eos positivè Hieronymus in Prologo Galeato , implicite verò Athanasius , qui in synopsi eos non retulit inter sacros ; Concilium Laodicænum , quod texens librorum Canonico-
rum chatalogum , istos non recenset : ergo reverà rejiciendi sunt ex Canone .

Resp. conc. ant. neg. conseq. Ratio est 1. quia nimis probat illud argumentum , nempe probat librum *Esther* , quem tamen admittunt hodierni Heterodoxi , expungi debere ex Scripturarum Canone ; eum enim , ac plures alios non esse referendos in Canonem judicarunt plures antiqui scriptores , ut patet ex iis , quæ superiùs dicta sunt . 2. Ideò à veteribus nonnullis libri , de quibus agitur , non relati sunt in Canonem , quòd (ut jam observatum est superiùs) ad præcipuarum Ecclesiarum traditionem , ut par erat , non attenderint .

Objicies 3. In libris Sapientiæ , Ecclesiastici , Judith , Tobia , Machabæorum , sunt 1. multæ contradictiones ; sunt 2. multi errores , tum contra veritatem historiæ , tum contra fidem ; 3. igno-
ran-

rantur eorum authores : ergo à Concilio Tridentino referri non debuerunt in Scripturarum Canonem.

Resp. neg. ant. nempè fictitiæ sunt illæ contradictiones, fictitii illi errores. Adeat lector catholicorum in illos libros commentaria, & evanescent argumenta, quæ ex iis libris adversus Tridentini Concilii Canonem recentiores hæretici desumunt.

C A P U T VI.

De lingua, qua scripti sunt libri Canonici.

Not. **D**E linguâ, quâ libri Canonici scripti sunt, quæremus 1. quænam reverrà sit, seu quo idiomate libri Canonici tum veteris, tum novi testamenti, à Prophetis, & ab Apostolis primùm scripti fuerint: 2. an Ecclesia nunc habeat genuinos Prophetarum, & Apostolorum textus.

A R T I C U L U S I.

Qua lingua à Prophetis, & Apostolis scripti sint libri Canonici.

Not. I. **D**icemus 1. de libris, qui continentur in Canone Judæorum: 2. de iis, quos Ecclesia Christiana addidit antiquo Judæorum Canoni: 3. de libris novi testamenti.

CONCLUSIO I. Uno excepto Daniele, libri qui antiquo Judæorum Canone continentur, Hebraicâ linguâ conscripti sunt.

Probatur 1. ex eo, quòd Hebraicè legantur in Bibliis, quibus nunc utitur Judæorum Synagoga, & quibus usa est semper. 2. Ex S. Hieronymo, qui in Præfationibus ad libros illos, asserit, eos Hebraicè conscriptos fuisse.

Jam

80 Instit. Theolog. Prolegomena.

Jam verò, quòd Daniel Chaldaicè scriptus sit, testatur idem Hieronymus in ipsum Danielis librum præfatione, ubi sic loquitur : *Danielem Prophetam juxta Septuaginta interpretes, Domini Salvatoris Ecclesiæ non legunt, utentes Theodotionis editione; & hoc cur acciderit nescio. Sive enim, quia sermo Chaldaicus est, & quibusdam proprietatibus à nostro eloquio discrepat, voluerunt Septuaginta interpretes easdem linguæ litteras in translatione servare, sive sub nomine eorum ab alio nescio, quo non satis Chaldeam linguam sciente, editus est liber; sive quid aliud causæ extiterit, ignorans.*

CONCLUSIO 2. Ex libris quos Ecclesia Christiana addidit Judæorum Canoni, quidam Hebraicè, quidam Chaldaicè, nonnulli Græcè conscripti sunt.

Probatur: Hieronymus præfatione in Tobiam, sic loquitur : *Mirari non desino exaltationis vestræ instantiam, exigitis enim, ut librum Chaldaeo sermone conscriptum ad Latinum stylum traham.* Sic etiam de libro Judith præfatione in eundem librum : *Chaldaico tamen sermone conscriptus inter historias computatur.* Hæc etiam habet de libro Sapientiæ præfatione in libros Salomonis : *Hebraicum reperi.* Idem dicendum est de libro Ecclesiastici. De libris verò Machabæorum, hæc idem Sanctus Doctor habet in Prologo Galeato : *Machabæorum primum librum; Hebraicum reperi: Secundus; Græcus est, quod ex istâ quoque phrasi probari potest.* Qua autem ratione, & quo tempore Ecclesia Christiana Tobiam, Sapientiam, Judith, Machabæorum libros suo Canoni inferuerit, superius dictum est iis locis, in quibus Concilii Tridentini Canonem exposuimus, eumque vindicavimus ab Heterodoxorum dictis.

CONCLUSIO 3. Omnes libri novi testamenti, uno excepto Matthæi Euangelio, quod Sy-

Syriacè scriptum est , Græcè editi sunt ab Apostolis.

Probatur autoritate Hieronymi , qui præfatione in Evangelia ad Damasum , sic loquitur : *De novo nunc loquor testamento , quod Græcum esse non dubium est , excepto Apostolo Matthæo , qui primus in Iudæâ Evangelium Christi Hebraicis litteris edidit . Nec obstant hæc verba , Hebraicis litteris ; nam intelliguntur de Hebraicis litteris , quæ tunc apud Judæos erant in usu , hoc est , Syriacis ; hinc Joannis 19. quod Syriacè scriptum erat dicitur (ut notat Hieronymus in libro de nominibus) scriptum Hebraicè : Exivit in eum , qui dicitur Calvarie locum , Hebraicè autem Golgotha . Evanuit autem multis abhinc sæculis Syriacum Matthæi Evangelium .*

ARTICULUS II.

*Virum Ecclesia nunc habeat genuinos
Prophetarum , & Apostolorum
textus .*

Not.1. **H**Æc quæstio non levis est momenti ; nempè , si Ecclesia in suis Bibliis nunc habeat ipsos Prophetarum , & Apostolorum textus , seu , si habeat libros Canonicos , prout primùm à Prophetis , & Apostolis conscripti sunt , menda , & errata , quæ in versionibus , ipsâ etiam nostrâ vulgatâ latinâ , reperiuntur , debebunt emendari , in veteri quidem testamento , ad textum Hebraicum , qui nunc in Bibliis legitur , & in novo ad textum Græcum , qui in eisdem Bibliis continetur . Si autem Ecclesia illos textus in suis Bibliis puros non habeat , hoc est , ut jam observatum est , eâ linguâ quâ primùm à Prophetis , & Apostolis scripti sunt , tutum non erit versionum errata semper ad textuum illorum normam corrigere .

Not.2. Heterodoxi passim contendunt textus

tus nostros Hebraicum & Græcum, esse in omnibus ipsosmet Prophetarum & Apostolorum textus; inde verò concludunt, id omne, quod in Latinis versionibus discrepat ab iis textibus, emendari debere ad textum Hebraicum & Græcum.

Not. 3. Quidam Catholici docent, certum esse textum veteris testamenti Hebraicum, & novi Græcum esse ipsummet Prophetarum & Apostolorum textum in iis omnibus, quæ ad fidem, & mores spectant; non esse verò ipsummet Prophetarum & Apostolorum textum in quibusdam levis momenti capitibus, quæ ad fidem, aut mores non spectant: indeque colligunt, tutum non esse versiones in iis capitibus semper emendare ad hodiernum textum Hebraicum & Græcum.

Not. 4. Quidam alii Catholici censent, non esse certum, quòd in aliquibus etiam capitibus, textus Hebraicus, & textus Græcus, qui in nostris Bibliis leguntur, sint ipsummet Prophetarum & Apostolorum textum; indeque inferunt textus illos non esse authenticos, seu aptos ad probanda fidei, aut morum dogmata.

CONCLUSIO I. Hodiernus veteris testamenti textus non ita purus est, ut nulla levis momenti errata, nulla menda in eum irrepsent.

Probatur 1. Nonnunquam integræ sententiæ defunt in Hebraico textu, v. gr. Exodi 2. ista non legitur: *Alium quoque genuit, & vocavit nomen ejus Eliezer, dicens: Deus Patris mei auxiliatus est mihi, & liberavit me de manu Pharaonis*; legitur tamen in versione septuaginta interpretum, & in Latinâ ex Hebræo Hieronymi translatione.

Probatur 2. Aliquot errata recenseri possunt. Isaïæ 9. textus Hebraicus legit, *Vocabit admirabilis*, cum tamen versiones omnes, Patres & ipse Scripturarum contextus demonstrent legendum esse *vocabitur*; hincque inferendum sit hæc epitheta, *admirabilis, Deus, fortis, pater futuri sæculi, tribui filio*, non autem æterno patri.

Alia

Differt.IV. *De Locis Theologicis.* 83

Alia errata videre est in Bellarmino, Melchiore Cano, aliisque, qui quæstionem, de quâ hic agitur, fusè pertractarunt.

CONCLUSIO 2. Hodiernus Hebraicus textus, in iis, quæ ad fidem, aut mores spectant, purus est omninò: ita Bellarminus, qui de verbo Dei lib. 2. c. 2. sic loquitur: *Ceterum non tanti sunt ejusmodi errores, ut in iis, quæ ad fidem, & bonos mores pertinent, Scripturæ Sacræ integritas desideretur.*

Probatur. Conclusionem demonstrant, quæ superiùs à nobis dicta sunt de Scripturarum integritate: ostendimus nimirum, impossibile fuisse mutationem, quam nonnulli, etiam catholici, post Concilii Tridentini tempora commenti sunt. Inde verò concluditur, Hebraicum textum, qui in hodiernis Bibliis legitur, esse authenticum, seu valere ad probandam fidem, & ad regulandos mores.

CONCLUSIO 3. Idem de Græco novi testamenti textu dicendum est, quod de Hebraico veteris, duabus præcedentibus conclusionibus, dictum est.

Probatur 1. Argumenta, quæ probant, integrum esse, quoad fidem & mores, Hebraicum textum, idem de Græco novi testamenti textu demonstrant: quomodo enim fieri potuisset, ut errores in iis, quæ ad fidem, & mores spectant, in omnes codices Græcos per totum orbem diffusos irrepsissent, nec tamen eos errores aliquis advenisset?

Confirmari potest argumentum variis observationibus.

Primò. Novi testamenti textus originalis Græcus, quoad substantiam, corrumpi non potuit Apostolorum tempore: cum ii, qui novum testamentum, Spiritu Sancto dictante, Græcè conscripserant, adhuc in vivis agerent.

Secundò. Idem textus originalis Græcus transmissus est purus ad proximè sequentia sæcula.

Ne-

84 Instit. Theolog. Prolegomena.

Neque enim verisimile est, primævos christianos, qui novi testamenti scriptorum ossa tanto cum studio eripuerunt casibus, divina eorum scripta neglexisse.

Tertiò. Originarios quosdam novi testamenti codices extabant Tertulliani tempore; id nimirum ipsemet testatur libro de præscript. adversus hæreticos.

Quartò. Nostra exemplaria græca maximè cohærent cum textibus Græcis, quos in suis scriptis laudarunt Ignatius, Clemens, Justinus, Irenæus, & alii, qui ipsa Apostolorum autographa consulere potuerant, cum vicini essent Apostolorum temporibus.

Quintò. Si in novi testamenti Græcum originalem textum irrepsissent ii errores, vel accidissent ante tempora, quibus habita sunt in Oriente octo priora Concilia Generalia, vel accidissent post ea tempora. Primum asseri non potest; alioquin enim dicendum esset octo illa Concilia, quæ non habuissent germanum scripturarum textum, utpotè utentium solo Græco, nullum potuisse dogma adversus hæreticos definire. Dicendum esset iis sæculis Ecclesiam Græcam non fuisse veram Ecclesiam; quippè quæ non habuisset integram fidei regulam; quod est absurdum. Alterum pariter dici non potest. Nam proferri non possunt loca, quæ substantialiter differant ab iis, quibus olim Græci utebantur. Numerosa in Oriente, etiam post exortum Photii schisma, ad hæc usque tempora, est Ecclesia Catholica: veram igitur habet Scripturam. Tandem si post octo Generalia Concilia contigerit mutatio, de quâ agitur, in Conciliis post illa tempora habitis, Lugdunensi nimirum & Florentino, Latini eam depravationem Græcis, cum quibus in illis Conciliis manus conseruerunt, objecissent.

Objicies. Concilium Tridentinum, cum agit de Scripturarum authenticitate, nec de Hebraico
tex-

textu, nec de Græco loquitur, sed tantum de nostrâ vulgatâ editione : Censuit igitur solam nostram vulgatam latinam esse authenticam, seu esse à quovis contra fidem, & mores errore immunem.

Resp. conc. ant. neg. conseq. Ratio est, quia (ut fusè dicetur inferiùs cum agemus de vulgatâ editione Latina) Concilium Tridentinum agebat contra Lutherum & Calvinum, qui contendebant vulgatam nostram gravibus erroribus scaterere : Sat igitur fuit, ut de nostrâ vulgatâ, non autem de textu Hebraico & Græco, de quibus non erat tunc quæstio, Concilium Tridentinum loqueretur.

C A P U T VII.

De Scripturarum versionibus.

HOc in capite dicemus, 1. de variis veteris testamenti versionibus Græcis ; specialiter de versione lxx. Expendemus, 2. quam olim habuerint, & nunc habeant auctoritatem, 3. fusè agemus de versionibus Latinis tum veteris, tum novi testamenti.

A R T I C U L U S I.

Quot olim fuerint veteris testamenti versiones Græcæ.

Not. **D**E numero versionum Græcarum veteris testamenti multiplex est opinio. Prima dicit esse septem versiones Græcas. Altera docet esse novem, & est Baronii. Tertia decem admittit : ita Bellarminus de verbo Dei lib. 2. cap. 5. Quarta undecim numerat. Quinta tredecim, & est Junii Calvinistæ contra Bellarminum.

CON-

CONCLUSIO . Decem tantum editæ sunt veteris testamenti versiones Græcæ.

Probatur enumeratione . Prima ac omnium antiquissima saltem aliquorum librorum testamenti veteris versio Græca, edita est ante Alexandri Magni tempora ; quo autem authore, incertum est . Meminit illius versionis Clemens Alexandrinus lib. 1. Stromatum . Ad eam alludit Josephus Antiquit. lib. 12. cap. 2. ubi narrat Theopompum , & Theodecten divinitus punitos fuisse, quod suis historiis, vel poematibus inferere tentassent nonnihil è sacris Bibliis, & quidem Græcis; nec enim Græci, nisi profelyti essent, solebant discere linguam Hebraicam . Idem Josephus lib. 1. contra Appionem, asserit, Platonem in suis libris de legibus expressisse Moysem: eum igitur legerat, & quidem Græcè; nec enim sciebat Hebraicè . Subscribunt Patres, qui passim ajunt, Pythagoram , Platonem , multa ex Moyse & Prophetarum libris hausisse . De eo argumento videre est Augustinum lib. 18. de civ. Dei cap. 11.

Nec obstat, quod obijcit Baronius, nimirum Patres vocasse versionem lxx. interpretum omnium primam, ac vetustissimam; nam sic locuti sunt, quod edita ante Alexandrum Magnum, Patrum temporibus evanuisset .

Non obstat quoque, quod addit idem Cardinalis, frustra Ptholemeum Philadelphum à Judæis desideratum fuisse versionem, quam ediderunt septuaginta interpretes, si Biblia jam in Græcum conversa fuissent . Nam authenticam, & minimè vitiosam optavit: ejusmodi verò non erat versio, quæ edita est ante Alexandrum Magnum, quippè incertorum erat authorum ; nec omnium, sed aliquorum tantum librorum .

Secunda versio est ea, quam septuaginta seniores Judæi ediderunt Ptholomei Philadelphi jussu . Agunt de eâ Eusebius hist. lib. 6. cap. 13.

Athæ-

Athanasius in synopsi, Epiphanius lib. de mensuris & ponderibus.

Tertia. Facta est ab Aquilâ Pontico anno 12. Adriani Imperatoris, ut ait Epiphanius loco proximè laudato: fuit autem Aquila, primùm gentilis, deindè Christianus; sed pulsus ab Ecclesiâ, quòd Astrologiæ judiciariæ daret operam, Judaismo dedit nomen.

Quarta. Est Theodotionis, primùm Hæretici Marcionitæ, deindè profelyti Judæi. Editæ est, Epiphanio teste, imperante Commodus.

Quinta. Est Symmachi, qui, Baronio teste, Severi Augusti, & secundùm alios, Lucii Veri temporibus, sacros libros ex Hebræo in Græcum sermonem transtulit. Scribit Eusebius, Symmachum fuisse primùm Hæreticum Ebionitam, qui cum in suâ sectâ non obtinuisset primatum, quem ambierat, Judaismo professus est.

Sexta. Nullius authoris nomen præferret: dicitur Hiericuntina, quòd, Epiphanio teste, apud urbem Hierico, Antonii Caracallæ anno 7. in doliis quibusdam reperta esset.

Septima. Non habet authorem certum; Nicopolitana vocatur, eò quòd, ut idem Epiphanius, aliique authores asserunt, Nicopoli inventa fuisset.

Hic obiter notandum est, ex sex postremis editionibus, Origenem, ut narrant Eusebius lib. 6. hist. cap. 13. & Epiphanius lib. de mensuris & ponderibus, composuisse sua, sive tetrapla, sive exapla, sive octapla.

Divisit primùm Origenes, ut ex laudatis Scriptoribus desumpsit Bellarminus, singulas suorum exemplarium paginas in sex columnas. In primâ quidem descripsit Hebraicum textum litteris Hebraicis: in secundâ eundem textum Hebraicum Græcis litteris: in tertiâ interpretationem Aquilæ: in quartâ interpretationem Symmachi: in quintâ interpretationem Septuaginta seniorum: in sextâ interpretationem Theodotionis.

88 Instit. Theolog. Prolegomena.

Conjunctas illas omnes versiones vocavit tetrapla, junctum illis interpretationibus duplici caractere textum Hebraicum dixit exapla; ubi verò iis omnibus Hierecuntinam, & Nicopolitanam versionem addidit in duabus aliis columnis, sua volumina nominavit octapla.

Octava. Origenis versio est: hanc ex Hebræo, quidem textu non adornavit, sed sic edidit, ut interpretationem Septuaginta seniorum correxerit, multa admiscuerit ex Theodotionis versione, quæ notavit, aut obelico, aut signo radiantis stellæ. Tot verò mutationes invexit illa correctio, ut nova visa sit versio. Ita obtinuit, ut teste Hieronymo epist. 89. Bibliothecas omnes impleverit, ac ex eodem Hieronymo præfatione in Isaiam, communis appellata sit.

Nona. Est Luciani presbyteri, & martyris, qui (ut scribit Eusebius hist. lib. 9. cap. 6.) in persecutione Diocletiani & Maximiani, Nicomediæ passus est: novam & integram versionem est aggressus, ex Hebræo in Græcum, quod censeret, in præcedentes versiones multa vitia obrepisse.

Decima. Hesychii est, qui Septuaginta seniorum interpretationem iterum emendavit, atque Ægypti Ecclesiis tradidit. Cui ex iis versionibus adhærerent Orbis Ecclesiæ, docet Hieronymus præfatione in Paralipp. ubi hæc habet: *Alexandria, & Ægyptus in Septuaginta suis Hesychium laudat authorem; Constantinopolis usque Antiochiam, Luciani martyris exempla probat; media inter has Provinciæ Palæstinos codices legunt, quos ab Origene elaboratos Eusebius, & Pamphilus vulgaverunt; totusque orbis hæc inter se trifariâ varietate compugnat.*

ARTICULUS II.

De versione Septuaginta interpretum;

Not. 1. **I**Nter Græcas veteris testamenti versiones, principem locum semper obtinuit versio, quæ Septuaginta dicitur, seu, quam edidit duo & septuaginta Judæi, ab Eleazaro Pontifice eam ob causam missi ad Ptholemæum Ægypti regem.

Not. 2. Historiam versionis, de quâ agitur, scripserunt Aristæus, qui & Aristæas, unus ex legatis à Ptholemæo Jerosolymam missis, Aristobulus Judæus Aristotelicâ Philosophiâ clarus, de quo agitur 2. Machab. cap. 1. Josephus lib. 12. Antiquit. cap. 2. Philo lib. 2. de vitâ Moyse. Eusebius lib. 8. præparationis cap. 1. Irenæus lib. 3. cap. 25. Justinus apologiâ secundâ. Clemens Alexandrinus lib. 1. Stromatum. Tertullianus apologetici cap. 18. Augustinus lib. 8. de civit. cap. 11. necnon lib. 2. de doctrinâ Christianâ cap. 15.

Not. 3. Aristæi hæc de historiâ libellus, nunc extat Græcè, Latinè, & Hebraicè. Scaliger in Eusebianis animadversionibus, pag. 123. asserit, Aristæum authorem esse supposititium, & ab Alexandrinis Judæis confictum. Sed Josephus, Eusebius, Hieronymus epist. 104. contrarium censent. An autem, qui hodie circumfertur illius libellus, omninò sincerus sit, ac germanus, negare videntur Augustinus lib. 18. de civit. cap. 4. Alphonsus Salmero Proleg. 6. E contra germanum, ac sincerum, asserunt Bellarminus lib. 2. de verbo Dei cap. 6. multique alij, quos, qui de eo argumento plura scire voluerit, poterit consulere.

Not. 4. De versione Septuaginta interpretum, quæri potest 1. sub quo Ptholemæo Ægypti rege facta fuerit: 2. quot & quales interpretes missi sint: 3. quo tempore, quo in loco, & quomodo

90 Instit. Theolog. Prolegomena.
incepta, ac peracta fuerit : 4. quosnam libros, Septuaginta verterint : 5. quantæ olim fuerit, & nunc sit auctoritatis: 6. an hisce temporibus germanam habeamus Septuaginta interpretum versionem.

§. I.

*Explicantur, quæ spectant ad historiam
versionis lxx. interpretum.*

CONCLUSIO 1. Versio Græca Septuaginta interpretum edita est regnante in Ægypto Ptholemæo Philadelpho, tertio rege ab Alexandro Magno.

Probatur 1. Uno excepto Irenæo, & Clemente Alexandrino, omnes ferè alii Scriptores docent, institutam ac peractam fuisse versionem Septuaginta interpretum regnante Ptholemæo Philadelpho, Ptholemæi Lagi filio. 2. Ptholemæus Lagus Judæis infensissimus fuit, ex iisque plurimos duxit in Ægyptum captivos: è contra verò Philadelphus libertate donavit; eum verò, qui fuit eorum juratus hostis, probabile est, non curasse de Judæorum libris.

Quæres, à quo, & quo fine Ptholemæus interpretes petierit.

Resp. ad 1. Ptholemæum ab Eleazaro, tunc Summo Pontifice, totâque Judæorum synagogâ, petiisse interpretes. Ad 2. dico ex Aristæo, & Josepho, non alium finem proposuisse sibi Ptholemæum, quàm ut Judaicis Libris ditaret Bibliothecam, quam Alexandriæ conquestis undique libris crexerat: de Judæorum verò libris cognoverat, ex relatione Demetrii Phalerei, qui Athenis venerat Alexandriam, præeratque regiæ Bibliothecæ.

CONCLUSIO 2. Missi fuerunt Septuaginta duo interpretes ad Ptholemæum; iique erant è senio-

nioribus populi ; legis & linguarum ; tum Hebraeae , tum Graecae , peritissimi .

Probatur prior pars . Aristæus , Josephus , & alii , quos supra laudavimus , aiunt , interpretes , de quibus agitur , fuisse Septuaginta duos : adduntque , sex delectos fuisse ex singulis tribubus .

Nec obstat , quòd passim dicantur Septuaginta tantum . Nempè id fit brevitatis , & numerandi facilitatis causa ; quare apud Romanos *centum viri* vocabantur , licèt essent centum & quinque . Sic etiam dicuntur Septuaginta discipuli Christi , quamvis essent Septuaginta & duo .

Probatur altera pars ex iisdem , qui supra laudati sunt , authoribus . Et quidem meritò ; nam alioquin stultissimi fuissent ii , qui tantum opus cum legis , & linguarum imperitiâ in se suscepissent .

Objicies . Sola tribus Juda , & Benjamin erant tunc in Judæa , decem nimirum tribus tempore Ezechiae regis in Mediam captivæ deportatæ fuerant : ergo ex singulis tribubus seni interpretes eligi non potuerunt .

Resp. neg. conseq. Ratio est , quia tempore captivitatis semper è singulis tribubus aliqui in Judæâ remanserunt , ut patet ex Judith cap. 2 . Præterea ex singulis tribubus aliqui è Media in patriam redierant , licèt multò plures essent ex tribubus Juda , & Benjamin .

CONCLUSIO 3. Incertum est , quo anno regni Ptholemæi Philadelphi incepta fuerit versio Septuaginta interpretum : sed satis constat , quantum ad eam absolvendam temporis impenderit .

Probatur prior pars . Eusebius in Chronico scribit , inceptam fuisse versionem illam Philadelphi anno quarto , vel quinto ; S. Epiphanius anno septimo : quo autem ante Christi adventum anno id contigerit , variè secundum diversam chronologiam traditur . Chrysostomus homil. 5. in Matth. numerat ante adventum Domini annos

centum: Theodoretus annos 250. Præfatio Romana in versionem Græcam Septuaginta, asserit, nec plus nec minus quàm unum supra trecentos annos fluxisse.

Probatur altera pars. Aristæus, Josephus & alii quos superius laudavimus, asserunt, septuaginta interpretes opus absolvisse intra septuaginta duos dies.

CONCLUSIO 3. Alexandria in Ægypto, seu in vicinâ urbi illi insulâ *Pharo*, facta est versio Græca septuaginta interpretum. Utrum autem singuli è Septuaginta separatim, an bini & bini, an potius omnes simul inter se conferentes, versionem fecerint, incertum est: probabilius est tamen, omnes inter se contulisse.

Probatur prior pars. Aristæus, Aristobulus, Josephus, Philo, necnon Christiani scriptores qui egerunt de versione Septuaginta, scribunt eam Alexandria apud Pharum inceptam & peractam fuisse.

Probatur altera pars. Quidam contendunt, septuaginta senes in unâ basilicâ conjunctos & inter se conferentes, opus suum adornasse: ita Bellarminus. Aliis placet eos in unâ quidem basilicâ fuisse conjunctos, sed divisos cellulis, ita ut inter se conferre non possent: ita Baronius. Quidam binis senibus unam tantum cellulam tribuunt, ita ut fuerint tantum triginta sex cellulæ. Priori sententiæ favet Hieronymus præfatione in pentateuchum: alteri patrocinatur Justinus in oratione exhortatoriâ ad gentes, ubi sic loquitur: *Hæc vobis, viri Græci, non ut fabulam, neque ut confictam historiam renuntiamus, sed qui Alexandria fuerimus ipsi, ac vestigia domuncularum apud Pharum adhuc reliqua viderimus, & ab incolis qui res patrias à majoribus per manus sibi traditas acceperunt, audierimus, commemoramus.* Justino adhæserunt Irenæus lib. 3. cap. 25. Cyrillus catechesi 4. S. Augustinus lib. 18. de civit. capite 42. Tertiæ opinio-

nionis author est Epiphanius lib. de mensuris & ponderibus. Ex eâ circumstantiâ mox laudati patres argumentum petunt pro authoritate versionis septuaginta interpretum, seu, ajunt, divinam fuisse eam versionem, in quam non collatis inter se operibus, septuagintaduo viri unanimiter consensere.

Probatur tertia pars, seu septuaginta duos interpretes in eâdem basilicâ conjunctos, inter se conferentes, Scripturam transtulisse.

Primò Josephus qui libro 12. Antiquit. cap. 2. versionis historiam describit, cellularum ne meminit quidem, eam tamen alioquin non prætermisurus, vir gloriæ gentis suæ cupidissimus: altum quoque est de iis silentium apud Philonem, Tertullianum, Chrysostomum, licet asserant LXX. interpretes miro consensu in eandem sententiam, in eademque verba convenisse.

Secundò Aristæus qui præsens fuit labori Septuaginta, apertè asserit, eos simul usque ad horam nonam conferendo, versionem intra septuaginta duos dies absolvisse.

Tertio cur illi LXX. Deum (ut ita loquar) tentassent, non observando humanam viam, mutuum nimirum collationem, ut opus sibi impositum exequerentur?

Quartò hæc habet S. Hieronymus præfatione in Pentateuchum: *Nescio, quis primus author septuaginta cellulas Alexandriae mendacio suo extruxerit.*

Objicies 1. Patres asserunt, miraculosam fuisse versionem septuaginta interpretum: atqui non ob aliud fuit miraculosa, quam quòd cellulis divisi, in eandem sententiam, in eademque verba consenserint.

Resp. conc. maj. neg. min. Miraculum enim est, quòd tot homines unanimi consensu in eandem sententiam, eademque verba consenserint, sive mutuo inter se de verbis ac sententiis con-

tulerint, five non contulerint : ita censet Augustinus lib. 2. de doctrinâ Christi. cap. 15. ubi sic loquitur: Qui si, ut fertur, multique non indigni fide prædicant, singuli cellis etiam singulis separati, cum interpretati essent; nihil in alicujus eorum codice inventum est, quod non iisdem verbis, eodemque verborum ordine inveniretur in cæteris: quis huic authoritati conferre aliquid, nedum præferre, audeat? Si autem contulerunt, ut una omnium communi tractatu, judicioque, vox fieret, nec sic quidem quemquam unum hominem quâlibet peritiâ ad emendandum tot seniorum, doctorumque consensum aspirare oportet, aut decet. Hastenùs S. Doctor.

Objicies 2. Justinus martyr in oratione exhortatoriâ ad Gentes, scribit, se vidisse Alexandriæ ruinas cellularum, in quibus lxx. suam versionem absolverint.

Resp. Justinum nimis facilè Judæis fabulam narrantibus credidisse: satius ipsi fuisset, Aristæum, qui negotio interfuit, audire, quàm Judæos, qui Justinii tempore vivebant.

Objicies 3. Epiphanius lib. de mensuris & ponderibus, scribit, se cellulas legisse in Aristæi libello, quo versionis Septuaginta seniorum historia narratur.

Resp. nec Josephum, nec Eusebium, nec Tertullianum, nec cæteros Christianos patres, qui ante Epiphanium vivere, nec Hieronymum, qui eodem cum illo tempore floruit, cellulas in Aristæo legisse: aut igitur, inquit Bellarminus, Epiphanius cum hæc scripsit, memoriâ lapsus est, vel id asseruit ex Justinii, nonnullorumque aliorum testimonio.

CONCLUSIO 4. Septuaginta interpretes non solum Pentateuchum vertere, sed libros omnes, qui tunc erant in Canone Judæorum, hoc est, libros viginti duos, quos post Josephum refert S. Hieronymus in prologo Galeato.

Pro-

Probatur . *Primò*, ita docent Justinus in dialogo cum Triphone ; Iræneus libro 3. cap. 25. Clemens Alexandrinus lib. 1. Stromatum , Eusebius præparat. lib. 8. cap. 1. *Secundò*, non est verisimile , quòd Ptholemæus Philadelphus, qui interpretes advocarat, non curarit de Prophetis, aliisq; Judæorum libris antiquissimis. *Tertio*, Apostoli, dum Prophetas laudarunt, usi sunt versione Græcâ ; sed eorum tempore , non alia erat versio Græca, quàm Septuaginta interpretum .

Objicies. Aristæus in libello de versione lxx. interpretum , Josephus lib. 12. Antiq. cap. 2. Philo lib. 2. de vitâ Moyſis, scribunt Septuaginta vertisse legem tantum . At legis nomine non intelligitur, nisi Pentateuchus . Confirmatur ex Hieronymo , qui in eam videtur abire sententiam in cap. 2. Michææ.

Resp. laudatos authores nomine legis intellexisse omnes Judæorum libros Canonicos, qui lex dicebantur, non quòd continerent solam legem, quam Moyses Judæis dederat ; sed quod lex præcipuum inter Judæorum libros locum teneret . Hinc Christus Joannis 10. & 15. dicit in lege scriptum esse, quod in Psalmis scriptum est ; Paulus 1. ad Corinth. 14. dicit in lege scriptum esse, quod apud Isaiam habetur .

Ad confirmationem, dico id, quod objicitur , Hieronymum scripsisse non affirmando , sed dubitando ; unde in Commentariis Prophetarum , mentionem facit versionis Septuaginta, & eam explicat.

§. II.

De authoritate versionis lxx. interpretum.

CONCLUSIO I. Versio Septuaginta interpretum, ad fidem & mores confirmandos , divinæ fuit olim authoritatis .

F 5 Pro-

Probatur . *Primò* conclusionem asserunt Aristæus, Josephus, Philo, Justinus, Irenæus, aliiq; Scriptores , qui in hocce paragrapho sæpiùs laudati sunt .

Secundò . Apostoli cum in suis ad Gentiles conversos scriptis laudarunt antiquum testamentum, usi sunt versione septuaginta interpretum .

Tertiò . Quinque prioribus sæculis obtinuit in Ecclesiâ Christiana , ut hisce verbis tradit Augustinus libro 2. de doctrinâ Christianâ cap. 15. *Septuaginta interpretum* , quod ad vetus testamentum attinet, excellit autoritas, qui jam per omnes peritiores Ecclesias tantâ præsentia Spiritus sancti interpretati esse dicuntur , utos unum tot hominum fuerit . Hæc etiam habet Hieronymus, in libro de optimo genere interpretandi : *Iure Septuaginta editio obtinuit in Ecclesia , vel quia prima est , & ante Christi facta adventum , vel quia ab Apostolis , in quibus tamen ab Hebraico non discrepat, usurpata .*

Objicies . Hieronymus præfatione in Pentateuchum multa scribit, quæ non cohærent cum conclusione . Contendit 1. septuaginta interpretes nonnulla in suâ versione omisisse , quæ tamen sunt in Scripturis, ut sunt ista , quæ ex veteri laudantur in novo testamento : *Ex Ægypto vocavi filium meum . Quoniam Nazareus vocabitur . Videbunt, in quem compunxerunt . Flumina de ventre ejus fluent aquæ vivæ . Quæ nec oculus vidit, nec auris audivit, nec in cor hominis ascenderunt, quæ præparavit Deus diligentibus se .* Docet 2. eos aliter , quàm ferret textus Hebraicus , interpretatos esse, aut prætermisisse textus omnes, qui favent mysterio SS. Trinitatis : *Ubicumque* , inquit , *sacratum aliquid Scriptura testatur de Patre, & Filio, & Spiritu Sancto, aut aliter interpretati sunt, aut omninò tacuerunt .* Rationem reddit : *Vt & regi satisfacerent, & arcanum fidei non vulgarent .* Scribit 3. eos non fuisse vates, sed interpretes tantum ; ac proindè labi potuerunt :

Aliud

Aliud est enim ratem, aliud est esse interpretem: ibi spiritus ventura prædicit, hic eruditio, & verborum copia, ea quæ intelligit, transfert. Afferit 4. idem S. Doctor in suo in Isaiam commentario, in caput 10. Septuaginta aliquid addidisse: in caput 2. ademisse aliquid: in caput 3. mutasse nonnulla: in caput 9. extenuasse sensum: in caput 49. subvertisse contra Iudæos testimonia fortissima: in idem caput miscuisse plurima vocabula in unum. Ex verò similesve sententiæ probant, versionem septuaginta interpretum, ad astruendam fidem, & regulandos mores olim non fuisse divinæ authoritatis.

Resp. ad 1. neg. ant. Ad 2. neg. conseq. Quæ enim objecta sunt ex Hieronymo, nihil fidei, & moribus contrarium continent. Præterea, menda, errata, de quibus loquitur Hieronymus, librorum erant, non ipsorum interpretum.

Confirmatur ex eo, quòd præfatione in Paralipp. hæc scribat: *Si septuaginta interpretum pura, & ut ab eis in Græcum versa est, editio permaneret, superflue me, Chromati, Episcoporum sanctissime, atque doctissime, impelleres, ut Hebræa tibi volumina Latino sermone transferrem.*

CONCLUSIO 2. Versio Græca septuaginta interpretum, authentica est, his etiam temporibus.

Probatur. Ex iis, quæ superiore conclusione dicta sunt, constat 1. primos Christianos à Judæis Hellenistis accepisse versionem Græcam septuaginta interpretum. Constat 2. eam versionem, utpotè tum à Christo, tum ab Apóstolis usurpatam, magnum pondus habuisse; ac publicè in Ecclesiis lectam, & populis explicatam fuisse per quinque priora sæcula. Constat 3. Patres eâ usos fuisse, ut tum in privatis scriptis, tum in Conciliis hæreses, quæ subortæ sunt, impugnarent, ac damnarent. Constat deniq; 4. ex Augustino, ita præ populi manibus fuisse versionem illam, ut plerique ignorarent, an alia esset:

F 6 Hanc,

Hanc, inquit S. Doctor libr. 18. de civit. Dei cap. 43. *quæ Septuaginta est, tanquam sola esset, sic recepit Ecclesia, eâque utuntur Græci populi Christiani, quorum plerique, utrûm alia sit aliqua, ignorant. Ergo his etiam temporibus, versio Septuaginta interpretum est authentica; nam impossibile est, ut quoad fidem, & mores, corrupta fuerit versio, quæ tanto in pretio fuit in Ecclesiis quinque priorum sæculorum.*

Confirmatur 1. iis omnibus argumentis, quibus superius ostensum est, integros esse, quoad fidem, & mores, Hebraicos veteris testamenti, & novi Græcos fontes.

Confirmatur 2. Ecclesia Græca semper usa est, & his etiam temporibus utitur, tum in populo docendo, tum in regulandis moribus, tum in definiendis dogmatibus, versione, de quâ agitur; eam summâ curâ, summo studio conservavit antiquitûs: quis igitur in animum inducat suum, illam amplissimam, quæ tot viros sanctos & doctos genuit, non conservasse integram, & sanam Scripturam, quam patriâ linguâ habuit ab initio, quæque fuit in quotidiano illius usu?

Confirmatur 3. autoritate Sixti Papæ V. Probavit laudatus Pontifex eam versionem studio Cardinalis Carassæ, Apostolici Bibliothecarii, anno 1582. editam ex antiquissimo Bibliothecæ Vaticanæ codice: *Volumus*, inquit in suo diplomate, *& sancimus ad Dei gloriam, & Ecclesiæ utilitatem, ut vetus Græcum testamentum juxta lxx. ita recognitum, & expositum, ab omnibus recipiatur, & retineatur; quò potissimum ad Latine vulgatæ editionis, & veterum SS. Patrum, intelligentiam utantur; prohibentes, ne quis de hac novâ Græcâ editione audeat in posterum quicquam immutare.*

Objicies 1. Aristæo teste, summa erat versionis Septuaginta interpretum, cum Hebraico textu consonantia: at deest nunc in eâ, ut docet Hieronymus præfatione in Pentateuchum, in epistola

Dissert. III. *De Proprietatib. Theol.* 99

lâ ad Suriam, & Fretellam, in quæstionibus Hebraicis, in commentariis in Prophetas, in libro de optimo genere interpretandi. 2. Patres, ut videre est apud Justinum in dialogo cum Triphone, asserunt, Judæos multis in locis corrupisse versionem illam. 3. Non semel ab Origene, Luciano, Hesychio, Hieronymo, fuit emendata: ergo, &c.

Nec audiendi sunt, qui respondent, Septuaginta interpretes, ex Spiritûs sancti impulsu, multa omisisse, addidisse, & quædam aliter vertisse. Nam ægrè id tulissent Judæi præ suâ in Scripturas veneratione. Præterea immeritò Aristæus, Philo, & reliqui, versionis cum Hebræo textu miram consonantiam commendassent.

Resp. ea, quæ desunt, aut quæ immutata, aut correctâ dicuntur, levis esse momenti; ac proinde non impedire, quin versio lxx. interpretum non sit authentica; seu, non valeat ad stabiliendam fidem, & regulandos mores: menda verò, quæ in eam librariorum negligentia irrepsit, corrigi debent, aut ad textum Hebraicum, aut ad lectiones veterum Patrum, aut ad coherentiam cum præcedentibus, & sequentibus; sed eæ regulæ exponuntur inferiùs, ubi de vulgatâ Latinâ editione sermonem instituemus.

ARTICULUS III.

De versionibus Latinis.

Not. **V**ersiones Latinæ Bibliorum sunt, vel eæ, quæ factæ sunt ante Hieronymi tempora, vel quæ editæ sunt ab ipso Hieronymo, vel quæ elapso proximè sæculo prodierunt, vel tandem ea, quam sub vulgatæ nomine, Concilium Tridentinum authenticam declaravit.

§. I.

De Latinis Bibliorum versionibus antiquioribus .

CONCLUSIO 1. Ante Hieronymi tempora, plures erant Latinæ veteris testamenti ex Græcâ versione Septuaginta, & novi testamenti ex fonte Græco, versiones.

Probat. Hieronymus apertè conclusioni favet hisce verbis præfatione in Josue: *Apud Latinos tot sunt exemplaria, quot codices, cum unusquisque pro arbitrio suo vel addiderit, vel subtraxerit, quod ei visum est. Augustinus idem docet lib. 2. de doctrinâ Christi. cap. 11. Qui, inquit, ex Hebræâ linguâ scripturas in Græcam verterunt linguam, numerari possunt; Latini autem nullo modo.*

CONCLUSIO 2. Intervarias, quæ ferebantur ante Hieronymum Bibliorum Latinæ versiones, ea quæ dicebatur *Itala*, obtinebat in Ecclesiis Occidentalibus.

Probat. Augustinus lib. 2. de doctrinâ Christianâ cap. 15. sic loquitur de versione, de quâ est quæstio: *In ipsis interpretationibus Itala ceteris præfertur; nam est verborum tenacior, cum perspicuitate sententiæ. Italæ illius versionis meminit Hieronymus, in caput 14. Isaïæ; meminit etiam Gregorius Magnus, præfatione in libros moralium cap. 5. ubi eam vocat veterem, & vulgatam; veterem quidem, respectu earum, quas postea Hieronymus edidit; vulgatam verò, quod in Ecclesiarum usu esset communior.*

§. II.

*De Bibliorum versionibus Latinis editis
ab Hieronymo.*

Not. Quæremus hîc 1. quoties Hieronymus vetus testamentum in Latinam linguam verterit : 2. quos verterit veteris testamenti libros : 3. quid in novi testamenti versionem Latinam contulerit : 4. quam in Ecclesiis auctoritatem habuerit Hieronymi versio.

CONCLUSIO I. Hieronymus vetus testamentum , aliquibus tamen libris exceptis , ex Hebraico textu in linguam latinam convertit .

Probatur prior pars . 1. Id testatur Hieronymus ipse ad calcem libri de scriptoribus Eccles. *Norum* , inquit , *testamentum Græcæ fidei reddidi : Vetus juxta Hebraicum transfuli* . Idem suadetur ex præfationibus ejusdem S. Doctoris , in varios veteris testamenti libros ; de quibus quidem præfationibus hæc ipse habet , epistolâ quæ est xi. inter Augustini epistolas : *Omnes præfationes divinorum voluminum , quas editioni nostræ , ex Hebræo in Latinum , præposuimus , explicant ; quod interpretationis videlicet genus , in Scripturis Sanctis sequendum sit* . Augustinus lib. 18. de civit. Dei cap. 43. eidem veritati suffragatur ; hæc enim habet : *Non defuit temporibus nostris presbyter Hieronymus , homo doctissimus , & omnium trium linguarum peritus ; qui non ex Græco , sed ex Hebræo in Latinum eloquium , easdem Scripturas converterit* .

Probatur altera pars . Eos tantum libros in Latinum convertit Hieronymus , quibus præpositæ sunt Hieronymi præfationes , ut patet ex epistolâ , quæ est inter Augustinianas xi. atqui non omnibus veteris testamenti libris præpositæ sunt Hieronymi præfationes , sed tantum
illis,

istis, nempè Pentateucho, Josue, Paralipomenis, Judicibus, Ruth, libris Regum in Prologo Galeato Esdræ, & Nehemiæ, Tobia, Judith, Esther, Job, Psalterio, Proverbiis, Ecclesiasti, Cantico Canticorum, Ezechieli, Danieli, Isaia, Jeremiæ, duodecim Prophetis minoribus; referuntur eæ præfationes, & in unum collectæ exhibentur ad caput Bibliorum, quæ Parisiis excudit Antonius Vitre, anno 1662.

Hinc concluditur 1. Hieronymum non transtulisse ex Hebræo in Latinum, Ecclesiasticum, Sapientiam, Baruch: 2. transtulisse eum nonnullos libros, qui non erant in Canone Judæorum; Tobiam nimirum, & Judith.

CONCLUSIO 2. Hieronymus aliquos Canonis Judaici libros, ex Græcâ Septuaginta versione, convertit in Latinum.

Probatur. Augustinus epistolâ 10. ad Hieronymum, testatur, eum ex Græco in Latinum vertisse, librum Job: *Job*, inquit S. Doctor, *ex Hebræo à te interpretatum, cum jam haberemus interpretationem tuam ejusdem Prophetæ, ex Græco eloquio, versam in Latinum.* Iple Hieronymus epist. ad Suriam, & Fretellam, scribit se Psalterium vertisse in Latinum, ex purâ versione Græcâ Septuaginta, prout in Origenis hexaplis habebatur. Libro 2. Apologiæ prioris, testatur se, ex eâdem versione Græcâ Septuaginta, convertisse in Latinum Salomonis libros, Ecclesiastè nimirum, & Proverbia; neque enim Ecclesiasticum, & Sapientiam, credidit Salomonis esse: Quos, ait loquens de duobus prioribus, *olim juxta Septuaginta, additis obelis, & asteriscis, in Latinum verteram.* Cur autem obelos, & asteriscos addidisset, quæritus ab Augustino epist. 10. sic ipse respondet, epistolâ quæ est 11. inter Augustini epistolas: *Quod autem quæris, cur mea prior in libris Canonicis interpretatio, asteriscos habeat, & virgulas prænotatas, & postea aliam translationem absque his signis ediderim; pace tuâ dixerim;*

videris mihi non intelligere, quod quæstisti; illa enim interpretatio, Septuaginta interpretum est; & ubicumque virgulæ, id est, obeli sunt, significatur, quod Septuaginta plus diverint, quam habetur in Hebræo; ubi autem asterisci, id est, stellæ prælucentes, ex Theodotionis editione additum est ab Origene; & ibi Græca transtulimus, hic de ipso Hebræico, quod intelligebamus, expressimus; sensuum potius veritatem, quam verborum interdum ordinem conservantes.

CONCLUSIO 3. Hieronymus ex Græcâ Septuaginta versione, non convertit in Latinum omnes libros Canonis Judaici. Est contra Belarminum, nonnullosque alios.

Probatur rationibus Nicolai Serrarii: *Primò*. Hieronymus solet recensere libros, quos in Latinum vertit: At præter eos, de quibus dictum est in probatione secundæ conclusionis, nullum alium in suis operibus recenset: *Secundò*. Nullibi scribit sibi allatratum esse circa versionem ex Septuaginta interpretatione in Latinam linguam; sed si eam absolvisset, allatrarent ii, quos sæpius vocat canes, cum allatrarent propter versionem ex textu Hebræico in Latinum: *Cogor*, inquit præfatione in librum Job, *per singulos Scripturæ divinæ libros, adversariorum respondere maledictis*. Præterea, nemo ex veteribus, quidquam ex eâ versione citat: *Tertiò*. Quoties Hieronymus agit de suo in versionem Septuaginta opere, emendationem tantum à se factam, non autem conversionem in Latinum recenset: *Memini*, ait præfatione in Paralippomena, *editionem Septuaginta translatorum, olim de Græco emendatam, tribuisse me nostris*. Tandem non integram Latinam versionem ex Septuaginta translatione, sed jam factæ correctionem ab eodem Hieronymo, petit Augustinus: *Plurimum*, ait Augustinus epistolâ 10. cap. 14. *profueris, si eam Græcam Scripturam, quam Septuaginta operati sunt, Latine veritati reddideris, quæ in diversis codicibus ita varia*

ria est , ut tolerari vix possit , & ita suspecta , ne in Græco aliud inveniatur , ut inde aliquid proferri , aut probari dubitetur .

Objicies . Hieronymus epistolâ , quæ xi. est inter Augustini epistolas , expressè asserit , se libros Canonicos in Latinum vertisse , ex Græco Septuaginta textu : *Quod autem , ait cap. 5. quævis , cur mea prior in libris Canonicis interpretatio asteriscos habeat , & virgulas prænotatas , &c. illa interpretatio Septuaginta interpretum est , &c.*

Resp. Hieronymum loqui de solâ versione libri Job : de eâ enim tantum locutus fuerat Augustinus : Hoc addo , ait Augustinus epist. 10. quod postea didicimus , Job ex Hebræo à te interpretatum , cum jam quandam haberemus interpretationem tuam ejusdem Prophetæ , ex Græco eloquio versam in Latinum . Vbi tamen asteriscis notastis , quæ in Hebræo sunt , & in Græco desunt , obeliscis autem , quæ in Græco inveniuntur , & in Hebræo non sunt .

CONCLUSIO 4. Hieronymus nusquam novum testamentum vertit ex Græco textu in Latinum , sed ad Græcum textum illud emendavit .

Probatum . Ipse Hieronymus , cum agit de suâ in novum testamentum operâ , nusquam ait , se illud ex Græco textu in Latinum convertisse , sed emendasse tantum , ad Græcum textum . Sic loquitur in præfatione ad Damasum Papam : *Novum opus me facere cogis ex veteri , ut post exemplaria Scripturarum toto orbe dispersa , quasi quidam arbiter sedeam , & quia inter se variant , quæ sint illa , quæ cum Græcâ consentiant veritate , decernam .* Hæc etiam habet ad calcem libri de viris illustribus : *Novum testamentum Græcæ veritati reddidi .*

Objicies . Augustinus epist. 10. cap. 4. scribit novum testamentum ex Græco in Latinum fuisse versum ab Hieronymo : *Non parvas , inquit , Deo*

Deo gratias agimus de opere tuo , quòd Euangelium ex Græco interpretatus es .

Resp. In Augustini epistolâ vocem hanc ; *Interpretatus es* , sumi debere pro hâc aliâ : *Emendasti* . Ratio est , quia sic eam explicat ipse Hieronymus , ad Augustinum rescribens : *Esse me , ut discis* , inquit epist. quæ est inter Augustinianas 11. *in novi testamenti emendatione suscipis , exponisque causam , cur suscipias , &c.*

CONCLUSIO 5. Summo plausu recepta fuit emendatio Latina novi testamenti , ab Hieronymo ad textum Græcum edita .

Probatur . Augustinus conclusionem apertè tradit epist. 10. cap. 4. ubi sic loquitur : *Non parvas Deo gratias agimus de opere tuo , quòd Euangelium ex Græco interpretatus es ; quia penè in omnibus nulla offensio est , cum Scripturam Græcam contulerimus .* Nec mirum ; siquidem jussu & autoritate Damasi Papæ , Hieronymus emendationem illam susceptam absolverat : *Adversus quam invidiam* , inquit in præfatione in Evangelia , Damasum alloquens , *duplex me causa consolatur , quòd & tu , qui summus Sacerdos es , fieri jubes .*

CONCLUSIO 6. Hieronymi versio Latina , ex Hebræo veteris testamenti textu , statim non obtinuit in Ecclesiâ ; obtinuit tamen postea .

Probatur prior pars 1. S. Hieronymus variis in locis scribit , se tanquam sacrilegum apud plures audiisse , quòd ejus versio ex Hebræo in Latinum , multis in capitibus dissideret à Græcâ versione Septuaginta interpretum , quæ tunc in omnibus Ecclesiis legebatur : *Cogor* , ait in præfatione in librum Job , *per singulos divinæ Scripturæ libros , adversariorum respondere maledictis , qui interpretationem meam , reprehensionem Septuaginta interpretum criminantur .*

Probatur 2. Augustinus epist. 10. scribit , obstituros esse plurimos , si Hieronymi interpreta-

tio

tio in Ecclesiis legatur: *Perdurus erit enim*, inquit cap. 3. *si tua interpretatio per multas Ecclesias frequentius caperit lectitari*; rationem reddit, quod, ait, à Græcis Ecclesiis, Latine Ecclesiæ dissonabunt. Subjicit S. Doctor factum, quod contigit in quodam Episcopo. Illi, cum ex interpretatione Hieronymi, aliquid de Ionâ legeret diversum ab eo, quod in codicibus Græcis reperitur, adeò obstitum est, ut periculum fuerit, ne vitam cum sacerdotio amitteret: *Factus est*, ait ibidem, *tantus tumultus in plebe, maxime Græcis arguentibus, & inflammantibus calumniam falsitatis, ut coactus sit homo, velut mendositatem corrigere volens; post magnum periculum non remanere sine plebe.*

Probatur altera conclusionis pars. Gregorius Magnus, præfatione in libros moralium, cap. 5. scribit, suo tempore Romanam Ecclesiam utraq; versione uti consuevisse; veterem nimirum, hoc est, factâ ex Septuaginta translatione; & novâ, id est, editâ ab Hieronymo ex Hebræo in Latinum: *Novam translationem dissero*, inquit in suâ ad Leandrum in moralium libros epistolâ; *sed ut comprobationis causa exigit, nunc novam, nunc veterem per testimonia assumo: ut quia Sedes Apostolica, cui, authore Deo, præsidet, utraq; utitur, mei quoque labor studiis, ex utraq; fulciatur.*

§. III.

De Bibliorum versionibus Latinis, editis elapso proxime sæculo.

Not. Bibliorum versiones Latine recentiores, factæ sunt, aut à Catholicis, aut ab Heterodoxis; de utriusque nonnihil hic dicendum est.

CONCLUSIO I. Multæ sunt recentiores Bibliorum versiones à Catholicis factæ.

Pro-

Probatur enumeratione præcipuarum: *Prima*, est Santis Pagnini Locensis, anno 1528. de quâ Genebrardus in præfatione ad Origenem: *Secunda*, est Isidori Clari Brixiani; illius meminit Canus locorum theologicorum lib.2. cap. 13. *Tertia*, est Ariæ Montani: *Quarta*, est Vatabli Parisiensis professoris; illius nimirum nomine commendata est à Roberto Stephano in editione Bibliorum, quam Parisiis edidit anno 1545. Vatabli tamen esse, negat Genebrardus præfatione in Origenem.

CONCLUSIO 2. Variæ, elapso proximè sæculo, prodierunt ab Heterodoxis Bibliorum Latinæ versiones.

Probatur enumeratione: *Prima*, quæ est Munsteri versio, prodit anno 1525. *Secunda*, est Oecolampadii, anno 1535. *Tertia*, Leonis Judæ, qui ex Judæo factus Zuinglianus, Biblia Latinè vertit; ea versio vulgò dicitur Tigurina, quod anno 1544. Tiguri edita sit: *Quarta*, Sebastiani Castalionis, quæ typis mandata est Basileæ, anno 1556. *Quinta*, Junii ac Tremellii Heidelbergensium professorum: edita fuit Genevæ anno 1590. & postea Hannoniæ anno 1592. Iis versionibus Genebrardus, præfatione in Origenem, addidit versionem Genevensium, quæ quidem, inquit, est rapsodia assuta è variis, Santis, Munsteri, Vatabli, & reliquorum centonibus, & pannis.

Præter eas omnium Bibliorum versiones, Latinæ sunt aliæ nonnullorum tantum librorum, tum à Catholicis, tum ab Heterodoxis editæ; de quibus, qui plura scire voluerit, poterit Serarium adire, cap. 18. Prolegomenorum Bibliacorum.

§. IV.

De vulgata versione Latina.

Not. De vulgatâ versione Latinâ quæri potest 1. quisnam sit illius author : 2. quænam olim fuerit illius in Ecclesiis authoritas, & quam nunc habeat à Concilio Tridentino : 3. utrùm ab ipso Concilio Hebraicis, & Græcis fontibus anteposita fuerit : 4. an in eâ nulla omninò sint menda, quæ correctione indigeant.

De authore vulgatæ versionis Latinæ.

Not. 1. Circa propositam quæstionem, triplex est theologorum sententia. Prima, docet vulgatam nostram, esse antiquam illam, quæ *Itala* dicebatur, & quâ utebantur Occidentales Ecclesiæ ante Hieronymi tempora. Secunda, quæ est Augustini Eugubini, & Pici Mirandulani, asserit, quoad vetus testamentum, esse eam, quam ex Hebraico textu edidit Hieronymus, & quoad novum, eam esse, quam idem ipse Hieronymus ad Græcum fontem correxit. Tertia, quæ est Joannis Driedonis, & Sixti Senensis, lib. 8. Bibliothecæ sanctæ, censet, nostram vulgatam esse mixtam, tum ex Italâ versione, tum ex eâ, quam Hieronymus edidit.

Not. 2. Ex iis, quibus placet, vulgatam esse mixtam ex vetere Latinâ, & novâ Hieronymi, nonnulli docent, plures integros libros esse ex antiquâ versione, & alios etiam integros, esse ex versione Hieronymi : ita Bellarminus de verbo Dei lib. 2. cap. 8. Alii contendunt, ne unum quidem librum esse omninò, aut ex antiquâ versione, aut ex novâ Hieronymi, sed esse ex utraq; ab incerto authore mixtum ; ita Baronius tomo 2. Sixtus Senensis Biblioth. lib. 8.

CONCLUSIO 1. Vulgata novi testamenti ver-

versio Latina , antiqua est versio , sed ab Hieronymo ad textum Græcum emendata .

Probatur . Antiqua versio ab Hieronymo emendata , obtinuit olim in Ecclesiis ; idque patet , tum ex eo , quòd eam Damasi Papæ jussu adornarit , tum ex eo , quòd Augustino teste epist. 10. ab omnibus probata fuerit : atqui rejecta non fuit , imò retenta , versio quæ peracta fuit jussu Summi Pontificis , & ab omnibus probata : ergo , &c.

Probatur 2. Quæ in veteri vulgatâ Hieronymus correxerat , majori ex parte correctâ leguntur in nostrâ vulgatâ novi testamenti ; exempli gratiâ , in antiquâ versione , Matthæi 2. legebatur : *In Bethleem Judææ* ; Hieronymus in Commentario ejusdem cap. 2. docet legendum : *In Bethleem Judææ* ; sic verò in nostrâ vulgatâ legitur . Lib. 1. in Jovinianum , reprehendit illud veteris versionis , 1. ad Corinthios 7. *Divisa est mulier , & virgo* , & legi vult , quod jam legitur : *Mulier innupta , & virgo* . In epistolâ ad Marcellam , arguit illud veteris versionis , ad Rom. 12. *Tempori servientes* ; aitque legendum , ut nunc legitur in nostrâ vulgatâ : *Domino servientes* .

Objicies . In nostrâ novi testamenti vulgatâ versione plura desunt , quæ Hieronymus in antiquâ versione emendanda duxerat ; ergo vulgata novi testamenti versio non est ea , quam Hieronymus emendavit . Probatur anteced. Nostra vulgata ad Rom. 12. legit , *Sapere ad sobrietatem* ; Hieronymus tamen lib. 1. in Jovinianum , legi vult , *Sapere ad pudicitiam* . Legit quoque , 1. ad Corinth. 13. *Si tradidero corpus meum , ita ut ardeam* ; quamvis idem S. Doctor in caput 5. epist. ad Galat. legendum censuerit : *Ita ut gloriar* .

Resp. ad 1. conc. ant. neg. conseq. Ratio est , quia Hieronymus in antiquâ novi testamenti versione non mutavit quæcumque mutanda censuerat ,

rat, ne scilicet plurimum, qui antiquæ versionis assuetierant, animum offenderet: Ita, inquit in præfatione ad Damasum, *calamo temperavimus, ut his tantum, quæ sensum videbantur mutare, correctis, reliqua remanere pateremur, ut fuerant.*

CONCLUSIO 2. Nostra vulgata veteris testamenti versio, aliquibus libris exceptis, non est antiqua versio, quæ Hieronymi tempora præcessit; sed quam ex textu Hebraico ipse Hieronymus edidit.

Probatur 1. prior pars. Antiqua versio Latina, quæ fuit ante Hieronymum, facta est, ut superius observatum est, ex Græcâ versione Septuaginta interpretum: atqui nostra vulgata non est facta ex Græcâ versione; innumeris enim in locis ab eâ dissidet: ergo facta est ex Hebræo textu, quippè maximè cum ipso cohæret. Sed solus Hieronymus author est versionis Latinæ, quæ facta est ex Hebræo textu: ergo, &c.

Probatur 2. eadem prior pars. Ea versio non est antiqua versio, sed versio Hieronymi, quæ continet omnia, quæ, ex eodem S. Hieronymo, desiderabantur in antiquâ versione Latinâ: atqui nostra vulgata continet ea omnia, ut sunt: *Ex Ægypto vocavi filium meum: Videbunt in quem transfixerunt; & alia plurima, quæ retulimus agentes de Græcâ versione Septuaginta interpretum: ergo, &c.*

Probatur 3. eadem pars. Patres cum de nostrâ vulgata loquuntur, eam sub Hieronymi nomine laudant: *Sancti Hieronymi editione*, inquit Isidorus lib. 6. etymol. cap. 5. *omnes Ecclesiæ usquequaque utuntur.* Hugo Victorinus lib. de Scripturis cap. 9. hæc habet: *Hieronymi translatio, quia Hebraicæ veritati concordare magis probata est, idcirco Ecclesia Christi per universam Latinitatem, præ cæteris omnibus translationibus, quas vitiosa interpretatio, sive prima de Hebræo in Græcum, sive secunda de Græco in Latinum, facta*

Dissert. IV. De Locis Theologicis. III.

facta corruperat, hanc solam legendam, & in authoritate habendam constituit.

Probatur 1. altera conclusionis pars. Vulgata nostra Psalterii versio, diversa est omnino ab iis quas Hieronymus edidit, tum ex Hebræo textu, tum ex Græcâ editione Septuaginta; idque facile quisque advertet, qui duplicem illam versionem Psalterii factam ab Hieronymo, quæque integra inter ejus opera reperitur, cum nostrâ vulgatâ comparaverit. Est igitur nostra vulgata eadem hoc in capite cum versione *Italâ*, quæ præcessit Hieronymi tempora, quam tamen ipse correxit; idque colligitur ex ejusdem S. Doctoris epistolâ ad Suriam & Fretellam.

Probatur 2. eadem secunda conclusionis pars. Ille non est author Latinæ versionis, Sapientiæ, Ecclesiastici, & Macchabæorum, qui eos libros nusquam in Latinum transtulit: atqui, ut suo loco dictum est, Hieronymus nusquam illos libros in Latinum transtulit. Si quis autem quærat, quis ergo, hoc in capite, sit nostræ vulgatæ author? Dicendum erit, eam esse antiquam versionem *Italam*, de quâ Augustinus libr. de doctrinâ Christianâ cap. 15. loquitur.

Objicies in priorem conclusionis partem: *Primò*. Nostra vulgata pluribus in locis dissidet ab Hebræico textu: non dissideret verò, si esset Hieronymi, viri, ut ait Augustinus, trium linguarum peritissimi: *Secundò*. In nostrâ vulgatâ non sunt asterisci & obeli, quibus, ut ipse testatur Hieronymus præfat. in Psalm. & in Job, suam versionem Latinam distinxerat: *Tertiò*. In nostrâ vulgatâ reperiuntur plurima, quæ S. Hieronymus aliter legenda duxerat, tum in quæstionibus Hebræicis, tum in libro de optimo genere interpretandi, tum in commentariis in Prophetas.

Resp. ad 1. Differentiam, quæ objicitur, oriri aut ex librariorum incuriâ, aut ex eo, quòd Hieronymus, ut faciendum docet in libro de optimo

genere interpretandi, magis ad Hebraici textus sensum, quam ad verba attenderit.

Ad 2. dico, nodum illum ab Hieronymo solvi, in epist. ad Augustinum, quæ est inter Augustini epistolas 11. scilicet ibi asserit, se solam versionem Job, & aliorum librorum, quos ex Septuaginta editione transtulit, distinxisse per asteriscos, & obelos.

Ad 3. Respondet Bellarminus, multis de causis accidisse, ut quædam sint in nostrâ vulgatâ, quæ aliter legenda duxit Hieronymus. Prima, est error, & incuria librariorum; secunda, varia significatio vocabulorum, quæ proindè modò in unum sensum, modò in alterum sumpta sunt ab Hieronymo; tertia est, quòd ipse priorem suam sententiam nonnunquam mutaverit; ac proindè aliter legerit in suâ versione, quam priùs in suis operibus legendum duxerat.

Quæres, an vulgata nostrâ Latina, sit omninò eadem cum versione Hieronymi ex Hebræo, ita ut eadem verba contineat?

Resp. majori ex parte eam continere eadem verba, quæ continet Hieronymi versio; nemo tamen asseret, ubique esse omninò eadem verba; sed cum denominatio fiat ex majori parte, jurè ac meritò vulgata nostrâ dicitur esse Hieronymi versio.

Quam olim habuerit, & nunc habeat auctoritatem vulgata Latina versio?

Not. Vulgata nostrâ versio Latina, potest comparari ad libros, aut veteris testamenti, aut novi: quærendum est igitur, quam auctoritatem habuerit, & nunc habeat ad utrumque testamentum comparata?

CONCLUSIO I. Vulgata nostrâ versio novi testamenti, statim post sui editionem, obtinuit in Ecclesiis.

Probatur. Ex dictis, vulgata nostrâ versio no-

vi testamenti, est eadem cum Italâ, quam Hieronymus ad textum Græcum emendavit in: *Da-*
masi Papæ: atqui versio Latina novi testamenti,
 quam S. Hieronymus ad Græcum textum emen-
 davit, statim obtinuit in Ecclesiis Occidentalibus;
 nempe id docet Augustinus epist. 10. quæ est ad
 Hieronymum; verba laudata sunt superius Pa-
 rag. 2. conclus. 5.

CONCLUSIO 2. Vulgata nostra veteris te-
 stamenti versio, statim admiffa fuit in aliquibus
 Ecclesiis, sed non in omnibus.

Probatur. Ex dictis, nostra vulgata versio ve-
 teris testamenti, eadem est cum versione Latinâ
 Hieronymi ex textu Hebraico: atqui ea Hiero-
 nymi versio admiffa fuit in aliquibus Ecclesiis;
 id enim patet ex apologiis, & præfationibus ejus-
 dem Hieronymi, necnon ex Augustino lib. 18.
 de civit. cap. 43. sed admiffa non fuit in omnibus;
 imò à pluribus fuit statim rejecta, ut superius Pa-
 rag. 2. Conclus. 6. demonstratum est.

CONCLUSIO 3. Post Hieronymi mortem,
 nostra veteris testamenti versio vulgata obti-
 nuit in Ecclesiâ Romanâ cum Italâ, seu antiquio-
 re versione Latinâ.

Probatur. Hieronymi versio obtinuit cum
 Italâ, ut superius ostensum est ex Gregorio Ma-
 gno: ergò & nostra vulgata.

CONCLUSIO 4. A septimo sæculo, usque
 ad Concilium Tridentinum, vulgata nostra ver-
 sio obtinuit sola, in omnibus Ecclesiis Occiden-
 talibus.

Probatur 1. Paulatim evanuerunt aliæ om-
 nes versiones, etiam quæ Itala dicebatur; quip-
 pè post septimum sæculum, nemo illius memi-
 nit præter Isidorum, etymol. lib. 6. cap. 5. *Secun-*
dò. Post Gregorium Magnum, omnes in toto
 Occidente nostram vulgatam versionem lege-
 re cœperunt, retinueruntque solam velut He-
 braicæ veritati magis consonam; unde in homi-
 liis, concionibus, commentariis, disquisitioni-

114 Instit. Theolog. Prolegomena.
nibus theologicis, synodis, nullam aliam citarunt.

(Quæres, an eo tempore, quod à Gregorio Magno nuxit usq; ad Concilium Tridentinum, esset aliqua constitutio Ecclesiastica, quâ solius nostræ vulgatæ usus præciperetur?)

Resp. nullam, aut in decretis Summorum Pontificum, aut in Conciliorum Canonibus, aut in Ecclesiarum particularium statutis, legi constitutionem, quæ ante Concilium Tridentinum, vulgatæ nostræ versionis usum positivè præscripserit.

Dices. Hugo Victorinus, meminit Ecclesiastici præcepti de usu vulgatæ editionis: hæc enim habet lib. de scripturis, cap. 9. *Ecclesia Christi per universam Latinitatem versionem hanc solum legendam, & in authoritate habendam constituit.*

Sed contra est 1. quia Hugo Victorinus non refert synodum, Pontificem Maximum, ex quibus hauserit constitutionem, de quâ loquitur: 2. dici potest, consuetudinem, per quam vulgatæ versionis usus invaluerat, fuisse constitutionis loco.

CONCLUSIO 5. Vulgata nostra versio post Concilium Tridentinum est authentica.

Probatur. Concilium Tridentinum sess. 4. decreto de editione, & usu sacrorum librorum, sic loquitur: *Sacrof. Synodus considerans, non parum utilitatis accedere posse Ecclesiæ Dei, si ex omnibus Latinis editionibus, quæ circumferuntur sacrorum librorum, quænam pro authentica habenda sit, innotescat, statuit, & declarat, ut hæc ipsa vetus, & vulgata editio, quæ longo tot sæculorum usu in ipsâ Ecclesiâ probata est, in publicis lectionibus, disputationibus, prædicationibus, & expositionibus pro authentica habeatur, & ut nemo illam rejicere, quovis prætextu, audeat, vel præsumat. Quod mox laudatum est Concilii decretum, variè vellicant Heterodoxi: necesse est igitur, ut speciatim illud explicemus.*

Ex-

*Explicatur Concilii Tridentini decretum circa
vulgatæ editionis authenticitatem.*

Not. Recentiores Hæretici in Concilii Tridentini decreto impugnant, 1. vocem hanc: *Authentica*; quasi verò, inquiunt, aliqua versio Hebraicis, aut Græcis fontibus anteferri possit: Decernunt, ait Calvinus in antidoto sessionis 4. *etiamsi ex fonte ipso purum liquorem proferant, etiamsi ex certâ veritate falsum coarguant, minime esse audiendos*. Impugnant 2. verba ista: *Nemo illam rejicere, quovis prætextu, audeat, vel præsumat*; sed quòd, inquiunt, constet, vulgatam multis erroribus scaterere: *Qui linguas tenent*, ait idem Calvinus in antidoto *hanc interpretationem deprehendunt infinitis erratis scaterere; idque apertissimis planum faciunt demonstrationibus*.

Not. 2. Nonnulli è Catholicis contendunt: 1. vocem, *Authenticam*, significare, nulla omninò, ne levia quidem, menda reperiri in vulgatâ nostrâ versione. Contendunt 2. Concilium declarasse, nec textum Hebraicum veteris testamenti, nec Græcum novi, qui in Bibliis leguntur, esse authenticos, seu, non esse primævos, ac germanos Scripturarum fontes: hoc est, non esse textus, quibus primùm à Prophetis & Apostolis libri Canonici conscripti sunt. Quid nos de iis controversiis sentiamus, sequentes conclusiones aperient.

CONCLUSIO I. Concilium Tridentinum vulgatam Latinam versionem non anteposuit Hebraicis, aut Græcis fontibus. Est contra Heterodoxorum calumniam.

Probatür I. Concilium Tridentinum vulgatam versionem Latinam non anteposuit fontibus, cum quibus eam nullo modò comparavit: atqui vulgatam versionem Latinam nullo modo comparavit cum Hebraicis, aut Græcis fontibus; quippè illorum, ne implicite quidem, meminit.

Probatur 2. Antelatio illa, quam Heterodoxi imponunt Concilio, est contra illius scopum : Nam Concilii scopus erat decernere, quænam inter varias *Latinas* editiones, quæ tunc circumferebantur, esset optima, quænam aptior esset ad confirmandam fidem, & regulandos mores : idque patet ex hac ipsiusmet concilii præfatiunculâ : *Considerans, non parum utilitatis accedere posse Ecclesiæ Dei, si ex omnibus Latinis editionibus, quæ circumferuntur, Sacrorum librorum, quænam pro authenticâ habenda sit, innoveſcat.*

Probatur 3. Non ultimi è Theologis Catholicis, scribunt id, quod Heterodoxi contendunt, Concilio nusquam venisse in mentem. Bellarminus de verbo Dei lib. 2. cap. 10. sic loquitur : *Hoc idè mendacium voco, quòd nihil ejusmodi in Decreto legatur. Nec enim Patres fontium ullam mentionem fecerunt.* Sic etiam Alphonsus Salmero, Prolegomeno 3. in secundâ disputatione de Latinâ versione : *Nihil ibi, in Concilio, de exemplaribus, aut Græcis, aut Hebraicis, agebatur ; tantùm inter tot editiones Latinas, quot nostra sæcula parturierunt, quænam ex illis præstaret, sermo erat ; & rejectis reliquis Latinis, unam hanc vulgatam, reliquis tanquam veriore, puriore, dilucidiore, ac suis fontibus, unde est orta, magis consentientem pronuntiavit ; atque huic soli, ut commentariis & scholiis illustretur, contulit.*

CONCLUSIO 2. Concilium Tridentinum vulgatam editionem non eo sensu declaravit authenticam, quòd textus Hebraicus, & Græcus, qui leguntur in Bibliis, non sint authentici.

Probatur 1. Ut mox observatum est, Concilium in suo decreto ne meminit quidem textus Hebraici, aut textus Græci : *Secundò.* Si ex Concilii decreto inferri posset, textum Hebraicum, & textum Græcum, prout in hodiernis Bibliis leguntur, non esse authenticos, id fieret, quòd au-

authenticitas vulgatæ versionis stare non posset cum authenticitate textuum Hebraicorum, & Græcorum, qui leguntur in hodiernis Bibliis: atqui reverà stare potest; neque enim authenticitas unius instrumenti excludit authenticitatem alterius, quod diversi est generis.

ib CONCLUSIO 3. Concilium Tridentinum non eo sensu vulgatam declaravit authenticam, quòd nulla omninò errata, seu, menda, in eà reperiantur.

Probat. I. Eo tempore, quo Sacra Synodus decretum suum de vulgatâ editione promulgavit, selectis Doctoribus mandavit, ut illius emendationi sedulò incumberent; non arbitrabatur ergo, eam esse ab omnibus mendis, vel levissimis immunem. *Secundò*, Concilii Tridentini mandatum exequi conatus est Pius Papa IV. quo Pontifice finitum fuit Concilium: *Pius IV. Pontifex Maximus* (verba sunt præfationis in editionem Romanam Bibliorum) *lectissimis aliquot Sanctæ Romanæ Ecclesiæ Cardinalibus, aliisque tum Sacrarum litterarum, tum variarum linguarum peritissimis viris, eam provinciam demandavit, ut vulgatam editionem Latinam, adhibitis antiquissimis codicibus manuscriptis, inspectis quoque Hebraicis, Græcisque Bibliorum fontibus, consultis denique veterum Patrum commentariis, accuratissimè castigarent.* Addit eadem præfatio, Pium V. idem institutum prosecutum fuisse: addit iterum Sixti V. jussu ad exitum perductum fuisse, quod incœperant Pius IV. & Pius V. Prodiit anno 1589. Sixti V. constitutio de vulgatæ versionis correctione, incipitque: *Æternus ille celestium*. Post Sixtinam illam correctionem, iterum emendata fuit nostra vulgata versio, Romæ sedente Clemente VIII. Tandem, ait præfationis author, *sub initium Pontificatus Clementis VIII. opus, in quod Sixtus V. intenderat, perfectum est.*

Objicies. Si essent menda, aut errata quædam

in vulgatâ editione, rejici posset aliquibus in locis sub prætextu eorum mendorum, ac erratorum: atqui sub eo prætextu nullis in locis rejici potest; id enim prohibet Concilii Tridentini decretum: *Vt, inquit, nemo illam rejicere, quovis prætextu, audeat, vel præsumat.*

Resp. neg. min. Ad cujus probationem dico, Concilii verba intelligi de rebus alicujus momenti, seu quæ ad fidem, aut mores spectant. Responsioni lux affulgebit ex sequenti conclusione.

CONCLUSIO 4. Eo tantum sensu vulgata versio Latina à Concilio Tridentino declarata fuit authentica, quod in iis, quæ sunt alicujus momenti, non discrepet à primario, & vero divinæ Scripturæ sensu: quod corrupta non sit in capitibus, quæ ad fidem, aut mores pertinent.

Probatur ex scopo Concilii. Concilium Tridentinum, ut superius dictum est, hoc unum definire voluit, nostram vulgatam valere ad faciendam fidem; nam id significat vox *Authenticam*; quippè ea vox significat instrumentum, quod in judicio dignum est fide, seu, cujus testimonium negari non debet: atqui ad hoc satis fuit declarare, quod in iis, quæ sunt alicujus momenti, vulgata nostra non discrepet à vero Scripturæ sensu, quod corrupta non sit in capitibus, quæ ad fidem, aut mores spectant: ergo, &c.

Probatur testimonio plurium Theologorum. Melchior Canus de locis theol. libr. 2. cap. 13. conclus. 1. asserit, vulgatam retineri debere *in his omnibus, quæ ad fidem, & mores spectant.* Andræas Vega lib. 15. in Concil. Trident. cap. 9. sic loquitur: *Eatenus voluit synodus, eam authenticam haberi, ut certum omnibus esset, nullo eam defædatam errore, ex quo perniciosum aliquod dogma in fide, & moribus colligi posset.* Eò autem majoris est momenti Vegæ testimonium, quod theologus adfuerit

rit Concilio Tridentino ; ipsi etiam sessioni 4. in quâ legitur decretum de authenticitate vulgatæ editionis.

Bellarminus lib. 2. cap. 11. de verbo Dei , hæc scribit : *Certos nos voluit reddere Ecclesia , in iis præsertim , quæ ad fidem & mores pertinent , nulla esse in hac versione interpretum errata .* Sixtus Senensis lib. 8. Biblioth. fatetur , *errata quædam , & leves defectus in eâ reperiri ; sed tamen eam esse authenticam contendit , quia certum est , inquit , neque in veteri , neq; in novâ editione , aliquid unquam inventum esse , quod fuerit à veritate Christianæ fidei devium , falsum ac mendax , vel contrarium dogmatibus , ac regulis Orthodoxis , vel præter veritatem additum , vel contra veritatem mutatum , vel in præjudicium veritatis omissum , vel adeò depravatum , ut occasionem perniciosè errandi attulerit .*

CONCLUSIO 5. Concilium Tridentinum jurè , ac meritò declaravit , vulgatam Latinam versionem esse authenticam in sensu conclusionis quartæ .

Probatur . Concilium declarare potuit authenticam versionem , quâ solâ per mille annos usa est Ecclesia Catholica in Occidente : atqui , ut superius dictum est , per mille annos Ecclesia Catholica in Occidente , solâ versione vulgatâ usa est in concionibus , in conciliis , in academiis : ergo , &c.

Probatur 2. Residet in Ecclesiæ corpore potestas judicandi absque erroris periculo , an versio aliqua sit authentica : alioquin ii , qui nesciunt linguas , quibus libri Sacri à Prophetis & Apostolis scripti sunt , nusquàm possent certi esse , se legere Dei verbum ; ac proinde Augustinus , qui Hebraicam linguam nesciit , qui tyro fuit in Græcâ , nullum librum in suis contra hæreticos disputationibus citare potuisset tanquam Dei verbum . Atqui potestas , quæ residet in ecclesiæ corpore , maximè residet in conciliis Oecu-

menicis; quippè totum Ecclesiæ corpus representant, ergo, &c.

Objicies. Augustinus epist. 10. scribit, Hieronymum falli potuisse in suâ ex Hebræo Latinâ versione: *Vndè etiam, inquit, nobis videtur, aliquando te quoque in nonnullis falli potuisse.* Ipse Hieronymus præfatione in Pentateuchum scribit, aliud esse vatem, aliud interpretem; illum errare quidem non posse, istum verò posse errare; hincque sic conficitur argumentum. Ut concilium definire potuerit, vulgatam versionem in iis, quæ ad fidem aut mores spectant, non discrepare à genuino & primævo scripturarum textu, debuit judicare, authorem vulgatæ versionis fuisse infallibilem: atqui id, Augustino & Hieronymo testibus, judicare non potuit, ergo &c.

Resp. neg. maj. nempè, ut concilium definiret, vulgatam versionem esse authenticam, satis fuit, ut judicaret illius authorem, quamvis errare potuerit, revera non errasse in iis quæ ad fidem aut mores spectant, seu, translationem ab eo editam, in capitibus ad fidem aut mores spectantibus, actu non discrepare à genuino scripturarum textu.

§. V.

De vernaculis Bibliorum versionibus.

Not. De vernaculis bibliorum versionibus queri potest 1. an omnibus jussum aut prohibitum sit eas legere: 2. an ratione quarundam circumstantiarum, loci, temporis, personarum, prohiberi possit lectio vernaculæ versionis bibliorum.

CONCLUSIO 1. Omnibus nec jussum, nec prohibitum est Catholicas Bibliorum vernaculas versiones legere,

Pro-

Probatur prima pars. Nullibi legitur generalis jussio legendi biblias in linguas vernaculas conversa.

Confirmatur ex eo quod nec Apostolis, nec aliis Apostolicis hominibus imperatum sit aliquando biblia transferre in linguas vernaculas: unde quatuor prioribus sæculis, licet Euangelium ubique diffusum esset, biblia non extabant, nisi aut Hebraicè, aut Græcè, aut Latinè.

Præterea omnibus omninò hominibus nusquam præscriptum fuit, ut legere discerent, ac proinde nec imperatum, ut vernaculas, si quæ forent, bibliorum versiones legerent: imò nec legi audirent, cum fidem ex concionatorum sermonibus quisque discere potuerit.

Probatur altera pars. Nullibi extat prohibitio generalis, de quâ hic agitur. Præterea ad hoc usque sæculum Ecclesia non aliarum quam factarum ab hæreticis versionum, Vvaldensibus scilicet, Vviclefistis, Lutheranis, & Calvinistis, lectionem generatim prohibuit.

CONCLUSIO 2. Ecclesia potest pro ratione circumstantiarum loci, temporis, personarum, nonnullis interdicare vernacularum versionum, etiam Catholicarum, lectionem.

Probatur. Ecclesia id potest interdicare, quod potest esse noxium: atqui lectio bibliorum in vernaculas linguas conversorum potest esse noxia ratione circumstantiarum, aut loci, aut temporis, aut personarum. Nempè aliquibus per accidens possunt esse offêndiculo, quæ de patriarcharum polygamiâ, ancillarum ad uxorem unam adjunctione, Davidis adulterio leguntur. Quædam scripturarum sententiæ per accidens nonnullis præbere possunt occasionem errandi, aut in fide aut in moribus. Se hoc in capite habet Ecclesia (inquit Merbesius Summæ Christianæ part. 1. quæst. 59.) sicut sollicita quæpiam mater, quæ infantulos adhuc teneros & imbelles non finit defecare panem, ne se lædant inter de-

secundum; sed ipsa met concidit, imò sæpè mandit, & manum inserit in os pusillorum, qui gingivâ adhuc inermi ipsum frangere nequeunt.

CONCLUSIO 3. Quibusdam in locis sub finem elapsi proximè sæculi Biblia vernaculè conversa, cuique passim & sine discrimine legere non licebat.

Probatur. Nonnulla sunt loca, in quibus quique fideles sine obtentâ priùs facultate non permittebantur legere Biblia in linguas vernaculas ab authoribus etiam Catholicis conversa; ea verò loca erant, in quibus promulgatum fuerat Concilium Tridentinum, & in quibus obtinebat, nec abierat in defuetudinem regula quarta Indicis librorum prohibitorum editi jussu ejusdem Concilii; quæ quidem regula sic habet: *Cum experimento manifestum sit, si Sacra Biblia vulgari linguâ passim sine discrimine permittantur, plus inde, ob hominum temeritatem, detrimenti, quam utilitatis oriri, hâc in parte judicio Episcopi, aut inquisitoris stetur, ut cum consilio Parochi, vel confessorii, Bibliorum à Catholicis authoribus versorum lectionem in vulgari lingua eis concedere possint, quos intellexerint ex hujusmodi lectione non damnum, sed fidei, atque pietatis argumentum capere posse; quam facultatem in scriptis habeant. Qui autem absq; eâ facultate ea legere, seu habere præsumpserit, nisi priùs Bibliis ordinario redditis, peccatorum absolutionem percipere non possit.*

Ea indicis regula apertè damnat recentiorum Hæreticorum sententiam, quæ sic habet: Nos, passim, inquit, affirmamus 1. Scripturarum lectionem cunctis hominibus communem fieri debere: 2. nullos quantumvis imperitos ab earum lectione arcendos, aut deterrendos esse: 3. sed excitandos potius omnes ad eas sæpè, & diligenter legendas: 4. idque non modo, si concessa à Prælati copia legendi fuerit, sed etiam quantumvis illi ordinarii & confessores prohibuerint.

ARTICULUS VII.

Quid inferri debeat ex iis, quæ de textu Hebraico, Græco, vulgata versione dicta sunt.

CONCL. **M**ulta sequuntur ex iis, quæ de textu Hebraico, Græco, vulgata editione dicta sunt.

Probatur. *Primo*, si (ut dictum est paragrapho secundo, articuli quinti) veteris testamenti textus Hebraicus, & novi testamenti Græcus sint authentici, sequitur, quod adhiberi possint, tum ad probanda fidei dogmata, tum ad asserendas morum regulas.

Secundo. Si (ut observatum est paragrapho tertio, articuli sexti) in rebus levis momenti, menda quædam irrepsent in vulgatam versionem, sequitur, ea menda emendari posse ad Hebraicum, aut Græcum textum. Cum tamen (ut dictum est paragrapho secundo, articuli quinti) nonnulla menda irrepsent quoque in hodiernum textum Hebraicum & Græcum, tutum non est semper, & ubique, emendare vulgatam versionem ad normam textus Hebraici & Græci.

Tertio. Ex eodem principio, nempe quod textus originales, & vulgata editio Latina, sine authentica, sequitur, interpretes in suis versionibus vernaculis posse sequi modò textus Hebraicos, modò Græcos, modò vulgatam editionem Latinam. Si tamen profiteantur, se vertere vulgatam editionem, suæ versionis textui inferere non possunt id quod in Hebraicis, aut Græcistextibus continetur, nisi notis quibusdam textus illos, à vulgatæ editionis textu distinguant.

Quæres, quænam regulæ servari debeant, cum
aut

aut diversa, aut contraria, aut contradictoria sunt, quæ in textibus originalibus, & vulgatâ editione leguntur.

Resp. Salmeronem Prolegomeno 3. in secundâ disputatione de versione Latinâ, præscribere subsequentes regulas: Si quando contingeret, inquit, ut aliud legamus in vulgatâ, & Latinâ editione, aliud verò in Hebraicis, aut Græcis codicibus, si non contradicunt, sed tantum sunt diversa, utraque lectio est recipienda, & catholico sensu est explicanda: si verò contradicant sibi invicem, sicut affirmatio & negatio, quod perrarum esse solet, adhibenda est diligentia, & omnis opera ponenda, si quâ ratione possimus ostendere, illa in speciem tantum, & non ipsa sibi adversari; ubi verò nulla possit iniri concordia, illi lectioni magis esset standum, quæ magis cum præcedentibus & consequentibus consonaret, aut quæ magis conveniret cum Apostolicis & Evangelicis litteris; aut quæ antiquiora, aut probatiora exemplaria pro se haberet; aut quæ à pluribus Patribus agnita est, & probata, siue sit Hebræa, siue Græca, siue Latina.

C A P U T VIII.

De Scripturarum sensu.

Hic dicemus 1. de Scripturarum sensu in genere: 2. de sensu Litterali: 3. de sensu Mystico: 4. de sensu Accommodatitio: 5. quæremus ad quem spectet tradere germanum Scripturarum sensum.

ARTICULUS I.

*De multiplici Scripturarum sensu
in genere .*

Not. **E**st de fide, Scripturas sub unâ litterâ continere plures sensus : Nam illud est de fide, quod expressè, aut in Scripturâ, aut in traditione reperitur : atqui, quòd Scriptura sub unâ litterâ plures sensus contineat, expressè reperitur in ipsâ Scripturâ, & in traditione ; Scriptura nimirum, & traditio non unius tantum loci, sed & plurium varios sensus proponunt : v.gr. quod Genesis 16. & 21. legitur de duobus Abrahamæ filiis, quorum unus de ancillâ, alter verò de liberâ natus est, Apostolus ad Gal. 4. de duobus testamentis vetere & novo interpretatur. Quod Exodi 12. ad litteram de Agno Paschali scribitur : *Nec os illius confringetis*, Joannis cap. 19. impletum est in Christo, cujus crura à crucifixoribus confecta non fuerunt. Sed dubium esse potest, quotuplex sit multiplex ille sensus, qui Scripturis continetur.

CONCLUSIO. Scripturarum sensus adæquatè dividitur in litteralem, mysticum, & accommodatitium.

Probatur. Sensus litteralis est ille, quem verba, sive propriè, sive metaphoricè accepta, immediate significant : Mysticus, qui per verba, *mediate* quidem, sed per sensum litteralem *immediate* significatur : Accommodatitius, qui nec immediate, nec mediatè per verba significatur, sed qui ad aliud, à theologo, aut quovis alio, applicatur. Atqui Scripturarum sensus adæquatè dividitur in sensum, qui per verba, aut immediate, aut mediatè significatur, & eum, qui ad aliud applicatur : ergo adæquatè dividitur in litteralem, mysticum, seu, spiritalem, & accommodatitium.

Ob-

Objicies. In Scripturâ continetur sensus metaphoricus, ut patet in his verbis : *Vixit leo de tribu Juda* ; atqui sensus metaphoricus non reducitur, aut in litteralem, aut in mysticum ; aut in accommodatum : ergo non est adæquata tradita in conclusione divisio.

Resp. neg. min. quippè reducitur ad litteralem. Ratio est, quia juxta humanum loquendi morem, verba metaphorica non sumuntur ad litteram pro re, quam propriè significant, sed pro ea, quam significant impropriè ; sic, cum in Scripturis nominatur Dei brachium, sensus litteralis non est, quòd in Deo sit membrum corporeum, quod brachium dicitur ; sed quod sit virtus operativa, quæ eo vocabulo metaphoricè significatur.

ARTICULUS II.

De Sensu Litterali.

CONCL. **N**onnunquam unus Scripturæ locus plures habet sensus litterales.

Probatur exemplis. In hac Geneseos sententiâ : *In principio creavit Deus cælum & terram* ; illa verba : *In principio*, duplicem habent sensum litteralem ; significant enim idem, ac ista : *In principio temporis, & mundi*, aut idem, quod ista : *Ante omnia*. Priorem sensum indicavit Augustinus lib. 12. confes. cap. 20. posteriorem verò lib. 11. de civitate Dei cap. 6. Ex priore colligitur, mundum non esse æternum : ex posteriore Angelos non fuisse creatos ante mundum corporeum. Hæc Psal. 2. sententia : *Filius meus es tu, ego hodie genui te*, intelligitur à Sancto Thomâ de temporali Christi generatione ; ab Apostolo ad Hebr. 1. de æternâ ; Actorum 13. de illius resurrectione : eaq; triplex explicatio cum Psalmi textu maxime cohæret.

Ob-

Objicies . Si unius Scripturarum textus, plures sint sensus litterales, textus ille erit ambiguus, ac proinde ineptus ad probandum fidei, aut morum principia.

Resp. ad 1. conc. ant. Ad 2. neg. sequelam . Ratio est, quia ex textu ambiguo peti possunt argumenta pro duplici veritate in eo textu virtualiter contenta; inter ea autem argumenta validius erit illud, quod judicabitur ad genuinum Scripturae sensum propius accedere.

Instabis . Si duplex, & quidem diversus sit sensus litteralis ejusdem Scripturarum textus, Deus qui author est Scripturae, dicetur praeuisse errandi occasionem.

Resp. neg. sequelam . Is enim non praebet occasionem errandi, qui vult, ut Scripturam legens, eam accipiat in duplici diverso sensu; & sic Deus differt ab homine, qui utitur equivocis verbis: scilicet, iste unicum intendit sensum, & quidem diversum ab eo, quem verba praeferunt.

Quæres 1. an sit de fide, quod nonnunquam unius textus sit duplex sensus litteralis.

Respondeo (inquit Sylvius 1. p. q. 1. art. 10.) sententiam Beati Thomae admittentis unius Scripturae plures sensus litterales, esse valde probabilem. Ex eâ autem responsione patet, persuasum fuisse Sylvio, non esse de fide, quod aliquis Scripturae textus plures habeat sensus litterales; unde inferri potest, eundem authorem sensisse non esse de fide, quod litteralis sit duplex sensus textuum, qui ad primæ hujusce articuli conclusionis probationem adducti sunt.

Quæres 2. Cum Scripturae sensus litteralis, ut dictum est superius, sit duplex, proprius nimirum, & metaphoricus, quando nam sensus aliquis sumi debeat in sensu proprio, aut in sensu metaphorico.

Respondeo, Scripturae verba, quæ aut vitium prohibent, aut præscribunt virtutis exercitium,
pro-

propriè sumi debere : quæ verò , aut peccatum jubere , aut virtutis praxim vetare videntur , impropriè , seu metaphoricè accipienda sunt : *Præceptiva locutio* , (inquit Augustinus lib. 3. de doctrinâ Christianâ , cap. 16.) aut *flagitium* , aut *facinus vetans* , aut *utilitatem* , aut *beneficientiam jubens* , non est figurata : si autem *flagitium* , aut *facinus videtur jubere* , aut *utilitatem* , aut *beneficientiam vetare* , figurata est . Utriusque illius acceptionis , propriæ , & figuratæ , exemplum profert S. Doctor in his scripturæ verbis : *Si esurierit inimicus tuus , ciba illum : si sitit , potum da illi : hoc enim faciens , carbones ignis congeres super caput ejus* . Prius membrum illius sententiæ , propriè sumendum est , quoddam *beneficientiam præcipiat* : Hic nullo dubitante *beneficientiam præcipit* , sed quod sequitur : *Hoc enim faciens , ne dubitaveris figuratè dictum* : Et cum possit dupliciter interpretari , uno modo ad nocendum , altero ad præstandum ; ad *beneficientiam te potius charitas revocet* , ut intelligas carbones ignis esse urentes *pœnitentiæ gemitus* , quibus *superbia sanatur ejus* , qui dolet se *inimicum fuisse hominis* , à quo ejus *miseriæ subvenitur* .

ARTICULUS III.

De sensu Mystico.

CONCL. **T**Riplex est mysticus Scripturarum sensus , Allegoricus , Tropologicus , Anagogicus .

Probatur . Mysticus sensus (ut dictum est supra) est ille , qui non per verba quidem , sed per sensum litteralem verborum immediatè significatur : atqui sensus , qui per sensum litteralem verborum immediatè significatur , est vel allegoricus , vel tropologicus , vel anagogicus ; si quidem ille sensus vel est de rebus credendis , vel
de

de agendis, vel de sperandis : si primum, est sensus allegoricus: si secundum, est tropologicus: si tertium, est anagogicus.

Confirmatur. Res, quæ mysticè significantur, pertinent vel ad Ecclesiam militantem, vel ad triumphantem. Si ad militantem, sunt res credendæ, aut agendæ, & sic constituitur duplex prior Scripturarum sensus: si ad triumphantem, sunt res sperandæ, de quibus est sensus anagogicus.

Confirmatur iterum exemplis. Vox hæc, *Hierusalem*, triplicem, de quo est quæstio, sensum complectitur; nam *historicè*, significat urbem illam notissimam, quæ in Palæstinâ sita est: *Allegoricè*, sanctam Ecclesiam: *Tropologicè*, animam: *Anagogicè*, fœlicitatem æternam. Aliud exemplum legitur cap. 4. epist. ad Galat. ibi enim hæc verba: *Abraham duos filios habuit*, continent sensum historicum, seu litteralem; hæc alia, *hæc sunt duo testamenta*, allegoricum; ista verò, *quomodo tunc is*, tropologicum; tandem ista, *illa autem, quæ sursum est Hierusalem*, sensum anagogicum complectuntur.

Quæres I. Utrùm in omnibus veteris testamenti partibus sit mysticus sensus.

Resp. in præcipuis veteris testamenti partibus reperiri sensum mysticum, non autem in minutissimis particulis.

Ratio primæ partis petitur, tum ex Scripturâ, tum ex Patribus: *Hæc autem omnia* (inquit Apostolus I. ad Corinth. 10.) *in figurâ continebant illis: scripta sunt autem ad correptionem nostram.* Hæc habet idem Apostolus ad Hebræos cap. 11. *Umbram habens lex futurorum bonorum, non ipsam imaginem.* Hæc etiam Augustinus lib. 12. contra Faustum cap. 7. *Omnia quæ in illis, veteris testamenti, continentur libris, vel de ipso, Christo, dicta sunt, vel propter ipsum.*

Ratio alterius partis est, quia in veteri testamento multæ sunt particulares personæ, actiones,

nes, urbes, loca, quæ per seipsa non videntur significare id quod, aut fidei, aut morum, aut spei, objectum est; sic illa verba: *Adam cognovit uxorem suam Evam*, non aliud continere videntur, quàm factum, quod iisdem verbis exprimitur.

Confirmatur ex Augustino, qui lib. 7. de civitate Dei cap. 3. sic loquitur: *Mihi sicut multum videntur errare, qui nullas res gestas in eo genere litterarum veteris testamenti, aliquid aliud præter id, quod eo modo gesta sunt, significare arbitrantur: ita multum audere, qui prosus ibi omnia significationibus allegoricis involuta esse contendunt.*

Confirmatur iterum ex Patribus, qui (ut videtur est in epistolis Hieronymi) frequenter Origenem arguunt, quod ubique allegorias inquirat, aiuntque, ipsum eâ ratione ex propriâ veritate non nihil detraxisse.

Quæres 2. Utrum in novo testamento nunquam mystici sensus reperiantur.

Resp. reperiri, sed multo rariores, quàm in veteri testamento.

Ratio est, quia hæc Apostoli verba ad Hebræos 13. *Excamus igitur ad eum extra castra, improprium ejus portantes*, non nisi mysticè exponi possunt.

Quæres 3. An sensus mysticus potius intentus fuerit à Deo, quàm litteralis.

Resp. sensum mysticum, plerumque potius intentum fuisse, quàm litteralem.

Ratio est, quia Spiritus Sanctus præcipue eum sensum intendit, propter quem dictavit litteralem: atqui Spiritus sanctus sensum litteralem plerumque dictavit propter mysticum; ille enim ad istum, utpote res fidei, & morum continentem, passim ordinatur: idque videre est primæ ad Corinth. 9. ubi Apostolus tropologicè exponens hoc Moysis præceptum: *Non alligabis os bovi trituranti*, subjungit, hunc tropologicum sensum potius

tiùs à Deo spectatum fuisse, quàm litteralem : *Nunquid, ait, de bobus cura est Deo? An propter nos utique hoc dicit?*

Quæres 4. An ex sensu mystico firmum argumentum semper ducatur ad probanda, tum fidei, tum morum, dogmata.

Resp. sensum litteralem eo in capite differre à mystico, quòd ex illo firmum semper, ac quovis in casu argumentum petatur ad fidei, aut morum dogmata : è contra verò non petatur è sensu mystico, nisi, cum ab aliquo alio Scripturæ textu, vel aliquo auctoritatem habente, mysticus sensus asseritur : *Pius sensus*, inquit Hieronymus in cap. 13. Matthæi, ubi agit de fermenti explicatione, quàm nonnulli utuntur, ut Trinitatis Mysterium explicent : *sed nunquam parabola, & dubia enigmatum intelligentia potest ad auctoritatem dogmatum proficere.*

ARTICULUS IV.

De sensu Accommodatitio.

Not. **E**X dictis, sensus accommodatitius est ille, qui Scripturæ verbis, nec mediatè, nec immediatè, significatus, ad aliquid aliud applicatur.

CONCLUSIO 1. In Scripturis admitti debet sensus aliquis accommodatitius.

Probatur. Patres non raro Scripturam applicant ad id, quod per ejus verba, nec mediatè, nec immediatè, significatur; id passim in Bernardo videre est : videre est etiam in Breviariis, & Ritualibus, v. gr. quod de Noe dicitur, Ecclesiastici 44. *Inventus est justus, & in tempore iracundie factus est reconciliatio*, jam dicitur de quolibet Confessore Pontifice.

CONCLUSIO 2. Nonnullæ sunt conditiones requisitæ, ut Scripturis adscribatur sensus accommodatitius.

Pro-

Probatur enumeratione earum conditionum .

Requiritur 1. ut sensus accommodatitius ad res pias applicetur : nec enim Scripturas transferre licet ad vitia, spurcitas, facetias, prophana, aliaque ejusmodi : *Sacrofancta Synodus* (inquit Concilium Tridentinum sess.4.) *temeritatem illam reprimere volens , quâ ad prophana quæque convertuntur , & torquentur verba , & sententiæ Sacra Scripturæ , ad scurrilia scilicet, fabulosa , vana , adulationes , detractiones , superstitiones , impias & diabolicas, incantationes , divinationes , sortes , libellos etiam famosos , mandat & præcipit ad tollendam hujusmodi irreverentiam & contemptum , ne de cætero quisquam quomodolibet verba Scripturæ Sacrae , ad hæc , aut similia audeat usurpare , ut omnes hujus generis homines , temeratores & violatores verbi Dei , juris & arbitrii pænis per Episcopos puniantur .*

Requiritur secundò , ut accommodatitius sensus non proferatur tanquam litteralis, & mysticus : praxim contrariam hisce verbis arguit Hieronymus in epistolâ ad Paulinum : *Nec scire dignantur* (inquit de iis loquens , qui post sæculares litteras Scripturis student) *quid Prophetae , quid Apostoli senserint ; sed ad suum sensum incongrua aptant testimonia , quasi grande sit , & non vitiosissimum dicendi genus , depravare sententias , & ad voluntatem suam Scripturam trahere repugnantem .*

Requiritur tertio, ut litteralis, aut mysticus sensus , non tradantur tanquam accommodatitius . Peccavit eo in capite Theodorus Mospuestenus, qui ea omnia, quæ in veteri testamento de Christo, ejusque mysteriis prædicta sunt , de eo secundum rei eventum , accommodatitiè nigrum, interpretabatur ; sic hæc Psalmi verba : *Non derelinques animam meam in inferno*, contendebat, prædicta esse de populo Israelitico, non de Christo; ad quem tamen (inquebat) propter rei eventum , hoc est, propter Christi resurrectionem,

nem, Petrus Actorum 2. per sensum accommodatitium transtulit.

Requiritur *quartò*, ut Scripturis sensus falsus non attribatur per accommodationem. Contra regulam illam peccabant Montanistæ, tribuentes Montano, quæ Scriptura Paracleto tribuit.

CONCLUSIO 3. Ex sensu accommodatitio sumi non potest firmum argumentum ad probanda fidei, aut morum dogmata.

Probatur. Ex eo sensu non potest sumi firmum argumentum ad probanda fidei, aut morum dogmata, qui non est Spiritus Sancti, sed hominis: atqui sensus accommodatitius non est Spiritus Sancti, sed hominis: ille enim sensus non est Spiritus Sancti, qui Scripturæ verbis, nec mediatè, nec immediatè, exprimitur: sed, ut supra dictum est, sensus accommodatitius scripturæ verbis, nec mediatè, nec immediatè, exprimitur.

Objicies. Ex historiis, parabolis, factis, theologi nonnunquam argumentantur, imò ipsemet Christus ex iis aliquando sumpsit argumenti medium: nempe Lucæ 6. sic arguit: In casu necessitatis Davidi, ejusque comitibus licuit Sacros Panes edere, 1. Reg. 21. ergo & in casu necessitatis, licet Apostolis Sacro sabbati die spicas vellere. Sic etiam pro Reliquiarum cultu arguunt Theologi: Arcæ fœderis in veteri testamento exhibita est veneratio, Psal. 98. ergo quarundam rerum inanimatarum, Reliquiarum v. gr. veneratio est pia & sancta.

Resp. neg. ant. Ad cujus probationem dico, argumentum, quo Christus pro suis discipulis contra Phariseos usus est, non fuisse petatum ex sensu accommodatitio, sed ex litterali, nempe ex externâ violatione rei sacræ, duxit argumentum ad aliam rem sacram; ostendit nimirum, crimen à Phariseis impactum discipulis ex profanatione temporis sacri, non niti aliquo fundamento, eò quòd

quodd alterius rei sacræ violatio, scilicet efus panum propositionis, urgente necessitate, in Davide ac sociis non fuisset peccatum. Eadem adhiberi debet responsio ad argumentum theologorum pro Reliquiarum cultu.

Instabis. Ille sensus est accommodatitius, qui transfertur ad aliquid aliud probandum: atqui loca Scripturæ, de quibus est quæstio, Christus transtulit ad aliud probandum, transferuntque in dies theologi: ergo Christus argumentatus est ex accommodatitio sensu.

Resp. neg. ant. Alioquin omnis Scripturarum sensus erit accommodatitius: nimirum ad aliud probandum, vel ob similitudinem, vel ob aliquam aliam rationem transferri potest; quod est absurdum.

Quæres, an Scriptura novi testamenti aliquando per accommodationem utatur Scripturâ veteris testamenti.

Respondent affirmativè nonnulli commentatores, quibus subscribit Jansenius Gandavenfis Concordiæ cap. 11. idque probant ex Matthæi secundo capite, ubi, inquiunt, per accommodationem laudantur hæc verba Osee 11. *Ex Ægypto vocavi filium meum; nec non ista alia, Vox in rama audita est; ex Jeremiæ cap. 31. Idem sentiunt de illis aliis: Aperiam in parabolis os meum, quæ Matth. 13. laudantur ex Psalmo 77.*

ARTICULUS V.

Ad quem spectet tradere germanum Scripturæ sensum.

Not. 1. **Q**Uæstio, quam hîc proponimus, pendet ex aliâ, nempe utrùm Scriptura per se facillima sit, ita ut interpretatione non indigeat: si enim sit ejusmodi, ipsa per sese sui ipsius sensum offert cuilibet legenti.

Not. 2.

Not.2. Lutherus in præfatione assertionis articuloꝝ, quos Papa Leo proſcripſit, contendit Scripturam per ſe ita facilem eſſe, ac claram, ut nullius, qui à textu diſtinctus ſit, authoris explanatione indigeat: addit tamen, fieri nonnunquam, ut lectores eam non intelligant, quòd aut locorum, quæ videntur obſcura, explicationem in aliis apertis locis non requirant; aut quòd in pœnam ſuæ ſuperbiæ, aut infidelitatis, divinâ luce priventur.

Not.3. E contra Catholici, poſt antiquos Patres, docent Scripturam plerumq; eſſe obſcuram, tum ratione rerum quas proponit, tum ratione modi quo eas exprimit; hincque concludunt 1. eam ſatis non eſſe, ut omnes fidei controverſias dirimat: concludunt 2. externam authoritatem requiri, quæ in iis, quæ controvertuntur, germanum Scripturæ ſenſum tradat: eam autem authoritatem contendunt non aliam eſſe, quàm authoritatem Eccleſiæ, hoc eſt, paſtorum, qui ex institutione Chriſti fidelibus præſunt.

CONCLUSIO 1. Scriptura quoad quædam capita, clara eſt & perſpicua.

Probatur. In iis clara eſt Scriptura, quæ cuique legenti per ſe patent: atqui quædam Scripturæ capita, cuique legenti per ſe patent, v. gr. Deum exiſtere, Chriſtum Dominum eſſe natum, paſſum, & alia ejuſmodi.

CONCLUSIO 2. Scriptura non eſt ubique clara, & perſpicua.

Probatur 1. Ipſamet Scriptura ſui ipſius, quoad aliqua capita, obſcuritatem prædicat. Pſal. 118. David nec infidelis, nec ſuperbus, illius intelligentiam à Deo poſcit: *Da mihi intellectum, & ſcrutabor legem tuam..... doce me juſtificationes tuas.* Eorum verò, quæ per ſe ſunt evidentia, intelligentia à Deo non petitur. Actorum 8. Eunuchus reginæ Æthiopum, vir pius & humilis, Hieronymo teſte in epiſt. ad Paulinum, non intelligebat Iſaiæ locum, quem legebat in ſuo cur-

ru; nam interrogatus à Philippo: *Putas intelligis quæ legis?* respondit: *Quomodo possum, nisi aliquis ostenderit mihi?* Petrus 2. epist. capite ultimo asserit, in Epistolis Pauli esse quædam difficilia intellectu, *quæ indocti & instabiles depravant.*

Probatur 2. Patres multam in plerisque scripturæ locis obscuritatem agnoscunt. *Primo*, docent scripturâs interdum esse obscuras, profundas, difficiles. Ita Irenæus lib. 2. cap. 47. Origenes lib. 3. contra Celsum, S. Augustinus lib. 2. de doctrinâ Christianâ cap. 6. *Secundo*, scribunt eas sine magistro, & doctore intelligi non posse: sic Hieronymus in Epist. ad Paulinum, sic apud Ruffinum lib. 11. cap. 9. Basilii & Gregorius Nazianzenus. *Tertio*, docent scripturam esse librum signatum, Origenes homil. 12. in Exodum: *Esse agrum in quo absconditus sit sapientiæ thesaurus*, Chrysostomus homil. 40. in Joannem: *Esse arcum ex quo tum boni, tum mali sagittæ ejaculari possint*, Sanctus Augustinus in Psalm. 7. *Esse mare in quo sit profunditas sensuum*, Ambrosius Epist. 44. ad Constantium. *Quarto*, confessi sunt se post summum, diuturnumque in scripturis studium, pauca in iis intellexisse: *In ipsis sanctis scripturis*, ait S. Augustinus Epist. 119. ad Januarium capite 21. *multò nescio plura, quàm scio.* *Quinto*, patres factis suis, pluribus nimirum editis à se commentariis, probarunt scripturam ubique non esse claram.

Objicies 1. Clara erat lex à Deo Judæis per Moysen data: *Mandatum*, ait Deus Deuter. 30. *quod ego præcipio tibi hodie, non supra te est, neque procul positum, nec in cælo situm, neque trans mare.* 2. Apostolus non in scripturas, sed in legentium peccata refundit earum obscuritatem: *Quod si*, inquit 2. ad Corinth. 4. *opertum est Evangelium nostrum, in iis qui pereunt, est opertum, in quibus Deus hujus sæculi excæcavit oculos infide-*

delium, ut non fulgeat eis illuminatio gloriæ Christi.

Resp. ad 1. Deuteronomii textum intelligi non de omni veteris Testamenti scripturâ, sed de præceptis decalogi, quæ clarè in eâ continentur, quæque supra nos non sunt, cùm servari possint divinæ gratiæ auxilio: ita exponunt Tertullianus lib. 4. contra Marcionem, Augustinus libro de perfectione Justitiæ.

Resp. 2. Apostolum loco laudato non loqui de Sacrà scripturâ, sed de Christi fide, quam ab Apostolis clarè propositam ac prædicatam amplecti renuerunt plurimi tum ex gentilibus, tum ex Judæis; excæcante nimirum illos cordis iniquitate.

Objicies 2. Patres frequenter ajunt, scripturas esse intellectu maximè faciles. Justinus in suo dialogo cum Triphone asserit, eas non explicatione, sed auditione tantum indigere. 2. Chrysostomus hom. 3. in 2. ad Thessalonic. scribit, ex hominum negligentia oriri, ut illas pro concionibus explicari oporteat. 3. Gregorius ait, scripturas esse nobis lucem, lucernam; ac proinde perspicuas esse. 4. S. Augustinus lib. 2. de doctrinâ Christianâ capite 6. docet, esse in scripturis textus claros, per quos explicentur qui videntur obscuri. *Magnificè, inquit, & salubriter Spiritus sanctus ita scripturas modificavit, ut locis apertioribus fami occurreret, obscurioribus autem fastidia detergeret; nihil enim de iis obscuritatibus eruit, quod non planissimè dictum alibi reperiatur.*

Resp. ad 1. 2. & 3. Patres loqui vel de aliquibus tantum scripturarum partibus, vel de capitulis, in quibus generalia quædam fidei dogmata aut morum præcepta continentur. Ratio est, quia iidem Patres qui aliquibus in locis docent scripturam esse intellectu facilem, in aliis locis asserunt, eam esse perobscuram; ut patet ex dictis superius.

H 2 Resp.

Resp. ad 4. Augustinum non loqui de omnibus Scripturæ locis, quippè addit istud adverbium *ferè*; nec immeritò, nam plurimi sunt in Scripturâ textus, qui per alios explicari non possunt.

CONCLUSIO 3. Requiritur externa auctoritas, quæ in plerisque capitibus tradat fidelibus germanum Scripturæ sensum. Est contra Lutheranos & Calvinistas, qui contendunt, quemque fidelem esse supremum, ac ultimum judicem circa Scripturæ sensum.

Probatur 1. Exodi 18. dubia, quæ circa Dei legem oriri poterant, non ad quemque privatum, sed ad ipsum Moysen, tanquam ad Israeliticæ Ecclesiæ Principem, referuntur. Deuter. 17. dubia, quæ post mortem Moysis oritura erant, Ecclesiæ non autem privatorum examini committuntur: *Si difficile, atque ambiguum apud te iudicium esse perspexeris venies ad sacerdotes Levitici generis, & facies quodcumque dixerint, qui præsumt loco quem elegerit Dominus.* Paralipp. cap. 19. omne de rebus sacris iudicium externæ auctoritati tribuitur, non autem privatorum hominum examini: *Ubicumque (inquit rex Josaphat sacerdotes alloquens) quæstio est de lege, de mandato, de ceremoniis, de justificationibus: ostendite eis, ut non peccent in Dominum.* Matth. 18. hæc ait Christus: *Si Ecclesiam non audierit, sic tibi velut Ethnicus & Publicanus.* Si verò ultimum de privatorum inter se litibus iudicium committatur Ecclesiæ, à fortiori commissum est illi iudicium de hæresi, cæterisque ad fidem aut mores spectantibus; ac proinde de germano, aut adulterino Scripturæ sensu.

Probatur 2. Si non esset aliqua externa auctoritas, quæ posset tradere certum Scripturarum sensum, Deus malè consulisset electorum salutem. Nam 1. ex electis plures sunt, qui Scripturarum sensum examinare non valent, aut prælin-

linguarum imperitiâ, aut præ mentis hebetudine. 2. Ex electis nonnulli sunt, qui adhuc sunt in hæresi: at ii converti non possent; non quidem discendo veritatem ab aliquo Doctore, cum, in suppositione quam impugnamus, nullus sit iudex infallibilis controversiarum de fide & moribus: nec etiam eam discendo per internam Spiritus Sancti revelationem; quippè sathanas seipsum nonnunquam transformat in Angelum lucis: idque patet in omnibus omninò hæreticis; quippè etsi diversa, ac contradictoria credant, dicunt omnes, se ea per internam revelationem à Spiritu sancto accepisse. Sic Lutherani docent Spiritum sanctum sibi interiùs revelare, hæc Evangelica verba: *Hoc est corpus meum*, intelligi debere de reali præsentia Corporis Christi in Eucharistia, è contra Zuingliani & Calvinistæ dicunt, se interiùs à Spiritu sancto edoceri, eadem verba intelligi tantùm debere de præsentia figurativâ & metaphoricâ.

Objicies 1. Ex Scripturâ Deus interiùs docet suos prædestinatos: ergo necessaria non est externa auctoritas, à quâ Scripturæ sensum doceantur. Probatur ant. Hæc habet Christus Joann. 6. *Est scriptum in Prophetis: Et erunt omnes discipuli Dei. Omnis qui audit à Patre, & didicit, venit ad me: hæc iterùm Joannis 10. Oves meæ vocem meam audiunt, & sequuntur me.* Apostolus 1. ad Corinth. 2. sic loquitur: *Spiritualis autem judicat omnia, & ipse à nemine judicatur:* idem Apostolus 1. ad Thess. 5. hæc ait: *Omnia probate, quod bonum est, tenete.*

Resp. ad 1. & 2. iis in locis agi de observatione mandatorum, quam interna sancti Spiritus unctio, hoc est, speciale gratiæ auxilium, ita prædestinatis persuadet, ut infallibiliter ea exequantur. Unde in formâ, resp. conc. ant. neg. conseq.

Ad 3. dist. ant. *Spiritualis autem judicat omnia*, hoc est, de omni rerum genere, conc. ant. de omnibus, ac singulis rebus in individuo, neg.

ant. Apostolus eo in loco hominem spiritali-
lem opponit homini animali, aitq; quòd cum
iste terrena tantum, non autem ea, quæ Dei sunt
percipiat; ille è contra non tantum de rebus ter-
renis, sed etiam de spiritualibus judicare possit,
& nonnunquam etiam de Scripturæ sensu; non
ita tamen, ut certò sciat se eum assecutum fuisse;
quippe sic post peccatum comparatus est homo,
ut nonnunquam fallatur in iis, quæ sibi veriora
videntur; idque patet in Cypriano, qui deceptus
est in explicatione locorum, quæ pro Hæretico-
rum rebaptizatione objecit Stephani Papæ de-
creto.

Objicies 2. S. August. & alii Patres, cum
Scripturas exponunt, suam explicationem sub-
jiciunt aliorum judicio: ergo nec Augustinus,
nec alii Patres crediderunt, convenire sibi jus tra-
dere germanum Scripturæ sensum.

Resp. dist. conseq. Si tradant eum tanquam
privati Doctores, conc. conseq. Si tanquam judi-
ces, neg. conseq. Privatus Doctor non proponit
suam sententiam, ut necessariò sequendam, sed
tantum, prout ratio suadet: at judex in conciliis
eam proponit tanquam necessariò sequendam.

CONCLUSIO 4. Externa autoritas, ad quam
spectat tradere germanum Scripturæ sensum,
residet in supremis Ecclesiæ Pastoribus; Ro-
mano nimirum Pontifice, & aliis orbis Epi-
scopis.

Probatur 1. ex Scripturâ, quâ docemur, Epi-
scopis præcipuè, non autem inferioribus Cleri-
cis, aut laicis hominibus, datam fuisse ligandi,
ac solvendi potestatem; commissum fuisse munus
docendi, ac regendi populos: *Attendite vobis*,
inquit Apostolus Actorum 20. *& universo gregi*,
in quo vos Spiritus Sanctus posuit Episcopos regere
Ecclesiam Dei. Atqui ad eos tantum spectat
jus tradendi germanum Scripturæ sensum,
quibus convenit jus docendi, & regendi po-
pulos; nempe in jure docendi, ac regendi
con-

continetur jus Scripturas explicandi .

Probatur 2. ex traditione . Quæ à Christo ad hoc usque sæculum exorta sunt dubia circa Scripturæ sensum , judicata fuerunt non ab hominibus laicis , aut à Clericis inferioribus , sed ab Episcopis ad Concilium congregatis ; idque fusè ostendetur inferiùs, ubi de Conciliis dicetur . Satis sit hìc laudare Augustinum , qui lib.2. *Retract.* cap. 50. sic loquitur : *Pelagiana hæresis cum suis authoribus ab Episcopis Ecclesiæ Romanæ , priùs Innocentio , deinde Zozimo , cooperantibus Conciliorum Africanorum litteris, convicta , atque damnata est .*

C A P U T XI.

De singulis in specie libris Canonicis .

Not. 1. **N**ON est animus hìc edendi commentarios in singulos libros Canonicos , sed tantùm proponendi singulorum argumentum , ut theologiæ candidati uno in loco reperiant, quid in unoquoque pertractetur.

Not. 2. Ex dictis superiùs, libri Canonici continent, vel ad vetus, vel ad novum testamentum: utrorumque ideam, seu argumentum, lectoribus hìc exhibere conabimur .

A R T I C U L U S I.

Proponitur idea singulorum librorum veteris testamenti .

Not. **L**ibri veteris testamenti, vulgò dividuntur in Legales, Historicos, Sapientiales , Propheticos .

§. I.

De libris Legalibus veteris testamenti.

Not. Libri Legales, seu, qui absolute *Lex* dicuntur, continentur Pentateucho, hoc est, quinque libris à Moysè conscriptis, *Genesis* nimirum, *Exodo*, *Numeris*, *Levitico*, *Deuteronomio*.

Genesis, mundi ortum, progressus varios, ac gubernationem per annos 2369. ad obitum usque *Joseph* complectitur. De eo libro hæc habet *Hieronymus* in epistolâ ad *Paulinum*: *Manifestissima est Genesis, in qua de creatura mundi, de exordio generis humani, de divisione terræ, de confusione linguarum & gentium, usque ad exitum scribitur Hebræorum.*

Exodus, continet duram populi *Israelitici* in *Ægypto* servitutem, admirandam ejus liberationem, divinæ legis promulgationem: denique res per 145. annos gestas, scilicet à morte *Joseph* ad erectum tabernaculum: *Patet Exodus*, inquit ibidem *Hieronymus*, *cum decem plagis, cum decalogo, cum mysticis divinisque præceptis.*

Leviticus, sic dicitur, quòd in eo fusè pertractentur leges, quæ ad cæremonias & officium *Levitarum* pertinent; ut sunt holocausta, & reliqua sacrificiorum, atque oblationum genera: *In promptu*, ait loco laudato *Hieronymus*, *est Leviticus liber, in quo singula sacrificia, imò singulæ panè syllabæ & vestes Aaron, & totus ordo Leviticus spirant cælestia sacramenta.*

Numeri, sic appellantur, quòd in ipsâ ejus libri fronte *Moyses* & *Aaron* totius populi, per singulas tribus, numerum ineant. Continet res gestas ab exitu ex *Ægypto* ad annos novem supra triginta: *Totius arithmeticæ*, inquit *Hieronymus*, *& prophetiæ Balaam, & quadraginta duarum per eremum mansionum mysteria continet.*

Deuteronomium, seu, secunda lex, sic dicitur, quòd

quòd data in Synai lex promulgetur coram filiis eorum, qui in deserto perierant. Incipit à brevi narratione rerum præteritarum: mox populum hortatur ad legis, quam diligenter explicat & repetit, observationem: deindè narrat ea, quæ contigerunt ab initio mensis undecimi usque ad septimum diem mensis duodecimi anni illius, qui ab exitu ex Ægypto quadragesimus est: *Deuteronomium*, verba sunt Hieronymi, *secunda lex, & euangelicæ legis præfiguratio, nonnè sic ea habet, quæ priora sunt, ut tamen nova sint omnia de veteribus?*

§. II.

De libris Historicis veteris testamenti.

Libri Historici continent librum Josue, Iudicum, Ruth, quatuor Regum, duos Paralipomenon, Esdræ primum & secundum, Esther, Judith, utrumque Macchabaicum.

Josue, liber, qui ab ipsomet conscriptus putatur, complectitur ea, quæ à Moyse morte ad mortem ipsiusmet Josue, hoc est, per septemdecim annos, gesta sunt. De eo hæc habet Hieronymus in epistolâ ad Paulinum: *Veniam ad Iesum Nave, qui typum Domini non solum gessit, verum etiam nomine præfert: transit Iordanem, hostium regna subvertit, dividit terram victori populo, & per singulas urbes, viculos, montes, flumina Ecclesiæ, cælestisq; Hierusalem spiritualia regna describit.*

Iudicum, liber refert Israeliticæ Reipublicæ statum sub iudicibus, hoc est, magistratibus, à morte Josue usque ad mortem Samsonis, illiusque varias exhibet servitutes. Peritis videtur probabilior eorum sententia, qui censent, librum hunc referre, quæ gesta sunt per trecentos & septemdecim annos: *In Iudicum libro*, ait Hieronymus, *quot principes populi, tot figuræ.*

Ruth, liber exhibet eximie pietatis, & divi-

H 5 næ

nam providentiæ singulare exemplum. Ruth Moabitidis socrum suam in patriam revertentem piè subsecuta, Boozo prædiviti secundis nuptiis jungitur, cui parit Obed Davidis avum, unde Christus secundum carnem genus traxit suum. De eâ hæc habet Hieronymus: *Isaiæ explet vaticinium, dicentis: Emitte Agnum, Domine, dominatorem terræ, de petra deserti ad montem filiæ Sion.*

Regum, liber primus narrat res gestas, per unum supra centum annos, hoc est, sub iudicibus Heli, & Samuele, nec non sub Rege Saule: *Samuel in Heli mortuo*; ait Hieronymus in epistolâ ad Paulinum, & *occiso Saul*, veterem legem abolitam monstrat. Porro in *Sadoc*, atque *David novi sacerdotii sacramenta monstrat.*

Regum, liber secundus describit res gestas à morte Saulis ad finem usque Davidici regni, annorum circiter quadraginta historiam exhibens. Hunc & priorem, Samuelis nomine Hebræi inscribunt.

Regum, liber tertius incipit à Salomone, præmissa tantum narratione, quâ ostenditur, quomodo ad regnum ipse pervenerit. Regno deindè in duas partes scisso, quatuor *Regum Juda*, & octo *Regum Israel* res gestas describit. Tota huius libri historia anno 119. complectitur.

Regum, liber quartus continet res gestas sexdecim *Regum Juda*, & duodecim *Regum Israelis*: de Eliâ multa dicit, nec non de Eliseo ejus comite, ac successore: estque historia 308. annorum. De hoc quarto & tertio libro *Regum*, hæc Hieronymus ad Paulinum scribit: *Si historiam respicias, verba simplicia sunt: si in literis sensum latentem inspexeris, Ecclesia paucitas, & hæreticorum contra Ecclesiam bella narrantur.*

Paralipomenon, hoc est, rerum prætermissarum libri, duo quidem sunt in codicibus Christianorum, sed unus tantum in codicibus Hebræorum. In priore recensetur propagatio gentis Israeliticæ ab Adamo ad reditum usque à Babylonicâ capti-

captivitate. Deindè repetitâ à Davide historiâ , ejus regnum accuratiùs describitur usque ad Salomonis unctionem. In altero describitur historia à Salomone usque ad finitam captivitatem Babyloniam, seu, usque ad tempus, quo Cyrus Judæis redeundi potestatem fecit. Continet historiam annorum 479. Constans est traditio, Esdræ utriusque illius libri authorem esse.

Esdræ, liber primus recenset ea, quæ Judæis acciderunt post reditum ex captivitate Babylonicâ sub Cyro rege Persarum.

Nehemiæ, liber ab ipso Nehemiâ, ejus authore nomen sortitum est. Dicitur etiam Esdræ secundus, eò quòd ex Esdræ consilio conscriptus sit. Continet instaurationem Jerosolymorum, correctionem reducis populi, & labentis divini cultus renovationem: historia est annorum circiter 83.

Judith, liber exhibet miraculosam urbis Bethulæ liberationem. Narrat, quomodo pia illa vidua Holofernem à Nabuchodonosor rege ad Judæos delendos missum, morti tradiderit. Non unâ est authorum opinio de tempore, quo illa historia contigit. Nonnulli eam collocant ante captivitatem, alii post reditum ex captivitate, impetrantibus Persis.

Estheris, liber refert virginis Judææ, ab Assuero Persarum rege postea ductæ in matrimonium, pietatem in gentem suam. Authore avunculo Mardocheo, persuasit Assuero, ut consuleret saluti Judæorum, quos Aman in odium Mardochei brevi erat in toto imperio mori traditurus.

Macchabæorum, libri exponunt statum Reipublicæ Judaicæ sub tertiâ, hoc est, Græcorum, monarchiâ. Exarati sunt à diversis scriptoribus, idque patet, tum ex styli diversitate, tum ex eo, quòd sæpiùs eadem res repetantur.

§. III.

De libris Sapientialibus veteris Testamenti.

Not. Ad libros sapientiales veteris testamenti reducuntur Tobias, Job, Psalmi, Proverbia, Ecclesiastes, Canticum Canticorum, Sapientia, Ecclesiasticus.

Tobia, liber continet eximie pietatis, singularis patientie, & Dei in suos providentie præclara documenta. Tobias ductus in captivitatem eo tempore, quo, captâ Samariâ, regnum Israeliticum eversum est, primum bonis cumulatus est à Salmanasare, deinde à Sennacheribo, iis & exilio multatus est, postea cæcitate à Deo probatus, tandem recuperato visu, ingentem ex filio sobolem reliquit.

Job, historia (ut probabilior fert sententia) contigit agentibus in deserto Judæis. Eximium exhibet in viro illo patientie exemplum. Præcipua, quæ in eo tractatur quæstio, est, an solos peccatores in hac vitâ Deus malis afficiat, an etiam pios & justos. Posteriores partem, quæ una vera est, B. Job tuetur, priorem verò, eamque falsam, ejus amici. Verba tum Dei, quæ hîc habentur, tum ipsius Job, Scripturæ Canonice authoritatem habent; non autem amicorum sermones, hoc est, vim non habent ad confirmandam fidem, & regulandos mores, quamvis in libro Canonico contineantur. Hi autem tres amici Job dicuntur à Patribus gessisse typum hæreticorum, nec immeritò; nempe Hæretici & Ecclesiam impugnare, & viros sanctos affligere nunquam desinent.

Psalmodum, liber David tribuitur, non quòd omnium sit author, sed quòd aliquot veteres collegerit, plurimos ipse addiderit. Aliqui quoque

que posterioris sunt ætatis, ab ipso Esdrâ, aliisq; prophetis editi. De eo libro hæc habet Hieronymus in epistolâ ad Paulinum: *Christum lyrâ personat, & ab inferis excitat resurgentem*.

Proverbiorum, liber, à Salomone exaratus, continet omnia præcepta moralia de piorum officiis, tum erga Deum, tum erga proximum.

Ecclesiastes, totus est de mundi ac rerum mundanarum vanitate.

Canticum Canticorum, totum mysticum est, plenissimè exhibet Christi amorem in Ecclesiam, & vicissim Ecclesiæ in Christum. De triplici, quem mox recensuimus, Salomonis libro, sic loquitur Hieronymus: *Salomon pacificus & amabilis Domini, mores corrigit, naturam docet, Ecclesiam jungit & Christum, sanctarumque nuptiarum dulce canit epithalamium*.

Sapientiæ, liber sic appellatur, quòd de sapientiâ tam increatâ, quàm creatâ pertractet. Dividitur in tres partes. Prima usque ad cap. 7. hortatur ad amorem sapientiæ: secunda usque ad caput 10. explicat sapientiæ originem: tertia sapientiæ tum effectus, tum fructus proponit. Totus liber constat ex sententiis à Salomone prolatis, ut patet ex 7. vers. cap. 9.

Ecclesiasticus, eadem ferè complectitur morum principia, quæ Salomonis Ecclesiastes. Hieronymo teste, scriptus est Hebræo sermone à Jesu filio Sirach; sed evanuit Hebraicum exemplar, superest verò Græcum ab alio, Jesu illius nepote, editum.

§. IV.

De libris Prophetis veteris testamenti.

Not. 1. Prophetæ in majores quatuor, & minores duodecim, vulgò dividuntur. Majores dicun-

cuntur ii, quorum opera sunt majora : Minores quorum minora.

N^{ot.} 2. Hebræi tres tantum majores nominant; nam Daniele, quod, cum esset Satrapa, propheticum vitæ genus non sectaretur, prophetis non adscribunt.

N^{ot.} 3. Inter Prophetas, quantum ex eorum scriptis conjicitur, hic est ordo temporis. Ozeas, Joel, Amos, Jsaïas, Jonas, Abdias, Michæas, Nahum, Jeremias, Sophonias, Habacuc, Daniel, Ezechiel, Aggæus, Zacharias, Malachias. Alium tamen in nostris Bibliis habent ordinem, quem hic sequemur.

N^{ot.} 4. Prophetarum initium est à rege Azaria, sive Ozia, qui anno mundi 3194. regnum auspicatus est : finis est ab extructo templo, ac reædificatâ urbe, hoc est, ad annum mundi 3581. hincque patet, totum illud prophetarum tempus ad annos ferè quatercentos extendi.

Jsaïas, multa prædixit, quæ ad Judæorum, & finitimorum populorum, nec non Assiriorum, Babyloniorumque historiam spectant. Ita distinctè Christi, Ecclesiæque mysteria profecutus est, ut, inquit Hieronymus, non tam Propheta dicendus sit, quàm Evangelista. Cœpit vaticinari, eodem Hieronymo teste, Ozia regis anno 25. Morti traditus est ab impio rege Manassæ, qui ejus monita ferre non potuerat. Præ cæteris Prophetis eminebat : 1. generis splendore, quippè natus erat ex Amoso fratre Amassæ regis Juda : 2. vitæ sanctitate, quam illius scripta testantur : 3. eloquentiâ, nempe, ut ait Hieronymus, vir erat nobilis & urbanæ eloquentiæ : 4. constantia in adversis, & gloriosi morte.

Jeremias, anno vitæ, ut putat Hieronymus, circiter 15. propheticum munus obire cœpit. Versatur autem ejus prophetia in acerbissimis reprehensionibus suorum temporum, in increpationibus & lamentis ; deindè verò in consolationibus Ecclesiæ graviter afflictæ : Nempè
pro-

promissionibus amplissimis de regno Christi , gentibus in ejus sinum inducendis , multiplici novi testamenti gratiâ eam erigit , ac reficit . Suo munere functus est per annos 45. scilicet à 13. regis Josiæ , ad 5. extructæ Hierusalem , & erecti templi .

Baruch , licèt ex nobili Judæorum prosapiâ oriundus , scribæ officium Jeremiæ præstare non abnuït . Babylone scripsit , quò , mortuo Jeremiâ , se contulerat . Prædicat Judæos à captivitate Babylonicâ post septem generationes liberandos . Vaticinatur quoque de Christi adventu in carnem , tandem idolorum vanitatem multis prosequitur .

Ezechiel , ortus est ex nobili sacerdotum stirpe . Prophetare cœpit in Chaldæâ anno 5. post sui cum Jechoniâ rege Juda deportationem , usque ad annum 27. ac proindè per 22. annos vaticinatus est , quorum priores undecim concurrunt cum undecim posterioribus Jeremiæ . Quæ Jeremias de excidio urbis & templi , necnon de Babylonicâ captivitate prædixerat , repetit Ezechiel , ut refellat vaticinia pseudoprophetarum , qui Jeremiam falsitatis arguebant . Prædixit quoque futurum populi ex captivitate reditum , Messisæ regnum , vocationem gentium , Ecclesiæ Christianæ ex hostibus victoriam .

Daniel , ex semine regio natus , adhuc adolescens , ac penè puer , à Nabuchodonosore anno quarto regni Joachimi translatus est Babylonem . Per triennium in litteris , & linguâ Chaldæorum institutus , omnibus Magis doctior inventus est . Sequenti anno , hoc est , quarto post illius deportationem , Susannam vindicavit ab iniquâ senum accusatione , tuncque Prophetam agere cœpit .

Prioribus sex capitibus historiam texit ab initio regni Nabuchodonosoris ad eversum per Medos & Persas Babylonicum imperium . A capite septimo usque ad duodecimum visa sibi divi-

na-

150 Instit. Theolog. Prolegomena.
nitus revelata exponit . Plura sunt in ejus libro
de Christo vaticinia: *Non solum* , ait Hierony-
mus , *scribit eum venturum , quod ei commune*
cum ceteris ; sed etiam quo tempore venturus sit
docet , & reges per ordinem digerit , & annos an-
numerat , & manifestissima signa prænunciat .

Oseas, exhibet 1. synagogæ excidium, & Eccle-
siæ vocationem : 2. Israelitarum idololatriam ,
aliaque scelera acriter insectatur : 3. pœnitenti-
bus veniam ac gloriam pollicetur .

Ioel, ex Hieronymo , Oseæ fuit æqualis : il-
lius prophetia, non ad decem tribus , ut Oseæ
vaticinium, sed ad duas reliquas pertinet . Præ-
dicit Jerosolymæ, ac totius Judææ per Chal-
dæos excidium ; sub hocque typo, universi ex-
cidium, & extremum judicium repræsentat .

Amos, vaticinatur de regni Israel excidio: *Tulit*
me Dominus , inquit cap. 7. *& dixit : Vade, pro-*
pheta ad populum meum Israel Israel captivus
migrabit de terrâ suâ .

Abdias, secundum Hieronymi calculum , coæ-
vus fuit Oseæ, Joeli, & Amoso . Vaticinatur exi-
tium adversus Idumæos , qui filios Israel cala-
mitatibus oppressos subsannarant . Exitium illud
Idumæa passa est Sennacheribi & Nabuchodo-
nosoris temporibus : *Personat* (inquit Hiero-
nymus in epistolâ ad Paulinum) *contra Edom*
sanguineum, terrenumque hominem : fratris quo-
que Iacob semper æmulum hastâ perculit spiri-
tali .

Jonas, Oseæ, & Amoso , si fides Hieronymo
sit adhibenda, æqualis fuit . Solus ex prophetis
ad gentes missus est : *Naufragio suo passionem*
Domini præfigurans , ait Hieronymus , *mun-*
dum ad pœnitentiam revocat , & sub nomine Ni-
nive, gentibus salutem nuntiat .

Michæas, prophetæ munus obiit sub Joatham,
qui anno 758. ante Christum , regnum auspica-
tus est . Invehitur in idololatriam, aliaque tum
duarum, tum decem tribuum scelera : utrisque
præ-

prænuntiat excidium, & captivitatem; istis per Assyrios, illis per Chaldæos. Tandem ex captivitate Babylonicâ reductum sub Cyro rege pollicetur, nec non plenissimam libertatem per Christum, quem prædicit in Bethleem nasciturum.

Nahum, sub Joatham, Josepho teste, vixit: sed ad verum accedunt propius, qui contendunt vixisse eum sub rege Achas. Prænuntiat Ninive à Chaldæis depopulationem, quòd contra Domini populum superbè egisset.

Habacuc, multo tempore post Nahum prophetavit. Conqueritur 1. de sceleratissimâ Judæorum vitâ: 2. prædicit Jerosolymorum per Chaldæos, ac Chaldæorum ipsorum excidium: 3. prænuntiat Judæorum per Cyrum liberationem, ac totius humani generis per Christum: 4. tandem insigni pro ignorantis oratione librum suum concludit.

Sophonias, scripsit Josiæ regis temporibus. 1. Judæos hortatur, ut ab idololatriâ, aliisque sceleribus resipiscant: 2. latæ contra Judæos primùm, deindè contra alios populos, sententiæ, subjicit euangelicas promissiones de vocatione gentium, & Ecclesiæ sanctificatione per Christum conferendâ.

Aggeus, urget 1. ut, repugnantibus etiam Persis, contradicentibusque Samaritanis, Dei templum extruatur: 2. Zorobabeli templi fabricam resumendi promittit, Messiam ex ejus stirpe nasciturum: 3. prædicit, quòd licèt ejus structura cum priore comparari non debeat, majori tamen gloriâ potitura sit, præsentia, doctrinâ & miraculis Christi, de cujus regno multa vaticinatur.

Zaccharias, Aggæi æqualis, 1. unâ cum ipso urget templi Jerosolymitani instaurationem: 2. Judæos monet, ne colant idola, & vitia majorum imitentur, cum eorum acerbam, per excidium & captivitatem, punitionem viderint: 3. varia prophetat Judæis ad Christum usque eventura: 4.

re-

recenset monarchiarum successiones, quæ definent in regnum Christi, cujus vitam & passionem tanquam Evangelista describit.

Malachias, prophetarum ultimus, 1. exstructo jam templo, reprehendit conjugia cum alienigenis inita, decimarum detentionem, cultûsque divini depravationem : 2. quòd deinceps futuri non essent Prophetæ, populum hortatur, ut Moyse legi constanter inhæreant usque ad adventum Christi, cujus præcursores recenset : 3. aperte prædicit synagogæ finem, & Ecclesiæ Christianæ ortum : *Malachias* (inquit Hieronymus in epistolâ ad Paulinum) aperte, & in fine omnium prophetarum, de abjectione Israel, & vocatione gentium : Non est mihi, ait, voluntas in vobis, dicit Dominus exercituum : & munus non suscipiam de manu vestrà. Ab ortu enim solis usque ad occasum, magnum est nomen meum in gentibus : & in omni loco sacrificatur, & offertur nomini meo oblatio munda. Si quis quærat, cur Deus tanto tempore, hoc est, à Malachiâ ad Joannem usque Baptistam, Judæis nullum prophetam concesserit, cum eodem Hieronymo, comment. 13. in Isaïæ cap. 49. dicendum erit, Deum voluisse eâ verbi fame Judæos facere appetentiores Messie, qui prophetas omnes miraculis erat superaturus.

ARTICULUS II.

Proponitur idea singulorum librorum novi testamenti.

Not. 1. **L**ibri novi testamenti non minùs, quàm libri veteris, dividi possunt in Legales, Historicos, Sapientiales, Propheticos.

Not. 2. Libri legales novi testamenti continentur quatuor Evangeliiis : Historici, uno Actorum libro : Sapientiales, Apostolorum Epistolis : Prophetici, Joannis Apocalypsi.

§. I.

§. I.

De quatuor Evangeliiis.

Not. 1. Evangelia (ut observat Augustinus lib. de conf. Euang. cap. 1.) inter divinas auctoritates meritò excellunt, quòd in iis reddita & completa confirmentur, quæ lex, & Prophetæ prænuntiarant.

Not. 2. Cum Christus nihil ipse de seipso scripserit, divino consilio factum est, ut illius facta dictaque quatuor discipuli litteris mandaverint. Inter eos Matthæus & Joannes rem, ut viderant, narrarunt: alii duo, Marcus & Lucas, ut acceperant ex testibus oculatis: *Quod* (ait Augustinus lib. 1. de conf. Euangel. cap. 1.) *divinâ providentiâ per Spiritum Sanctum procuratum est; ne putaretur, quòd ad percipiendum & prædicandum Evangelium, interesset aliquid; utrum illi annuntient, qui eundem Dominum hic in carne apparentem secuti sunt, an hi, qui ex illis fideliter comperta crediderunt.*

Matthæus, omnium primus æræ vulgaris 49. scripsit Evangelium, Hieronymo teste; idque Jerusalemis, ac Syriaco sermone, quo tunc utebantur Judæi. Id verò fecisse putatur rogatu discipulorum, & aliorum Apostolorum jussu.

Marcus, eadem ferè, quæ Matthæus, litteris consignavit, sed contractius; unde ab Augustino dicitur Matthæi brevior. Romæ scripsit Christi ann. 43. & paulò antequam Alexandriam à Petro mitteretur.

Lucas, Antiochiâ Syriæ oriundus, à Paulo conversus, ejusq; comes individuus, ann. Christi 56. scripsit Evangelium, prout ipsum ab eodem Paulo, cæterisque Apostolis audierat. Id autem eo consilio fecisse tradunt, ut pseudoapostolorum temeritatem confutaret, qui ut Pauli prædicationi

ni

ni obessent, aliter quàm ipse prædicabant: *Conati erant*, ait Lucas ipse Euang. cap. i. *narrationem rerum à Christo completarum ordinare.*

Ioannes, reversus ex exilio, Nervæ anno 1. æræ vulgaris anno 96. post Matthæum, Marcum, & Lucam, Euangelium scripsit: *Coactus* (inquit Hieronymus lib. de scriptoribus Ecclesiasticis) *ab omnibus penè tunc Asiæ Episcopis, & multarum Ecclesiarum legationibus, indicto etiam communi jejunio, precantibusque fratribus.* Epiphanius hæc. 51. observat, eum tunc annum nonagesimum egisse. Id autem operis suscepit, ut hæreticos, Ebionem præsertim, & Cerinthum, Christi divinitatem negantes confutaret.

§. II.

De Actibus Apostolorum.

Actus Apostolorum, à Lucæ conscripti sunt. Cum in suo Euangelio audita narrasset, in Actibus visa memorat.

Continet hic liber historiam annorum serè 30. à morte scilicet Christi, & æræ vulgaris 33. ad biennium illud, quod in liberâ custodiâ Paulus Romæ consumpsit.

In Actibus Lucas, Pauli comes individuus & adiutor, mirandam Ecclesiæ Christianæ infantiam ponit ob oculos, describit illius in omnes gentes propagationem per Apostolos, & præcipuè per Petrum & Paulum.

De postremo illo Lucæ libro hæc habet Hieronymus ad Paulinum: *Actus Apostolorum nudam quidem sonare videntur historiam, & nascentis Ecclesiæ infantiam texere: sed si noverimus scriptorem eorum Lucam esse medicum, cujus laus est in Euangelio, animadvertemus pariter omnia verba illius, animæ languentis esse medicinam.*

§. III.

§. III.

De Canonicis Epistolis.

Not. Hic non referemus Epistolas Canonicas eo ordine, quo in nostris Bibliis leguntur; sed habitâ ratione temporis, quo ab Apostolis conscriptæ sunt.

Petri prior, quæ est ad electos advenas dispersionis Ponti, &c. habitâ ratione temporis, prima est inter Canonicas Apostolorum epistolas. Certum quidem est, eam scriptam fuisse, postquam discipuli jam Christiani cognominari cœperant, nempe capite 4. Petrus sic fideles appellat: *Si autem ut Christianus es, &c.* sed non constat, quæ præcisè anno edita sit. Aliqui censent, id contigisse, æræ vulgaris anno 52. paulò antequam Marcus, qui in fine fratribus salutem dicit, Alexandriam proficisceretur. Româ missam testatur ipsemet Petrus; quippè Romam intelligit Babylonis nomine, idque propter confusionem idololatriæ, quæ tunc in eâ vigeat, scilicet, ut ait Leo Magnus: *Omnium gentium serviebat erroribus*. Tota est ea epistola in tradendis vitæ Christianæ præceptis.

Petri secunda, est ad eosdem, ad quos prior, ut patet ex his verbis cap. 3. *Hanc ecce vobis secundam scribo epistolam*. Scriptam esse anno Petri ultimo, testantur hæc capitis 1. verba: *Certus, quod velox est depositio tabernaculi mei, secundum quod Dominus Iesus Christus significavit mihi*; ac proinde æræ nostræ 66. quo tempore Paulus cum Petro Romæ captivus de tempore resolutionis suæ, 2. ad Tim. 4. per revelationem admonitus, secundam ad Timoth. epistolam scripsit.

In hac epistolâ Petrus, 1. hortatur fideles, ut post suam mortem constantes sint in fide, quam
ab

156 In stit. Theolog. Prolegomena.

ab Apostolis audierant: 2. monet eos, ut fugiant errorum, magistros, quorum mores studiaque depingit.

Pauli ad Thessalonicenses prior, teste Chrysostomo, omnium Paulinarum est prima, æræ nostræ anno 52. Scripta est Corintho, ubi Paulus de rebus ad Thessalonicenses spectantibus per Timotheum certior factus fuerat. Eâ in epistolâ Paulus, 1. laudat Thessalonicenses, quod in traditâ sibi fide constantes essent: 2. docet eos futuram mortuorum resurrectionem: 3. tradit eis veram de extremo iudicio doctrinam: 4. plura subjungit moralis Christianæ principia.

Ad Thessalonicenses secunda, eodem anno, eodemque loco, quo prior, scripta est. In eâ Paulus, 1. explicat, quæ in priore de die iudicii, quasi instante, dixerat, docens Christum non prius venturum, quàm Antichristus, ipso Domini adventu destruendus, apparuerit: 2. excommunicationem, ni resipiscant, eis minatur, quos in priore tanquam otiosos & inquietos arguerat.

Ad Galatas, Epheso scripsit Paulus, æræ nostræ anno 56. Eos 1. arguit, quod statim post sui discessum credidissent pseudoapostolis, qui legem Mosaicam cum Euangelicâ necessariò coniungendam esse docuerant: 2. commendat sui Apostolatûs dignitatem, quod illi pseudomagistri eam elevare contenderent: 3. rationibus ex antiquo testamento sumptis, eos revocat ab errore: 4. propositum sibi finem opponit fini, quem pseudoapostoli in Galatarum circumcissione sibi proposuerant.

Ad Corinthios prima, scripta est Ephesi, æræ vulgaris 57. Paulus in eâ, 1. componit contentiones Corinthiorum ortas ex nimio erga magistros studio: 2. profert excommunicationis sententiam in Corinthium, quem publico in incestu viventem toleraverant: 3. Eucharistiæ institutionem, requisitasque ad eam recipiendam dispositiones recenset: 4. varia tradit tum
disci-

disciplinæ, tum morum præcepta.

Ad Corinthios secunda, ex Macedoniâ, eodem quo prior, anno scripta est, hoc est, æræ nostræ 57. Apostolus in eâ, 1. gratulatur Corinthiis de sincero erga se studio: 2. incestuoso pœnitenti communionem reddit: 3. respondet pseudoapostolorum sibi invidentium obtrectationibus.

Ad Romanos, epistola, scripta est Corintho, utrâque ad Corinthios jam missâ, æræ nostræ anno 57. in nostris tamen Bibliis ante alias omnes collocatur; nimirum Biblia rationem habuerunt dignitatis, aut Ecclesiarum, aut privatorum hominum, ad quos Apostolus epistolas direxit.

Epistolæ occasione fuit contentio Judæos inter & Gentiles orta. Contendebant illi, se per observationem legis Mosaicæ venisse ad Christi fidem, & consecutos fuisse justificationem; isti vero per legis moralis observationem. Utrisque silentium imponit Apostolus, probans & Judæos, & Gentiles peccatis subditos fuisse, cum annuntiatum est eis Euangelium; hincque concludit, justificationem esse gratuitum donum; ac proir dè, nec ex observatione legis, nec ex operum meritis, sed ex Christi fide proficisci.

Ad Philippenses, æræ nostræ anno 61. Paulus scripsit ex primis suis vinculis, quæ, ut constat ex Act. 28. biennio perdurarunt: 1. gratias agit de subsidio sibi in vinculis per Epaphroditum misso: 2. eos monet, ut constantes sint in fide, quam ab ipso audierant, nec obsequantur pseudoapostolis Judaizantibus, quos appellat, *canes & inimicos crucis Christi*: 4. docet, non ex lege, sed ex Christi fide veram esse justitiam.

Ad Philemonem, eodem anno 62. & eodem loco scripsit per Onesimum illius servum. Epistolæ occasionem dedit Onesimi furtum, cujus cum eum pœnituisset, & postquam Romæ, quò fugerat, baptizatus fuisset à Paulo, ab eodem cum hâc epistolâ ad herum

158 Instit. Theolog. Prolegomena.
rum suum Pauli discipulum remissus est.

Ad Ephesios, Româ ex vinculis, quorum ter meminuit, scripsit Paulus, æræ nostræ anno 62. In eâ ep. loquitur de gratuitâ per Christum justificatione, ac prædestinatione : 2. Ephesios hortatur ad unitatem spiritus : 3. docet, quænam sibi invicem debeant officia vir & mulier, quid filii parentibus, & vicissim parentes filiis debeant.

Ad Colossenses, eodem anno, & ex eodem carcere scripsit per Tychicum & Onesimum. Apostolus 1. Colossenses deterret à Simonianis, qui docebant, nos accessum habere ad Deum, non per Filium, sed per Angelos; asseritque non nisi per Christum Dei filium nos Deo reconciliari: 2. prædicat, Judaicas & Philosophicas observationes contemni debere: 3. in tertio & quarto capite totus est in tradendis vitæ Christianæ præceptis.

Ad Hebræos, scripsit Paulus ex iisdem vinculis, ut patet ex cap. 13. æræ nostræ 62. sub finem biennii, quo Romæ primùm commoratus est, Româ jam dimisso Timotheo, ut constat ex cap. 23. In hac epistolâ duo potissimum agit : 1. docet, quantum Christi sacerdotium, & sacrificium emineant supra Leviticum : 2. Hebræos consolatur, & ad fidei in Christum perseverantiam hortatur.

Ad Timotheum, priorem epistolam Philippis scripsit Paulus, cum primis suis vinculis solutus, iterùm Orientem peragraret, æræ vulgaris anno 66. Explicat omnes omninò Episcopatus partes. Timotheo, quem adhuc adolescentem Paulus Ephesiorum Episcopum consecravit, iis S. Patris documentis opuserat.

Ad Timotheum secundam, Apostolus ex suis Secundis vinculis Româ scripsit, paulò antequam martyrium subiret; ac proinde anno æræ vulgaris 66. labente. Istius idem est ac præcedentis argumentum.

Ad Titum, epistola ejusdem est cum præceden-

dentibus argumenti; nam 1. Titum, quem Crenesium Episcopum creaverat, admonet de presbyteris, sive Episcopis ordinandis: 2. acriter adversus Judaizantes insurgit: 3. multa tradit morum præcepta. Scripta verò est hæc epistola Philippis, cum Paulus post prima vincula Orientem peragraret, æræ vulgaris anno 66.

Jacobi, epistolæ scopus est 1. ut Christianos ad modestiam erudiat, à vanâ confidentiâ revocet, & ad petendam à Deo sapientiam hortetur: 2. ut contra Simonianos, qui tunc Ecclesiam vexabant, doceat, fidem sine operibus ad salutem nihil prodesse.

Incertum est, cujus Jacobi sit hæc epistola, an ejus, qui filius est Zebedæi, & frater Joannis, an verò ejus, qui filius est Alphæi, & frater Judæ, quique postea consecratus est Ierosolymorum Episcopus, & cujus Paulus ad Galatas cap.2. meminit. Eum Alphæi, non autem Zebedæi filium esse, docet Hieronymus in cap. 1. epist. ad Gal. nec immerito; nam Zebedæi filius ab Herode necatus est, ut habetur Actor. 12. anno circiter post Christi mortem nono: at tunc (Irenæo teste lib. 3. adversus Hæres. cap. 1.) Apostoli nullas adhuc epistolas scripserant. Prætereà, ut jam observatum est, hæc epistola est contra Simonianos, qui pro solius fidei sufficientiâ nonnullis Pauli sententiis abutebantur; Paulus tamen nondum aliquas epistolas scripserat, cum Jacobus Zebedæi filius morti traditus est. Quo autem tempore scripta sit hæc Jacobi epistola, planè est incertum.

Judæ, fratris Jacobi filii Alphæi epistola, non argumento tantum, sed etiam verbis secundæ Petri similis est. Incertum est, quo tempore scripta sit; sed conveniunt omnes, scriptam esse post aliorum omnium, si unum Joannem excipias, Apostolorum mortem; quippè Apostolorum, qui jam è vivis excesserant, versu 27. meminit.

Joannis prior epistola scripta est, juxta ve-

Tom. I.

I te-

terum traditionem, ad Parthos, seu, Judæos qui in Parthiâ vicinisque regionibus supererant ex antiquâ captivitate & dispersione, & quorum fit mentio Actor. 2. Explicantur in eâ 1. Incarnationis veritas & œconomia: 2. traduntur varia, quæ tum ad fidem, tum ad mores spectant, documenta.

In Epistolâ secundâ, Joannes 1. impugnat Basilidem ejusque sectarios, qui tunc temporis docebant, Christum non fuisse verum hominem, sed phantasma: ac proinde eum nec aliquid aut egisse aut passum fuisse: *Multi*, inquit versu 7. *seductores exierunt in mundum, qui non consentunt Iesum Christum venisse in carnem*. 2. gratulatur Electæ & natisejus, quod seductores illos non audissent. 3. vetat omnem cum eis communionem, in iis etiam quæ ad civilem vitam spectant.

In tertiâ Epistolâ Joannes, 1. idem quod in secundâ sibi proponit argumentum: 2. Gajum ad quem scribit, monet, nè Diotrephen, sed Demetrium imitetur.

Incertum est, quo præcisè tempore tres illæ Joannis Epistolæ scriptæ sint. Probabilius est eas fuisse scriptas post Joannis ex insulâ Pathmos reditum paulò ante illius mortem, hoc est, æræ communis 98. nam tunc maximè temporis grassabantur Ebion, Cerinthus, & Basilides, ad quos in tribus iis Epistolis respexisse videtur.

§. I V.

De Apocalypsi.

Nihil hîc dicemus de hujusce libri canonicitate, quippè de eâ dictum est, ubi superius egimus de librorum canonicorum numero.

Apo-

Differt. IV. De Locis Theologicis. 161.

Apocalypsis scripta est à Joanne, dum esset in insulam Pathmos relegatus, circa annum Domitiani 14. æræ vulgaris 94. Hinc patet, *Apocalypsin* esse conscriptam ante Joannis, tum *Euangelium* tum *Epistolas*.

De eo Joannis libro hæc habet Hieronymus in *Epistolâ ad Paulinum*: *Apocalypsis Joannis tot habet sacramenta, quot verba. Parum dixi, pro merito voluminis tæus omnis inferior est. In verbis singulis multiplices latent intelligentiæ. Omnia verò ea sacramenta, omnes intelligentias nemo hætenùs clarè explicuit. Nonnullorum expositionem legere est apud Augustinum qui lib. 20. de civitate Dei cap. 7. & sequentibus, totum caput vigesimum interpretatus est. De reliquis adeat lector Doctissimi Bossuetii Episcopi Meldensis eximium commentarium: consulat quoque Herveum nostrum, qui contentas in *Apocalypsi* prophetias majori ex parte, primo & altero Ecclesiæ sæculo, impletas esse contendit.*

Q U Æ S T I O II.

De Traditione.

Not. 1. **N**Omīne traditionis intelligitur doctrina non scripta: *Si leges postules* (inquit Tertullianus libro de coronâ militis) *scripturam nullam inveniam, traditio tibi prætenditur auctrix*: dicitur verò doctrina non scripta, non quidem quòd nullibi scripta sit, reperitur enim aut in Conciliorum Canonibus, aut in operibus Patrum; sed quòd non legatur in libris Canonicis.

Not. 2. Traditio considerata per ordinem ad objectum, triplex est, fidei nimirum, morum, & disciplinæ: prior ad fidem spectat; altera

ad mores; tertia ad disciplinam; hæc ultima dividitur in Apostolicam & Ecclesiasticam. Illa est ritus quidam ab Apostolis primùm institutus, sed qui in eorum epistolis non legitur; hujus generis est jejunium quadragesimale: ista, est consuetudo, quæ aut à Prælatiis, aut à populis inchoata, deinceps tacito fidelium consensu vim legis obtinuit.

Not. 3. Traditio, quæ aut ad fidem, aut ad mores spectat, vel est divina, vel humana: Si humana sit, theologus ex eâ tanquam ex medio infallibili non potest argumenta desumere: Si autem sit divina, hoc est, si Apostoli eam à Christo vivâ voce, aut postea Spiritu Sancto docti sint, est medium infallibile ad ea cognoscenda, quæ ad fidem, aut mores pertinent.

Not. 4. Recentiores hæretici, Lutherus, Calvinus, Zuinglius, Socinus, contenderunt, nullam prorsus esse traditionem divinam: hincque concluderunt, nullum pro fide, aut moribus argumentum infallibile ex eâ desumi posse, sed ex solâ Scripturâ, hoc est, ex solis libris Canonicis, quos fatentur divinitus esse scriptos. E contra Catholici docent, aliquas esse traditiones divinas; unde concludunt, eas esse medium, ex quo theologo fidem, aut mores certò possunt adstruere: *Perspiciens* (inquit Tridentina Synodus sessione 49.) *hanc veritatem & disciplinam contineri in libris scriptis, & sine scripto traditionibus, quæ ipsius Christi ore ab Apostolis acceptæ, aut ab ipsis Apostolis, Spiritu Sancto dictante, quasi per manus traditæ, ad nos usque pervenerunt, Orthodoxorum Patrum exempla secuta, omnes libros tam veteris, quàm novi testamenti, cum utriusque unus Deus sit author, nec non traditiones ipsas, tum ad fidem, tum ad mores pertinentes, tanquam vel ore tenus à Christo, vel à Spiritu Sancto dictatas, & continuâ successione in Ecclesiâ Catholicâ conservatas, pari pietatis affectu, ac reverentiâ suscipit, & veneratur.*

Not. 5.

Not. 5. Ex iis, quæ hucusque notata sunt, patet, Catholici theologi partes esse, ut probet 1. esse aliquas divinas traditiones: 2. eas traditiones medium esse, ex quo theologia argumenta certissima pro fide aut moribus stabilendis desumat: 3. proferre regulas, quibus divinæ traditiones ab humanis discernantur. Verum, ut cum methodo pertractentur eæ difficultates, tribus subsequentibus capitibus exponendæ sunt.

C A P U T I.

Utrum sint aliquæ traditiones divine.

Not. 1. **E**Cclesia Christiana non minùs est antiqua, quàm ipse mundus. Ubi primum Adamus post peccatum justificatus est, cœpit religio Christiana; nempe ab eo tempore nulli hominum contigit justificatio, nisi per fidem, saltem implicitam, in Christum mediatorem: Fides autem in mediatorem est character Christianæ religioni essentialis. Unde, ut divinarum traditionum existentiam asseramus, oportet, ut expendamus an à mundi exordio, ad hæc usque tempora extiterint.

Not. 2. Tempus, quod ab Adami peccato hucusque fluxit, dividi solet à theologis in tres status, seu ætates, naturæ nimirum, legis & evangelii; ac proinde necesse est, ut quæramus, an in illâ triplici ætatæ extiterint aliquæ divinæ traditiones.

CONCLUSIO I. Extiterunt divinæ traditiones in statu legis naturæ, hoc est, ab Adamo ad Moysen usque.

Probatur. In statu legis naturæ debuit esse aliqua fidei, ac morum regula; cum in eâ Ecclesiæ ætatæ extiterint homines verâ fide, ac piis

moribus præditi : atqui ea regula non fuit humana ratio ; neque enim ratio humana, cum sit per peccatum corrupta, infallibilis est, ac certa fidei aut morum regula : Non fuit quoque Scriptura ; siquidem nulla tunc extabat : ergo ea regula erat traditio ; Adamus nimirum suos natos docuit, quæ sibi de Mediatore, & aliis mysteriis revelata fuerant : ex Adamo nati fidem illam suis posteris ad Moysen usque non interruptâ serie communicarunt.

CONCLUSIO 2. In lege Mosaicâ, quamvis extarent Scripturæ, Judæi tamen traditionibus, tum ad fidem, tum ad mores pertinentibus utebantur.

Probatur. Sic Deus loquitur Exodi 13. *Narrabis filio tuo in illo die, dicens, Hoc est, quod fecit Dominus; hinc psaltes Regius Psal. 77. hæc habet: Quanta mandavit Patribus nostris nota facere ea filiis suis, ut cognoscat generatio altera!* Prætermittimus multa ejusmodi loca, quibus patet, non solam Scripturam, sed narrationem patrum, seu, traditionem, fidem fecisse apud Judæos de portentis, ac cæteris, quæ illorum causâ Deus patrarat in deserto.

CONCLUSIO 3. In lege Evangelicâ pluribus annis traditio absolutè fuit necessaria.

probatur. Pluribus annis post Christi mortem nulla extitit novi testamenti Scriptura. Eiusdem testamenti libri variis successivè temporibus conscripti sunt: ergo tunc traditio, quam fideles audierant ab Apostolis, erat tum morum, tum fidei regula.

CONCLUSIO 4. Ecclesiæ Christianæ, his etiam temporibus, necessariae sunt divinæ traditiones.

Probatur 1. Divinæ traditiones Ecclesiæ Christianæ, his etiam temporibus, ad multa sunt necessariae.

Primò quidem ad discernendum libros Canonicos ab apocriphis ; neque enim in Evangelio,

lio, aut in Apostolorum epistolis legitur scriptum, quot sint libri Canonici: Nec solo cujusque privati fidelis spiritu Canonici à non Canonicis dignosci possunt, ut superius dictum est; unde Patres uno ore testantur, non aliundè, quàm ex traditione, nos habere, quòd aliqua Scriptura sit divina: *Ex traditione* (inquit Origenes apud Eusebium hist. lib.6, cap.18.) *didici de quatuor Evangeliiis, quòd hæc sola, &c.*

Secundò. Traditio divina est Ecclesiæ necessaria, ut judicet, quinam sit sensus Scripturarum, cum de eo exoritur aliquod dubium; ut sunt loca, quæ probant personarum in divinis trinitatem, consubstantialitatem, processionem Spiritûs sancti à Patre & à Filio, Mariam esse Deiparam, dari aliquod peccatum originale, quod omnibus hominibus commune sit; nempè plures hæretici quondam contenderunt, ut nunc etiam Sociniani contendunt, Scripturas, quibus Ecclesia utitur, ut ea dogmata probet, alium prorsus habere sensum ab eo, quem eis adscribunt Catholici.

Tertiò. Necessariæ sunt traditiones ad fidem plurium dogmatum, quæ Catholicis, Calvinistis, Lutheranis, pluribusque aliis, qui earum auctoritatem negant, communia sunt: scilicet, Calvinistæ & Lutherani credunt contra errorem Helvidii, Mariam Deiparam semper fuisse virginem: credunt adversus Anabaptistas, valere datum parvulis baptisma: credunt contra Donatistas, valere datum ab hæreticis, & aliis impiis hominibus. Atqui nullum ex iis capitibus credere possunt propter Scripturæ auctoritatem; nullius enim ne apex quidem est in Scripturis: ergo ex solâ traditione eos articulos credunt; ac proindè, quod probandum erat, necessariæ sunt aliquæ divinæ traditiones, quæ ad fidem & mores spectant.

Confirmatur argumentum. Non omnia, quæ Christus docuit, litteris consignata fuerunt: *Sunt autem & alia multa*, ait Joannes evangelii capite ultimo, *quæ fecit Iesus, quæ si scri-*

bantur per singula, nec ipsum arbitror mundum, capere posse eos, qui conscribendi sunt, libros. At verisimile non est, Apostolosea, quæ fecit, & docuit Jesus, quæque scripta non fuerunt, Ecclesiis non tradidisse. Quod mox de Christo dictum est, locum habet in Apostolis; seu non scripserunt omnia, quæ populis prædicarunt; nam licet ex impulsu Spiritus Sancti euangelia, ac epistolas conscripserint, tamen id fecerunt tantum, quoddam scribendum eos veluti coegerint, quæ datæ sunt occasiones. Refert eas occasiones Eusebius historiæ lib. 2. & 3. Hieronymus in libro de Scriptoribus Ecclesiasticis testatur, Joannem usque ad extremam senectutem absque editis à se Scripturis Euangelium prædicasse, additque tandem eum compulsus fuisse ab Asiæ Episcopis Euangelium scribere, ut occurreret Ebionitarum hæresi, quæ tunc grassari cœperat. Atqui datæ non sunt Apostolis occasiones omnia, quæ à Christo audierant, scribendi: ergo non omnia, quæ prædicarunt, scripsere; multa igitur ipsis per traditionem reliquerunt.

Confirmatur iterum. Ipsimet Apostoli commendarunt necessitatem traditionum, quas non scripto, sed tantum verbo tenus, iis reliquerant, quos ipsi converterant ad fidem: Laudo vos, inquit Paulus 1. ad Corinth. 11. quod per omnia mei memores estis, & sicut tradidi vobis, præcepta mea tenetis; ad Thessal. 2. hæc etiam habet: Tenete traditiones quas accepistis, sive per sermonem, sive per epistolam nostram; in quem quidem locum sic loquitur Chrysostomus: Hinc patet, quod non omnia per epistolam, sed multa etiam sine litteris: eadem verò fide digna sunt iam illa, quam ista.

Solvuntur adversariorum argumenta.

Objicies 1. Illud non est Ecclesiæ necessarium, quod à Moyse, Paulo, ipso etiam Christo prohibi-

bitum est : atqui traditiones prohibitæ sunt à Moysè, Paulo, ipso etiam Christo . Deuteronomii 4. hæc habentur : *Non addetis ad verbum, quod ego præcipio vobis, nec auferetis ex eo ; hæc leguntur ad Galatas : Sed licet nos, aut Angelus de cælo evangelizet vobis, præterquam quod evangelizavimus vobis, anathema sit . Matth. 15.* Christus sic Pharisæos increpat : *Quare & vos transgredimini mandatum Dei propter traditionem vestram ? ergo, &c.*

Resp. ad 1. conc. maj. neg. min. Ad secundum, dico 1. argumentum esse de non supponente ; supponit enim, traditionem, de qua hic agitur, esse additionem ad Dei verbum ; quod falsum est ; nempe traditio, ut patet ex dictis superius, non minùs est Dei verbum, quàm ipsamet Scriptura ; unde Moyses non ait, *Non addetis ad verbum, quod ego scribo vobis, sed quod præcipio.* Paulus quoque non ait, *Quod scripsimus, vobis, sed quod evangelizavimus ;* nec mirum, pauca quippè ad Galatas scripserat, sed evangelizaverat multa. Christus etiam non ait, *traditionem meam, sed vestram, hoc est, à Pharisæis inventam .* Dico 2. iis in locis Moysen, Paulum, Christum, ex suppositione, quòd loquantur de solo verbo scripto, prohibere additionem eidem verbo scripto contrariam ; idque patet tum ex his Christi verbis : *Irritum fecistis mandatum Dei propter traditionem vestram ;* tum etiam ex Augustino, qui hanc Pauli vocem : *Præter, per hanc aliam, Contra, reddit : Non ait plus, quàm quod accepistis, inquit Augustinus tractatu 98. in Joannem, sed præterquam quod accepistis.*

Objicies 2. Scriptura sufficienter omnia continet : *Omnis scriptura divinitus inspirata, ait Paulus 2. ad Timoth. 3. utilis est ad docendum, ad arguendum, ad corripiendum, ad erudiendum in justitiâ, ut perfectus sit homo Dei, ad omne opus bonum instructus.*

I 5 Resp.

Resp. ad 1. neg. ant. Ad 2. dico, Apostolum velle, Scripturam utilem esse ad docendum, corripiendum, erudiendum; quod non negamus; sed non dicit eam esse sufficientem. Ratio solutionis est 1. quia utitur hac voce, *Utilis*. 2. Non loquitur de omnibus libris Canonicis collectivè sumptis, sed de singulis distributivè, *Omnis*, inquit, *Scriptura* &c. at quilibet liber Canonicus, licèt utilis sit, non est tamen ad fidem & ad mores sufficiens.

Objicies 3. Patres non rarò docent, omnia fidei, ac morum dogmata Scripturis contineri. Irenæus adversùs hæreses lib. 3. cap. 1. asserit, Apostolos scripsisse postea, quæ ante prædicarant. Augustinus lib. 2. de doctrinâ Christi cap. 9. hæc habet: *In his, quæ apertè posita sunt in Scriptura, inveniuntur illa omnia, quæ continent fidem, moresq; vivendi.*

Resp. ad 1. neg. ant. Ad cujus priorem probationem dico, Irenæum non asserere, Apostolos scripsisse omnia, quæ prædicaverant, sed tantùm Evangelium, hoc est, præcipua fidei & morum capita: *Quod, Evangelium, tunc, ait, prædicaverunt, postea verò per Dei voluntatem in Scripturis nobis tradiderunt.* Ad alteram probationem distinguo hæc Augustini verba: In Scripturâ inveniuntur illa omnia, quæ continent fidem, moresque vivendi, quoad ea, quorum fides & cognitio explicita cuique sunt necessariæ ad salutem, ut sunt præcipua mysteria, quæ continentur in symbolo, & morum principia, quæ sunt in decalogo, conc. ant. Quorum fides & cognitio explicita, cuique non sunt necessariæ ad salutem, ut sunt cognitio aliquorum Sacramentorum, & quædam conclusiones, quæ ex decalogi præceptis sequuntur, neg. ant.

C A P U T II.

*Utrum traditio sit locus, ex quo peti possit
certum pro fide & moribus ar-
gumentum.*

CONCL. **T**Raditio est locus, ex quo peti
potest certum pro fide & mo-
ribus argumentum.

Probatur 1. Traditio divina est Dei ipsius ver-
bum, seu, est facta à Deo revelatio: Sed ex Dei
verbo, ex Dei revelatione, peti potest certum
pro fide & moribus argumentum: ergo, &c.

Major patet ex dictis articulo superiore: mi-
nor supponitur ex dicendis in tractatu de fide;
ubi ostenditur, impossibile esse, quòd Deus men-
tiatur.

Probatur 2. Ex aliquo medio erui debet ar-
gumentum certum pro pluribus fidei articulis,
pluribus morum principiis, quæ in Scripturâ
non continentur, ut superiore articulo observa-
tum est: atqui illud medium est sola traditio,
cum non possit esse Scriptura, in quâ, ut sup-
pono, illi articuli nullo modo continentur; nec
ratio humana, cum non sit in iis, quæ aut ad fi-
dem, aut mores spectant, principium omnino
infallibile.

Probatur 3. Ecclesia in suis Conciliis, Patres
in suis Operibus, usi sunt traditione tanquam
medio certissimo ad probanda, tum fidei, tum
morum dogmata: ergo ex eâ pro fide & mori-
bus peti possunt argumenta certissima.

Ostenditur prior pars antecedentis. Concilia
cum egerunt de Scripturarum sensu, traditio-
nem consuluere; nempe Theodoretus hist.lib. 1.
cap. 8. testatur, Nicænum primum Concilium
damnasse Arium testimonio Scripturarum, quas
expendit ad mentem traditionis. Alterum Nicæ-

num Concilium actione 6. tom. 4. traditione utitur, ut adversus Iconomachos definiat, pium esse cultum, quem Ecclesia sacris imaginibus exhibet. Octavum generale Concilium actione 8. profitetur, servari debere germanas traditiones.

Ostenditur altera ejusdem antecedentis pars ex Patribus Græcis. S. Ignatius apud Eusebium hist. lib. 3. cap. 36. fideles hortatur, ut Apostolorum traditionibus tenaciùs inhæreant. Irenæus lib. 3. cap. 4. asserit, suo tempore multas Barbaras gentes in Christum credidisse: *Sine charactere*, inquit, *vel atramento scriptam habentes per spiritum in cordibus suis salutem, & veterum traditionem diligenter custodientes*. Addit, quòd, cum hæretici scripturis convinci non possint, ad traditionem recurrendum sit.

Origenes. in caput sextum epist. ad Rom. Ecclesia, inquit, *ab Apostolis traditionem accepit etiam parvulis baptismum dare*. Basiliius libro de Spiritu Sancto cap. 27. Dogmata, ait, *quæ in Ecclesiâ servantur, ac prædicantur, partim conscriptâ doctrinâ habemus, partim ex Apostolorum traditione recepimus, quæ utraque eandem ad pietatem vim habet*. Similem eâ de re Chrysostomi textum retulimus articulo superiore. Epiphanius hæresi 61. Oportet, inquit, *& traditione uti; non enim omnia à divinâ scripturâ accipi possunt: quapropter aliqua in scripturis, aliqua in traditione sancti Apostoli tradiderunt*.

Ostenditur eadem secunda antecedentis pars ex Patribus Latinis. Tertullianus in libro de Præscript. ex instituto docet, hæreticos, non ex scripturis, cum eas in suum falsum sensum detorquere soliti sint, sed ex traditione, confutari debere.

Augustinus libro 5. de baptismo cap. 23. expressè probat, datum ab hæreticis baptismum valere; non ex Scripturâ, cum nihil de eo baptismo dicat, sed ex traditione: *Consuetudo illa*, inquit, *quæ opponebatur Cypriano*,
ab

ab eorum , Apostolorum , traditione exordium sumpsisse credenda est , sicut sunt multa , quæ universa tenet Ecclesia , & ob hoc ab Apostolis præcepta bene creduntur , quamquam scripta non repetantur .

Vincentius Lirinensis toto libro , quem *Commonitorium* inscripsit , probat , esse traditioni inhærendum , in rebus , quæ ad fidem & mores spectant . Cap. 2. quærit , quâ viâ catholica veritas ab hæreticâ pravitate discerni possit : Respondet verò , duplici ratione id fieri posse , scilicet , inquit , *divinæ legis autoritate , tum deinde Ecclesiæ Catholicæ traditione* . Quærit postea , cur traditio Scripturæ addenda sit : respondet , id debere fieri , quia *Scripturam Sacram non uno , eodemque sensu universi accipiunt , sed ejusdem eloquia aliter atque aliter , alius atque alius interpretatur ; ut penè quot homines sunt , tot illinc sententiæ erui posse videantur* .

Objicies 1. Cyprianus pugnans pro nullitate baptismatis recepti ab hæreticis , nullam habuit rationem traditionis , quam ipsi objecit Stephanus Papa , sic ad eum rescribens : *Nihil innovetur præter id , quod traditum est* : ergo ex traditione desumi non possunt certa argumenta ad probandam fidem , aut ad stabiliendam morum regulam .

Resp. dist. ant. Cyprianus , &c. traditionis quam credebat non descendere ab Apostolis , conc. ant. traditionis quam credebat ab Apostolis descendere , neg. antec. Cyprianus non credidit fluxisse ab Apostolis traditionem , quam illi Papa Stephanus opposuit ; unde illam appellavit vetustum errorem , asseruitque , contrariam esse Scripturis : Unde , inquit in epistola ad Pompejum , *ista traditio ? Vtrum de dominicâ & evangelicâ autoritate descendens , an de Apostolorum mandatis , atque epistolis veniens ? Ea enim facienda esse , quæ scripta sunt , testatur Deus , &c.*

Ob.

Objicies 2. Hieronymus in caput 23. Matth. *Hoc, inquit, quia de scripturis auctoritatem non habet, eâdem facilitate contemnitur, quâ probatur: ergo Hieronymus non censuit, aliunde quàm ex scripturis peti posse pro fide aut moribus argumenta. Idem sensisse videtur Augustinus libro 2. de peccatorum meritis & remissione cap. 3. ubi sic loquitur: Vbi de re obscurissima disputatur, non adjuvantibus divinarum scripturarum certis clarisque documentis, cohibere se debet humana præsumpcio, nihil faciens, in alteram partem declinando.*

Resp. ad 1. dist. ant. Hoc, &c. quia in Scripturis, sed tantùm in libro apocrypho, auctoritatem non habet, facilè contemnitur, conc. ant. quòd habet auctoritatem alibi, quàm in libro apocrypho, neg. ant. Agebat ibi Hieronymus de nonnullis, qui ex quodam libro apocrypho urgebant, Zachariam quem Judæi occiderunt inter templum & altare, fuisse Zachariam patrem Joannis Baptistæ.

Ad 2. dico, Augustinum loqui de quæstionibus, quæ nec in scripturâ, nec in traditione, quæ (ut dictum est) in scripturâ fundatur, aperta habent testimonia, ut est, in Augustini sententia, quæstio de origine animarum, de quâ agebat loco qui objectus est ab adversariis. Confirmatur responsio ex eo, quòd lib. 1. contra Cresconium cap. 43. sanctus doctor asserat, scripturæ veritatem à nobis teneri, cùm id facimus, quod universa probat Ecclesia.

Objicies 3. Ex monumento quod est obnoxium mutationi, peti non possunt firma ac certa argumenta ad stabiliendas aut fidei, aut morum regulas: atqui traditio est monumentum obnoxium mutationi, ut videre est in communionem Eucharisticâ sub utrâque specie, quæ licet per duodecim priora sæcula ubique passim obtinuerit, tamen à quatuor ab hinc sæculis in Occidente desit.

Resp.

Resp. dist. min. Traditio, quæ ad disciplinam spectat, est monumentum obnoxium mutationi, conc. min. quæ spectat ad fidem aut ad mores, neg. min. De istâ non autem de illâ intelligitur nostra conclusio.

C A P U T III.

De Regulis, quibus divina traditio discernitur ab humana.

Not. **H**Æretici traditionis vim ad firmandam fidem, & mores regulandos, ex eo maxime capite impugnant, quod, aiunt, impossibile sit, veras à falsis traditionibus distinguere; idque, addunt, patet in opinione veterum, qui crediderunt, Christum post universalem hominum resurrectionem cum prædestinatis hîc, in terris, per mille annos regnaturum; nempè illi errori sub traditionis obtentu adhæserunt Papias Polycarpi discipulus, Irenæus, Tertullianus, Lactantius, alique permulti, de quibus Eusebium libro 3. hist. cap. 39. videre est. Plurimi igitur interest regulas tradere, quibus vera traditio à falsâ, divina ab humanâ distinguatur.

CONCLUSIO I. Nonnullæ sunt regulæ, quibus cognoscitur, aliquam traditionem esse humanam, non autem divinam.

Probatur earum regularum enumeratione.

Prima regula. Illud non est divina traditio, cujus, licet in totâ Ecclesiâ serveretur, initium reperitur aut in decretis summorum Pontificum, aut in Conciliorum canonibus, aut in statutis Patrum.

Ratio est, quia, si id cujus initium reperitur, esset divina traditio, seu, si esset aliquid divinitus traditum, oporteret, quod Patri, à quo habet initium, de novo fuisset revelatum: atqui id asseri non potest, cum Ecclesia non admittat novas revelationes.

Et

Et sanè, vel ea revelatio cognita fuisset Apostolis, vel ipsis fuisset incognita. Si primum, Apostoli eam revelationem docuissent; alioquin in ministerio se præbuisent infideles. Si secundum, culpandus esset Christus, qui Apostolos non omnia Ecclesiæ necessaria docuisset: falsò promississet, Spiritum sanctum eos docturum esse omnem veritatem. Tertulliani est illud argumentum, sic enim loquitur libro de Præscript. cap. 22. *Solent dicere (loquitur de quibusdam sui temporis gnosticis) non omnia Apostolos scisse: agitati dementia, qua rursus convertunt; omnia quidem Apostolos scisse, sed non omnia omnibus tradidisse; in utroque Christum reprehensioni subiicientes, qui aut minus instructos, aut parum simplices Apostolos miserit.*

Idem, seu, quòd novæ revelationes admitti non debeant in iis quæ ad fidem aut ad mores spectant, ostenditur ex Vincentio Lirinensi, qui commonitorii lib. 1. cap. 6. hæc scribit: *Mos iste in Ecclesia semper viguit, ut quò quisque foret religiosior, eò promptius novellis adinventionibus contraheret.* Hinc summi Pontifices, hinc concilia summâ vi, summo studio id unum adversus hæreticos curarunt, *ut defenderint (teste eodem Vincentio Lirinensi) susceptæ semel religionis integritatem.* Hinc grande piaculum esse prædicarunt Patres, id annunciare, quod prius auditum non est: *Adnuntiare ergo, inquit mox laudatus author cap. 9. aliquid Christianis Catholicis præter id quod acceperunt, numquam licuit, nunquam licebit: & anathematizare eos qui annuntiant aliquid, præterquam quod semel acceptum est, nusquam non oportuit, nunquam non oportet, nunquam non oportebit.* Hinc, eodem Lirinensi teste c. 20. iidem Patres impetrarunt, ut fideles, *quidquid ab aliquo deinceps uno præter omnes, vel contra omnes sanctos novum & inauditum subinduci senserint, id non ad religionem, sed ad tentationem potius intelligant pertinere.*

Quæ

Quæ mox de fugiendâ tum in vitâ, tum in moribus novitate dicta sunt, confirmantur ex Apostolo, qui 1. ad Timoth. cap. 6. hæc habet : *O Timothee, depositum custodi, devitans prophanas vocum novitates, & oppositiones falsi nominis scientiæ, quam quidam promittentes, circa fidem exciderunt. In eam autem sententiam hæc scribit Vincentius Lirinensis commonit. capite 21. Non dixit, antiquitates : non dixit, vetustates. Immo plane quid è contrario sequeretur, ostendit. Nam si vitanda est novitas, tenenda est antiquitas : & si profana est novitas, sacrata est vetustas. Hæc iterum in eandem sententiam scribit capite 22. Quid est, depositum custodi ? Custodi, inquit, propter fures, propter inimicos. Quid est depositum ? id est quod tibi creditum est, non quod à te inventum ; quod accepisti, non quod excogitasti ; rem non ingenii, sed doctrinæ ; non usurpationis privæ, sed publicæ traditionis ; rem ad te perductam, non à te prolatam ; in qua non auctor debes esse, sed custos ; non institutor, sed sectator ; non ducens, sed sequens.*

Confirmantur iterum ex eo quòd si admittantur novæ revelationes in iis quæ spectant ad fidem, aut ad mores, Ecclesia nec Montanum qui se à Spiritu sancto singulariter doctum jactabat, nec alios hæreticos qui errores protulerunt, nec novatores aliquos, qui deinceps orientur, confutare poterit : ii enim cum Montano statim Ecclesiæ objicient, factas sibi esse novarum opinionum revelationes ; sicque nihil integrum, nihil sanum in Ecclesiâ stare poterit : Si novitia veteribus, extranea domesticis, & prophana sacratis admisceri cæperint, proserpat hic mos in universum necesse est, ut nihil post hac apud Ecclesiam relinquatur intactum, nihil integrum, sed sit ibi deinceps impiorum ac turpium errorum lupanar, ubi erat antea castæ, & incorruptæ sacrarium veritatis. Multa alia ad idem argumentum pertinentia legere est apud eundem Vin-

cen-

centium Lirinensem, & apud Tertullianum lib. de Præscriptionibus adversus hæreticos.

Secunda regula. Doctrina, quæ in unâ tantum particulari Ecclesiâ reperitur, non est divina, sed humana; non tradita, sed inventa.

Ratio est, quia veritas divinitus tradita, contineri non potest in unâ tantum particulari Ecclesiâ; alioquin ad terræ angulum reduci posset Ecclesia Catholica: quod falsum esse demonstrat Augustinus in suis adversus Donatistas operibus. Hinc Vincentius Lirinensis commonitorii cap. 3. meritò docet, Ecclesiam illam particularem eo in casu non esse audiendam, neminemque posse illi adjungi, si ob privatam suam traditionem, sese à cæterarum Ecclesiarum communione præsciderit: *Quid igitur, inquit, tunc faciet Christianus Catholicus, si se aliqua Ecclesiæ particula ab universalis fidei communione præsciderit? Quid utique, nisi ut pestifero, corruptoque membro sanitatem universi corporis anteponat?*

Tertia regula. Humanum est, non divinitus traditum, dogma, quod contra communem aliorum sententiam ab uno tantum, aut duobus, etiam antiquis scriptoribus, imò & totâ aliquâ urbe particulari, aut provinciâ docetur.

Ratio est 1. quia hujus regulæ veritatem demonstrat argumentum, quod proprio prolatum est. 2. Sic senserunt majores nostri: *Quòd si* (ait Vincentius Lirinensis commonit. cap. 3.) *in ipsâ vetustate duorum, aut trium hominum, vel certe civitatis unius, aut etiam provinciæ alicujus error deprehendatur: tunc omninò curabit, ut paucorum temeritati, vel inscitiae, si qua sunt universaliter antiquitus, universalis concilii decreto præponat.* Similia scribit cap. 28. *Quidquid verò, quamvis ille sanctus, & doctus, quamvis Episcopus, quamvis confessor & martyr, præter omnes, aut etiam contra omnes senserit, id inter proprias & privatas opiniunculas à communis & publicæ generalis sententiæ auctoritate secretum sit, ne*

cum

cum summo aeternae salutis periculo , universalis dogmatis antiquâ veritate dimissâ , unius hominis novitium sectemur errorem .

CONCLUSIO 2. Certæ sunt regulæ , quibus cognosci potest , aliquam traditionem esse divinam .

Probaturn earum regularum enumeratione .

Prima regula. Dogma, quod universa Ecclesia amplectitur, licet in sacris litteris non reperiatur, divinæ est traditionis .

Ratio est, quia Ecclesia universa errare non potest, cum (ut ait Paulus I. ad Timoth. 3.) sit columna & firmamentum veritatis .

Confirmatur 1. ex Iræneo, qui libro 1. adversus hæreses cap. 2. docet, ex Ecclesiarum consensu judicari debere , an doctrina aliqua sit vera , aut falsa : *Ecclesia*, inquit, *per universum orbem usque ad fines terræ seminata, & ab Apostolis & à discipulis eorum accepit eam fidem , quæ est, &c.* Hanc prædicationem cum acceperit, & hanc fidem Ecclesia, & quidem in universum orbem disseminata , diligenter custodit , quasi unam domum inhabitans , & similiter credit his , videlicet quasi unam habens animam, & unum cor .

Confirmatur 2. ex Tertulliano : *Ecquid* (ait lib. de Præscript.) *verissimile est, ut tot, ac tantæ in unam fidem erraverint ; variasse debuerat error doctrinæ Ecclesiarum . Cæterum quod apud multos unum invenitur, non est erratum, sed traditum .*

Confirmatur 3. ex Cypriano, qui ideò hæreticum, asserit, fuisse Novatianum, quòd apud omnes orbis Ecclesias tanquam hæreticus audiret : *Quàm vanum est*, (inquit lib. 3. epist. 13.) *ut Novatiano nuper relicto, & refutato, & per ipsum orbem à sacerdotibus Dei abstituto, nunc adulatores adhuc nobis patiamur illudere, & de majestate, ac dignitate Ecclesiæ judicare ?*

Confirmatur 4. ex Hieronymo, qui Vigilantium ex eo damnat, quòd illi universi orbis Episcopi

copi contradicant: *Et non solum, inquit, unius urbis, sed totius orbis errant Episcopi, qui cauponem Vigilantium contemnentes, ingrediuntur basilicas mortuorum.*

Idem confirmari potest ex Augustino qui sæpè in suis adversùs Pelagianos operibus asserit hæreticam esse eorum doctrinam, quòd omnes orbis Ecclesiæ synodorum Carthaginensium decretis & Innocentii ac Zolimi summorum Pontificum judicio subscripsissent.

Secunda regula. Doctrina quam universa Ecclesia quovis sæculo propugnavit, divinæ est traditionis, quamvis in libris canonicis non reperiatur. Ratio est, quia sicut tota præsentis sæculi Ecclesia admittere non potest tanquam divinum quod humanum est: ita nec præcedentium sæculorum Ecclesia. Una nimirum est ac eadem Christi sponsa, licèt diversis sæculis ac ætatibus distincta sit: ergo doctrina quam ut divinam admittit quovis sæculo, verè divina est, quamvis in sacris litteris non legatur.

Confirmatur 1. ex laudato superiùs hoc Tertulliani axioma: *Cæterum quod apud multos unum invenitur, non est erratum, sed traditum.*

Confirmatur 2. ex Vincentio Lirinensi: *In ipsa (inquit Commonit. cap. 2.) item Catholica Ecclesia magnoperè curandum est, ut id teneamus, quod ubique, quod semper, quod ab omnibus creditum est. Explicat, quâ ratione id fieri possit: Sed hoc ita demùm fiet, si sequamur universitatem, antiquitatem, consensionem; sequemur autem universitatem hoc modo, si hanc unam fidem veram esse fateamur, quam tota per orbem terrarum confitetur Ecclesia; antiquitatem verò ita, si ab his sensibus nullatenus recedamus, quos sanctos maiores, ac patres nostros celebrasse manifestum est; consensionem quoque itidem, si in ipsâ vetustate, omnium vel certe penè omnium sacerdotum pariter, & magistrorum definitiones sententiasque sectemur. Multa alia habet author*

thor ad idem argumentum spectantia, de quibus consuli potest.

Tertia regula. Praxis quam solus Deus institueret potest, est ex traditione Apostolicâ, si ab universâ Ecclesiâ servetur.

Ratio est, quia Ecclesia universa non magis in cultu quàm in fide errare potest: ac proinde dicendum est, Ecclesiam à Deo per Apostolos eorumque successores accepisse praxim, quæ solum Deum potest habere institutorem.

Confirmatur 1. ex Augustino, qui mox allatâ ratione utitur, ut probet, praxim de baptizandis parvulis esse ex institutione divinâ: *Consuetudo*, inquit lib. 10. de Gen. cap. 23. *matris Ecclesiæ in baptizandis parvulis, nequaquam spernenda est, neque ullo modo superflua deputanda, nec omnino credenda, nisi Apostolica esset traditio.* Eodem utitur argumento lib. 2. de Bapt. contra Donatistas cap. 7. ut ostendat, iterari non debere datum ab hæreticis baptisma: *Quam*, inquit, *consuetudinem non rebaptizandi hæreticos credo ex Apostolicâ traditione venientem, sicut multa non inveniuntur in libris eorum, neque in Conciliis posteriorum, & tamen quia per universam custodiuntur Ecclesiam, nonnisi ab ipsis tradita & commendata creduntur.*

Confirmatur 2. Multa eiusdem generis fiunt in Ecclesiâ, quæ nec tentare posset, nisi potestatem sibi per Apostolos divinitus traditam accepisset: sic (inquit Melchior Canus lib. 3. de locis theologicis cap. 4.) vota dissolvere, & remittere iuramenta, non erat humanæ potestatis; tum quia jure naturæ vota nuncupata, Deo reddere, & iuramenta servare tenemur: humana verò facultas ea quæ jure naturæ debita & constituta sunt, condonare ac tollere non potest. Eadem est ratio de matrimonii rati diremptione per solemne votum: cùm enim matrimonium, etiam non consummatum, ante Evangelicam legem jure naturæ esset indissolubile, nec esset in republicâ humanâ facultas ulla ejus-

ejusmodi matrimonii dirimendi, consequens sit hunc Ecclesię morem, ex Christi & Apostolorum instituto descendisse. Nec enim credi potest, Ecclesiam Dei aliquam sibi potestatem generaliter usurpasse in his, quę ad jus naturę pertinerent, nisi quam Christo & Apostolis tradentibus accepisset; jam enim hic error esset gravis in moribus, in quibus Ecclesiam errare non posse, suo loco ostendemus: hætenus Melchior Canus.

Quarta regula. Praxis, quę in Ecclesia universa, quovis sæculo, continuatâ serie servata est, quęque instituta non videtur in Conciliis, meritò censetur ab Apostolis instituta, quamvis ejus sit generis, ut ab Ecclesiâ institui potuerit.

Ratio est, quia eo in casu nullum est fundamentum judicandi, quòd praxis, de quâ agitur ab Ecclesiâ fuerit instituta. Eo argumento utuntur theologi, ut quadragesimale jejunium in Apostolicam institutionem refundant.

Confirmatur ea regula ex Augustino, qui lib. 4. de Baptismo contra Donatistas cap. 24. sic loquitur: *Quod universa tenet Ecclesia, nec Conciliis institutum, sed semper retentum est, non nisi auctoritate Apostolicâ traditum rectissime creditur.*

Idem hisce verbis docet epist. 118. *Illam autem, quę non scripta, sed tradita custodimus, quę quidem toto terrarum orbe observantur, dantur intelligi, vel ab ipsis Apostolis, vel plenariis Conciliis, quorum est in Ecclesiis saluberrima auctoritas, commendata, atque statuta retineri, sicuti quòd Domini passio, & resurrectio, & ascensio in cælum, & adventus de cælo Spiritus Sancti anniversariâ solemnitate celebrantur; & si quid aliud tale occurrerit, quod servatur ab universa quacumque se diffundit Ecclesia.*

Quæres, quid facto opus sit, cum in aliquibus Ecclesiis, alicujus dogmatis traditio non reperitur, quę tamen reperitur in aliis.

Resp. Irenæum & Tertullianum occurrisse illi

illi quæstioni ; nempè ajunt, eo in casu judicandum esse, eam traditionem esse divinam, quæ reperitur in præcipuis, & Apostolicis Ecclesiis, in quibus interrupta non fuit Episcoporum successio.

Irenæus lib. 3. adversus hæreses cap. 2. asserit, hæreticos impugnari posse, vel scripturâ, vel traditione, quæ in Ecclesiis Apostolicis servatur: Cum, inquit, ad eam iterum traditionem, quæ est ab Apostolis, quæ per successionem presbyterorum in Ecclesiis custoditur, provocamus eos.

Ejusdem lib. cap. 3. scribit, eam traditionem eminere in Ecclesiis, quas Apostoli fundarunt, & in quibus Episcoporum series interrupta non fuit: Traditionem itaque Apostolorum, inquit, in toto mundo manifestatam, in Ecclesia adest perspicere omnibus; qui vera velint audire, & habemus numerare eos, qui ab Apostolis instituti sunt Episcopi in Ecclesiis, & successores eorum usque ad nos, qui nihil tale docuerunt, neque cognoverunt, quale ab his deliratur. Porro inter eas Apostolicas Ecclesias, in quibus conservata est traditio, docet Romanam Ecclesiam tenere principem locum: In qua, ait, semper ab his, qui sunt undique, conservata est ea, quæ est ab Apostolis traditio. Ubi idem author omnes Episcopos Romanos ad sua usque tempora recensuit, hæc habet: Hæc ordinatione, & successionem, ea quæ est ab Apostolis in Ecclesiâ traditio, & veritatis præconizatio, pervenit usque ad nos.

Tertullianus libro de Præscriptionibus, dubitanti, an aliquod dogma divinitus per Apostolos traditum sit, jubet, ut consulat Ecclesias matricem, quas Apostoli fundarunt, credatq; quod ab eis credi perspexerit: Quid prædicaverint Apostoli, quid illis Christus revelaverit, & hic præscribam, non aliter probari debere, nisi per easdem Ecclesias, quas ipsi Apostoli condiderunt, ipsi eis prædicando, tam vivâ voce, quam per epistolas postea. Si hæc ita sunt, constat proinde, omnem doctrinam,

nam, quæ cum illis Ecclesiis Apostolicis, matricibus & originalibus fidei conspiret, veritati deputandam, id sine dubio tenentem, quod Ecclesia ab Apostolis, Apostoli à Christo, Christus à Deo suscepit: reliquam verò omnem doctrinam de mendacio præjudicandam, quæ sapiat contra veritatem Ecclesiarum, & Apostolorum, & Christi.

Posteà laudatus scriptor singulares recitat Ecclesias Apostolicas de doctrinâ fidei, de traditione percontandas. Laudat Corinthum, Philippos, Thessalonicam, Ephesum, Romam præ cæteris, de quâ hæc habet: *Videamus, quid didicerit, quid docuerit, cum Africanis quoque Ecclesiis contestetur.*

Q U Æ S T I O III.

De Conciliis.

Not. **M**ethodi causâ hancce de Conciliis questionem partiemur in duo capita; in priore dicemus de conciliis in genere; in altero verò nonnulla dicemus de singulis conciliis generalibus in specie.

C A P U T P R I M U M.

De Conciliis in genere.

Not. I. **R**ecte observat Bellarminus, Concilii nomine, idem in Ecclesiâ significari, quod in regnis nomine comitiorum significatur; unde quemadmodum regni comitia nihil aliud sunt, quàm principum, procerum, magistratuum in unum locum congregatio; ut de rebus ad regnum spectantibus tractent: ita Ecclesiæ concilia nihil aliud sunt, quàm Ecclesiæ præsum

lum conventus, ut de rebus ad Ecclesiam spectantibus agant.

Not. 2. Conciliorum quatuor sunt genera : quædam enim sunt generalia , quædam nationalia , quædam provincialia, & quædam diœcesana . Generalia sunt, ad quæ congregantur totius orbis Episcopi : nationalia, ad quæ conveniunt unius, aut regni, aut nationis, præfules : provincialia, in quibus sub metropolitano reperiuntur unius tantum provinciæ Episcopi : diœcesana denique, in quibus sunt sub Episcopo unius Episcopatus presbyteri .

Not. 3. Inter concilia tum generalia , tum nationalia, tum provincialia, nonnulla sunt legitima, hoc est, quibus nihil deest ex iis, quæ ad verum concilium requiruntur ; alia non legitima, quibus nimirum deest aliqua ex conditionibus, quæ requiruntur ad legitimum concilium, convocatio v.gr. libertas, & ita de cæteris, quas suo loco recensebimus .

Not. 4. De conciliis sic definitis, ac divisis quæri potest : 1. ad quem spectet eorum convocatio : 2. quinam sint ad ea convocandi : 3. cujusnam sit eis præsidere : 4. cujus sint autoritatis : 5. denique, utrum concilia sint ecclesiæ necessaria .

A R T I C U L U S I.

Ad quem spectet conciliorum convocatio.

Not. 1. **Q**Uæ hîc proponitur quæstio, intelligi potest, aut de facto, aut de jure ; seu, aut de iis, qui convocarunt concilia, aut de iis, ad quos jus illud spectat .

Not. 2. Recentiores Hæretici , Lutherus nimirum libro de Conciliis , Calvinus lib. 4. Institut. Centuriatores Magdeburgenses centuriâ 4. contendunt, jus convocandi concilia non esse pe-

nēs Ecclesiam sumptam pro animarum Pastoribus, sed prout Imperatores, Reges, & Magistratus complectitur. Unde concludunt, Imperatoris esse convocare Concilia Generalia, regum nationalia, magistratum ea, quæ in subiectis sibi regionibus celebrantur.

Npt. 3. Ex suppositione, quòd, ut docent Catholici, sit penès solam Ecclesiam, prout viros Ecclesiasticos complectitur, convocare Concilia, difficultas potest esse, an illud jus pertineat ad solum Summum Pontificem, an aliquo saltem in casu ad S. Romanæ Ecclesiæ Cardinales, an ad Concilium legitimè coactum, seu, an Episcopi omnes ad Concilium coacti, aliud Concilium indicare, & convocare possunt.

CONCLUSIO 1. Concilia, quæ tribus prioribus sæculis habita sunt, convocata fuerunt ab Ecclesiâ, prout solos animarum Pastores complectitur.

Probatur. *Primò*, ubi ortum fuit dubium, an gentes ad fidem conversæ circumcisionis, aliorumque legalium rituum observatione tenerentur, non à viris laicis, sed ab Apostolicis indicta fuit synodus, in quâ id expenderetur: *Convenerunt*, ait Lucas Act. 15. *Apostoli & seniores videre de verbo hoc*; coegerunt pariter Concilium, in quo actum est de septem Diaconorum electione: *Convocantes duodecim multitudinem discipulorum*, ait Lucas Act. 6.

Secundò. Scribit Eusebius hist. lib. 5. cap. 16. plures in Asiâ habitas fuisse synodos contra Montanistas, ab Episcopis, non autem à viris laicis coactas. Idem asserit, eodem lib. cap. 23. ubi agit de controversiâ Paschæ: *Synodi ob id*, inquit, *cætusque Episcoporum convenere*. Lib. 6. cap. 43. refert Romanæ synodi decretum adversus Novatum, aitq; eam ex Episcopis, ac reliquo Clero coaluisse, non ab alio, haud dubiè, quàm à Cornelio convocatis: *Cum Romæ synodus congregata esset, in qua sexaginta quidem Episcopi, &c.*

Idem

Idem videre est in Conciliis, quæ tum in Oriente, tum in Africâ in causâ baptismi ab hæreticis dati tertio sæculo celebrata sunt: ea nimirum non ab hominibus laicis, sed solum à viris ecclesiasticis & coacta & celebrata sunt. Idem quoque patet in causâ Pauli Samosateni: *Reliqui ecclesiarum pastores undique acciti*, inquit idem Eusebius hist. lib. 4. cap. 27. *simul omnes Anthiochiam convenerunt, tanquam ad gregis Dominici vastatorem.*

Quæres, quomodo tribus prioribus sæculis ecclesiarum pastores ad synodum vocarentur.

Resp. 1. episcopos fuisse vocatos à Metropolitanis, Primatibus, Patriarchis: *Possent*, inquit Polycrates, ad Victorem Papam scribens, apud Eusebium hist. lib. 4. cap. 24. *episcoporum qui mecum sunt, facere mentionem, quos petiistis, ut convocarem, sicut & feci.*

Resp. 2. eos qui diversæ erant provinciæ, fuisse invitatos, non jussos, ut ad concilium venirent: sic humiliter ab Episcopis Palæstinæ rogatus fuit Dionysius Alexandrinus Patriarcha, ut veniret ad synodum, quæ adversus Novatum erat habenda: *Scribit Dionysius ad Cornelium Romanæ urbis episcopum*, inquit Eusebius hist. lib. 6. cap. 46. *se ab Heleno Tarşi Ciliciæ episcopo, & à cæteris qui cum illo convenerant episcopis, invitatum fuisse, ut ad synodum Antiochenam occurreret, in qua quidam Novati schisma confirmare tentabant.* Idem Eusebius utitur precum nomine, cum ait, vocatum fuisse eundem Dionysium ad concilium Antiochenum, quod adversus Paulum Samosatenum celebratum est: *Dionysius Alexandrinæ ecclesiæ episcopus*, ait cap. 2. *rogatus, ut ad concilium veniret, adventum quidem suum distulit, &c.*

Resp. 3. episcopos prioribus illis sæculis nunquam habuisse concilia, ubi fortè & ex improviso aliquem in locum, nemine vocante, convenissent: censebant nimirum, se ubivis & quæ-

cumque de causâ essent congregati, posse ferre decreta, quibus suarum Ecclesiarum fidei, & disciplinæ consulerent.

CONCLUSIO 2. Imperatores Christiani convocarunt octo priora concilia generalia.

Probatur. Constantinum Magnum Nicænam primam synodum convocasse, scribit Eusebius hisce verbis lib. 3. de vitâ Constantini: *Deinceps igitur Concilium generale tanquam quendam Dei exercitum instruens, in unum locum coegit, & Episcopos undique per litteras honorificè scriptas, ut eò maturarent, accivit.*

Socrates hist. lib. 5. cap. 8. testatur, alteram synodum generalem, primam nimirum Constantinopolitanam, à Theodosio Seniore coactam fuisse: *Imperator, inquit, nullâ morâ interpositâ Concilium Episcoporum, ipsius fidem amplectentium, convocat, quo fides Concilii Nicæni corroboraretur.*

Evagrius hist. lib. 6. cap. 3. conceptis terminis asserit, tertium concilium generale, Ephesium nempè, celebratum fuisse ex nutu, & mandato Theodosii Junioris: *Nestorius, inquit, neque Cyrillo, neque Cælestini antiquæ Romæ Episcopi consiliis obsecundavit, sed suum ipsius virus nihil veritus evomuit in ecclesiam, postulavitque, ut autoritate, ac nutu Theodosii junioris, qui tum Orientis administravit imperium, primum Concilium Ephesi cogeretur.*

Parte secundâ Concilii Chalcedonensis, quæ quidem est quarta generalis synodus, actione 1. hæc habentur: *In nomine Domini nostri Iesu Christi in Chalcedonensi civitate facta est synodus ex decreto piissimorum, & fidelissimorum Imperatorum Valentiniani & Marciani.* Indixerunt ergo, ac convocarunt quartam generalem synodum Valentinianus & Marcianus Imperatores.

Concilium Constantinopolitanum secundum, quod quintum generale dicitur, Justinianus Imperator coegit, ut patet ex illius epistolâ ad Epi-

Episcopos Constantinopoli confidentes , quæ quidem ejusdem Concilii collatione i. legitur .

Patres tertii Concilii Constantinopolitani , quod sextum est œcumenicum , actione i. clare profitentur, se ad concilium vocatos esse imperatorum litteris: *Conveniente quoque sanctâ & universalis synodo , quæ secundum imperialem sanctionem congregata est in hac à Deo conservandâ regiâ urbe .*

Nicænum II. Concilium , quod est septimum generale , convocatum fuisse à Constantino & Irene Augustis, fidem facit eorundem Augustorum epistola ad Hadrianum Papam : *Vnde , inquit , nunc constanter cum mundo corde , & vero cultu , quæ ad Deum pertinent , unâ cum omnibus subditis nostris , & his sacerdotibus doctissimis locuti sumus , & cum consilio decrevimus , ut fieret universale concilium , & rogamus vestram paternam beatitudinem , ut det seipsam , & nullam tarditatem faciat , & ascendat huc instabilitatem , & firmitatem antiquæ traditionis super venerabilibus imaginibus .*

Quartam Constantinopolitanam synodum , quæ octava est œcumenica, convocatam fuisse ab Imperatore Basilio , colligitur ex ejusdem synodi actione primâ , ubi hæc leguntur : *Obsequente divinæ voluntati , ac decreto , Basilio Dei amicissimo Imperatore nostro , qui universalem synodum congregavit .*

CONCLUSIO 3. Romani Pontifices convocarunt omnia concilia generalia , quæ post octavum generale celebrata sunt .

Probatum enumeratione. Lateranense primum, quod nonum est generale concilium, indixit Calixtus Papa II. *Rogamus (inquit laudatus Papa in epistolâ ad Henricum Imperatorem) ut quia concilium indictum à nobis accelerat , citò eos , legatos nostros , ad nos Domino largiente remittas .*

Alterum Concilium Lateranense, quod decimum est œcumenicum, Romæ coegit Innocen-

tius Papa II. *Universalis ecclesiæ principale concilium* (inquit Acta ejusdem concilii) *Romæ aggregat , ut in ipso imminentes ecclesiæ necessitates decenter disponat .*

Lateranense tertium concilium sub Alexandro Papa III. quodque dicitur œcumenicum undecimum , idem Papa coegit , ut patet ex ejusdem epistolâ ad episcopos per Tusciam constitutos : *Quocirca per apostolica vobis scripta mandamus , qualiter huic nostræ dispositioni plenius desideriis cooperari curetis , & prima dominica advenientis quadragesimæ , ad urbem Romam , ducente Domino , venistis .*

Lateranense quartum concilium congregavit Innocentius Papa III. id nimirum testantur ejusdem Papæ epistolæ plures eidem concilio præfixæ , quibus totius orbis episcopos ad illud vocat : *Nullus* (inquit , scribens ad prælatos Viennensis provincie) *se fallaciter excusando ab executione tam sancti operis subtrahat .*

Concilium Lugdunense primum coegit Innocentius Papa IV. Id testantur datæ ab ipso epistolæ ad Archiepiscopum Senonensem , ad capitulum Senonense , ad Francorum regem , ad episcopum Ostiensem : præmittuntur verò illæ epistolæ ejusdem concilii actis .

Alterum Lugdunense generale concilium indixit Gregorius Papa X. ut patet ex illius epistolâ ad Patriarcham Hierosolymitanum , & ex alterâ ad Michaellem Paleologum Græcorum Imperatorem , nec non ex tertiâ ad Josephum Græcorum Patriarcham : habentur autem ad ejusdem concilii caput .

Concilium Vienneſe convocatum fuisse à Clemente Papâ V. probant epistolæ illi præfixæ , quibus episcopos , ipsum etiam Philip-pum Francorum regem , ad concilium vocat .

Concilium Constantiense coegit Joannes Papa XXIII. Id testatur ejusdem Papæ Bulla convoca-

vocationis, quæ in eodem concilio sess.1. lecta fuit.

Martinus Papa V. convocavit Concilium Basileense; siquidem sess.1. ejusdem concilii extat diploma, quo laudatus Pontifex synodum indicit ad civitatem Papiensem: *Nuper, inquit, siquidem cupientes generale concilium juxta deliberationem & ordinationem sanctæ synodi Constantiensis ad deputationem loci colim, eadem approbante synodo, per nos factam in civitate Papiensi auctore Domino celebrari, &c.* Continet idem diploma facultatem factam Sedis Apostolicæ legatis aliò, si expedire judicarent, concilium transferendi; immediatè post legitur decretum translationis in Civitatem Basileensem, ab iisdem legatis editum.

Concilium Florentinum Eugenius Papa IV. primùm Ferrariæ celebrandum indixit, ac post annum, grassante in urbe Ferrariâ peste, Florentiam transtulit: duo eâ de re Eugenii Papæ decreta extant; priusquidem primâ parte laudati Concilii, alterum secundâ parte. Et in hoc Eugenius confirmavit Concilium Basileense, cujus sanior pars sessione 36. decretum ediderat de transferendo Concilio Ferrariam, aut Utinum, aut in alium locum Summo Pontifici & Græcis accommodum, quamquam (ut inferiùs dicetur) alia pars, præsidente Cardinale Arelatensi, eodem die, eodemque in loco decrevisset, Concilium, aut Avenionem, aut in Sabaudiam transferri debere.

Ad caput Concilii Tridentini extat Bulla de ejusdem Concilii convocatione, edita à Paulo Papâ III.

Ex iis omnibus patet, certum esse omnes synodos, quæ generales sunt, hoc est, quæ pro generalibus à totâ Ecclesiâ recipiuntur, à Romanis Pontificibus post nonum sæculum fuisse convocatas.

CONCLUSIO 3. Stricto jure solius est Ec-

clesiæ, prout animarum pastores complectitur, synodos convocare.

Probatur. Illud stricto jure solius est Ecclesiæ, prout animarum pastores complectitur, quod ex se refertur ad spirituale regimen animarum: atqui convocatio Conciliorum ex se refertur ad spirituale regimen animarum; nempè non ob aliud congregantur Concilia, quàm ut tradantur fidei, vel morum regulæ, aut quædam disciplinæ capita præscribantur.

Confirmatur argumentum ex eo, quòd Ecclesiastica negotia, ut est Conciliorum convocatio, ad viros Ecclesiasticos tantùm stricto jure pertineant: *Ne te misceas Ecclesiasticis negotiis* (inquit apud Athanasium in epistolâ ad Solitarios, Osusad Constantium Imperatorem scribens) *nequenobis in hoc genere præcipe, sed potius ea à nobis disce; & quemadmodum, qui tuum imperium carpit, contradicit ordinationi divinæ; ita & tu care, ne quæ sunt ecclesiæ, ad te trahens, magno crimini obnoxius fias.*

Ad se minimè pertinere ecclesiastica negotia, inter laicos præcipui, Imperatores nimirum, confessi sunt. Petentibus Episcopis facultatem cogendæ synodi apud Sozomenum lib. 6. cap. 7. respondit Valentinianus Imperator; *sibi qui à laicorum numero erat, non licere se ejusmodi negotiis interponere; & ideo sacerdotes & Episcopi, inquit, quibus hæc curæ sunt, seorsum per se, ubicumque ipsis libitum fuerit, in unum conveniant.*

Objicies. Illud stricto jure non pertinet ad solam Ecclesiam, prout animarum pastores complectitur, quod per plura sæcula præstitum est ab Imperatoribus: atqui (ut patet ex hujusce paragraphi conclusione 2.) Imperatores per plura sæcula convocarunt synodos: ergo, &c.

Confirmatur argumentum ex eo, quòd iis sæculis, nec Episcopi, nec Romanus Pontifex, arguerint Imperatores, quòd jus Ecclesiasticis proprium

prium eo in capite sibi arrogarent; imò Imperatoribus ad Concilia vocantibus morem gessere: ergo, &c.

Resp. neg. maj. Nam plerumque Imperatores synodos convocarunt ex Episcoporum, aut consilio, aut petitione; ac proindè, non tam in earum convocatione elucebat principum, quàm viro- rum ecclesiasticorum potestas. De Nicænâ id apertis verbis asserit Ruffinus lib. i. cap. i. seu, scribit, eam ab Imperatore, ex *sententiâ sacerdotum*, convocatam fuisse. Post Ephesinum prædatorium concilium opus fuit alio: sine morâ Leo Magnus author fuit Theodosio, ut in Italiâ haberetur, non autem Ephesi, sicut priùs: *Si pietas vestra (inquit epistolâ 12.) suggestioni, ac supplicationi nostræ dignetur annuere, ut intra Italiam habere jubetis episcopale concilium, citò auxiliante Deo poterunt omnia scandala, quæ in turbatione totius Ecclesiæ sunt commota, refecari.* Præterea facta diligenter à jure distinguenda sunt: nec enim sequitur ei jus in rem aliquam competere, qui eâ vindicavit sibi.

Ad argumenti verò confirmationem, dicendū est, ecclesiam varias ob causas passam fuisse, imò petiisse, ut Imperatores octo priora concilia œcumenica convocarent. Iis nimirum sæculis vige- bat adhuc lex civilis, quâ vetitum erat, ne fierent hominum, cujuscumque essent conditionis, ac statûs, collegia ac conventus sine Imperato- rum autoritate. Tunc pauper ecclesia vix suis sumptibus potuisset in generalem synodum con- venire: ferebat ergo, ut Imperatores convocarent concilia, quòd Episcopis vehicula & alimenta præberent.

Instabis. Si jus convocandi concilia ad impe- ratores non spectasset, octo priora, quæ ab illis de facto convocata sunt, non concilia, sed conciliabula extitissent; defuisset quippè conditio es- sentialis legitimo concilio, nimirum facta ab ec- clesiasticis viris convocatio: sed hoc est absur- dum: ergo, &c.

K 5 Resp.

Resp. neg. maj. Ratio est 1. quia, ut dictum est, convocata fuerunt ab imperatoribus ex Ecclesiæ consilio. 2. Episcopi ad illa concilia coacti suo facto declararunt, se consentire in imperatoriam convocationem. 3. Confirmata est à Romanis Pontificibus ea convocatio: nam ad synodos ab imperatoribus coactas miserunt legatos, qui eis suo nomine præsiderent; acceptarunt ipsi postea cum reliquis terrarum Episcopis editas in illis Conciliis fidei definitiones.

CONCLUSIO 5. Diocesanae synodi convocari debent ab ordinario loci, provinciales à metropolitans, nationales à primatibus.

Probatur tum ex constanti Ecclesiæ praxi, tum ex eo quod solus Ordinarius loci habeat jurisdictionem immediatam in clerum suæ diocesis, Metropolitanus in Episcopos provinciae Ecclesiasticae cui præficitur, Primas in totam nationem: tum denique ex Augustino Epistolâ 217. quæ est ad Victorinum de primatu cum Xantippo Episcopo Tagastensi contendentem: *Vt inter tuam sanctimoniam, & senem Xantippum concorditer constet, quis vestrum debeat convocare concilium.*

Quæres, quid facto sit opus in regnis, ubi primates non sunt in usu sui primatus, ut in Hispaniâ, in Germaniâ, in Italiâ ac totâ Europâ, unâ exceptâ Ecclesiâ Lugdunensi, quæ primatu suo fruitur in plures Galliarum provincias Ecclesiasticas.

Resp. eo in casu Concilium nationale convocari debere à singulis metropolitans. Eo modo singulis quinquenniis Episcopi in Galliis ad Comitia generalia conveniunt; unde mirum non est, quod non solis Ecclesiæ temporalibus bonis consulant, sed malis etiam spiritualibus medeantur.

CONCLUSIO 6. Jure divino, Romano Pontifici, & non alteri Episcopo, convenit autoritas ordinaria convocandi concilia generalia.

Pro-

Probatur . Illius solùm est congregare concilia œcumenica , qui potest singulis totius orbis Episcopis præcipere, ut ad Concilium conveniant; qui enim conventum, cœtum , congregationem jure indicit, non precibus , non invitatione tantùm, sed præcepto utitur ; ut patet ex diplomatis convocationum, quæ hucusque aut ab imperatoribus, aut ab Ecclesiarum pastoribus factæ sunt . Atqui solus Romanus Pontifex potest singulis totius orbis Episcopis præcipere, ut ad Concilium conveniant; nempè ipse solus omnium orbis Episcoporum Episcopus est , & pastor: *Isti sunt, Roma, inquit Leo Magnus sermone in natali Apost. Petri & Pauli, qui te ad hanc gloriam provexerunt, ut per sacram beati Petri Sedem caput orbis effecta, latius præsideres religione divinâ, quàm dominatione terrenâ. Quamvis enim multis evecta victoriis, ius imperii tui terrâ marique profuderis; minùs tamen est quod tibi bellicus labor subdidit, quàm quod pax Christiana subjecit. Imperatores verò aliquibus tantùm orbis Provinciis imperarunt antiquitùs, & nunc etiam imperant.*

Probatur 2. Ex iis, quæ hujusce paragraphi conclusione 2. dicta sunt , constat, nemine contradicente , imò consentientibus omnibus Catholicis, tum clericis, tum laicis, Romanos Pontifices indixisse, ac convocavisse omnia Concilia œcumenica, quæ post octavũ sæculum celebrata sunt: ergo omnibus tum clericis, tum laicis , qui iis sæculis vivere, persuasum fuit, penès Pontifices Romanos esse jus, de quo agitur ; alioquin enim nonnulli aut ex clericis, aut ex laicis, præsertim Principes , ejusmodi convocationi obstitissent, cum primùm ab episcopis Romanis tentatam advertissent .

Confirmatur argumentum ex Græcorum etiam consensu. Nempè interfuerunt Lugdunensi concilio , quod indictum fuerat à Gregorio Pap^a X. interfuerunt etiam Florentino , quod ab Eugenio

IV. convocatum fuerat. Nonnihil quidem eo in concilio disputatum est de jure, de quo agitur; volebant enim Græci, ut Papa absque imperatore non posset convocare synodos: *Admisimus, inquit actione 25. privilegia Papæ, præterquam duo, ne convocet synodum absque imperatore, & Patriarchis, si veniant; quod si advocentur, & non veniant, ne propterea impedimento sint, quominus synodus fiat.* Igitur ipsi Græci ultrò in summo Pontifice agnoverunt potestatem convocandi concilia generalia; exceptio autem quam obtendebant, à Latinis rejecta est; nam Eugenius ibidem respondit: *Authoritatem sibi esse ac facultatem convocandi synodum æcumenicam, ubi opus fuerit, & omnes Patriarchas parere ejus voluntati.*

Probatur 3. Summis Pontificibus semper persuasum fuit, sibi competere jus de quo agitur. Nicolaus Papa I. hæc scribit Epistolâ 38. ad Galliarum Episcopos: *Generale concilium sine Apostolicæ sedis præcepto nulli fas est vocandi.* Antiqui nostrates Episcopi idem jus agnovere: Sic igitur, ait Hincmarus Rhemenfis opusc. 55. cap. 20. *universales synodi specialiter Apostolicæ sedis auctoritate convocantur.*

CONCLUSIO 7. Alteri quàm summo Pontifici aliquibus in casibus competit jus convocandi concilia generalia.

Probatur enumeratione ejusmodi casuum.

Primò. Quando duo contendunt de papatu, nec eorum aliquis est in possessione, tunc jus convocandi Concilium generale est penès Cardinales. Ratio est, quia eo in casu Sedes Romana vacare censetur, ac proinde qui tunc eam moderantur, possunt ac debent sufficere medium, quo illius viduitati consulatur.

Secundò. Cum is qui ex contenditibus est in possessione, non vult generalem synodum convocare, qua lis ejusmodi dirimatur, sibi idem jus est penès Cardinales. Ratio est, quia ubi Ecclesiæ uni-

ver-

versali periculum imminet, nec ei Papa qui est in possessione, vult mederi, vicem illius supplere debent, qui primum ab ipso locum occupant.

Tertiò. Si Papa foret, tanquam persona privata, notorius apostata aut hæreticus, eodem jure fruerentur Cardinales; nec enim Ecclesia posset notorium apostatam aut notorium hæreticū tolerare.

Quartò. Si Papa esset occultè hæreticus, & occultè apostata, tunc requiri quidem deberet, ut congregaret synodum; si verò nollet, ipse tacitè damnaret seipsum: ac proinde meritò augeret pravam, ac fundatam de se ipso suspicionem.

Quintò. Si Papa, etiam maximè catholicus, nollet convocare synodum, alioquin, ut supponitur, Ecclesiæ absolutè necessariam, tunc fieri deberet, quod faciendum hisce verbis innuit Duvalius part. 4. qu. 2. *Si contingeret concilium Oecumenicum Ecclesiæ esse prorsus necessarium, ita ut ejus defectu omnia retro sublapsa ferrentur in Ecclesia, neque induci posset Pontifex, ut illud indiceret, in hoc casu Cardinales possent illud indicare: Qui si etiam nollent, Primates diversorum regnorum possent inter se convenire, & Episcopos sibi subiectos in unum locum convocare; quibus etiam renuentibus, Episcopi ipsi mutuo hortatu, in unum locum, ad Ecclesiæ rebus providendum legitimè inter se convenire possent.*

Quæ dicta sunt de requirendo Pontifice Maximo, ut Concilium convocet, etiam cū agitur de ejus personâ, patent ex patribus tertii Concilii Romani, quod habitum est in causâ Symmachi; nempe contestati sunt se ab ipso Papâ licet impetito debuisse convocari &c. *Memorati Pontifices suggererunt, ipsum qui dicebatur impetitus, debuisse synodum convocare; sed potentissimus princeps Theodoricus, qui Concilium convocarat, ipsum quoque Papam in colligendâ synodo voluntatem suam litteris demonstrasse significavit; unde & ab ejus mansuetudine pagine postulatae sunt, quas ab eodirectas constabat.*

Ex

Ex iis, quæ ad septimæ conclusionis nostræ probationem prolata sunt, facile solvuntur, quæ contra sextam conclusionem ab heterodoxis obijciuntur; neque enim, ut causantur, futurus est aliquando casus, in quo Ecclesia nec fidei, nec moribus, nec disciplinæ, possit consulere; siquidem si Papa in extremis religionis periculis recusaret convocare synodum Oecumenicam, quâ imminenti ipsius malo mederetur, tunc Ecclesia, modo quo dictum est, posset seipsam ad Concilium congregare, & sibi ipsi periclitanti consulere.

ARTICULUS II.

Quinam ad Concilia vocari debeant.

Not. 1. **C** Errum est, ad Concilia vocari debere eos omnes, qui ipsi sunt necessarij tanquam aut iudices, aut consultores, aut defensores, aut actorum exceptores, sive sint clerici, sive sint laici. Difficultas est, quinam in specie tanquam iudices, seu, ad ferendum de rebus propositis definitivum iudicium, vocari debeant.

Not. 2. Hæretici qui elapso proximè sæculo vexarunt Ecclesiam, docuerunt, quemque fidelem, sive sit clericus, sive sit laicus, vocari debere ad concilium, ac habere jus ferendi vim suffragij, seu, iudicii definitivi: ita Lutherus in suo de conciliis libro; ita etiam censent Magdeburgenses Centur. 1. lib. 2. cap. 2.

Not. 3. Catholici è contra docent, solos Episcopos habere in Conciliis, tum Provincialibus, tum generalibus, jus ferendi iudicium decisivum; idque ex institutione divinâ, seu vi characteris Episcopalis, quo insigniti sunt. Addunt, idem jus, sed ex privilegio, hoc est, ex Ecclesiæ concessione, convenire Cardinalibus, Abbatibus & Ordinum generalibus præpositis.

CON-

CONCLUSIO 1. Homines laici non habent in conciliis jus suffragii decisivi.

Probatur 1. ex scripturâ. Concilium quod Actorum 15. celebratum est ab Apostolis, exemplar est, ad quod cætera omnia Ecclesiæ Concilia exigi debent: atqui in eo Concilio homines laici non habuerunt jus suffragii decisivi. In eo nimirum, factâ tum per Apostolos, tum per seniores disquisitione; soli Apostoli sententiam definitivam protulerunt; soli enim Petrus, Paulus, Barnabas, & Jacobus post factam disquisitionem loquentes inducuntur: è contra altum silentium tenuerunt homines laici: *Conveneruntque*, ait Lucas, *Apostoli & seniores videre de verbo hoc: cum autem magna conquisitio fieret, surgens Petrus, dixit ad eos: Viri fratres ... Tacuit autem omnis multitudo, & audiebant Barnabam, & Paulum narrantes Et postquam tacuerunt, respondit Iacobus.*

Dices. Seniores primò vocati sunt cum Apostolis ad Concilium: *Conveneruntque Apostoli, & Seniores videre de verbo hoc*. 2. Simul cum Apostolis expenderunt quæstionem, de quâ agebatur; non enim minùs ipsis quàm Apostolis Lucas illius disquisitionem tribuit: *Cum autem magna conquisitio fieret*. 3. Seniorum nomine scripta est Epistola synodica Concilii: *Apostoli & Seniores fratres his qui sunt Antiochiæ, & Syriæ, & Ciliciæ, fratribus salutem*. 4. Non minùs Senioribus quàm Apostolis adscribitur definitivum de controversiâ judicium: *Visum est enim Spiritui sancto, & nobis, nihil ultra imponere vobis oneris, quàm hæc necessaria*. Atqui Seniores illi erant homines laici; neque enim Lucas ait quòd clero adscripti essent: ergo in priore Ecclesiæ Concilio viri laici habuerunt jus suffragii decisivi.

Resp. concessâ maj. neg. min. Ratio est, quia vox illa *Senior* idem est, ac alia Græca *Presbyteros*, Græca verò vox *Presbyteros*, licèt in antiquo

quo testamento nonnunquam sumatur pro senioribus ætate; tamen in novo nusquam sumitur, nisi pro senioribus dignitate & ordine; unde dicendum est, seniores, de quibus Lucas Act. 15. loquitur, fuisse aliquos è septuaginta duobus discipulis, quos Apostoli, mortuo Christo, sacerdotes, imò & Episcopos consecraverant.

Confirmatur responsio ex duabus postremis epistolis Joannis. In iis seipsum, licèt Episcopum, ac Apostolum, vocat senioris nomine: *Senior* (inquit in 2.) *Electæ domina: Senior*, ait in 3. *Gaio charissimo*.

Probatur 2. ex traditione, quæ quidem optima est Scripturarum interpret. Illi non habent in conciliis jus suffragii decisivi, qui ab Ecclesiæ exordiis, adhæc usque tempora, nusquam eo jure fructi sunt. Atqui laici ab Ecclesiæ exordiis, adhæc usque tempora, nusquam fructi sunt jure suffragii decisivi; neque enim adversarii proferre possunt concilium in quo laici suffragium, de quo agitur, tulerint; imò laudari possunt concilia, quibus ne adesse quidem illis permissum est: *Mittite foras superfluos* (inquiunt patres Concilii Chalcedonenſis, loquentes de laicis, ac monachis, quos ex Ægypto secum adduxerat Dioscorus) *Concilium Episcoporum est*.

Confirmatur argumentum. Illi non habent jus suffragii decisivi in conciliis, qui non habent jus definiendi, quæ credenda sunt, aut agenda; sed laici jus illud non habent; siquidem definire, quæ credenda sunt, aut agenda, est pascere & docere fidelem populum: atqui laici non possunt fidelem populum pascere, ac docere, juxtà illud ad Ephes. 4. *Alios autem pastores & doctores, &c.* unde Actor. 20. non quibuslibet Christianis, sed tantum Episcopis creditum dicitur Ecclesiæ regimen: *Attendite vobis, & universo gregi, in quo vos Spiritus sanctus posuit Episcopos regere Ecclesiam Dei*.

Objicies 1. Illi habent in conciliis jus suffragii decisivi, ad quos non minùs spectat fides, quàm
ad

ad clericos; sed ad laicos fideles non minùs spectat fides, quàm ad clericos; quippè non minùs tenentur credere, quàm laici.

Confirmatur objectio ex canone, *Vbinam*, dist. 96. in quo sic Nicolaus Papa I. loquitur: *Vbinam legistis, imperatores antecessores vestros, synodalibus conventibus interfuisse, nisi fortè in quibusdam, ubi de fide tractatum est, quæ universalis est, quæ omnium communis, quæ non solum ad clericos, verùm etiam ad laicos, & omnes omninò pertinet Christianos?*

Resp. dist. maj. Si fides ad laicos & clericos eodem modo spectet, conc. maj. Si alio modo, neg. maj. Ad laicos spectat tanquam ad discipulos, ad clericos verò tanquam ad doctores: Unde (ut Bellarminus observat) quemadmodum singuli milites non præcipiunt in bello, in quo causa communis agitur; ita nec in conciliis definire debent quique fideles, licèt in eis causa communis disceptetur.

Ad confirmationem dicendum est, in eo valere Nicolai Papæ argumentum, quòd Imperatores communem causam, tanquam fidei defensores, tueri debeant; non autem tanquam pastores & doctores: unde Theodosius junior in epistolâ ad Ephesinam synodum, sic de seipso loquitur: *Illicitum est eum, qui non sit in ordine sanctissimorum Episcoporum, Ecclesiasticis immisceri tractatibus.*

Objicies 2. Singuli fideles habent jus suffragii decisivi in cœtibus, qui universam Ecclesiam repræsentant: atqui Concilia generalia universâ Ecclesiam repræsentant; ut videre est ad caput Concilii Constantiensis, & Concilii Basileensis.

Resp. neg. maj. Ratio est, quia universa Ecclesia perfectè repræsentatur per clericos, qui illius sunt duces & pastores. Confirmatur ex Cypriano, qui lib. 4. epist. 9. scribit, Ecclesiam esse in Episcopo, seu, eam in Episcopo repræsentari. Confirmatur iterùm ex August. qui lib. 1. de Bapt. cap.

cap. 18. asserit, Concilium plenarium, in quo soli fuerunt Episcopi, esse totius terrarum orbis consensum.

Objicies 3. Nonnunquam Deus idiotis, sed aliundè piis, revelat mysteria, quæ nec Episcopis, nec ipsi etiam Concilio Generali revelat: ergo idiotis ejusmodi tribui debet in Conciliis judicium decisivum. Prætereà aliqui laici, doctiores sunt pluribus Episcopis; ac proindè non minùs, quàm Episcopi, debent in Conciliis habere suffragium.

Resp. ad 1. neg. ant. Nempè in rebus, quæ ad fidem, aut mores spectant, Concilia generalia post diligens examen semper, Deo specialiter adjuvante, certò cognoscunt, quid de iis capitibus Scriptura, aut traditio docuerint; ac proindè, quid de iis, Deus Apostolis revelaverit. Ad 2. conc. ant. neg. conseq. Ratio est, quia, ut quis ferat judicium decisivum, non sufficit doctrina, sed prætereà requiritur jurisdictio; nam ejusmodi suffragium ligat fideles, aut ad credendum, aut ad agendum, quod eo suffragio, aut credi, aut agi debere definitum est.

Ex iis, quæ ad nostræ conclusionis probationem dicta sunt, patet, quàm immeritò Lutherani & Calvinistæ elapso proximè sæculo postularint, ut suæ sectæ laici, quos dicebant doctos, in Concilio Tridentino jus haberent ferendi in rebus fidei & morum suffragium decisivum.

CONCLUSIO 2. Jure divino Episcopi jus habent in Conciliis ferendi suffragium decisivum.

Probatur 1. ex eo, quòd Episcopi ad Concilia generalia coacti, jure divino jurisdictionem habeant in omnes Ecclesias. 2. Episcopi jure divino sunt Pastores & Doctores Ecclesiæ: *Attendite vobis* (inquit Paulus Act. 20.) *& universo gregi, in quo vos Spiritus sanctus posuit Episcopos regere Ecclesiam Dei*. 3. Jure divino illi habent jus ferendi judicium decisivum in Concilio,

lio, qui soli fuerunt iudices in omnibus Conciliis, quæ à Christo usque ad finem sæculi 15. habita sunt: atqui Episcopi in iis Conciliis soli fuerunt iudices; neque enim alii, quàm Episcopi in iis subscripsisse leguntur, quæ tertio Ecclesiæ sæculo habita sunt Romæ in causâ Novatianorum, in Africâ in causâ baptismatis, in Oriente in causâ Montanistarum: nullorum quoque aliorum subscriptum nomen legitur in Conciliis Generalibus, quæ per quindecim priora sæcula, seu in Oriente, seu in Occidente, habita sunt: aut saltem, si quæ Concilia reperiantur, in quibus presbyteri subscripserint, Episcopi hoc addidère: *Ego Episcopus definiens subscripsi*; quod quidem non addiderunt presbyteri.

CONCLUSIO 3. Jure Ecclesiastico aliquibus abhinc sæculis Abbates, ac Generales Ordinum præpositi jus habent in Conciliis suffragii decisivi, licet non sint Episcopi, sed simplices presbyteri.

Probatur. Consuetudo, legis est ecclesiasticæ loco: atqui à tempore Concilii Basileensis fert consuetudo, ut Abbates, ac Generales Ordinum Præpositi habeant in Conciliis suffragium decisivum; nempe eo jure fructi sunt in Conciliis Basileensi, Florentino, Lateranensi sub Leone X. & Tridentino.

Objicies. Abbates, ac Ordinum Generales non habent jurisdictionem in singulas orbis Ecclesias, sed tantum in subjectas sibi Congregationes: ergo in Conciliis habere non possunt suffragium decisivum.

Resp. Abbates, ac Ordinum Præpositos Generales habere in Conciliis generalibus jurisdictionem in singulas orbis Ecclesias, non quidem jure, sed tantum ex privilegio, seu, Ecclesia largitur ipsis jurisdictionem, quam non habent vi sui officii, vi suæ dignitatis.

Quæres 1. Quinam Episcopi possint Conciliis adesse, in iisque ferre decisivum suffragium.

Resp.

Resp. utrumq; posse singulos totius orbis Episcopos, modò non sint excommunicati, licèt sint tantùm titulares. Ratio est, quia singulis Episcopis in solidum, dicente Cypriano, credita est fides, creditæ sunt morum regulæ, creditum est sub Summo Pontifice regimen Ecclesiæ, creditum est officium Pastorale; quod quidem regimen, quod officium, canones restrinxere, quando non celebratur Concilium Generale, ad Ecclesias, quarum Episcopi habent titulum.

Quæres 2. quot Episcopi requirantur ad Concilium generale.

Resp. requiri 1. ut omnes vocentur ad Concilium, itaut convocatio innotescat omnibus majoribus Ecclesiæ provinciis: 2. ut nullus Episcopus, modò non sit excommunicatus, à concilio repellatur: 3. ut aliqui Episcopi ex majori parte provinciarum Christianarum se de facto Concilio præsentent.

Confirmantur eæ responsiones ex eo, quòd Concilium Nicænum primum fuerit Concilium generale, quamvis ipsi adfuerint tantùm tres Episcopi, & duo Presbyteri Occidentales, qui aliorum omnium personam gerebant, quiq; Nicæam detulerunt Occidentalis Ecclesiæ suffragium. In secundo & tertio, seu, in Constantinopolitano I. & in primis sessionibus Ephesini, nulli Occidentales adfuere; sed ea tum Damasus, tum Celestinus, coactò Romæ Episcoporum Occidentalium Concilio, confirmarunt. In Chalcedonenſi nulli fuerunt Occidentales præter Papæ legatos; verè tamen fuit Concilium generale, scilicet ad Patres Chalcedonenſes Leo Magnus miserat consensu Episcoporum Hispaniæ, Galliæ, & Italiæ, qui post celebratas in suis provinciis synodos, ipsum de suarum Ecclesiarum fide certiozem fecerant.

Confirmantur iterum eadem responsiones ex eo, quòd synodi, quæ in Occidente habitæ sunt post nonum sæculum, verè fuerint generales, quamvis perpauca ex Oriente ad eas accesserint,
ut

Differt. IV. *De Locis Theologicis.* 203
ut in Constantiensi, Viennensi, & Tridentinâ videre est.

ARTICULUS III.

Quis debeat præesse Conciliis.

Not. 1. **N**on est hîc quæstio de Conciliis particularibus; nam omnes conveniunt, diœcesanis præesse Episcopum, Provincialibus Metropolitanum, nationalibus Primate, Patriarchalibus Patriarcham; sed quæstio est de Conciliis generalibus.

Not. 2. Lutherani, Calvinistæ, alique elapsi proximè sæculi novatores contenderunt, Imperatorem ordinariè præesse debere in Conciliis generalibus, aut per se, aut per legatos à se missos. Addunt, Concilium debere sibi eligere præsidem, si imperator, nec per se, nec per legatos, ei adesse voluerit. Eo nixi principio, noluerunt se præsentibus sistere Concilio Tridentino; nempè causabantur, Pontificem Romanum non potuisse illius esse præsidem.

Not. 3. E contra Catholici omnes docent, soli Romano Pontifici convenire jus ordinarium præsidendi in Conciliis generalibus. Addita est hæc vox *Ordinarium*, eò quòd (ut superiore paragrapho dictum est) nonnulli sint casus, in quibus sine Romano Pontifice Concilia generalia celebrari possunt, v. gr. cum ex duobus de Papatu contendentibus neuter vult congregare generalem synodum, neuter vult adesse convocatæ.

Not. 4. Præsentia tribus modis sumi potest, vel quoad directionem & suffragium, hoc est, quoad potestatem præscribendi rerum pertractandarum methodum, aut ferendi suffragium; vel quoad firmandum in concilio ordinem, & conciliandam in eo pacem; vel denique quoad locum
ma-

materiam, hoc est, quoad honoratiorem locum Basilicæ, in quâ celebratur.

CONCLUSIO 1. Nulli unquam imperatores legitimæ synodopræfuerunt, quoad directionem & suffragium.

Probatur 1. Nullibi legitur, quòd secundum eam rationem, de quâ agitur, imperatores conciliis præfuerint: 2. contrarium evincitur ex iis, quæ superiore paragrapho dicta sunt: 3. id quoque ex inferiùs dicendis constabit.

CONCLUSIO 2. Imperatores quoad locum materiam, & quoad ordinem & pacem conciliandam præfuerunt plerisque Conciliis Generalibus, quæ per octo priora sæcula apud Orientales celebrata sunt.

Probatur prior pars: *Primò*, ex Eusebio, qui lib. 3. de vitâ Constantini cap. 10. sic loquitur: *Postquam Imperator ad caput subselliorum venit, primus medius stetit, posteaque ante eum humili sellâ ex auro fabrefactâ, non prius assedit, quam Episcopi ei annuissent: idem omnes post imperatorem fecere.* Patet ex iis verbis in Concilio Nicæno 1. Episcoporum subsellia hinc & inde distributa fuisse. Patet iterum, Imperatorem ad eorum caput in medio sedisse. Atqui locus ille medius, est honoratior. 2. In quarto & sexto Concilio Generali Imperatores dicuntur sedisse in summo & altiore loco. 3. In Concilio Florentino Græci contenderunt, Græco Imperatori, qui ipsi aderat, deberi sedem etiam ante Romanum Pontificem, quòd in Conciliis, quæ in Oriente celebrata sunt, semper tum ante ejusdem Pontificis legatos, tum ante omnes Patriarchas eam occupasset: *Lis autem eâ conditione composita est, ut Eugenius Papa IV. primam sedem occuparet ad dextram Altaris, & Imperator ad dextram ingredientium respectu.*

Probatur altera pars. Certum est, Imperatores vero aliquo sensu pluribus Conciliis Generalibus præfuisse. Leo Papa II. hæc scribit ad Im-

Imperatorem Constantinum Pogonatum: *Sancta universalis sexta synodus, quam nutu Dei studiosè vestra clementia convocavit, & cui pro Dei ministerio præsuit.* Actione 8. synodi 7. Irene Imperatrix dicitur cum filio eidem synodo præsuisse. Actione 7. octavæ synodi generalis asseritur, quòd Basilius Imperator ei præsuerit. Sigismundus Romanorum Imperator (ut patet ex actis Concilii Constantiensis) ejusdem Concilii sessioni decimæ quartæ præsuit. Atqui (ut supra dictum est) ea præsidentia non intelligitur de præsidentia quoad directionem, aut quoad jussuffragii: ergo intelligitur, aut de loco materiali (ut jamjam observatum est) aut de ordine stabiliendæ & conciliandæ in Conciliis paci necessario.

Confirmatur argumentum. Primò, Constantinus Magnus, qui (ut observatum est) in Concilio Nicæno I. sedit in honoratiore loco, professus est, se nihil posse in iis, quæ ad internum Ecclesiæ regimen pertinent; sed tantum in iis, quæ spectant ad rerum ab Episcopis definitarum executionem: *Quocirca* (inquit Eusebius lib. 4. de vitâ Constantini cap. 24.) *non absurdè cum Episcopos aliquando convivio exciperet, se quoque Episcopum esse dixit, his ferè verbis usus, nobis præsentibus. Vos quidem, inquit, in his, quæ intra Ecclesiam, ego verò in iis, quæ extra geruntur, Episcopus à Deo sum constitutus.*

Secundò, Theodosius Imperator expressè asserit, se ad Ephesinum Concilium misisse comitem, ut omnia pacificè, & cum ordine in eo gererentur: *Candidianum* (inquit in Sacra ad idem Concilium) *ad vestram synodum abire jussimus, ut Monachos & seculares, qui hujus spectaculi causâ eò nunc confluerunt, vel confluent, ab illa civitate summoveat: prospiciat, ne qua gravior dissensio ex mutuo repugnandi studio coorta, synodi consultationem, & veritatis indagationem obturber.*

Ter-

Tertio, Constantinus Pogonatus, qui, ut observatum est, dicitur præfuisse sextæ generali synodo, non alium sibi in eâ titulum vindicavit, quàm defensoris, & executoris eorum, quæ ab Episcopis statuta fuissent: *Neque* (inquit in suâ ad Gregorium Papam epist. quam idem Gregorius refert in anteaâctis ejusdem synodi) *cum illis, Episcopis, tanquam imperator sededo, aut imperiosè loquar; sed tanquam unus ex illis, & prout statuerint Pontifices, ego exequar.*

Objicies 1. Imperator Theodosius facultatem fecit Dioscoro, ut secundo Concilio Ephesino præfisset: ergo Imperatori persuasum fuit penès Imperatores esse jus præsidere conciliis, aut per seipsos, aut per alios, etiam quoad vim directivam, & quoad jus suffragii. Prob. ant. ex Evagrio, qui hist. lib. 1. cap. 10. hæc habet: *Hujus concilii præses fuit Dioscorus, quò odium in Flavianum incenderetur: Chrysaphius enim, qui tunc præfectus Palatii fuit, hanc rem callidè molitus est.* Idem patet ex Sacrà Theodosii ad Dioscorum.

Resp. concessio ant. dist. consequ. Ergo Imperatori persuasum fuit, ex errore, penès, &c. conc. consequ. ex verâ scientiâ, neg. consequ. Id (ut patet ex mox laudatis Evagrii verbis) Chrysaphius, & alii Eutichetis defensores, callidè imperatori persuaserant, ut Flavianum, à quo damnatus fuerat Eutiches, faciliùs opprimerent.

Objicies 2. Carolus Magnus quoad vim directivam, & jus suffragii, præfuit Concilio Francofordiensi, quod contra Elipandum habitum est; nam fuit illius arbiter, ut ipsemet testatur in suâ ad Elipandum epistolâ, ubi sic loquitur: *Scriptam itaque in epistolâ vestrà hujusmodi precationem invenimus: Poscentes, ut per te arbiter sedeas: ecce ego vestris petitionibus satisfaciens, congregationi sacerdotum auditor, & arbiter adsedes.*

Resp. ad 1. neg. ant. Ad 2. dist. ant. Arbiter fuit

fuit quoad ordinem firmandum, & conciliandam in synodo pacem, conc. ant. quoad jus suffragii, neg. ant. Ratio est, quia Carolus Magnus non aliâ ratione fuit arbiter in Concilio Francofordiensi, quàm in Concilio Ratisponensi, in quo dicitur præfuisse: at in isto Concilio non habuit directionem, ac jus suffragii, ut ostenditur ex Alcuino, qui lib. I. contra Elipandum scribit, in Concilio Ratisponensi, *Eodem glorioso principe præfidente*, Felicem præsentem damnatum fuisse, *synodali auctoritate sacerdotum Christi*.

Objicies 3. Illi præfuerunt Conciliis quoad jus suffragii, qui ea confirmarunt approbante, & consentiente Ecclesiâ: atqui imperatores, approbante & consentiente Ecclesiâ, confirmarunt concilia. Eusebius lib. 3. de vitâ Constantini cap. 17. refert epistolam, quâ laudatus imperator confirmavit Nicænâ synodum: *Planè* (inquit in eâ epistolâ Constantinus) *divinum mandatum suscipite: quidquid enim in sanctis episcoporum conciliis, geritur, id omne referendum est ad divinam voluntatem*. Patres alterius concilii generalis rerum à se in concilio gestarum confirmationem petunt ab Imperatore Theodosio: *Rogamus*, inquit, *tuam clementiam, ut per litteras quoque tuæ pietatis confirmetur concilii decretum*. Idem in actis primi Concilii Ephesini, & in actis tum sextæ, tum septimæ synodi generalis videre est.

Resp. dist. maj. Qui ea confirmarunt quoad vim obligandi in conscientiâ, conc. maj. quoad externam tantum executionem, neg. maj. Principes confirmatione, de quâ agitur, conciliis auctoritatem intrinsecam non conciliarunt, sed externam tantum; seu, effecerunt, ut executioni mandarentur; unde per eam confirmationem exhibuerunt se, non iudices rerum ecclesiasticarum, sed executores decretorum, quæ à conciliis sancita fuerant; *Convenit* (inquit rex Gunthramnus, confirmans alterum Concilium Matisconense) *ut distinguat legalis ultio iudicium, quos*

non corrigit canonica prædicatio sacerdotum.

CONCLUSIO 3. Romani Pontifices, vel per legatos, vel per se, præfuerunt omnibus ferè generalibus conciliis.

Probat. Constat, Romanos Pontifices per se præfuisse omnibus Lateranensibus Conciliis, iis quæ Lugduni habita sunt, ei quod Viennæ sub Clemente Papâ V. celebratum est, Florentino quod habitum est sub Eugenio Papâ IV. per legatos verò, omnibus aliis, quæ in Occidente habita sunt.

Certum est quoque, Romanos Pontifices non præfuisse per se alicui ex conciliis generalibus, quæ celebrata sunt in Oriente; quippè nulli per se adfuerunt: sed facilè demonstrari potest, iis, quæ pro generalibus primùm habita sunt, per suos legatos præfuisse.

Primò. Nicænæ primæ synodo nomine, & vice Sylvestri Papæ, præfuerunt Osius Episcopus Cordubensis, Vitus & Vincentius præbyteri.

De Osiō scribit Athanasius in epistolâ ad Solitarios, quòd Nicæni Concilii princeps fuerit. At quâ ratione id honoris præ Patriarchis Orientalibus habuisset Occidentalis Episcopus, nisi primæ Sedis vices egisset?

Photius libro de septem synodis, Osiō Vitum & Vincentium tanquam Sylvestri legatos adjungit; reverà Vitus & Vincentius ad concilium missos à Sylvestro fuisse, scribit Theodoretus hist. lib. 1. cap. 7. *Episcopus autem Romanus*, inquit, *propter ætatem admodum ingravescentem absuit, verum duos ille misit presbyteros, potestate illis concessâ, actis illius concilii assentiendi.* Socrates id ante scripserat, addens eos Romani Pontificis locum tenuisse: *Urbis verò illius penès quam imperium est*, inquit hist. lib. 1. cap. 5. *Episcopus ingravescente ætate præpeditus absuit, sed ejus presbyteri, qui aderant, ejus locum supplere.* Idem iis, qui postea floruerunt, Episcopis persuasum fuit. Hæc enim habet Hincmarus lib.

55. cap. 20. *Sylvestri tempore*, inquit, *celebrata est sacra Nicæna synodus*, cui ad vicem *Sylvestri præfuerunt Osius Cordubensis Episcopus, Vitus & Vincentius presbyteri urbis Romæ*.

Dices. Multa probare videntur, nec Osum, nec Vitum, nec Vincentium præfuisse Nicænæ primæ synodo. *Primò*, nec Eusebius, nec Socrates, nec Sozomenus, nec Theodoretus id affirmant, quamvis de Oso, Vito & Vincentio locuti fuerint, ut patet ex testimoniis, quæ ex illis laudata sunt. 2. Eusebius primum inter Episcopos Nicænos locum tribuit Eustathio Episcopo Antiocheno: *Episcopus autem* (inquit lib.3. de vitâ Constantini cap. 11.) *qui in dextro ordine primam sedem occupabat*, hoc est, Eustathius, ut Theodoretus asserit, lib.1. hist. cap.7. *perbrevis oratione imperatorem affatus est*.

Resp.ad 1. neg. ant. Nam id dicunt, saltem *implicite*, Socrates & Theodoretus, dum scribunt Vitum & Vincentium supplevisse locum Romani Pontificis.

Ad 2. dicendum videtur, quòd Eustathio Antiocheno, tum propter eximiam sanctitatem, tum propter ætatem, primam à dextro ordine sedem concessa sit; neque enim eam habuit jure suæ sedis; siquidem sedes Alexandrina potior erat Antiochenâ. Vel dicendum est, illum ordinem, in quo sedebat Eustathius, fuisse dextrum respectu ingredientium in aulam, in quâ celebrabatur concilium, non autem respectu imperatoris; ac proindè Eustathium non sedisse in honoratiore loco. Simile quidpiam (ut superius observatum est) in Concilio Florentino inter Eugenium Papam IV. & Græcorum Imperatorem visum est.

Bellarminus censet, extitisse tres ordines sedium in aulâ, in quâ celebratum est Concilium: unum à dextris, alterum à sinistris, & tertium in capite totius aulæ. Et quidem, inquit, in hoc tertio sedebat medius imperator inter Osum, cui proximè assidebant Vitus & Vincentius, & in-

ter Alexandrum Alexandriæ Episcopum. Deindè primus ordinis ejus, qui erat à dextris ingredientium respectu, sedebat Eustathius Episcopus Antiochenus. Alterius autem ordinis, qui erat à sinistris, primus sedebat Macharius Hierosolymorum Episcopus. Verùm, ut ait laudatus Cardinalis, conjecturæ sunt hæc, non autem facta, quæ autoritatibus probari possint.

Secundò. Concilio Ephesino I. quod habitum est contra Nestorium, Cyrillus Episcopus Alexandrinus præfuit nomine Celestini Papæ. Id testatur Evagrius hist. lib. 1. cap. 4. *Cyrillo*, inquit, *locum Celestini Episcopatum antiquæ Romæ gerentis obtinente* : id quoque patet ex epist. Celestini ad Cyrillum : *Quamobrem*, ait, *nostræ sedis autoritate adscitâ, nostrâque vice, & loco cum potestate usus, ejusmodi non absque exquisitâ severitate sententiam exequeris ; nempe ut nisi &c.*

Nec alicujus est momenti, quod respondet Blondellus Calvinista, contendens, Cyrillum in eodem Concilio implevisse vices Episcoporum Africanorum, ut patet ex relatione per Comitem Candidianum missâ ad Imperatorem ; nec inde tamen sequi, quòd tanquam Africanorum legatus Ephesinæ synodo præfuerit.

Non est, inquam, alicujus momenti, tum quia nusquam legitur, ut tamen habetur de Celestino, quòd Episcopi Africani vices suas Cyrillo commiserint ; tum etiam, quia expressè asseritur, Afros adfuisse Concilio, eo sensu, quòd Cyrillo suam sententiam conjunxerint ; tum denique, quia nusquam dicitur, quòd Afri monuerint, hortatique fuerint Cyrillum, ut suo nomine, suâ autoritate, sui throni eminentiâ, Nestorium deponeret : quod tamen dicitur de Celestino.

Tertiò. Leo Magnus præfuit Concilio Chalcedonensi : *In his fratribus* (inquit in epistolâ ad synodum Chalcedonensem) *qui ab Apostolicâ Sede directi sunt, me synodo fraternitas vestra existimet.*

stinet præsidere. Idem videre est in ejusmodi synodi epistolâ ad Leonem : *Quibus* (verba sunt Episcoporum Chalcedonenſium) *tu quidem ſicut membris caput præeras in his, qui tuas vices obibant.*

Confirmatur ex eo, quòd Leonis legati in ſingulis Concilii actionibus primi nominentur, primi ſedeant, primi loquantur, primi ſubſcribant, ipſi de poſitionis ſententiam in Dioſcorum proferât nomine Summi Pontificis, & totius Concilii : *Sanctiſſimus, ac Beatiſſimus Papa,* inquiunt actione 3. *per nos legatos ſuos, ſanctâ ſynodo conſentiente, Episcopali dignitate Dioſcorum nudavit, &c.*

Quartò. Sextæ generali ſynodo præſuiſſe Agathonem Papam per Petrum, & Georgium præbyteros, ac Joannem Diaconum, patet, tum ex eo, quòd in omnibus actionibus primi nominentur, loquantur, ſubſcribant; tum etiam, quòd in ſermone ad imperatorem, qui aderat, laudatæ ſynodi Patres hæc, de ſuâ definitione loquentes, affirmant : *Per Agathonem Petrus loquebatur.* Multa alia ejusdem generis in ejusdem Concilii variis actionibus legere eſt.

Quintò. Nomine Adriani Papæ II. octavæ generali ſynodo præſuerunt Donatus & Stephanus Episcopi, & Marinus Diaconus. Prior hiſce verbis ad Concilii calcem ſubſcripſit : *Ego Donatus Dei gratiâ Episcopus Hoſtiensis, locum obtinens domini mei Adriani uniſverſalis Papæ, huic ſanctæ & uniſverſali ſynodo præſidens, omnia quæ ſuperius leguntur, promulgavi, & manu propriâ ſubſcripſi.*

Quæres, an Papa præſuerit ſecundæ & quintæ ſynodo generali.

Reſp. negativè. Ratio eſt, quia cum habebatur ſecunda, Damasus aliam Romæ coegerat, per quam confirmavit ſecundam. Cum habita eſt quinta, Papa Vigilius Conſtantinopoli quidem aderat, ſed noluit ei adſeſſe, licèt invitatus

fuiſſet, ut illi præſidere dignaretur : *Ideò petimus* (inquit per Eutichium laudati concilii Patres collat. 2.) *præſidente nobis veſtrâ beatitudine ; &c.*

CONCLUSIO 4. Solus Romanus Pontifex jus habet ordinarium præſidendi in conciliis generalibus.

Probatur 1. Ille habet jus ordinarium, de quo agitur, qui præſuit omnibus conciliis generalibus, quæ hætenùs habita ſunt, uno & altero excepto, quæ poſteà ab illo confirmata ſunt : atqui iis reverà præſuit Romanus Pontifex, ut ſuperiori concluſione demonſtratum eſt.

Probatur 2. Ille, & quidem jure divino, habet jus ordinarium præſidendi in conciliis generalibus, qui eſt omnium Episcoporum Paſtor, viſibile totius Eccleſiæ caput, qui à Chriſto primatum habet in totâ eccleſiâ : atqui (ut inferiùs oſtendetur) Romanus Pontifex eſt omnium Episcoporum Paſtor, viſibile totius Eccleſiæ caput, habet à Chriſto primatum in totâ Eccleſiâ : ergo, &c.

Quæres, num legitima forent Concilia Generalia, in quibus Romanus Pontifex, nec per ſe, nec per legatos præſideret.

Reſp. non fore legitima, ſi miſſis à Romano Pontifice legatis præſidentia negaretur. Id patet ex Concilio Ephefino ſecundo, quod quidem præ cæteris cauſis, tanquam latrocinium habitum eſt, quia miſſis à Summo Pontifice legatis præſidentia negata fuerat à Dioſcoro Alexandrino Patriarchâ, qui eam callidè, Chryſaphii operâ, ab Imperatore Theodoſio extorſerat.

Quæ hæretici contra poſtremam hanc noſtram concluſionem ſolent objicere, ſoluta manent ex iis, quæ in defenſionem primæ, ſecundæ, & tertiæ, ſuo loco prolata ſunt.

ARTICULUS IV.

De Conciliorum autoritate.

Not. 1. **E**X iis, quæ hujusce capituli articulo primo dicta sunt, patet, Concilia quadruplicis esse generis, nimirum Diocesana, Provincialia, Nationalia, Generalia.

Not. 2. Lutherus libro de Conciliis, docet nullum prorsus esse Concilium, quod divinæ sit autoritatis: contendit nempe, nullum esse, quantumcumque generale, & à quocumque approbatum supponatur, quod tum in fide, tum in moribus errare non possit. Luthero subscribit Calvinus Institutionum lib. 4. cap. 9. In eam verò sententiam abierunt Lutherus & Calvinus, quòd pleraque ex dogmatibus, quæ propugnabant quæque prætensæ suæ reformationis sunt fundamenta, jampridem à Conciliis Generalibus damnata essent; cernerentque, brevi iterum damnanda in Concilio Tridentino, quod contra hæreticos illos Paulus Papa III. convocarat. E contra Catholici omnes credunt, Concilia Generalia, si legitimè convocata, si ab iis, ad quos spectat, liberè celebrata fuerint, si debitam approbationem habeant, divinæ esse autoritatis; nec id mirum est, inquiunt; ea enim Concilia, nec in fide, nec in moribus errare possunt.

CONCLUSIO I. Nec diocesana, nec provinciales, nec nationales synodi sunt autoritatis divinæ: unde ex iis infallibile pro fide aut moribus argumentum erui non potest.

Probatur. Ex synodi non sunt divinæ autoritatis, quæ tum in fide, tum in moribus errare possunt: atqui synodi, de quibus agitur, errare possunt; siquidem non repræsentant universam Ecclesiam, quæ sola (ut dicetur inferius) infallibilis est, sed repræsentant tantum quasdam par-

ticulares Ecclesias, quæ errare possunt, & nonnunquam de facto errarunt, ut patet in Africanâ, quæ, agente Cypriano, pluribus in Conciliis definiit, irritum esse datum ab hæreticis baptismum.

CONCLUSIO 2. Ex synodis diœcesanis, Provincialibus, & nationalibus, nisi major aliarum Ecclesiarum pars iis repugnet, licet non infallibile, non leve tamen pro fide, & moribus argumentum erui potest.

Probatur conclusio. 1. Quoad synodos diœcesanas, in capite *Ad abolendum, de hæreticis*, Lucius Papa III. decernit, vinculo anathematis verè eos innodari, quos, vel Romana Ecclesia, vel singuli Episcopi per diœceses suas cum concilio clericorum, vel etiam, si oportuerit, vicinorum Episcoporum, hæreticos judicaverint: ergo Lucius III. judicavit, ex synodis diœcesanis non leve pro fide & moribus argumentum sumi posse.

Nec valet, quod nonnulli respondent, eam Lucii Decretalem intelligi de manifestis hæreticis. Nam eodem modo, servatâ tamen debitâ proportionem, loquitur de Ecclesiâ diœcesanâ, ac de Romanâ: *Quos, inquit, vel Ecclesia Romana, vel singuli Episcopi, &c.* Atqui Ecclesiæ Romanæ iudicium non habet locum solum in hæreticis hæresim jam damnatam profitentibus, sed etiam in iis qui dogmata propugnant, quæ tunc primum in eis damnantur.

Probatur iterum conclusio quoad synodos Provinciales. 1. Argumentum quod pro diœcesanis prolatum est, locum habet in Provincialibus. **2.** Non leve eruitur argumentum ex iis synodis quas contingit rarò falli: atqui synodi Provinciales perrarò falluntur; nam ex innumeris ferè quæ à sæculo secundo ad hæc usque tempora celebratæ sunt, iis exceptis quæ rebaptizationem sub Firmiliano & Cypriano probarunt, vix aliquas reperire est, quæ erraverint: etiam quibus pro-

probata fuit rebaptizatio, utcumque excusari possunt, si dicatur, eas non judicasse causam rebaptizationis ad fidem, aut ad mores pertinere, sed ad meram disciplinam, quam quisque salva religione pro diversis regionum consuetudinibus servare, aut non servare posset.

Quod de Conciliis provincialibus mox dictum est, à fortiori locum habet in Conciliis nationalibus, quæ tum diocesana, tum provincialia, aut irrita facere, aut confirmare possunt.

CONCLUSIO 3. Concilia generalia, quibus nullæ desunt requisitæ à Catholicis conditiones, infallibilis sunt autoritatis; unde desumptum ex eis pro fide, aut moribus argumentum, est omninò certum.

Probatur 1. ex his verbis Matth. 18. *Vbi sunt duo, vel tres congregati in nomine meo, ibi sum in medio eorum*; ex eis enim sic conficitur argumentum: Cum duo vel tres autoritate Christi conveniunt in aliquem locum, ab ipsoque veritatis cognitionem petunt, Deus eis largitur ejusdem veritatis cognitionem: ergo à fortiori eam largitur Episcopis ad Concilium generale autoritate Christi coactis.

Confirmatur argumentum 1. ex eo, quòd illud argumentum videatur esse ipsiusmet Christi ratiocinationem. Paulò ante verba, de quibus agitur, Christus dixerat, Ecclesiam sub anathematis pœnâ audiri debere: *Si Ecclesiam non audierit, sit tibi sicut ethnicus, & publicanus*. Nomine autem Ecclesiæ intellexerat pastorum corpus; quippè ad eos tantùm spectant, quæ de audiendâ Ecclesiâ subiiciuntur: *Amen dico vobis, quaecumque alligaveritis super terram, erunt ligata & in cælo, & quaecumque solveritis super terram, erunt soluta & in cælo*. Cum autem quærere potuissent Apostoli, quâ ratione scire possent se adunatos in Concilium semper à Deo recepturos veritatis cognitionem, Christus usus argumento à minori ad majus, respondit, id quod de Ecclesiâ dixerat, re-

vocari non posse in dubium, cum etiam in privatis, bona sibi ad salutem convenientia petentibus, habiturum esset locum illud Evangelii : *Vbi duo, &c.*

Confirmatur 2. ex traditione, quæ (ut suo loco dictum est) regula est certissima ad judicandum, quoniam sit germanus Scripturarum sensus. Concilium Chalcedonense in epistolâ ad Leonem Papam, quæ legitur ad calcem actionis tertie: sexta generalis synodus, actione 17. Celestinus in epistolâ ad Ephesinum I. Concilium verba evangelica : *Vbi duo, &c.* exponunt de Conciliorum infallibilitate in iis, quæ aut ad fidem, aut ad mores pertinent.

Probatur 2. ex his verbis Actorum 15. *Visum est Spiritui sancto & nobis*. Idem ferri debet iudicium de Conciliis generalibus, quæ celebrantur in Ecclesiâ, ac de eo, ad quod Actorum 15. convenerunt Apostoli; tum quia illud Apostolorum Concilium est aliorum omnium forma, ac regula; tum etiam, quia non minùs aliis temporibus, quàm Apostolicis, Ecclesiæ, ut seipsam ab erroribus immunem conservet, opus est Spiritu sancto, à quo veritatem in Conciliis doceatur. Atqui Concilium, ad quod Apostoli convenerunt Actorum 15. divinæ fuit auctoritatis, quippè editam in eo definitionem Scriptura Spiritui Sancto tribuit : *Visum est Spiritui sancto & nobis*.

Probatur 3. Concilia generalia repræsentant totam Ecclesiam. Id siquidem docet Augustinus lib. 1. de Baptis. cap. 18. Docet etiam Martinus Papa V. ad calcem Concilii Constantiensis, ubi jubet, ut ii, qui venerint in hæreseos suspensionem, interrogentur : *An non credant, Concilium generale universam Ecclesiam repræsentare*. Sed (ut dicetur inferiùs) Ecclesia universa errare non potest: ergo nec Concilium generale; proindèque editæ ab eo definitiones sunt divinæ auctoritatis.

Probatur 4. Fideles in iis, in quibus Scri-
ptu-

pturæ sensus est dubius, debent præpositis sibi pastoribus obedire: *Super cathedram Moysis sederunt Scribæ & Pharisei* (inquit Christus Matthæi 23.) *quæcumque dixerint vobis, facite.* Non ex alio capite, quàm quòd auditi non sint legitimi pastores, exortæ sunt hæreses: *Neque enim* (ait Cyprianus lib. 1. epist. 3.) *aliundè hæreses obortæ sunt, aut nata sunt schismata, quàm inde, quòd sacerdoti Dei non obtemperatur.* Ergo audiendi sunt pastores, præsertim in concilio generali nomine totius Ecclesiæ loquentes: ergo tunc errare non possunt; nam alioquin eo etiam in casu fideles non tenerentur eis obedire: quod tamen (ut ex Scripturâ, & Cypriano mox dictum fuit) falsum est omninò.

Probatur 5. Traditione docemur 1. antiqua concilia habuisse pro hæreticis, ac anathemate damnasse eos, qui conciliariter editis fidei definitionibus subscribere noluerant. Docemur 2. concilia iussisse fidelibus, ut id ex animo crederent, quod definierant. Docemur 3. ea tribuisse Spiritui sancto editas à se definitiones. Docemur 4. viros maximè pios & doctos exilia, mortem ipsam passos fuisse pro generalium conciliorum definitionibus. Docemur 5. non debere in conciliis posterioribus iterùm examinari fidei, aut morum definitiones editæ in prioribus generalibus conciliis. Loca quibusea omnia nituntur, non hic laudamus, quòd cuique obvia sint.

Probatur 6. ex absurdis. Si concilia generalia non sint divinæ authoritatis, quisque fidelis, quantumcumq; plebeius sit, antequam Trinitatis consubstantialitatem, incarnationem Verbi, aliaque religionis mysteria credat, tenebitur in examen adducere definitiones, quæ de iis articulis editæ sunt in conciliis generalibus quondam ab Ecclesiâ adversus hæreticos celebratis; ac proindè certò credere debebit, quòd veriùs ac saniùs de Scripturis, in quibus illa mysteria saltem implicite continentur, judicare possit;

quàm Patres, qui à Christo ad hæc usque sæcula vivere : quàm autem id sit absurdum, nemo non videt.

Solvuntur, quæ contra Conciliorum infallibilitatem ex Scriptura, & Patribus objiciuntur.

Objicies 1. Omnes omninò pastores errare possunt; reipsa nimirum errarunt omnes in veteri testamento: *Speculatores ejus*, inquit *Isaias c. 56. cæci omnes, neque quidquam noverunt: omnes cænes muti, nec valent latrare.* Hæc etiam habentur *Jeremiæ 6. A prophetâ usque ad sacerdotem quisquis sectatur mendacium*: atqui concilium generale non est aliud, quàm omnium, aut saltem plurium ex omnibus orbis partibus, Episcoporum cœtus: ergo concilium generale potest errare; ac proindè, quantumcumque legitimum supponatur, non est authoritatis divinæ.

Resp. 1. neg. maj. Ratio est, quia (ut Augustinus lib. de unitate Ecclesiæ cap. 12. observavit) Scriptura solet omnes arguere propter aliquos malos, & è contra nonnunquam omnes commendat propter aliquos bonos: v. gr. Apostolus ad Philippenses cap. 2. scribit: *Omnes quaerunt, quæ sua sunt, non quæ Iesu Christi*; & tamen cap. 1. dixerat, nonnullos ex charitate annuntiare Christi Euangelium.

Resp. 2. dist. maj. Omnes pastores seorsim, ac distributivè sumpti, errare possunt, conc. maj. Collectivè sumpti, aut congregati ad concilium, neg. maj. Ratio disparitatis est, quia Deus cuilibet in individuo pastori non promisit infallibilitatem, quam tamen corpori pastorum, & concilio ex eis constanti pollicitus est: *Vbi sunt duo, vel tres congregati in nomine meo, ibi sum in medio eorum*. De pastoribus priore modo, non autem posteriore, intelligi debent loca, quæ in argumento ex Scripturis laudata sunt.

Objicies 2. Gregorius Nazianzenus in episto-

ſtolâ ad Procopium , ſcribit, ſe nullius concilii vidiffè felicem exitum . Auguſtinus lib.3. contra Maximinum cap. 14. ait, ſe non debere laudare Nicænum Concilium adverſus Maximinum , nec Maximinum poſſe contra ipſum Auguſtinum urgere Concilium Ariminenſe . Idem S. Doctör lib.2. de Baptiſ.c.3. aſſerit, concilia plenaria priora à poſterioribus emendari . Leo Magnus epiſt. 55. ad Pulcheriam , ambitionis ac ſuperbiæ notam inurit Chalcedonenſi Concilio , quamvis illud agnoſcat pro legitimo, & œcumenico . Ex iis verò Patrum locis ſic conficitur argumentum . Ii cœtus non ſunt infallibiles, quorum nullus eſt felix exitus; qui pro abſtruendâ fide laudari non poſſunt; qui nonnunquam à poſterioribus cœtibus emendantur : atqui ejuſmodi ſunt concilia generalia : ergo non ſunt infallibilia .

Reſp. ad 1. loqui Nazianzenum de ſynodis, quæ ſub Conſtantio Imperatore Ariano celebratæ ſunt ; in iis nempè, aut non erat ſuffragiorum libertas, ut in Ariminenſi contigit ; aut non erant generales ſynodi, ut reverà non fuerunt plurimæ, quæ Gregorii Nazianzeni tempore apud Orientales, contradicentibus Epiſcopis Occidentilibus, habitæ ſunt .

Ad 2. dicendum, eſt Auguſtinum argumentari ex ſuppoſitione Maximini , qui contendebat Concilium Nicænum I. non fuiſſe legitimum ; è contra legitimum fuiſſe Ariminenſe , quod quidem (ut infrâ dicetur) ſaltem in ſpecie , Arianis faverat .

Ad 3. dici debet Auguſtinum , nomine *plenariorum Conciliorum* , loco relato intelligere nationalia , non autem œcumenica ; unde multi contendunt, Concilium Arelatenſe I. licèt non ſit œcumenicum, eſſe tamen *plenarium* illud, in quo, ex Auguſtino, cauſa de rebaptizatione , quæ diu Eccleſiam vexarat, finita eſt . Prætereà non in rebus, quæ ad fidem, aut mores pertinent , poſteriora Concilia, de quibus Auguſtinus loquitur,
ſo-

solent emendare priora ; sed tantum in iis , aut quæ sunt facti tantum , aut quæ ad meram disciplinam pertinent . Ratio est , quia Augustinus docet , emendationem , de quâ agit , fieri , quando experimento aliquo aperitur , quod clausum fuerat : id verò locum habet tantum in quæstionibus facti , aut in iis , quæ ad meram disciplinam spectant ; nec enim quæstiones , quæ sunt aut de fide , aut de moribus , novo aliquo experimento aperiuntur .

Solvuntur , quæ obijciuntur ex Concilio Iudæorum adversus Christum .

Objicies . Concilium , in quo Judæi definiunt , Christum non esse Messiam in lege promissum , fuit concilium generale ; quippè constabat ex summo sacerdote , ac præcipuis Iudæorum pastoribus . Illius concilii meminerunt Joannes Evangelii cap. 9 . Marcus cap. 14 . Atqui illud Iudæorum Concilium erravit , & quidem in re , quæ ad fidem spectabat , quæque erat maximi momenti : ergo concilia generalia errare possunt in rebus , quæ ad fidem , aut mores pertinent .

Nec admitti debet eorum solutio , qui respondent , argumentum petatum à Conciliis Iudæorum non valere adversus Concilia Christianorum , eò quòd Deus Conciliis Judaicis non pollicitus fuisset infallibilitatem , quam tamen Christus Christianorum Conciliis promiserit hisce verbis : *Vbi duo , vel tres , &c.*

Non est , inquam , admittenda ea solutio . Nam 1. non minùs in antiquo testamento , quàm in novo , Deus dubitantes de Scripturarum sensu remittit ad pastores , à quibus doceantur : *Si ambiguum , &c. venies ad sacerdotes Levitici generis* . 2. Si Iudæorum generalia concilia non fuissent infallibilia , Judæi certò scire non potuissent , legis , ac Prophetarum libros fuisse Canonicos ;

cos : certò etiam scire non potuissent germanum suarum Scripturarum sensum ; non enim aliâ viâ, quàm per concilia generalia , aut totius synagogæ consensum , Judæi, præsertim plebeji, ac rudiores , illas similesque scientias comparare potuissent.

Resp.1. Concilium , de quo est hîc quæstio , fuisse generale concilium . 2. Fatemur, illud concilium errasse , sed negamus inde sequi , quòd errare potuissent alia concilia generalia , quæ priùs habita fuerant apud Judæos : negamus quoque inde sequi, quòd errare possint ea, quæ apud Christianos celebrantur. Erravit Judæorum Conciliû, de quo agitur, quia habitum est eo tempore , quo Judæorum synagoga desierat esse infallibilis ; nempè Judaicæ synagogæ ad tempus tantùm , hoc est , usque ad adventum Christi , infallibilitas concessa fuerat . Nec id mirum est ; tunc enim synagoga desinere debebat, & dare locum Ecclesiæ Christianæ : tunc, hoc est, tempore quo Ecclesia Christiana cœpit in Christo , Judæis ad judicandum, an Christus esset Messias, necessaria non erat synagogæ infallibilitas ; quisque nimirum privatus certò cognoscere poterat , Jesum Nazarenum esse Messiam in lege promissum , quia id manifestò demonstrabant infinita ac evidentia miracula , quæ Christus in suæ missionis confirmationem operabatur .

*Solvuntur argumenta petita ex Apostolicis, ac
Eliberitanis Canonibus .*

Objicies . In Canonibus, qui dicuntur Apostolici, nonnulli sunt errores ; reprobant scilicet datum ab hæreticis baptisma , tanquam nullum, ac irritum . In Concilio Eliberitano non pauci quoque reperiuntur ; nam vetant, ne quibusdam reis, licèt ex animo pœnitentibus, detur, etiam in ultimo vitæ discrimine , sacramentalis absolutio ; quod quidem Novatianismum redolet. Ve-
tant

tant quoque, ne imagines in parietibus pingantur, contrarium licet usum probet Ecclesia Catholica: ergo errarunt antiquissima etiam Concilia, quamvis fuerint generalia, ut revera fuisse videntur Concilia, in quibus editi sunt Canones, qui dicuntur Apostolici, & ii quos Eliberitanos appellant; quippe tota Ecclesia Orientalis per tria priora secula usa est Canonibus Apostolicis, Eliberitanis verò plures Occidentales Ecclesiarum.

Resp. 1. dato ant. neg. conseq. Ratio est, quia nec Apostolici, nec Eliberitani Canones editi fuerunt in aliquo concilio generali. Apostolici nihil sunt aliud, quam collectio facta ex variis synodis, quæ in Oriente per tria priora secula celebrata sunt; Eliberitani verò collecti sunt ex synodis, quæ prioribus illis seculis habita sunt in Hispaniarum Ecclesiis.

Resp. 2. Ecclesiam Romanam ex Apostolicis Canonibus recepisse solos quinquaginta priores; nec enim ampliorem numerum Dionysius Exiguus retulit in collectionem, quam postea Gelasius Papa probavit. Ille autem Canon, qui rebaptizationem præscribit, non est ex numero illorum quinquaginta; editus videtur in Concilio Synadeni in Phrygiâ sub Firmiliano Stephani Papæ in causâ rebaptizationis adversario.

Resp. 3. Eliberitanos Canones nullum prorsus errorem continere. Negant quidem ii Canones absolutionem reis quibusdam, licet pœnitentibus & in exitu positis; sed ita cautum est (ut in tractatu de Sacramentis dicitur) non quod Eliberitani Patres censerent, Ecclesiam non posse à quibuslibet peccatis absolvere pœnitentes, ut contenderunt Montanistæ & Novatiani; sed sic statutum est disciplinæ causâ, seu, ut à quibusdam gravissimis sceleribus committendis fideles tam gravi pœnâ deterrentur. Canon in quo de imaginibus agitur, non damnat pium illarum cultum, sed tantum vetat, ne pingantur in parietibus;

id

id verò sancitum est, ne Christi, aut illius my-
steriorum imagines, idololatrarum ludibrio ex-
ponerentur; aut saltem, ne quibusdam fide-
libus recentèr ex idololatriâ ad fidem converfis
essent offendiculo.

*Solvitur argumentum petatum ex Ephesino II.
Concilio.*

Objicies. Concilium Ephesinûm II. quod
Dioscoro Alexandrino præside habitum est, er-
ravit; probavit nimirum impium Eutichetis dog-
ma de unâ in Christo naturâ. Illud autem Con-
cilium fuit œcumenicum. Nam 1. convocatum
fuerat ex consensu Romani Pontificis: 2. illi
adfuerunt Sanctæ Sedis Apostolicæ legati: 3. ad
ipsum confluerant omnes Orientis provinciæ.
Ergo Concilia œcumenica errare possunt; proin-
dèque non sunt authoritatis divinæ.

Resp. conc. maj. dist. consequ. Concilia œcu-
menica errare possunt, si in eis libera non sint
Episcoporum suffragia, conc. consequ. Si sint li-
bera, neg. consequ. Quæ in Concilio Ephesino II.
acta sunt, omnia contra ordinem & per vim
facta sunt. *Primò*, enim Dioscorus contra Cano-
nes præsentiam extorserat à Theodosio juniore:
Hujus Concilii (inquit Evagrius hist. lib. 1. cap.
10.) *præses fuerit Dioscorus*; quò odium in Fla-
vianum incenderetur: *Chrysaphius enim, qui tunc*
præfectus Palatii fuit, hanc rem callidè molitus
est. Idem Dioscorus *Secundò*, prohibuit, ne in
Concilio, de quo agitur, Flavianus, qui Eutichen
Constantinopoli damnavat, suffragium ferret.
Tertiò, Episcopi, qui Ephesino II. Concilio sub-
scripserant, asseruerunt postea in Concilio Chal-
cedonensi, se vim esse passos à militibus, qui Ba-
silicam, in quâ celebrabatur Concilium, occupa-
verant. *Quartò*, varias ob alias causas, de quibus
consuli possunt historici, rejectum fuit, ac pro-
scriptum in Concilio Chalcedonensi, in quo om-
nia

224 Instit. Theolog. Prolegomena.
nia secundum ordinem, & secundum Canones
peracta sunt.

*Solvitur argumentum desumptum ex Concilio
Ariminensi.*

Objicies. Concilium Ariminense, quod anno
359. habitum est, fuit concilium generale; tum
quia ipsi aderant sexcenti Episcopi, tum quia
ejus veluti pars erat Concilium Seleuciense,
quod eodem tempore, & propter eandem cau-
sam in Oriente celebrabatur: atqui Concilium
Ariminense erravit. Nam 1. ex symbolo erasit
vocem *Consubstantialis*, quam Nicæna I. sy-
nodus illi contra Arianos inseruerat. 2. Ipsum
errasse, scribit Hieronymus in dialogo adversus
Luciferianos, aitque, per illud Arianismum in-
vectum esse in universum orbem: *Tunc, inquit,
Nicænæ fidei damnatio conclamata est, ingemuit
totus orbis, & Arianum se esse miratus est.* 3.
Non omnibus Episcopis, qui subscripserant
Concilio Ariminensi, conservatæ postea fue-
runt sedes, sed iis tantum quos facti pœniteret;
nempe in Alexandrinâ synodo, quæ post Arimi-
nensem habita est, constitutum est, ut exceptis
authoribus hærescos, *pœnitentes*, Ecclesiæ so-
ciarentur.

Resp. 1. Concilium Ariminense, quamdiù li-
berum fuit, strenuè pugnavit pro Nicænâ fide
ipsâ etiam *Consubstantialis* voce: id ex ejusdem
Concilii priore parte evidens est.

Resp. 2. Idem Concilium per Arianorum
vim & fraudem egisse, quæ in eo reprehendun-
tur. *Primò*, Episcopi vi, ac fraude coacti, de-
leverunt ex symbolo *Consubstantialis* vocem:
Secundò, communicarunt cum Arianis: *Ter-
ziò*, toti Ecclesiæ scandalo fuerunt: verum con-
tendimus, eos etiam tunc nihil contra fidem de-
finivisse.

Et sanè, licet œconomix causâ Patres Con-
cilii

cili Ariminensis temperaverint à voce *Consubstantialis*, usi sunt tamen terminis, quibus censebant exprimi Nicænam fidem, quamvis iisdem terminis contra eandem fidem Ariani postea abusi sint: De *Vsæ* verò nomine abjiciendo (inquit Hieronymus, adversus Luciferianos agens) *verisimilis ratio probabatur, quia in Scripturis, aiebant, non invenitur, & multos simpliciores novitate suâ scandalizat, placuit auferri. Non erat curæ Episcopis de vocabulo, cum sensus esset in tuto.*

Præterea Ariani in Concilio Ariminensi non se exhibuerunt in specie hostes fidei Nicæne, sed tantum vocabuli *Consubstantialis*; unde persuasum fuit Catholicis Episcopis, Arianos suum antiquum errorem deposuisse; sic enim Catholicos, detecta deinceps Ursacii, Valentis, & aliorum Arianorum fraude, loquentes inducit Hieronymus: *Putavimus sensum congruere cum verbis, nec aliud in Ecclesiâ Dei, ubi simplicitas, ubi pura confessio est, aliud in corde clausum esse, aliud in labiis proferri timuimus. Decepit nos bona de malis existimatio.*

Ex iis, quæ mox dicta sunt, sequitur, quod orbis post Concilium Ariminense ingemuerit se esse Arianum, non quidem in re, sed in specie tantum, nimirum propter Episcoporum silentium de voce *Consubstantialis*, nec non propter communionem cum Arianis, qui tamen Catholici putabantur. Silentium illud, ea communio, toti Ecclesiæ scandalo fuerant; ac proinde meritò statutum est in Concilio Alexandrino, ne Sedes indulgerentur, nisi penitentibus: de decreto, quod soli Lucifero Calaritano Episcopo displicuit, sic loquitur Hieronymus: *Asensus est huic sententiæ Occidens, & per tam necessarium Concilium Sathanae faucibus mundus ereptus est.*

Solvitur argumentum petitum ex sexto generali Concilio.

Objicies . Concilium Constantinopolitanum III. quod anno 680. habitum est adversus Monothelitas, est concilium generale . Nam 1. passim dicitur sextum œcumenicum . 2. Agatho Papa ei per suos legatos præfuit . 3. Confirmatum fuit à Leone Papâ II. ut patet ex illius epistolâ, quæ extat ad calcem ejusdem Concilii . 4. Illi consenserunt omnes ubique gentium Ecclesiæ Catholicæ . Atqui illud Concilium erravit ; nam erravit illud Concilium, quod tanquam hæreticas igne damnavit Honorii Papæ epistolas ; quod ipsi Honorio Papæ dixit anathema : atqui sextum concilium generale igne damnavit Honorii Papæ epistolas, ipsi Honorio Papæ dixit anathema : ergo erravit .

Major argumenti propositio patet ex eo, quòd Honorii epistolæ reverâ non continuerint hæresim, sed dispensationem, seu, œconomiam : prohibebant nimirum, ne una tantum, ut volebant Monothelitæ, aut duplex, ut docebant Catholici, diceretur in Christo voluntas ; idque cautum est, ne Monothelitarum animi, quos ad fidem perducendos sperabat, nimium exasperarentur . Unde fit, ut Honorius, ne materialiter quidem, ut loquuntur, fuerit hæreticus ; nempe nusquam docuit, quòd in Christo una tantum sit voluntas . Confirmatur ex eo, quòd plerique Scriptores maximè Catholici, tum Honorii epistolas, tum ipsum Honorium ab omni prorsus hæresi liberent .

Minor verò ejusdem argumenti propositio constat ex ipsius concilii actis, nec non ex epistolâ Leonis Papæ II. ad Constantinum Imperatorem concilii sexti confirmatoriâ, & tandem ex actione 7. octavæ synodi generalis sub Hadriano Papâ II.

Ref-

Respondeo, non uno modo solvi à theologis Catholicis, quod propositum est argumentum. Placet hìc referre varias opiniones, in quas abierunt.

Primò. Visum est Baronio, sextæ synodi generalis acta fuisse interpolata, seu, loco Theodori Episcopi Constantinopolitani à laudatâ synodo damnati, insertum fuisse Honorii nomen, nec non id omne, quod in actis, prout nunc extant, adversus eundem Honorium legitur.

Verùm stare non potest ea solutio. Nam 1. oporteret, ut decem in locis interpolata fuissent acta concilii; quippè decem in locis Honorii nomen legitur. 2. Oporteret, ut non solum Honorii nomen, sed ipsius epistola, epistolæ examen, & damnatio synodalibus actibus inserta fuissent. 3. In eâ suppositione dicendum esset, quinque exemplaria actorum synodaliū adulterata fuisse; reverà enim (ut patet ex actione 18. quinque exemplaria, pro quinque nimirum Patriarchis, Romano, Constantinopolitano, Alexandrino, Antiocheno, Jerosolymitano, conscripta fuerant; quod tamen est moraliter impossibile. 4. Romanæ Sedis legati, qui concilio adfuerant, eam fraudem haud dubiè detexissent, cum exemplaria ad Leonem Papam II. missa fuerunt, ut ab eo synodalis definitio confirmaretur. 5. Eidem Leoni, qui Agathonì proximè successit, persuasum fuit, sextam synodum dixisse anathema Honorio; ipsemet enim in eundem Honorium anathema intorsit, ut constat ex illius epistolis ad Constantinum Imperatorem, & ad Episcopos per Hispaniam constitutos. 6. Octava generalis synodus interpolationem, de quâ agitur, nusquam agnovit; nam Actione 7. hæc sub Hadriani nomine leguntur: *Licet Honorio ab Orientalibus post mortem anathema sit dictum; sciendum tamen, &c.* Ob ea, quæ mox relata sunt momenta pauci jam sunt, qui Baronii sententiam amplectantur.

228 Instit. Theolog. Prolegomena.

Secundò. Nonnulli contendunt, sextam generalem synodum nequaquam errasse, etiam ex suppositione, quòd illius acta interpolata non fuerint. Et sanè, inquiunt, sacra synodus non damnat epistolas Honorii, quasi continerent Monothelitarum hæresim, sed tantum, quòd illius incremento favissent, prohibendo usum vocabulorum, *unius, aut duplicis*, in Christo voluntatis. Addunt illi authores, Honorio dictum fuisse anathema, non quòd concilium censuerit eum reverà abiisse in Monothelitarum errorem, sed quòd præscripto ab eo silentio de unâ, aut duplici voluntate in Christo, Monothelitæ, præter Honorii spem, in sui erroris patrociniū abuterentur.

Sed, aiunt aliqui, ea responsio graves patitur difficultates. Nam 1. iniqua prorsus esset facta à synodo damnatio; in Catholicas nimirum epistolas, in virum innocentem intortum fuisset anathema. 2. Ea solutio vix cohæret cum his concilii verbis: *Anathematizari prævidimus & Honorium, eò quòd invenimus per scripta, quæ ab eo facta sunt ad Sergium, quia in omnibus ejus mentem secutus est, & impia dogmata confirmavit*. 3. Illam in synodo dispensationem non advertit Leo Papa I I. quippè Honorium tum negligentiae, tum simulationis, tum prodicionis reum agit, eoque jure damnatum agnoscit epistolis ad Constantinum Imperatorem, ad Episcopos per Hispaniam constitutos, ad Ervigium Hispaniarum regem scriptis. 4. Qui rem ipsam confitetur, licet nomen justâ de causâ arbitretur tacendum, præsertim ante definitionem Ecclesiæ, non potest, inquit Bellarminus, damnari pro hæretico: alioquin B. Hieronymus posset jam damnari pro hæretico, quia in epistolâ ad Damasum censuit, non esse dicendas tres hypostasēs, cujus contrarium postea Ecclesia non semel definivit.

Tertiò. Plures cum Bellarmino respondent, in
Ho-

Honorii epistolis nihil fuisse, quod adversaretur fidei; damnatas tamen reverà fuisse à sexto concilio generali, sed immeritò. Qui autem sic sentiunt, distinguunt minorem propositionem argumenti, quod superiùs propositum est: Atqui sextum concilium œcumenicum erravit in re, quæ est *humanis factis*, concedunt min. in re, quæ sit *juris*, hoc est, quæ aut ad fidem, aut ad mores pertineat, negant minorem.

Eorum authorum solutio supponit, generalia concilia posse errare in humanis factis, non autem in jure. Nec id mirum est, inquiunt; nam quæstiones *juris*, ex Scripturâ, aut traditione, hoc est, divinâ revelatione definiuntur; quæstiones verò *facti*, dirimuntur humano tantum judicio, ex hominum relatione: illud verò judicium, ea relatio, errori obnoxia sunt: *Quamvis* (verba sunt Bellarmini lib. 4. de Rom. Pontifice cap. 11.) *generale concilium legitimum non possit errare (ut neque erravit hoc sextum in dogmatibus fidei definiendis), tamen errare potest in quæstionibus de facto.* Itaque tutò dicere possumus hos Patres deceptos ex falsis rumoribus, & non intellectis Honorii epistolis, immeritò cum hæreticis connumerasse Honorium.

Contra eam solutionem ipse Bellarminus objicit sibi sequi ex eâ privatos, qui erroris in re facti arguunt sextam generalem synodum, & Honorii epistolas judicant Catholicas, meliùs intelligere earum sensum, quàm Patres sextæ synodi generalis. Respondet, nec à se, nec ab illis scriptoribus meliùs intelligi, sed à Joanne IV. Martino I. Agathone & totâ synodo Romanâ sub eodem Martino congregatâ: ii enim Pontifices (inquit) declararunt, nullâ unquam erroris labe Romanam Sedem commaculatam fuisse; quod quidem non ausi fuissent asserere, si in epistolis Honorii, cui successerant, credidissent contineri Monothelitarum hæresim.

Objicit sibi iterum laudatus Cardinalis, quòd
Pa-

Patres septimæ & octavæ generalis synodi, eâdem ratione intellexerint Honorii epistolas, quâ eas intellexerant Patres sextæ synodi. Respondet, eos Patres per se non expendisse Honorii epistolas, sed de iis judicasse ad examen, & relationem Patrum sextæ synodi, quæ eas per errorem damnaverat.

Quartò. Nonnulli respondent, nec interpolata fuisse sextæ synodi generalis acta, nec errasse ipsam synodum, quæ damnavit Honorii epistolas. Nam, inquiunt, reverà (ut judicavit concilium sextum) Honorii epistolæ hæresim Monothelitarum continebant in sensu obvio, seu, in sensu, quem præseferabant epistolarum verba. Addunt ex iisdem litteris constare, quòd Honorius reverà abierit in Monothelitarum errorem: Sed (aiunt illi scriptores) ab eo errore immunis erat Petri Cathedra, in qua sederat Honorius: nec enim, aut convocato Romano Clero, aut vocatis ad concilium, ut tunc in rebus magni momenti moris erat, pluribus Episcopis, Petri Cathedram Honorius consuluerat, antequam litteras, de quibus agitur, ad Orientales scriberet.

Authores, qui sic opinantur, sententiam suam ex eo confirmant, quòd Summi Pontifices, Theodorus, Martinus, Agatho, qui post Honorium & ante sextam synodum Romæ sederunt, ipse etiam Leo II. qui in epistolâ ad Imperatorem Constantinum synodum sextam confirmavit, constanter asseruerint, Sedem suam semper à quovis errore fuisse immunem: quod tamen palàm profiteri non ausi fuissent, si Honorius, quem post sextum concilium damnavit Leo Papa II. Clerum suum de datis ad Sergium litteris consulisset.

Sed ut certa sit ea responsio, necesse est, ut veterum monumentis probetur Honorium Clerum suum non consuluisse de litteris, quas ad Sergium scripsit; nisi enim ejusmodi monumenta proferantur, vix (inquiunt nonnulli) credi poterit,

terit, quòd laudatus Pontifex non adhibito, quod ordinariè adhibere solebat, sui cleri consilio, tanti momenti decretum miserit ad Sergium, Constantinopoli promulgandum, ubi Catholici cum Hæreticis manus conferebant.

Nec, ut probetur huiusmodi consilium adhibitum non fuisse ab Honorio, satis est asserere, quòd Honorius in epistolis, de quibus agitur, adhibiti à se consilii non meminerit; siquidem innumeræ sunt Summorum Pontificum decretales, quæ scriptæ non fuerunt inconsulto Clero, quamvis id in iis decretalibus non legatur.

Præterea Romani Pontifices, qui post Honorium, ante sextam synodum, ejusdem Honorii epistolas expenderunt, usi non sunt eâ responsione, ut consulerent famæ suæ Sedis, quam (ut ait Leo Papa II. ad Constantinum Imperatorem scribens, & sextam generalem synodum confirmans) Honorius prophanâ traditione maculari permiserat: hoc est, non dixerunt, illas epistolas ab Honorio inconsultâ, cui præerat, Sede conscriptas fuisse; sed aliam tentarunt viam, nempe negarunt, contineri in iis epistolis Monothelitarum hæresim; contenderunt contineri catholicum sensum in verbis, ex quibus constant; hincque concluderunt. immeritò eas in sui erroris patrociniû à Monothelitis detorqueri. Id videre est in epistolâ Ioannis Papæ IV. à Sirmundo inter Anastasii Bibliothecarii Collectanea editâ, in disputatione Maximi martyris cum Pyrrho habitâ, in Concilio Romano, quod sub Martino I. celebratum est: *Vnam voluntatem diximus in Domino* (sensus est, quem ex Maximo Joannes affinxit Honorii epistolis) *non divinitatis ejus & humanitatis, sed solius humanitatis. Cum enim Sergius scripsisset, quòd quidam duas voluntates in Christo contrarias dicerent, diximus, Christum non duas voluntates contrarias habuisse, carnis, inquam, & spiritus, sicut nos habemus post pec-*

catur, sed unam tantum, quæ naturaliter humanitatem ejus signabat.

Romani Pontifices eo jacto fundamento, quòd epistolæ Honorii Catholicum sensum, non autem hæreticum, continerent, constanter prædicarunt suæ Sedis integritatem, prædecessores suos nullâ unquam erroris labe maculatos fuisse: *Consideret vestra clementia* (verba sunt epistolæ Agathonis ad Imperatorem Constantinum scriptæ, & lectæ sess. 4. synodi sextæ) *quoniam Dominus, & Salvator omnium, cujus fides est, qui fidem Petri non defecturam promisit, confirmare eum fratres suos admonuit, quod Apostolicos Pontifices meæ exiguitatis prædecessores fecisse semper, cunctis est agnitus.*

Veram ad nos hæc non pertinent; hujus enim loci non est definire, quænam ex quatuor relatis responsonibus verior sit; quæcumque enim defendatur, stat conclusio, quam contra Lutheranos & Calvinistas statuimus; seu in iis, quæ ad fidem, aut mores spectant, legitima concilia generalia divinæ esse authoritatis.

Et sanè. 1. Si (ut vult prior sententia) interpolata sint acta sextæ synodi, ex iis contra nos desumi non potest argumentum. 2. Si sint integra, & proscripserint tantum Honorii de unâ, aut duplici voluntate silentium, non damnarunt in Honorii epistolis hæresim aliquam, sed tantum intempestivam dispensationem, ac ecclesiæ noxiâ œconomiam. 3. Si Honorii epistolæ in sensu obvio, seu, quem verba præferunt, contineant hæresim, sed quæ conveniat ipsi soli, non autem cathedræ, quam supponitur non consuluisset, nullus est error in decreto, quod tum adversus Honorium, tum contra illius epistolas tulit sexta synodus. 4. Si Honorius, habitâ prius cum suo Clero, aut Episcopis ad concilium vocatis deliberatione, litteras ad Sergium scripserit, eæque litteræ sint (ut voluerunt Joannes IV. Maximus martyr cum Pyrrho agens) ab omni contra
fidem

fidem errore immunes, dicendum erit, sextam generalem synodum incidisse in errorem *facti*, non autem in errorem *juris*, de quo solo agitur in nostra conclusione.

Solvitur argumentum petitum ex septimo Concilio Generali.

Objicies. Septimum concilium generale, quod est Nicænum II. definit, pium esse cultum, qui sacris imaginibus exhibetur: è contra verò Concilium Francofordiense, quod anno 794. habitum est, & cui adfuerunt, tum legati Romani Pontificis, tum trecenti Occidentales Episcopi, damnavit decretum de colendis imaginibus latum in Concilio Nicæno II. Ergo erravit, aut Concilium Nicænum II. aut Concilium Francofordiense; utrumque tamen est universale: ergo, &c.

Resp. 1. Concilium Francofordiense non esse concilium generale; neque enim ad illud vocati fuerunt Orientales Episcopi, aut ipsi eorum aliquis adfuit: è contra verò Concilium Nicænum II. fuit generale; ipsi nimirum non Orientales modò, sed & Occidentales per Romanæ Ecclesiæ legatos adfuerunt.

Resp. 2. conc. ant. dist. conseq. Ergo erravit Concilium Francofordiense in quæstione *facti*, conc. conseq. in quæstione *juris*, neg. conseq. Concilio Francofordiensi visum fuerat, quòd Concilium Nicænum II. definiisset, *Sanctorum* imaginibus exhiberi posse eundem cultum, qui debetur Sanctissimæ Trinitati: *Allata est in medium quæstio de novâ Græcorum synodo* (verba sunt Concilii Francofordiensis cap. 2.) *quam de adorandis imaginibus Constantinopoli fecerunt, in quâ scriptum habebatur, ut qui imagines Sanctorum, ita ut Deificam Trinitatem servitio, aut adoratione non impenderent, anathema judicarentur: Quam omnes, qui supra, sanctissimi Pa-*

tres nostri omnimodis & adorationem, & servitium respuentes contempserunt, atque consentientes condemnaverunt. Confirmatur responsio ex eo, quòd ubi ab Occidentalibus intellectus postea fuit germanus Nicæni Concilii sensus, ipsum omnes Occidentales Ecclesiæ pro œcumenico Concilio receperint, ejusque definitioni adhæserint.

Solvitur argumentum petiitum ex personis, ex quibus constant Concilia.

Objicies. Concilia constant ex Episcopis, qui majori ex parte dilectores sunt mundi, aut saltem quos nemo sciat, an justii sint, vel iniqui: atqui Concilia, quæ Episcopis illis constant, non sunt infallibilia. Nam in iis Conciliis non est Spiritus sanctus; neque enim est in mundi dilectoribus: ergo, &c.

Resp. 1. neg. maj. nec enim, nisi temerariò eam asserunt Heterodoxi. **Resp. 2.** datâ majore, quæ tamen est falsissima, neg. min. Ad cujus probationem, dist. ant. In iis Conciliis non est Spiritus sanctus, quantum ad gratiam gratum facientem, conc. ant. quantum ad gratias gratis datas, neg. ant. Gratia gratum faciens, seu, quæ justificet, non est necessaria, ut pastores vera doceant, & vera sacramenta conferant; ad id quippè satis sunt gratiæ gratis datæ, quæ iis etiam dantur, qui sunt in statu peccati mortalis.

Instabis. Sine fundamento asseritur, quòd Episcopis impiis ad concilium congregatis adsint gratiæ gratis datæ, quæ necessariae sunt ad cognoscendam veritatem, & ad docendos fideles: ergo, &c.

Resp. neg. ant. Ratio est, quia Episcopi illi in nomine, hoc est, autoritate Christi ad concilia conveniunt; ac proinde ad eos spectat hæc Christi promissio: *Vbi duo, vel tres, &c.* 2. Justorum Ecclesia, seu, justorum, qui in eâ sunt, cœ-

cœtus Episcopis illis impetrat auxilia , quibus indigent ad cognoscendam, & prædicandam veritatem ; quippè id impetrat (ut Augustini verbis utar) columbæ gemitus, quod Ecclesiæ corpori necessarium est ; ad eum enim columbæ gemitum spectant in primis hæc Christi verba : *Querite, & invenietis ; pulsate, & aperietur vobis : Quodcumque petieritis Patrem in nomine meo, dabit vobis.* At Ecclesiæ corpori necessarium est , ut Episcopi ad Concilium congregati, veritatem cognoscant, & cognitam prædicent populis.

ARTICULUS V.

Utrum Concilia sint Ecclesiæ necessaria.

Not. 1. **E**X Logicis, necessitas est duplex, absoluta, & secundum quid . Prior convenit rei, sine quâ finis nullo modo potest haberi ; posterior est ea, quæ convenit rei, sine quâ finis haberi quidem potest, sed magnâ cum difficultate .

Not. 2. Concilia considerari possunt : 1. in genere, seu, abstrahendo an sint generalia, aut particularia ; 2. in specie hoc est , prout sunt generalia, aut particularia .

Not. 3. Apud Lutheranos & Calvinistas Concilia, sive in genere, sive in specie considerata, non sunt Ecclesiæ absolutè necessaria ad definiendas fidei, aut morum controversias . Nec mirum, cum in novatorum illorum systemate, quæcumque concilia errori obnoxia sint in iis etiam capitibus, quæ ad fidem, aut mores spectant ; è contra in sententia Catholicorum, quædam concilia sunt absolutè necessaria ad definiendas fidei, aut morum controversias ; aliquando verò non sunt absolutè necessaria ; sed id subsequenter conclusionibus est explicandum .

CONCLUSIO I. Aliqua Concilia sunt
M 3 non-

nonnunquam absolutè necessaria Ecclesiæ.

Probatur 1. ex Scripturâ. Illud est nonnunquâ absolutè necessarium Ecclesiæ, cui Christus pollicitus est infallibilitatem : atqui Christus quibusdam Conciliis pollicitus est infallibilitatem ; hanc enim ejus sententiam, Matth. 18. *Vbi sunt duo, vel tres congregati in nomine meo, ibi sum in medio eorum*, Patres (ut articulo quarto dictum est) de conciliis intellexerunt.

Probatur 2. ex Ecclesiæ praxi. Eâ siquidem docemur, Ecclesiam ad Concilia quovis sæculo convenisse, ut fidei, morum, & disciplinæ quaestiones definiret. Apostoli Actorum 15. eo medio usi sunt, ut ortam Antiochiæ de legalibus litem dirimerent. Ad concilia convenerunt majores nostri, ut Arium, Macedonium, Nestorium, Eutichem, Monothelitas, aliosque veteres, tum hæreticos, tum schismaticos, tum disciplinæ ecclesiasticæ infractores proscriberent. Ipsi etiam Romani Pontifices (inquit Bellarminus, de conciliis & ecclesiâ lib. 1. cap. 11.) nullam unquam hæresim novam sine novo concilio damnaverunt. Verum quod semper, & ab omnibus factum est, medium est ordinarium ; ac proindè Ecclesiæ necessarium ad eorum definitionem, quæ ad fidem, aut mores, aut disciplinam spectant : *Necesse habuimus* (inquit Cyprianus ad Stephanum Papam scribens) *convenientibus in unum pluribus sacerdotibus, cogere & celebrare Concilium.*

CONCLUSIO 2. Cum plures, ac insignes Ecclesiæ, errore aut schismate non laborant, concilia generalia non sunt simpliciter necessaria.

Probatur 1. Illud non est simpliciter necessarium Ecclesiæ, sine quo & hæreses, & schismata extingui possunt : atqui sine conciliis generalibus, in casu, de quo est quaestio, & hæreses, & schismata extingui possunt. Siquidem, quæ tribus prioribus sæculis exortæ sunt hæreses, Menandri, Ebionis, Cerinthi, Nicolaitarum, Valentini, Cerdonis, Marcionis, Marci,

ci, Tatiani, & plures aliæ, absque Conciliorum, etiam provincialium, ope extinctæ sunt; neque enim Eusebius, qui in suâ Ecclesiæ historiâ illarum novitatum meminit, refert aliquam Episcoporum synodum, in quâ damnatæ fuerint.

Extinctum est pariter conflatum à Montano schisma, labente secundo sæculo, sine Conciliorum, saltem generalium, auxilio; quippè nonnulli tantum in Asiâ Episcopi ad synodos coacti, Montanum damnarunt, restitueruntque Ecclesiis pacem: Nam, inquit Eusebius libro 5. hist. cap. 16. *cum fideles, qui in Asiâ erant, sæpius & in plurimis Asiæ locis convenissent, novamque illam doctrinam examinassent, & prophanam, atque impiam judicassent, damnatâ hæresi, ipsi ab Ecclesia & fidelium communione expulsi sunt.*

Eadem ratione, seu, absque concilio generali, sed solis particularibus synodis, quæ Romæ, & in provinciis celebratæ sunt, itum est obviam Novatiano schismati: Cum Romæ (ait Eusebius hist. lib. 6. cap. 43.) congregata esset synodus, in quâ sexaginta quidem Episcopi, presbyteri verò, ac diaconi multo plures convenerunt, cumque in provinciis Antistites, quid agendum esset, singuli consultassent, hujusmodi decretum cunctis promulgatum est.

Probat 2. Ubi post datam Ecclesiis pacem liberum fuit Episcopis ad synodos convenire, ad eas non convenerunt, quoties exortæ sunt hæreses novæ; satis eis fuit, aut doctorum calamo, aut lato ab Episcopis in diœcesibus decreto, aut provincialium conciliorum sententiâ hæreticos compescere, aut eis objicere orbis catholici consensum.

Et quidem. Primò, nulla contra Vigilantium coacta fuit synodus: obstruxit illius ora Ecclesiæ Romanæ, cæterarumque Ecclesiarum per orbem diffusarum consensus: obstruxit etiam Hieronymus: *Malè ergo* (inquit adversus novatorem illum disputans) *facit Romanus Episcopus, qui super*

mortuorum hominum Petri & Pauli, secundum nos ossa veneranda, secundum te, vilem pulvisculum, offert Domino sacrificia, & tumulos eorum Christi arbitratur altaria; & non solum unius urbis, sed totius orbis errant Episcopi, qui campum Vigilantium contemnentes, ingrediuntur basilicas mortuorum.

Secundò. Origenistæ sat intellecti sunt damnati, ubi Romanus Pontifex, aliique non pauci Ecclesiæ Catholicæ Episcopi in eos tulere sententiam: Non valet apud eos (Origenis defensores) super Origenis damnatione, Episcoporum auctoritas. Quid facient epistola Theophili Episcopi? Quid Papæ Anastasii in toto orbe hæreticum persequentes? Verba sunt Hieronymi in Apologiam adversus Ruffinum.

Tertio. Pelagianis poscentibus synodum œcumenicam, in quâ expenderetur eorum doctrina, responsum est ab Augustino, id non fuisse necessarium; quod quidem ex eo confirmavit S. Doctor, quod absque synodis plures antiquiores hæreses extinctæ fuissent: Aut verò (ait Augustinus lib. 4. ad Bonifacium cap. ult.) congregatione synodi opus erat, ut aperta perniciēs damnaretur; quasi nulla hæresis aliquando sine synodi congregatione damnata sit: Cum potius rarissimæ inveniantur, propter quas damnandas necessitas talis extiterit Hanc gloriam captare intelligitur, Pelagianorum superbia, ut propter illos Orientis & Occidentis synodus congregetur.

Quæres, quandonam ultimò damnatæ intelligantur novitates, quæ aliquorum tantum Episcoporum, aut synodorum provincialium decretis proscriptæ sunt.

Resp. id contingere, cum illorum Episcoporum, illarum synodorum decretis aliæ orbis Ecclesiæ Catholicæ, licet ad synodum non coactæ, subscribunt. Nec mirum, nec enim minùs infallibilis est Ecclesia per totum orbem diffusa, quàm
cum

cum coacta est ad universalem synodum : *Ipsam orbem circumspicite* (ait Basilius epist. 72. de Eunomianis agens) & videte, quàm modica sit ea portio, quæ hoc morbo laborat; reliqua verò universa Ecclesia, quæ ab orbis finibus usque ad fines Evangelium recipit, sanam hanc & incorruptam doctrinam sectetur.

Eo principio sæpè usus est Augustinus contra Pelagianos agens : *Quid adhuc* (inquit lib. 2. operis ultim. contra Julianum) *quæris examen, quod apud Apostolicam sedem jam factum est? quod denique jam factum est in Episcopali judicio Palæstino?* Ergo hæresis ab Episcopis non adhuc examinanda, sed coercenda est potestatibus Christianis. Sermone 2. de verbis Apostoli, Africanæ & Romanæ Ecclesiæ judicium, cui ne vel minima orbis Ecclesia contradixisset, ita laudat, ut contendat, aliâ synodo opus non fuisse ad proscribendum Pelagianorum errorem: *Iam enim*, ait, *de hac causa duo concilia missa sunt ad Sedem Apostolicam, inde etiam rescripta venerunt. Causa finita est; utinam aliquando finiat error.*

CONCLUSIO 3. Quando plures insignes Ecclesiæ laborant, aut errore, aut schismate, opus est Concilio generali, quo aut veritas Catholica definiatur, aut tollatur schismatis occasio.

Probatur 1. autoritate S. Augustini. Licet S. Doctor Pelagianis Concilium generale petentibus sæpè responderit, necessarium non fuisse illud Concilium, ut eorum dogma de impietate convinceretur; asserit tamen, necessarium aliquando fuisse propter alias hæreses : *Cum potius* (inquit lib. 4. ad Bonifacium cap. 12.) *rarissimæ, hæreses, inveniantur, propter quas damnandas necessitas talis* (convocandi generalem synodum) *existerit.* Lib. 2. de Bapt. cap. 4. scribit, necessarium fuisse generale concilium, ut quæstio de hæreticorum baptismo dirimeretur; addit, de eo baptismo in utramq; partem Episcopos disceptare

potuisse salvâ pace Ecclesiæ Catholicæ, donec plenario totius orbis concilio, quod saluberrimè sentiebatur, etiam remotis dubitationibus firmaretur.

Si quis quærat, cur adversus Pelagianos, ex Augustino, necessaria non fuerit generalis synodus; fuerit verò, ex eodem Augustino, necessaria adversus rebaptizantes, & adversus quasdam hæreses, v. gr. Arianam; non alia reddi potest ratio, quàm quòd, ubi Pelagianorum hæresis primùm prodiit, paucorum esset hominum; è contra verò Ariana, à primis suis exordiis plures, & quidem insigniorum Ecclesiarum, Episcopos patronos habuerit. Idem dici debet de rebaptizantibus; plures nimirum Ecclesiæ, tum in Oriente, tum in Africâ contendebant, irritum esse datum ab hæreticis baptisma: *Quæstionis hujus obscuritas* (inquit Augustinus lib. I. de Bapt. contra Donatistas cap. 7.) *prioribus ecclesiæ temporibus ante schisma Donati, magnos viros, & magnâ charitate prædictos patres, episcopos ita inter se compulit, salvâ pace, disceptare & fluctuare, ut diu Conciliorum in suis quibusque regionibus diversa statuta mutaverint.*

Probatur 2. autoritate Leonis Magni. Postulavit S. Papa ab Imperatore Theodosio synodum generalem, quam Eutichianæ impietati opponeret: *Si pietas vestra, inquit epist. 12. suggestioni, ac supplicationi nostræ dignetur annuere, ut intra Italiam habere jubeatis episcopale concilium, citò, auxiliante Deo, poterunt omnia scandala, quæ in perturbationem ecclesiæ sunt commota, resecari.* Epistolâ 43. laudat Martianum Imperatorem, quòd generale concilium à se postulatum, etiam ipse judicavit necessarium ad tollendum scandalum, quod in prædatoriâ synodo Ephesinâ, Eutichiani erroris occasione, Ecclesiæ Catholicæ datum fuerat à Diòscoro.

Probatur 3. ex Ecclesiæ praxi. Ecclesia non
aliis

Differt.IV. *De Locis Theologicis.* 241

aliis temporibus celebravit generalia concilia , quàm cum plures & insignes Ecclesiæ errore , aut schismate laborarunt ; idque singula Ecclesiæ sæcula percurrenti faciliè patebit : Ergo iis in circumstantiis Ecclesia judicavit concilia generalia esse necessaria ad profligandum natum errorem , & reddendam Ecclesiis pacem .

Confirmantur , quæ hucusque dicta sunt , ex Bullâ indictionis Sacri Concilii Tridentini , ubi Paulus Papa III. sic loquitur : *Deinde animo repententes , majores nostros sapientiâ admirabili & sanctitate præditos , sæpè in summis Christianæ Reipublicæ periculis , remedium optimum , etque opportunissimum , æcumenica concilia , & Episcoporum generales conventus adhibuisse , ipsi quoque animus ad generale habendum concilium adjecimus .*

Quæres , quænam sint causæ præcipuæ , propter quas Concilia generalia celebrari debent .

Resp. causas , de quibus agitur , ad sequentes à Bellarmino reduci . Prima , est hæresis nova , non quæcumque tamen (ut jam superiùs observatum est) sed quæ , cum à pluribus propugnetur , serpit ut cancer , suoq; veneno potest inficere populos : Ejus generis fuerunt hæreses , Arii , Macedonii , Nestorii , Eutichetis , Monothelitarum , Iconomachorum , Lutheri , Calvinii , & aliorum .

Secunda , est schisma inter duos , qui de Romano Pontificatu contendunt : Eam ob causam habita sunt Concilia temporibus , Cornelii , Damasi , Symmachi , Innocentii II. Alexandri III. Gregorii XII. Benedicti XIII. Nimirum in eâ Ecclesiarum calamitate nullum est Concilio potentius remedium , nec aliud veteres adhibuerunt .

Tertia , est resistentia communi hosti totius Ecclesiæ : hoc est , cum eundem est obviam paganis , & aliis infidelibus bellum in Christianos moventibus . Ob eum finem celebrata sunt Concilia ab Urbano II. Calixto II. Eugenio III. aliis-

M 6 que

aliisque Pontificibus, qui fideles vocarunt ad bellum Saracenis inferendum.

Quarta, est (inquit idem Bellarminus) suspicio hæresis in privatâ personâ Romani Pontificis, vel (si accideret) tyrannidis incorrigibilis; tunc enim deberet congregari generalis Synodus, vel ad deponendum Pontificem, si inveniretur hæreticus, vel certè ad eum admonendum, si in moribus videretur incorrigibilis; nam (ut dicitur in octavâ synodo actione ult. can. 21.) debent generalia concilia cognoscere controversias circa Romanum Pontificem exortas.

Quinta, est dubitatio de electione Romani Pontificis. Si enim Cardinales non possent, aut non vellent Pontificem creare, aut si omnes simul perirent, aut aliundè fieret verè dubium, ad quos pertineret ejusmodi electio, ad Concilium generale spectaret decernere de electione Romani Pontificis; quamquam non est verisimile id aliquando eventurum.

Sexta denique causa, est reformatio generalis abusuum & vitiorum, quæ in Ecclesiam irrepsissent. Hinc videmus, omnia ferè generalia Concilia Canones edidisse de reformatione. Hactenus laudatus scriptor.

Objicies. Celebratio Concilii generalis pastores avellit ab Ecclesiis, quibus præpositi sunt: fieri non potest sine magnis Ecclesiarum sumptibus: ergo tantùm abest, ut Concilia generalia sint necessaria, quin potius nocere videantur.

Resp. neg. consequ. Ratio est, quia damnum, quod Ecclesiis particularibus inferri videtur, abundè compensatur publico bono, quod totum Ecclesiæ corpus, ipsæ etiam particulares Ecclesiæ ex generalis synodi celebratione percipiunt. Unde sacri Canones, cum loquuntur de residentiæ lege, excipiunt casum de celebratione Concilii.

CAPUT II.

De Conciliis generalibus in specie .

Not. **C**oncilia generalia hucusque celebrata, sunt novemdecim; Nicænum I. Constantinopolitanum I. Ephesinum I. Chalcedonense; Constantinopolitanum II. Constantinopolitanum III. Nicænum II. Constantipolitanum IV. Lateranense I. Lateranense II. Lateranense III. Lateranense IV. Lugdunense I. Lugdunense II. Viennense, Constantiense, Basileense, saltem quoad aliquas sessiones; Florentinum; Tridentinum. Quæ in iis sunt præcipua capita, tum ad fidem, tum ad disciplinam spectantia, in gratiam theologiæ candidatorum hîc inferemus.

ARTICULUS I.

De Concilio Nicæno I.

Not. 1. **D**E priore Concilio Nicæno quæremus: 1. quo Christi anno celebratum fuerit, & quot ad ipsum Episcopi convenierint: 2. quid illi celebrando causæ fuerit: 3. quid in eo fuerit definitum: 4. quot ediderit Canones: 5. à quo fuerit convocatum: 6. quis ipsi præfuerit: 7. quam olim, & his etiam temporibus habeat authoritatem.

Not. 2. De his, quæ ad hujusce Concilii convocationem, præfidentiam, & authoritatem pertinent, nihil hîc dicemus; quippè sat, superque de iis actum est iis locis, ubi de Conciliorum generalium convocatione, præside, & infallibilitate sermonem habuimus.

§. I.

*De tempore, & Episcopis Concilii
Nicaneni I.*

CONCLUSIO I. Nicænum primum Concilium celebratum est Nicææ in Bythiniâ anno Christi 325. Sylvestri Papæ anno 12.

Probatur . Concilium Chalcedonense actione 2. testatur, primam Nicænam synodum habitam fuisse sub consulatu Paulini & Juliani : atqui Paulini & Juliani consulatus incidit in annum 325. Idem asseritur à Socrate, qui hist. lib. 1. cap. 9. sic loquitur : *Coactum est Paulino & Iuliano consulibus 11. Kalend. Iunii* . Concilium Chalcedonense signat diem 13. Julii, sed id fortè accidit, quòd Socrates Concilii initium, Concilium verò Chalcedonense alicujus actionis postea habitæ respectum habuerit.

Objicies 1. Chronicon Eusebii asserit, Concilium Nicænum I. habitum fuisse anno imperii Constantini Magni 15. is verò Constantini annus incidit in annum Christi 320.

Resp. emendari debere eo in capite Eusebii Chronicon.

Objicies 2. Sozomenus hist. lib. 1. cap. 16. scribit, Concilium Nicænum I. celebratum fuisse sub Julio Papâ : ergo celebratum non est sub Sylvestro, ut in conclusione dictum est.

Resp. eo in capite Sozomenum errasse ; nempe alii omnes historici scribunt sub Sylvestro habitum fuisse illud Concilium . Sozomeni errori locum dedit Julii epistola, cujus Athanasius meminit Apolog. 2. & in quâ sic Julius loquitur : *Nostri presbyteri, qui tunc in Nicæno Concilio aderant, de ipsius rectâ fide contestabantur* . Sozomenus censuit, hæc verba : *Nostri presbyteri*, intelligi debere de presbyteris à Julio missis, cum è contra intelligi debeant de presbyter-

teris Ecclesiæ Romanæ, quos Sylvester miserat.

CONCLUSIO 2. Trecenti & octodecim Episcopi celebrarunt Nicænum I. Concilium.

Probatur 1. Athanasius tum in epistolâ ad Jovinianum Imperatorem, tum in disputatione adversus Arium, asserit, trecentos decem & octo Episcopos interfuisse Nicænæ synodo. 2. Quotiescumque in veterum scriptis laudatur Concilium Nicænum I. semper Patres 318. recensentur.

Objicies 1. Eusebius recensens Episcopos, qui ad Nicænum I. Concilium convenerunt, dicit, eos fuisse ducentos quinquaginta & amplius. 2. In epistolâ Eustathii Antiocheni, qui synodo interfuit, quam recitat Theodoretus hist. libro 1. cap. 8. legitur, Episcopos 270. adfuisse Nicæno Concilio.

Respondet Baronius, utrumque illum locum esse emendandum; confirmatque ex eo, quod Socrates lib. 1. cap. 5. laudata Eusebii verba recitans, legat, Episcopos plusquam trecentos Nicænæ ad Concilium convenisse.

§. II.

De causa Nicæni I. Concilii.

CONCLUSIO. Non una fuit, sed multiplex causa celebrandi Nicænum I. Concilium.

Probatur enumeratione. *Primò*, habita est Nicæna I. synodus contra Arium: *secundò*, contra Quartodecimânos: *tertiò*, contra Meletianos.

Quæres 1. quis fuerit Arius ille, contra quem habitum est Nicænum I. Concilium: quem errorem docuerit: quem senserit impugnatorem.

Resp. ad 1. Arium fuisse presbyterum Alexandrinum. Is (inquit Theodoretus hist. lib. 1. cap. 1.) invidiæ stimulis agitated, quod post Achillæ obitum Ecclesiæ Alexandrinæ regimini, quod

am-

ambierat , Præfectus fuisset Alexander , cum S. Præsulis mores criminari non posset , illius de Trinitate doctrinam aggredi instituit .

Resp. ad 2. Arium adversus Verbi divinitatem pugnasse . Scilicet contendebat , ipsum non esse ejusdem substantiæ cum æterno Patre , sed esse meram creaturam , quam Pater ante cæteras quidem , sed tamen in tempore , eduxisset ex nihilo : *Deus* (verba sunt epistolæ Concilii Alexandrini , Arii hæresim referentis) non semper pater fuit , sed fuit aliquando tempus , quo *Deus* non erat pater . *Verbum* non semper fuit , sed factum ex non existentibus . *Deus* enim existens , eum qui non erat , ex non existente fecit ; quapropter fuit aliquando tempus , quando non erat ; est enim filius creatura & factura . Neque autem secundum essentiam Patri consimilis , neque verum , & secundum naturam Patris *Verbum* , nec vera illius *Sapientia* ; sed abusivè *Verbum* & *Sapientia* est factus , & ipse per proprium Dei *Verbum* & *Sapientiam* , quæ in Deo est , per quam *Deus* & omnia , & ipsum fecit .

Resp. ad 3. Alexandrum Episcopum Alexandrinum , & Athanasium illius diaconum , præcipuos fuisse Arianæ impietatis impugnatores . Prior , cum perspexisset , errorem septuaginta virgines Deo sacras , septem presbyteros & duodecim diaconos infecisse , blandis cohortationibus , ait Theodoretus lib. 1. cap. 1. virum ab eâ mente deducere studuit : Sed ille magis in dies turbare privatas domos , ipsos etiam Ecclesiæ Pastores in errorem inducere non semel tentavit . Alexander periculi magnitudine commotus , coactâ centum Episcoporum synodo , adversus Arium ejusque sequaces tulit anathematis decretum : Eo anathemate percussus Arius confugit ad Eusebium Nicomediensem Episcopum , qui (ut narrat Sozomenus lib. 1. cap. 7.) coacto in Bithinia aliquot Episcoporum Concilio ,

lio, Arium recipi jussit in Ecclesiæ communionem. Alexander, ut tanto malo iret obviam, dedit ad Constantinum Imperatorem litteras, quibuseum obtestatus est, ut natum nuper incendium suâ autoritate extingueret. Princeps Osum Episcopum Cordubensem misit Alexandriam, ut res æquissimè componeret; sed cum malum in dies serperet, de sacerdotum concilio, inquit Rufinus, ex toto orbe Episcopos in Nicæam Bythiniae urbem accersivit, dispositis ad itinera vehiculis.

Quæres 2. quid docerent Quartodecimani, contra quos coacta fuit generalis prima synodus.

Resp. in eo positum fuisse Quartodecimano-
rum errorem, quòd contenderent, Pascha cum Judæis celebrari debere Lunâ 14. mensis Martii, in quamcumque hebdomadæ diem incideret. Tenebantur eo errore plures ex Ecclesiis Christianis, quæ erant in Syriâ, Ciliciâ, Mesopotamiâ; contraria verò praxis apud plures alias Orientis Ecclesias, & apud omnes Occidentales jam ab Apostolorum temporibus obtinuerat,

Quæres 3. quis esset Meletius, de quo actum est in Concilio Nicæno; quid ipse antea peccasset.

Resp. Meletium Episcopatum in Ægypto gessisse, sed multis convictum criminibus (ait Athanasius in secundâ apologiâ) ac potissimum, quòd idolis sacrificasset, ab Episcopatu dejectus est à S. Petro Episcopo Alexandrino in plurium Episcoporum conventu. Is verò rem indignissimè ferens, Petrum, ejusque successores Achilam & Alexandrum probris, & criminationibus lacera-
vit, multos per Ægypti civitates creavit Episcopos, presbyteros, diaconos; ac proindè Ecclesiam pessimo laceraverat schismate.

§. III.

*Quid definitum fuerit in Concilio
Nicæno I.*

CONCLUSIO . In priore Concilio Nicæno damnata fuit: 1. Arii impietas: 2. determinata est dies, quâ Pascha ubiq; terrarum celebrari deberet: 3. Meletii, ac ordinatorum ab eo ministrorum causa definita est.

Probatur prior conclusionis pars referendo Concilii acta. In synodo recitata sunt impia Arii dogmata, quæ (ut refert Athanasius Orat. 1. contra Arianos) Episcopi, obstructis etiam auribus, execrati sunt.

Lectæ sunt pariter (Theodoreto teste hist. lib. 1. cap. 6.) Eusebii Nicomediensis litteræ, atque, ut blasphemiarum plenæ, totâ spectante synodo conscissæ sunt.

Prolata sunt deindè Alexandrini sub Alexandro Concilii acta; lectus pariter fuit Arii liber, quem Thaleiam, hoc est, convivium & crapulam vocarat, tum impio errori, ac illius authorianathema dictum est.

Communi omnium suffragio asserta fuit Verbi divinitas, definitumque fuit, Dei filium esse Deum de Deo, lumen de lumine, Deum verum de Deo vero: Omoousios, hoc est, consubstantialis Patri pronuntiatur; ac tandem edita fuit fidei formula, seu symbolum, cui omnes subscribere tenerentur; illud verò symbolum, eam formulam legere est apud Athanasium in epistolâ ad Solitarios, apud Hilarium libro de synodis, apud Socratem hist. lib. 1. cap. 5.

Probatur altera conclusionis pars ex litteris Constantini ad Ecclesias, ubi hæc habentur: *Visum est communi omnium iudicio sacratissimum Paschatis festum, uno eodemque die celebrandum esse; neque enim in re tam sanctâ, & solemnî ulla dis-*

diffensio debet existere . Apud Socratem & Sozomenum extant prolixæ epistolæ , quas de eâ Concilii definitione Constantinus Imperator ad omnes orbis Ecclesias conscripsit.

Probatur tertia conclusionis pars . Scribit Theodoretus hist. lib. 1. cap. 9. sacram synodum statuisse , 1. ut Meletius , nudo Episcopi nomine retento , sine functionibus ullis Lycum , ubi fuerat Episcopus , incoletet : 2. ut qui ab eo saceris initiati fuerant , Alexandrino Episcopo subjacerent : 3. ut aliis ecclesiarum ministris postponerentur . Idem quoque videre est in epistola synodicâ Concilii ad Alexandrinam Ecclesiam , quæ à Socrate refertur hist. lib. 1. cap. 6.

§. IV.

An omnes , qui Nicæna synodo adfuerant , ipsi subscripserint .

Not. Non est dubium , quin subscripserint synodo , quotquot ei adfuerant Episcopi Catholici , sed quæstio est de Arianis ; quippè Socrates libro 1. cap. 5. asserit , reverà non subscripsisse omnes Arianos .

CONCLUSIO . Fidei formulæ à Concilio Nicæno editæ subscripserunt omnes , quotquot aderant , Episcopi Ariani .

Probatur 1. Omnium Arianorum Episcoporum nomina leguntur inter Episcoporum subscriptiones . 2. Athanasius in decretis synodi Nicænæ contra hæresim Arianam , hæc habet : *Episcopi igitur sublati Eusebianorum vocabulis , formulam sanæ fidei conceperunt , omnibusque subscribentibus , subscripserunt & ipsi Eusebiani , substantiam & consubstantialitatem approbantes ; Deique filium nullo modo facturam , aut creaturam esse ; sed factum , verbumque ex patris substantiâ .* Quodque majoris admirationis est : *Eusebius ex Cæsarea Palæstinus , cum pridie ab-*

ne-

negasset, in eandem sententiam tamen postridie subscripsit.

Objicies 1. Theodoretus negat, Secundum à Ptolemaide subscripsisse fidei formulæ. 2. Socrates hist. lib. 1. cap. 5. hæc scribit : *Hanc fidem approbaverunt trecenti decem & octo Episcopi, omnesque eidem subscripserunt, quinque solum exceptis, qui hanc vocem Omoousion repudiarunt, Eusebio videlicet Nicomediæ Episcopo, Theognide Nicææ, Mari Chalcedonis, Theoneâ Marmaricæ, Secundo Ptolemaides: ergo omnes Ariani Episcopi non subscripserunt fidei formulæ à Concilio Nicæno editæ.*

Resp. dist. conseq. Ergo omnes Ariani non subscripserunt eodem tempore, conc. conseq. diverso tempore, neg. conseq. Cum scripta est fidei regula, tunc id accidit, quod narrat Socrates, hoc est, subscriptionem negarunt Eusebius Nicomediensis & alii quatuor; sed ubi lata fuit in eos depositionis sententia, tunc palinodiam recantantes, oblato Nicænis Patribus pœnitentiæ libello, in suas sedes restituti sunt.

Confirmatur responsio 1. ex Athanasio, qui (ut jam observatum est) affirmat, omnes omnino Episcopos subscripsisse editæ à Concilio fidei formulæ: 2. ex Sozomeno, qui lib. 1. cap. 28. expressè asserit, Eusebium, Theognidem, & Secundum approbasse formulam fidei à Concilio compositam: 3. ex ipso Socrate hist. lib. 1. cap. 10.

Quæres, an Arius ipse editæ à synodo fidei formulæ subscripserit.

Respondet Hieronymus, Arium subscripsisse fidei formulæ à Concilio editæ; hæc enim habet in dialogo adversus Luciferianos: *Susceptus est, caput horum, & causa malorum, Arius presbyter; quærentia autem Luciferiano, unde probari posset Episcopos Arianos, & ipsum Arium à sacrâ synodo fuisse susceptos, sic idem Hieronymus respondet: Supersunt adhuc homines, qui illi synodo interfuerunt.*

Illi

Illi Hieronymi responso adversantur 1. quæ scribit Socrates, scilicet à Concilio dictum fuisse anathema, tum errori, quem Arius docuerat, tum ipsi etiam Ario : *Quinque tantum reperti sunt, qui illam amplecti nollent . . . Vocem igitur Consubstantialis, plurimis cavillis, ac dictæis insectati, Arij depositioni subscribere noluerunt. Verba sunt Socratis hist. lib. 1. cap. 8.*

Adversatur 2. idem Socrates, qui loco mox laudato sic loquitur : *Quam ob causam synodus quidem Nicæna, Arium & omnes, qui cum eo sentiebant, anathemate percussit, adjecto insuper, ne Alexandriam ei ingredi liceret. Imperator vero, tum Arium ipsum, tum Eusebium, ac Theognem exilio multavit.*

Adversatur 3. Athanasii factum, qui quinquennio post Concilium, iussus ab Imperatore, ut Arium, qui fingens se adhærere Nicænæ fidei, eum deceperat, in communionem reciperet, ad id nusquam adduci potuit ; ut patet ex Socrate histor. lib. 1. cap. 20.

§. V.

De Canonibus Nicænis.

Not. De Canonibus Nicænis quæri potest : 1. quantus sit eorum numerus : 2. quâ in autoritate fuerint semper : 3. quisnam sit germanus eorum sensus.

De numero, & autoritate Canonum Nicænorum.

CONCLUSIO 1. Nec plus, nec minùs, quàm viginti, editi sunt Canones à Concilio Nicæno I.

Probatur 1. Nec plus, nec minùs, quàm viginti Canones, Nicænos recensent editæ ad hoc usque sæculum collectiones. 2. Nullo argumento, quod alicujus sit momenti, ostendi potest, Canones,

nes, qui vulgò dicuntur Arabici, seu, ex Græco in linguam Arabicam versi, editos fuisse à Concilio Nicæno I.

Objicies 1. Episcopi Africani postularunt à Bonifacio Papâ Canones Nicænos; non postularunt verò viginti, quos ex omnium sententiâ constabat editos fuisse à Nicænis Patribus, quippè eos jam acceperant à Cyrillo Alexandrino, & Attico Constantinopolitano missos: ergo supposuerunt, alios præter viginti, de quibus agitur, editos fuisse à Nicæno I. Concilio.

Resp. dist. maj. Postularunt Nicænos Canones à Bonifacio Papâ laudatos in causâ Appiarii Presbyteri Africani, conc. maj. veros Nicænos Canones, neg. maj. Canonem Sardicensem pro Nicæno Canone laudarat Bonifacius, ut latam à se pro Appiario in Africanis Conciliis damnato sententiam tueretur. Contestati sunt Africani, eum Canonem non esse Nicænum, probaruntque ex eo, quòd nec in exemplari quod ex ipso Concilio Nicæno Cecilianus Episcopus Carthaginensis Carthaginem detulerat, nec in aliis exemplaribus, quæ ad ipsos Africanos Cyrillus Alexandrinus, & Atticus Constantinopolitanus miserant, reperiretur.

Objicies 2. Summi Pontifices nonnumquam laudant Canones tanquam Nicænos, qui tamen non sunt inter viginti, qui in collectione Dionysianâ reperiuntur: ergo plusquam viginti, editi sunt ab ipso Nicæno I. Concilio.

Resp. conc. ant. neg. conseq. Nam 1. Bonifacius Canonem Sardicensem de appellationibus pro Nicæno laudavit, eò quòd tum Nicæni, tum Sardicenses Canones uno tenore descripti essent in Codice Romano. 2. Alii Summi Pontifices aliquando pro Nicænis laudarunt Canones in conciliis posterioribus editos, eò quòd qui postea editi sunt Canones, reducantur ad Nicænos tanquam primarios totius Ecclesiasticæ disciplinæ fontes.

Ob-

Objicies 3. Turrianus è Societate Jesu, scribit, octoginta Canones Arabicos, Pio IV. Pontifice Maximo, ex codice Alexandrini Patriarchæ descriptos fuisse à patre Joanne Baptistâ, quem Societatis Præpositus generalis in Ægyptum miserat. In iis autem Canonibus Arabicis reperiuntur, tum viginti, qui in antiquis Nicænorum Canonum collectionibus leguntur, tum plures alii, quos Romani Pontifices sub Nicænorum Canonum nomine, in suis epistolis laudarunt: ergo plusquam viginti Canones editi sunt in Concilio Nicæno I.

Resp. conc. ant. neg. conseq. Ratio est, quia codex Alexandrinus, ex quo descripti sunt Arabici Canones, erat collectio Canonum non ab uno tantum Concilio, sed à pluribus editorum: facta verò fuerat ea collectio, aut ab Episcopis Alexandrinis, aut à privatis quibusdam ad frequentiore Ecclesiæ Alexandrinæ praxim.

CONCLUSIO 2. Nicæni Canones summo semper ubique fuerunt in pretio.

Probatur. Oecumenicæ synodi (ut passim videre est apud Socratem, Sozomenum, Theodoretum) professæ sunt, se Nicænis Canonibus inhærere. Eosdem Canones tanquam totius ecclesiasticæ disciplinæ arcem laudarunt in suis epistolis decretalibus Romani Pontifices, eorumque autoritate usi sunt, ut irrita facerent, quæ in posterioribus nonnullis Conciliis, Constantino-politano I. v. gr. & Chalcedonenſi, contra ecclesiarum jura tentata fuerunt.

Explicantur Nicæni Canones.

Canon I.

Prior Nicænus Canon jubet 1. ut ii, qui aut propter languorem à medicis, aut per vim à barbaris evirati fuerint, in Clero permaneant, si ante abscissionem essent Clerici; si autem laici ad Clerum

254 Instit. Theolog. Prolegomena.
rum promoveri possint: jubet 2. ut ii, qui seipsos evirarunt, à Clero dejiciantur, si sint Clerici; nec unquam, si sint laici, ad ipsum promoveantur.

Origenis factum, qui seipsum absciderat, ut sine suspitione Scripturam mulieres doceret, sectæ Valesianorum, qui, Augustino teste, quosvis advenas violenter exsecabant, Canon, de quo agitur, occasionem præbuit.

Licet laudatus Canon eorum non meminerit, qui seipsos etiam propter languorem absciderint, eo tamen comprehenduntur, hoc est, iis tantum clericatum indulget, qui propter languorem, aliâ, non propriâ, manu evirati fuerint.

Canon II.

Alter Nicæni Concilii Canon vetat neophytorum, hoc est, non ita pridem baptizatorum hominum ordinationem. Nititur verò laudatus Canon Apostoli autoritate: *Non neophytum*, inquit, *ne in superbiam elatus, in judicium incidat diaboli*, &c. Non est tamen divini juris, sed ecclesiastici tantum; unde nonnunquam, aut in eo dispensatum est propter Ecclesiæ utilitatem, ut in Ambrosio; aut tolerata est contraria praxis, quam invexit in Ecclesiam Episcoporum incuria.

Canon expressè tantum loquitur de neophytis ex gentilitate; sed rationes, quibus nititur, eum extendunt ad quemlibet neophytum ex fide, siue fuerit gentilis, siue fuerit hæreticus. Imò qui in pluribus aliis Conciliis editi sunt Canones, illum extendunt ad neophytos, tum ex laicis, tum ex ætate; præscribunt nimirum, ut nemo ad presbyteratum, aut ad Episcopatum promoveatur, nisi ætatem, quam definiunt, attigerit, & in gradibus inferioribus certo tempore probatus fuerit. Adeat lector alterum tomum commentarii nostri historici de Sacramentis, ubi
fusè

fusè pertractatum est de neophytorum irregularitate.

Canon I I I.

Tertius Canon prohibet iis omnibus, qui sunt in clero, ne subintroductam habeant mulierem, nisi fortè sit aut mater, aut soror, vel amita, aut eas tantùm personas, quæ suspicioni locum dare non possint. Subintroductarum verò mulierum nomine intelliguntur quædam, aut viduæ, aut virgines piæ, quæ sub sororum, aut agapetarum nomine, in domesticum ministerium à clericis assumebantur.

Ulus initio licitus (ut patet ex Tertull. lib. de Monogamiâ cap. 16.) sed in pestem per humanam infirmitatem postea mutatus, hoc Nicæni Concilii tertio Canone abrogatus est.

Ea lex omnes omninò clericos complectitur: *Nec alicui omninò, qui in clero est.* Uxorum non meminit Canon, earum alioquin expressam mentionem factururus, si majoribus clericis, episcopis nimirum, presbyteris & diaconis, uti licuisset ductis ante ordinationem. Quæstionem de clericorum cœlibatu, agentes de subdiaconatu, pertractavimus in nostro commentario historico de Sacramentis.

Canon I V.

Quartus Canon jubet 1. ut omnes, ac singuli ejusdem provinciæ Episcopi conveniant ad novi ordinationem: jubet 2. ut si omnes faciliè convenire non possint, ordinatio à tribus saltem, absentibus scripto consentientibus, celebretur: jubet 3. ut in eâ ordinatione Metropolitanus primas habeat partes.

Duo priora Canonis membra, ex Balsamone, intelliguntur de electione, tertium de consecratione, in quâ, ut licita sit, saltem extra casum necessitatis, non autem ut valeat, duo Episcopi debent Metropolitanus consecrantis assistentes esse.

De Episcoporum electionibus, & consecratione
plura diximus in eodem nostro commentario hi-
storico de Sacramentis.

Canon V.

Quinto Canone sancitur, ut censuræ ab Episco-
pis latæ in laicos, aut in clericos sibi subditos,
etiam apud aliarum provinciarum Episcopos va-
leant. Sancitur 2. ut eæ censuræ tollantur, aut ab
iis tantum Episcopis, à quibus latæ fuerint, aut à
provinciæ Concilio; quod quidem bis uno quoq;
anno, ante quadragesimam nimirum, & circa
tempus autumnale, præcipitur celebrari.

Canon locum dederat Eusebius Nicomedi-
ensis, qui Arium ab Episcopo Alexandrino segre-
gatum, propriâ autoritate in communionem
admiserat. Intelligitur idem Canon absque
præjudicio appellationis ad auctoritatem Con-
cilio provinciali majorem.

Canon VI.

Sextus Canon præscribit 1. ut Alexandrinus
Episcopus præsit diocesibus omnibus, quæ sunt
in Ægypto, Libyâ, & Pentapoli. Præscribit 2. ut
Antiochenus Episcopus subditas sibi provincias,
Syriam nimirum, Cælesyriam, Ciliciam, utramq;
Mesopotamiam, administret. Præscribit 3. ut qui-
busque Ecclesiis sua jura servantur. Præscribit 4.
ne pro Episcopo habeatur, qui præter Metropo-
litani sententiam factus est Episcopus. Præscri-
bit 5. ut rata habeatur electio communi suffragio
peracta, quamvis duo aut tres Episcopi contra-
dixerint.

Priori Canonis parti Meletianum schisma, de
quo superius dictum est, occasione fuerat.

Falsò ex primâ & secundâ ejusdem Canonis
parte, nonnulli concludunt, tres majores Patriar-
chatus, Romanum, Alexandrinum, & Antioche-
num, institutos primum fuisse in Concilio Nicæ-
no

no I. quippè duplex ea Canonis pars antiquiore consuetudine nititur: *Antiqua*, inquit Canon, *consuetudo servetur*.

Immeritò quoq; ex his Canonis verbis: *Quia & urbis Romæ Episcopo parilis mos est*, Heterodoxi impugnant Romani Pontificis in universâ Ecclesiâ primatum. Nempè Canon Alexâdrinum Episcopum cum Romano comparat in jure Patriarchali, non autem in jure Papali, hoc est, vult, ut ille fruatur Ecclesiis suo Patriarchatui subditis, sicut Romanus Pontifex fruitur Ecclesiis suo Patriarchatui subditis; toto nimirum Occidente, Africâ, Septentrione, & Illyrico. Mox dato sensui favet Rufini versio: *Vt, inquit, ille Ægypti, vel hic suburbicariarum Ecclesiarum curam gerat*. Sed de eo Canone redibit sermo, ubi inferiùs agetur de divino Romani Pontificis in totâ Ecclesiâ primatu.

Canon VII.

Septimo Canone decernitur 1. ut Episcopus Hierosolymitanus habeat *honoris consequentiam*, hoc est, ut sedeat in Conciliis post Episcopum Romanum, Alexandrinum, & Antiochenum. Decernitur 2. nullum inde damnum quoad jurisdictionem inferri debere Metropolitano, hoc est, Cæsariensi Episcopo, cui subdita erat Hierosolymorum Ecclesia.

Canon Patriarchæ nec nomen, nec jurisdictionem, sed honorem tantum Episcopo Hierosolymitano antiquâ consuetudine concessum confirmavit; nec immeritò, nam Hierosolymorum Ecclesia mater est omnium aliarum Ecclesiarum, sed eo sensu, quòd in ea, tanquam in incunabulis Christiana religio nata fuerit.

Canon VIII.

Octavus Canon agit de Novatianis, qui se Catharos, hoc est, Puros dicebant. De iis autem statuit 1. ut si Ecclesiæ dogmata suscipiant, in

Clero permaneant, *impositionem manuum accipientes*. Statuit 2. ut in locis, ubi fuerint Episcopi Catholici, Novatiani solo Episcopi nomine retento, aut presbyteratu fungantur, aut chorepiscopatu donentur.

Manuum impositionem, cujus Canon meminit, nonnulli de reconciliatoriâ, seu, de Sacramento Pœnitentiæ interpretantur; alii de confirmatoriâ, hoc est, de Confirmationis sacramento, quod Novatiani suis neophytis non conferebant; alii tandem eam, de quâ Canon agit, manuum impositionem, exponunt de ordinatoriâ, hoc est, de Ordinis Sacramento, quod, aiunt illi Scriptores, Patres jubent in Novatianis iterari, quia eos ad illud in suâ sectâ conferendum Ecclesia Catholica inhabiles reddiderat. De eâ difficultate consuli potest noster commentarius historicus de Sacramentis, tum in dissertatione de Sacramento Confirmationis, tum etiam in dissertatione de Ordinis sacramento.

Clericatus honor & potestas Novatianis in Ecclesiæ sinum redeuntibus debita non erant; nam ferebant, qui tunc observabantur Canones, ut Clerici, vel in hæresim, vel in schisma lapsi, aut ne etiam in fine vitæ reciperentur, aut si reciperentur, non fruerentur, nisi laicâ communione; sed Novatiani, œconomix & charitatis causâ, ab iis Canonibus à Nicænâ synodo dispensati sunt.

Canon IX.

Nono Nicæno Canone deponuntur Clerici, qui aut absque prævio examine, aut gravia quædam peccata confitentes, promoti sunt.

Examen autem, cujus Canon meminit, non intelligitur de scientiâ tantum, sed etiam de moribus; idque probat disjunctiva Canonis particula: *Vel peccata sua confessi sunt*. Promotionem absq; prævio illo examine tentatam Concilium dicit esse *contra Canones*; nempe varii eâ de re

re sanciti fuerant in variis provincialibus conciliis; addit esse quoque *regulam*, Apostolicam nimirum, ut patet ex Pauli, tum ad Timotheum, tum ad Titum, epistolis.

Canon X.

Canon decimus deponit Clericum, qui post lapsum promotus fuisset ab Episcopo, aut per ignorantiam, aut per dissimulationem.

Lapsum verò nomine intelliguntur præsertim ii, qui, sæviente persecutione, facto, aut verbis ejurarant fidem; intelliguntur quoque ii, qui rei essent gravium externorum criminum, ut sunt adulterium, & homicidium.

Verbum illud, *aut per ignorantiam*, probat Canonem intelligi de criminibus occultis; ac proinde sequitur ex criminibus, etiam occultis, tunc contrahi solitam fuisse irregularitatem, tum respectu recipiendorum ordinum, tum respectu exercitii receptorum, hoc est, laicos per ea crimina inhabiles fuisse ad recipiendos ordines; & Clericos ad eos exercendos, quos eorum criminum rei recepissent.

Canon XI.

Undecimus Canon spontè lapsos, hoc est, aut non coactos tormentorum vi, aut non territos vitæ, vel facultatum periculo, admittit ad reconciliationem, ubi tamen per decennium in variis penitentium classibus pœnitentiam probaverint.

Observandum est 1. eo in Canone agi de lapsis post baptismum; nam Canon 14. agit de catechumenis, qui nondum baptizati, lapsi fuissent.

Observandum est 2. specialem esse, nec antea alicubi definitum, usum illum, cujus Canon meminit; neque enim est idem cum eo, de quo Cyprianus Clerum Romanum consuluerat; quippe Clerum Romanum non interrogarat, nisi de iis, qui aut tormentorum vi, aut facultatum periculo territi, fidem ejurarant.

Observandum est 3. Canonem recensere tantum tres pœnitentium classes, Audientium nimirum, Prostratorum & Consistentium: de Flentium verò classe, de quâ fit mentio in Epistolâ Gregorii Thaumaturgi ad Amphilochem, silet omnino: hincque colligitur, eundem ubique non fuisse artificialium illarum classium usum. Sed de his multa diximus in nostro commentario, nonnulla quoque dicturi sumus harum Institutionum theologicarum tomo ultimo, ubi de pœnitentiæ sacramento disseremus.

Canon X I I.

Canon duodecimus, 1. Post triennii tempus in auditione expletum, triennio in substratione damnat eos, qui *deponentes militiæ cingulum, post modum verò ad proprium vomitum sunt relapsi*. 2. Facultatem facit Episcopo, ut pro fervore, quem ejusmodi pœnitentes in auditione probaverint, dispenset à substratione, minuatque consistentiæ tempus: *Tum demùm fidelibus in oratione communient: postmodum verò licebit Episcopo de his aliud quid humanius cogitare.*

Circa priorem Canonis partem quæritur, quinam ii sint, qui *deponentes militiæ cingulum, &c.*

Respondent passim interpretes, iis verbis intelligi debere milites, qui ubi cum militibus gentilibus, aut ante certamen, aut post reportatam victoriam, diis immolare noluerint, resumebant postea militiæ cingulum cum idololatriæ, aut conditione, aut periculo. Sed Canon eo sensu sumptus, ab undecimo non discreparet: quod est absurdum.

Respondentalii, militiæ professionem Christianis olim non licuisse. Sed ea responsio nullo fundamento nititur. Nec alicujus ponderis est eo in capite sententia Tertulliani, docentis militiam licuisse quidem iis quos fides milites invenerat, seu,

seu, qui antequam baptizarentur, militiam profitebantur; non autem iis, qui ante baptismum ei non dederant nomen: par enim est utrobique ratio.

Dicendum est igitur, Canonem intelligi de pœnitentibus, qui relictâ, quam amplexi fuerant, pœnitentiâ, rursus dabant se, aut militiæ, aut sæcularibus negotiis, quibus pœnitentes (ut patet ex Epistolâ Innocentii Papæ I. ad Victricium Rothomagensem) interdicebantur.

Circa alteram Canonis partem observandum est, eam à substratione decurrendâ dispensationem esse, ut nunc loquimur, indulgentiam propriè dictam. Hinc verò colligitur, patres attendisse ad contritionis fervorem, & ad peractos pœnitentiæ Canonice labores, ut indulgentias majores, vel minores pœnitentibus largirentur. Colligitur iterum, indulgentiam nihil aliud esse, quàm impositæ, aut juxta Canones imponendæ, satisfactionis remissionem. Adeat lector nostrum de Indulgentiis tractatum ad calcem tomi de Sacramentis.

Canon X I I I.

Decimo tertio Canone præscribitur 1. ut ii, qui periculosè ægrotant, *ultimo & maxime necessario viatico minime priventur*. Præscribit 2. *ut communionem consecutus, & oblationis particeps factus, si convaluerit, stet in consistentium gradu*. Præscribit 3. *ut cuilibet in exitu posito, & poscenti communionis gratiam, Episcopus probabiliter ex oblatione dare debeat*.

Toto eo in Canone, cujus verba retulimus, de iis agitur, qui dum sani essent, pœnitentium classes decurrere cœperant; nam iis, qui in infirmitate tantum reconciliationem poscebant, negabantur, tum absolutio sacramentalis, tum Eucharistica Communio: hinc jubet Canon, ut

ejusmodi pœnitentes, si accepto viatico convalescerint, inter consistentes orent.

Viatici nomine, de quo prior Canonis pars loquitur, nonnulli intelligunt perfectam reconciliationem, hoc est, absolutionem sacramentalem & communionem Eucharisticam, sed immeritò; nam viaticum, de quo quæstio est in priore Canonis parte, non est idem cum communione, de quâ secunda pars loquitur: siquidem viaticum, cujus prior pars meminit, cuilibet pœnitenti tribui debet in exitu; communio verò, cujus fit mentio in alterâ parte, iis tantùm conceditur, quorum Episcopus, non autem inferior aliquis sacerdos, mores & vitam exploraverit.

Dicendum est igitur cum Albaspineo, viatici nomine intelligi sacramentalem absolutionem; quippè Canon dicit illud viaticum esse *maximè necessarium*; quod tamen non dicit de communione, de quâ in alterâ parte Canonis agitur; ac proinde loquitur de relapsis necessariâ necessitate medii; quod quidem (ut ex tractatu de Sacramento Pœnitentiæ supponitur) soli absolutioni sacramentali convenit.

Inde colligitur, Canonem confirmare, quæ tum à Zephirino de pace mœchis pœnitentiâ perfunctis dandâ; tum de idololâtris & homicidis reconciliandis, ut à Cypriano Carthagine, & à Cornelio Romæ decretum fuerat; cui quidem & Zephirini, & Cornelii, & Cypriani decreto contraria fuerat antiqua praxis, quæ adulteris, homicidis & idololâtris, licet pœnitentiâ sani perfuncti fuissent, in ipso vitæ exitu, aliquibus saltem in locis, reconciliationem negaverat.

Canon XIV.

Decimoquarto Canone Nieæno, trium annorum audientiâ damnantur Catechumeni, qui in aliquod grave scelus lapsi fuerint.

Qui-

Differt.IV. *De Locis Theologicis*. 263

Quinam essent Catechumeni, & quot eorum essent classes, fusè dicemus, agentes de Baptismatis sacramento.

Pœnitentia, quâ Catechumeni hoc in Canone damnantur, non erat satisfactoria; neque enim Catechumeni Ecclesiæ clavibus sunt subjecti; sed erat ad baptismum preparatoria, hoc est, Ecclesiæ trium annorum audientiâ probabat, an Catechumenos in catechumenatu lapsos, sui lapsus verè pœniteret.

Canon XV.

Decimoquinto Canone prohibentur, ac irritæ declarantur Episcoporum, presbyterorum, & diaconorum translationes.

Canonis rationem reddit Hieronymus in epistolâ ad Oceanum: *Ne*, inquit, *virginis periculæ societate contemptâ, ditioris adulteræ quærat amplexus*. Illud tamen, quod hîc prohibetur, divortium, potest ex causâ fieri.

Observandum est, Canonem non prohibere, ne Episcopus intra propriam diœcesim, presbyteros, aut diaconos in alios titulos transferat; nam hæc verba: *De civitate in civitatem*, respectu Episcopi, intelliguntur tantùm de translatione ex unâ diœcesi in aliam: ergo eodem sensu intelliguntur quoque respectu presbyterorum, & diaconorum.

Canon XVI.

Canon decimus sextus vetat 1. ne Clerici, absque proprii Episcopi facultate, ad aliam diœcesim transeuntes, communicent. Vetat 2. nè quis Episcopus alienum Clericum, aut retinere, aut ad altiorem ordinem promovere audeat; idque sub nullitatis pœnâ.

Communione nomine hîc intelligitur Ecclesiastica, ita ut Canon velit, Clericum non posse in alienâ diœcesi ordinis sui munera obire invito proprio Episcopo, hoc est, eo à quo fuit or-

dinatus; is enim Nicæni Concilii tempore erat solus proprius Episcopus.

Hiscæ verbis : *Ordinatio hujusmodi irrita comprobetur*, intelligitur, secundum Morinum, ordinatio, quæ sit irrita, ac nulla non tantum secundum executionem, sed etiam quoad characterem & substantiam; quippè, ait, Ecclesia prioribus sæculis inhabilem reddiderat Episcopum ad ordinandum alienum Clerum. Sed, secundum alios, intelligitur ordinatio, quæ irrita quidem sit secundum executionem, seu, ordinis exercitium; sed quæ valeat quoad characterem & substantiam. Quinam probabilius sentiant, explicuimus agentes de Ordinis Sacramento.

Canon XVII.

Canon decimus septimus, Clericis omnibus sub depositionis pœnâ prohibet, ne *centesimas*, aut *hemiola*, id est, *sexcupla*, aut aliquid aliud præter sortem exigant ex mutuo, aut ex negotiatione, in quâ mutuatum mutuanti servetur indemne.

Centesimarum nomine, intelligitur centesima pars per mensem, ex pecuniâ, aut frugibus mutuò datis, ita ut duodecim nummi supra centum mutuò datos singulis annis mutuanti à mutuatorio solvantur.

Hemiola, hoc est, sexcupla, ex Zonarâ in hunc Canonem, est dimidia pars centesimæ: ex Hieronymo verò, est tertia pars superexcedens frugum, aut frumenti copiam mutuò datam. Duplici illâ usurâ, hoc Canone XVII. Clerici interduntur, imò & quâvis aliâ, quantumcumque exigua fuerit: *Vel aliquid tale*, inquit, *prorsus excogitans turpis lucri gratiâ*.

Observandum est. i. Canonem usuram vocare, quidquid præter sortem acceptum fuerit: 2. non loqui de laicis, sed de solis Clericis, eò quòd Romanæ leges duplicem illam usuram permitte-
rent.

rent. Verùm Canon laudans hæc Scripturæ verba : *Qui pecuniam suam non dedit ad usuram* , sat innuit, usuram cuilibet, tum laico, tunc Clerico, vetitam esse jure divino , imò & naturali ; neque enim veteris testamenti præcepta vigent in novo, nisi in iis, in quibus aliquid ex naturali jure includitur.

Canon XVIII.

Canon decimus octavus vetat 1. ne diaconi *sacrae communionis gratiam* presbyteris porrigant : 2. ne ipsi ante , sed tantum post presbyteros eandem communionis gratiam recipiant : 3. ne iidem diaconi sibi ipsis communionem impertiantur ; jubet verò , ut eam , aut ab Episcopo , aut à presbytero recipiant : 4. ne sedeant in presbyterorum confessu .

Prioris Canonis pars confirmatur ex eo , quòd par non sit, inquit Concilium, ut ab his, qui potestatem non habent offerendi , illi qui offerunt , Christi corpus accipiant . Aliæ Canonis partes hæc ratione confirmantur , quòd *diaconi episcoporum quidem ministri sint* , inferiores autem presbyteris habeantur .

In illum Canonem observare est 1. Concilium non vetare , quin diaconi in publicis synaxibus sacram communionem Clericis inferioribus , fidelique populo dispensent ; imò jus illud in eis supponit, cum, ut definiunt jura, exceptio firmet regulam .

Observare est 2. tempore Concilii Nicæni I. Ecclesiam Eucharistiam obtulisse in sacrificium ; nam ex potestate offerendi, quæ Episcopis tantum & presbyteris conveniret, Concilium colligit, non licere Diaconis Eucharistiam presbyteris porrigere .

Observandum est 3. tempore quo habitum est Concilium, unius ac ejusdem Ecclesiæ presbyteros non diversas missas , sed unam tantum

simul cum Episcopo celebrare solitos fuisse : in eâ autem solemni Missâ presbyteri omni ex parte Altare circumcingebant : in eâ verò solemni Missâ diaconi jus illud sibi arrogarant, quod Canon, quem expendimus, damnat.

Canon XIX.

Canone decimonono definitur 1. Paulianistas ad Ecclesiam redeuntibus baptizari debere. Definitur 2. eos, qui apud Paulianistas Clerici fuissent, accepto novo baptismo, & novâ ordinatione, posse in Clero remanere, si irreprehensibiles apparuerint. Definitur 3. idem privilegium concedi debere diaconis, quæ apud eosdem Paulianistas recepissent manuum impositionem; non autem iis, quæ aut ad id muneris electæ quidem, sed nondum consecratæ fuissent per manuum impositionem; aut quæ officium illud usurpassent, ut, teste Tertulliano, plerumque fiebat apud hæreticos.

Notandum est hæc 1. discrimen Paulianistarum à Novatianis. Istorum baptisma Concilium implicite probat octavo Canone; nec enim præscribit, ut iis, cum in Ecclesiæ sinum redierint, aliud baptisma conferatur; è contra verò irritum declarat datum à Paulianistis, hoc est, Pauli Samosatani discipulis: Nec id mirum est; siquidem (ut ait Innocentius I. epist. 22. cap. 6.) *Paulianistæ* (qui Sabellii, Trinitatis personas confundentis, impium dogma renovarant) *in nomine Patris, & Filii, & Spiritus Sancti minime baptizabant; & Novatiani ejusdem tremendis, venerandisque nominibus baptizabant.*

Notandum est 2. privilegium obeundi sacras functiones Paulianistis concessum, non fuisse exceptionem à regulâ, quâ vetitum erat, ne in hæresim lapsi, aut in eâ ordinati, admitterentur in Ecclesiam cum facultate fungendi suorum ordinum exercitio; nam Paulianistæ non erant Christiani,
cum

cum non essent valido baptismo consecrati; ac proinde potius erant infideles, quam hæretici.

Notandum est 3. Diaconissas olim Clero reverà adscriptas fuisse, ac per manuum impositionem consecratas; ea tamen consecratio non erat ordo, nisi valdè improprie, ut de Diaconissarum institutione, abrogatione, officiis, dotibus agentes, diximus in historico nostro de Sacramentis commentario.

Canon XX.

Canon vigesimus prohibet, ne quis die Dominico, aut diebus Pentecostes, genua inter orandum flectat; ut, inquit, omnia in omnibus consonanter observentur.

Observandum est 1. eo in Canone agi de publicâ in templis oratione, non autem de secretâ in domibus privatis.

Observandum est 2. morem flectendi genua in publicis orationibus, paucorum tantum fuisse: *Quidam*, ait Canon, *in die Dominico, &c.* Cæterum de genuflexione, statione, aliisque veterum orandi ritibus, legere est Tertullianum libro de Oratione.

Observandum est 3. per hæc verba: *In diebus Pentecostes*, Concilium intelligere tempus, quod à Paschate fluit ad Pentecosten inclusivè. Externo illo ritu majores nostri suam de Christi resurrectione fidem solemniter profitebantur.

ARTICULUS II.

De Concilio Constantinopolitano I.

DE Concilio Constantinopolitano I. quod est secundum generale, quaeri potest 1. quam ob causam coactum fuerit: 2. quid definierit: 3. quosnam condiderit Canones: 4. an reverà sit generale concilium.

§. I.

*De causa Constantinopolitani
I. Concilii.*

CONCLUSIO. Duplici de causâ celebratum est Concilium Constantinopolitanum I. anno 381.

Probatur autoritate Socratis, qui lib. 5. hist. cap. 8. sic loquitur: *Posthæc Imperator, Theodosius, suæ fidei Episcoporum Concilium convocavit, quo & Nicæna fides confirmaretur, & Constantinopoli ordinaretur Episcopus.* Idem patet ex ejusdem Concilii synodicâ ad Episcopos Romæ, ad Concilium sub Damaso Papâ congregatos.

Quæres, quinam ii essent, contra quos Nicæna fides confirmanda erat, cum habitum est Constantinopolitanum I. Concilium.

Resp. Nicænam fidem confirmari debuisse contra Arianae sectæ præcipuos ramos, Macedonium, Aetium, Eunomium, eosque omnes, qui post Concilium Ariminense, ex decreto Constantii Imperatoris, dicebant, Dei Filium, nec Homousion, neque Heterousion, sed tantum Patri in omnibus similem.

Macedonius Ecclesiæ Constantinopolitanæ à Constantio Præpositus, primum meram Arii hæresim propugnavit; postea varia ob sceleta, quorum erat reus, ab eodem Constantio, agentibus Arianismi præcipuis capitibus Acacio & Eudoxio, ad Semi-arianos conversus, Homœousion vocem usurpare cœpit, hoc est, desiit id asserere, quod assererat antea, id est, *Verbum esse simile Patri, sed non similis substantiæ.* Sed quod Verbo visus fuerat concedere, apertè negavit Spiritui Sancto; nempe docuit, ipsum nec esse Homousion, hoc est, ejusdem substantiæ cum Patre, nec Homœousion, seu, similis substantiæ; sed omninò diversæ, hoc est, Spiritum

tum sanctum ad meræ creaturæ ordinem rede-
git .

Æthius (ut scribit Epiph. Hær. 76.), Ari-
stotelicæ philosophiæ methodo abusus , apertè
Verbi divinitatem cum Ario , apertè quoq; Spi-
ritûs Sancti divinitatem cum Macedonio impu-
gnavit .

Eunomius, qui Æthium magistrum audierat ,
easdem cum ipso in Filium, & Spiritum sanctum
blasphemias evomuit . Apertè nimirum & Ho-
mouision, & Homœouision rejecit, adjecitq; utrius-
que respectu Heterouision : hoc est , asseruit, Fi-
lium, & Spiritum sanctum esse alterius à Patre
substantiæ . Illius discipuli (nam ob dicendi ar-
tem sectæ dederat nomen) Anomiani, seu, Ano-
mœi dicti sunt .

§. II.

Quid definierit Concilium Constan- tinopolitanum I.

CONCLUSIO . Concilium Constantinopo-
litanum I. quatuor præstitit .

Probatur enumeratione : 1. Nectarium, Gre-
gorio Nazianzeno in Sede Constantinopolita-
nâ successorē, dejecto Maximo , suffecit : 2.
confirmavit Nicænæ synodi fidem, editoque ab
ipsâ symbolo addidit expositionem, in quâ Spi-
ritui sancto eandem cum Patre, & Filio divinita-
tem apertè tribuit : 3. condidit Canones quosdam
ad disciplinam spectantes : 4. ad Damasum Pa-
pam, & ad reliquos Occidentis Episcopos, qui
Romæ ad Concilium convenerant , direxit
epistolam synodicam, in quâ Concilii acta re-
feruntur .

§. III.

*De Canonibus Concilii Constantinopolitani I.**Canon I.*

In priore Canone Concilii Constantinopolitani I. dictum est anathema in eos, qui blasphemarant in SS. Trinitatem; Sabellianos nimirum, Eunomianos, Macedonianos; tum etiam in eos, qui errarant circa Verbi Incarnationum; nempe Marcellianos, Photinianos, Apollinaristas.

Canon II.

In Canone, qui in Dionysii Exigui collectione habetur secundo loco, confirmantur jura, quæ à Nicænis Patribus Ecclesiis adscripta fuerant; cum hac tamen exceptione, quod Episcopo Constantinopolitano patres tribuerint, *honoris primatum post Romanum Episcopum, propterea quod urbs ipsa sit junior Roma.*

Observe lector, exceptionem de Ecclesiâ Constantinopolitanâ non repetiri in epistolâ synodica, quam Concilium ad Occidentales scripsit; probabile est, Orientales noluisse eâ exceptione offendere animos Occidentalium, quos sciebant esse Nicænis Canonibus addictissimos. Ex eâ omissione aliqui concludunt, Canonem illum esse supposititium; alii eum quidem admittunt, sed volunt editum fuisse, & relatum in acta Concilii post electionem Nectarii, & discessum Timothei Alexandrini, qui, ut suæ Ecclesiæ juribus consuleret, haud dubiè Canoni, de quo agitur, obstitisset. Illius tanquam non supposititii, sed certò editi Canonis meminerunt illorum temporum historici, Socrates histor. lib. 5. cap. 2. Sozomenus lib. 7. cap. 8.

Ca-

Canon III.

Canone, qui tertius est apud Dionysium Exiguum, quartus verò apud Gentianum Hervetum, qui secundum Dionysianum in duos divisit, irrita declaratur Maximi in Episcopum Constantinopolitanum ordinatio facta ab Ægyptiis Episcopis; irrita quoque fit ordinatio eorum, quibus idem Maximus manus imposuerat: *Placuit neque Maximum Episcopum esse, vel fuisse, nec eos, qui ab ipso in quolibet gradu Clerici sunt ordinati.*

Morinus noster in suo de sacris ordinationibus commentario, censet, latum in Maximum Canonem exponi non debere de solâ depositione, sed de nullitate ordinationis, etiam secundum substantiam sumptæ; nempe asserit, ordinationes contra Canones etiam à Catholicis Episcopis tentatas, olim irritas fuisse non tantum secundum exercitium, sed etiam secundum substantiam, ita ut characterem non imprimerent.

Canon IV.

In quinto apud Gentianum Hervetum Canone patres in sui communionem admittunt, tum Meletio, tum Paulino Antiochiæ adhærentes, eò quòd utrique SS. Trinitatis fidem confiterentur. Verum utrum Meletius præ Paulino, aut Paulinus præ Meletio verus esset Episcopus Antiochenus, definire noluerunt, eò quòd scirent, Paulini ordinationem ab Occidentalibus probari, improbari verò ordinationem Meletii.

Zonaras censet, per *libellum Occidentalium*, cujus Canon meminit, intelligi decretum Concilii Sardicensis, quo Athanasius, & alii ab Arianis dejecti, in suas sedes restituti fuerant.

Canon VI.

Canone, in Herveti collectione, sexto statuitur I.

tur 1. in iis, quæ ad res Ecclesiasticas spectant, admitti non debere, aut hæreticorum, aut schismaticorum, aut excommunicatorum, aut eorum etiam, qui sunt in Ecclesiâ, sed accusati non se purgarunt, accusationes adversus Episcopos. Statuitur 2. ut impactum Episcopo crimen expendatur in provinciali synodo, à quâ provocari possit ad totius diœcesis, seu, plurium provinciarum sub Primate, aut Patriarchâ maiorem synodum. Statuitur 3. ut in synodis generalibus non admittantur adversus Episcopos accusationes, quæ antea in diœceseos synodis examinatæ non fuerint : *Si quis ausus fuerit universalem synodum perturbare, neglectis diœcesis Episcopis, eum nullo modo esse ad accusationem admittendum.*

Observandum est, Canonem non meminisse provocationis ad Sedem Apostolicam, eò quòd (inquiunt nonnulli, quorum sententiam, an vera sit, aut falsa, hic non expendimus) omnes omninò causæ, siue Episcoporum, siue aliorum, nisi ad fidem pertinerent, in Conciliis, aut provincialibus, aut diœcesanis, aut multarum diœceseon synodis ultimò judicarentur.

Canon VII.

In septimo Canone, ex ejusdem Herveti interpretatione, decernitur 1. ut Ariani, Macedoniani, Novatiani & Apollinaristæ, si velint redire in Ecclesiæ sinum, admittantur per christi unctioem, quam comitentur hæc verba : *Signaculum doni Spiritus sancti*. Decernitur 2. ut Eunomiani, Montanistæ, & Sabelliani recipiantur per aliud baptisma.

Morinus in suo commentario de Sacramento Pœnitentiæ docet, ritum illum, quem in quibusdam hæreticis admittendis Canon septimus recenset, intelligi de Confirmationis Sacramento; quod quidem, inquit, hæretici, etiamsi formam debitè applicarent materiæ, validè tamen non con-

conferebant, quia Ecclesia eos ad illud Sacramentum conferendum inhabiles per sua decreta reddiderat. Alii è contra contendunt, ritum, de quo agitur, fuisse merè cerimonialem, non autem sacramentalem; neque enim, inquiunt, verba ista: *Signaculum doni Spiritus sancti*, sed preces, per quas invocatur Spiritus sanctus ad robur, sunt forma Sacramenti Confirmationis.

Theodoretus observat, alterâ septimi Canonis parte declarari, baptisma ab Eunomianis, & aliis, qui ibidem recensentur, datum, iterari debere, eò quòd præscriptâ in euangelio formâ non uterentur.

Observet lector, tres posteriores Canones non reperiri in collectione Dionysii Exigui: fortè eos illi non inseruit, quòd sciret, Occidentalibus apud quos scribebat, non probari sancitam in iis disciplinam.

§. IV.

Vtrum Concilium Constantinopolitanum

I. sit Concilium Generale.

CONCLUSIO. Concilium Constantinopolitanum I. non fuit generale, nisi post datum ipsi ab Occidentalibus consensum.

Probatur prior pars. Ad Concilium universale necessariò requiritur, ut Ecclesia Occidentalis ei adsit, aut per se, aut per suos legatos: atqui nullo modo adfuit Constantinopolitano I. Concilio; neque enim ei vel unus adfuit Episcopus Occidentalis.

Probatur altera conclusionis pars. Concilium, quod initio non est generale defectu alicujus conditionis, postea fit generale, cum ea conditio ponitur: ergo Concilium Constantinopolitanum I. factum est generale per Occidentalium consensum, qui deerat, cum habitum est in Oriente.

Con-

Confirmatur autoritate Gregorii Magni, qui lib. 6. epist. 125. asserit, Concilium, de quo agitur, ab Occidentalibus receptum fuisse in iis quæ ad fidem spectant: *In hoc autem, inquit, eandem synodum accepit Ecclesia Romana, quod est per eam contra Macedonium definitum; reliquas verò hæreses, quæ illic memoratæ fuerunt, ab aliis jam patribus damnatas reprobant.*

ARTICULUS III.

De Concilio Ephesino I.

CONCILIUM Ephesinum I. quod anno 431. imperante Theodosio juniore, Cælestino Romæ sedente, celebratum est, dicitur tertium Concilium generale. De eo quæremus eadem, quæ de duobus prioribus quæsitæ sunt.

§. I.

De causa Concilii Ephesini I.

CONCLUSIO. Concilium Ephesinum I. celebratum est contra Nestorium.

Probatur tum ex ejusdem Concilii actis, tum ex litteris convocationis, tum ex Cælestini ad Cyrillum, & Cyrilli ad Cælestinum epistolis.

Quæres, quis esset Nestorius, quam propugnaret hæresim, quis præcipuus fuerit illius adversarius.

Resp. ad 1. Nestorium Germaniciæ in Oriente natus, presbyterio in Ecclesiâ Antiochenâ cum laude perfunctum, tandem à Theodosio juniore, summo omnium plausu, electum fuisse in Episcopum Constantinopolitanum.

Resp. ad 2. Nestorium, statim atque consecratus fuit, publicâ in concione asseruisse, duas esse

in

in Christo hypostases, ac personas, proindeque duos filios; unum quidem Deum ex Patre Deo, hominem alterum ex matre, quam docebat non Theotocon, sed Christotocon appellari debere.

Resp. ad 3. Cyrillum Episcopum Alexandrinum damnasse errorem Nestorii in plurium Episcoporum synodo, quam habuit Alexandria, & in qua duodecim ipsi anathematismos opposuit. Coacto pariter Romæ Concilio proscriptus est à Cælestino Papâ. Verum cum Nestorius, nec Alexandrinæ synodi, nec Romanæ, rationem haberet, indictum fuit Ephesi Concilium generale, in quo post debitum examen, definitum fuit, unam tantum esse, Verbi nimirum, in Christo personam; ac proinde Mariam verè dici ac esse Deiparam.

§. II.

De convocatione, & præside Ephesini I. Concilii.

Not. De Ephesini I. Concilii convocatione & præside, nonnulla jam dicta sunt iis locis, ubi actum est de Conciliis in genere: hinc tamen aliqua alia addenda censemus.

CONCLUSIO 1. Concilium Ephesium I. convocatum fuit ab Imperatore Theodosio juniore.

Probatum variis monumentis. *Primò*, Theodosii de Concilii Ephesini I. convocatione mandatum legitur ejusdem Concilii par. 1. cap. 31. *Secundò*, patres sæpiùs in ejusdem Concilii actis testantur, se convenisse Imperatoris jussu. *Tertiò*, id apertè scribunt Socrates hist. lib. 7. cap. 34. Evagrius lib. 1. cap. 3.

CONCLUSIO 2. Cyrillus Alexandrinus præfuit Ephesino I. Concilio; nec locum amisit suum post adventum Arcadii, Projecti & Philippi, quos Cælestinus Papa suo & totius Ecclesiæ

Oc-

Occidentalis nomine ad Concilium miserat.

Probatur prior pars . In ipsis Concilii actis sæpè dicitur, quòd Cyrillus Nestorium deposuerit, quòd fuerit Concilii caput . Leo Magnus epist. 47. sic loquitur : *Prioris autem Ephesinæ synodi , cui sanctæ memoriæ Cyrillus Episcopus tunc præsedet , statuta permaneant .*

Quæres, quo jure ante Occidentalium adventum Cyrillus Ephesino I. Concilio præfuerit.

Resp. præfuisse tum proprio, tum Romani Pontificis nomine : proprio quidem ; erat quippè post Romanum Pontificem primus totius orbis Episcopus ; proindèque par erat, ut absentibus Romani Pontificis legatis, primum in Concilio locum obtineret : præfuit quoque Cælestini nomine ; siquidem illi vices commiserat suas Cælestinus , ut patet ex ejusdem Cælestini ad Cyrilum litteris, ubi sic eum alloquitur : *Quamobrem nostræ Sedis auctoritate adscitâ , nostrâque vice , & loco cum potestate usus , &c.* unde Concilii actione primâ, idem Cyrillus dicitur, *Cælestini Romanæ Ecclesiæ Archiepiscopi locum obtinuisse .*

Probatur altera conclusionis pars 1. ex hujusce synodi actione tertiâ, ubi licèt adessent Occidentales legati, Cyrillus ante eos nominatur, diciturque Cælestini Papæ tenere locum : *Confidentibus Cyrillo Alexandrino , qui & Cælestini quoque sanctissimi Romanæ Ecclesiæ Archiepiscopi locum obtinebat , & Arcadio Episcopo , Romanæ Sedis legato , &c.* 2. Actione 6. Cyrillus ab ipsis Ephesinis Patribus vocatur Concilii præses . 3. Cyrilli subscriptio in actis, prout nunc extant , legitur ante subscriptionem Occidentalium legatorum .

Objicies . Mandatum Arcadio , Projecto & Philippo datum, censetur revocatio mandati , quod Cælestinus antea Cyrillo dederat : ergo illi, non autem iste, Concilio præfuerunt . Probatur ant. Mandatum, quod Arcadio, Projecto & Philippo datum est, ferebat, ut Cælestini te-

ne-

nerent locum, ut illius agerent vices, ut latam ab eo in Nestorium depositionis sententiam exquerentur: ergo, &c.

Resp. ad 1. neg. ant. Ad 2. conc. ant. neg. conseq. Ratio est, quia intelligi debent ea mandati loca per conjunctionem cum Cyrillo, non autem per exclusionem; hoc est, Cælestinus Arcadio, Projecto & Philippo dedit in mandatis, ut cum Cyrillo jam tunc ejus legato, Romanæ Sedis vices agerent, &c.

§. III.

Virum Concilium Ephesinum I. haberi debeat pro Concilio generali.

Not. Ex dictis superiùs multa requiruntur ad Concilium generale: 1. ut ad ipsum vocentur omnes orbis Episcopi: 2. ut per potestatem legitimam indicetur: 3. ut debitum habeat præsidem: 4. ut ei adsit major Episcoporum pars: 5. ut si præcipua orbis pars ei non adfuerit, ipse decretis postea suum præbeat consensum.

CONCLUSIO. Ephesinum I. Concilium haberi debet pro Concilio generali.

Probatur. Primò, ad Concilium Ephesinum vocati sunt omnium Ecclesiarum Episcopi: *Omnes undique Episcopos* (inquit Socrates histor. lib. 7. cap. 34.) *ad civitatem Ephesiorum, Theodosius convocavit.*

Secundò. Theodosius Concilium non convocavit, nisi rogatus à Cyrillo, cui Cælestinus vices suas in Cælestii causâ commiserat: *Cyrillus petiit à Theodosio, qui tunc imperium Orientis administrabat, ut ejus mandato prima synodus Ephesi congregaretur; verba sunt Evagrii hist. lib. 1. cap. 3.*

Tertiò. Cyrillus Concilio præfuit nomine Romanæ Sedis: *Vicem nostram* (ait Cælestinus in suis ad Clerum Constantinop. litteris)

teris) *sancto fratri meo Cyrillo delegavimus.*

Quartò. Ducenti ex Oriente Episcopi conveniunt ad Concilium Ephesinum I. imò & omnes Occidentales, qui in Concilio, quod Cælestinus Romæ celebrarat, suum suffragium adversus Nestorium tulerunt: *Quia ergo viri ipsi, Occidentales legati, totius Occidentis sententiam nostræ huic synodo per litteras exposuerunt, sensumque de fide & pietate nobis consonum declararunt, & eadem, quæ nos, decreverunt, &c.* Verba sunt Patrum Ephesinorum in suâ ad imperatorem relatione, quæ legitur post tertiam Concilii actionem.

Objicies 1. Episcopi Patriarchatûs Antiocheni non adfuerunt Ephesino I. Concilio, nec illud probarunt, imò celebrarunt aliud, in quo resciderunt ea omnia, quæ Ephesi à Cyrillo aliisque Episcopis illi adhærentibus facta fuerant: ergo in concilio Ephesino I. non reperiuntur omnes conditiones, quæ ad Concilium œcumenicum requiruntur.

Resp. 1. dist. ant. Et illi Episcopi fuerunt pauci numero, habitâ ratione ducentorum Orientalium, & omnium Occidentalium, qui per suos legatos Concilio adfuerant, conc. ant. Et non fuerunt pauci numero, neg. ant. quippè fuerunt tantum numero paulò plus triginta, ut scribunt synodi patres ad provinciarum Episcopos.

Resp. 2. dist. ant. Non adfuerunt Concilio ex suâ culpâ, conc. ant. absque suâ culpâ, neg. ant. Episcopi Patriarchatûs Antiocheni moram spontè suâ trahebant eo fine, ut tandem, lite minimè definitâ, patres Ephesini à se invicem discederent: ita censent aliqui, licèt Evagrius hist. lib. 1. cap. 3. contrarium asserat.

Resp. 3. dist. iterum ant. Et illi Episcopi postea probarunt Concilium Ephesinum, conc. ant. Et non probarunt, neg. ant. Inter Joannem An-

tio-

tiokenum & Cyrillum inita est deinceps concordia , quæ , non quidem propter fidei dogma in Concilio I. Ephesino definitum , sed propter latum in Nestorii personam depositionis decretum , fracta fuerat : *Cyrillum aversatus est* (inquit Socrates de Joanne agens histor. lib. 7. cap. 34.) *quippe qui temerario & precipiti impetu , in Joannis opinione , ad depositionem Nestorii prorupisset.*

§. V.

De Canonibus Ephesini I. Concilii.

Sex sunt numero Ephesini I. Concilii Canones , in quibus aut Nestoriani deponuntur , aut à Nestorianis depositi restituuntur .

Priore decernitur , metropolitam , qui derelictâ synodo ad Joannem Antiochenum accesserit , aut senserit cum Cælestio , excidere ab omni in provinciæ Episcopos jurisdictione ; imò subjici eum provinciæ Episcoporum , viciniorumque metropolitanorum judicio ; hoc est , ab iis tum Episcopis , tum Metropolitanis proferri debere depositionis sententiam . In eum autem Canonem observare est , Ephesinam synodum judicasse , se œcumenicam , ac legitimam esse , quamvis unius Patriarchatus Episcopi eam non haberent pro legitimâ & œcumenicâ .

Altero Canone dejiuntur à Clero , qui Nestorio , vel Joanni adhæserant , aut deinceps , contemptâ synodo , adhæsuri essent . Canonem Morinus sic interpretatur , ut velit , Nestorianos redditos fuisse inhabiles ad quodcumq; tum ordinis , tum jurisdictionis exercitium ; ita ut non illicitum esset modò , sed etiam vanum , ac irritum quidquid posthac tentare ausuri essent . Alii verò decretum exponunt tantum de illicito , non

280 Instit. Theolog. Prolegomena.
autem de irritō, in iis saltem, quæ ad ordinis exercitium spectant.

Aliis quatuor Canonibus, aut restituuntur in proprias sedes Catholici, quos Nestoriani deiecerant, aut declaratur verè restitutos non fuisse, quos Nestoriani post latam à Concilio depositionem restituere tentarant.

ARTICULUS IV.

De Chalcedonensi Concilio.

Concilium Chalcedonense, quod quartum est œcumenicum, habitum est anno 451. imperante apud Orientales Marciano, & Romæ sedente Leone Magno.

Ubi de Conciliis in genere dictum est, probatum est, Marcianum indixisse, seu, convocasse synodum hanc; idque rursus potest confirmari, tum ex Leonis, tum ex ipsiusmet Marciani epistolis, quæ ejusdem synodi actis præfixæ sunt. Ibi dem pariter ostensum est, Leonem eidem Concilio per suos legatos præfuisse: *In his fratribus Paschasino & Lucentio Episcopis, Bonifacio & Basilio presbyteris, qui ab Apostolicâ Sede directi sunt, me synodo vestra fraternitas existimet præsidere*; verba sunt ipsius Leonis in suâ ad Concilium epistolâ.

Superest igitur, ut de Concilii causâ, actis & Canonibus breviter hîc disseramus.

§. I.

De causa Concilii Chalcedonensis.

CONCLUSIO. Cogendæ ac celebrandæ Chalcedonensis synodo causa fuit hæresis Euthychiana.

Probatur, tum ex epistolis Leonis Magni ad Mar-

Marcianum, & ad ipsummet Concilium Chalcedonense, tum ex aliis ejusdem Marciani ad Leonem, ad Episcopos, qui vocati sunt ad Concilium; tum denique ex ejusdem Concilii actis; nempe in iis omnibus monumentis legitur, coactam fuisse Chalcedonensem synodum adversus Eutychianam hæresim.

Quæres 1. quis esset Eutyches, quam protulisset hæresim, quos expertus fuisset adversarios.

Resp. ad 1. Eutychem presbyterum fuisse, Monasterii, quod Constantinopoli celeberrimum erat, archimandritam.

Resp. ad 2. in eo positam fuisse Eutychis hæresim, quod vellet, ut unam hypostasim, ita unam tantum naturam in Christo fuisse; quippe (inquit hæresiarcha) tanta fuerit unio Verbi cum humanâ naturâ, ut sola divinitas sub carnis non veritate, sed figurâ, famem, sitim, crucem, mortem perpassa sit, & post triduum revixerit e sepulchro: *Iste Eutyches* (inquit S. Flavianus in epistolâ ad Leonem Papam) *impietatem propriam præsumpsit inferre, dicens, ante incarnationem quidem Salvatoris nostri Iesu Christi duas naturas esse divinitatis & humanitatis, post unionem verò unam naturam factam. . . .* Adjecit autem & aliam impietatem, dicens, *Corpus Domini, quod ex Mariâ factum est, non esse nostræ substantiæ, neque humanæ conspersionis; sed humanum quidem illud vocat, non tamen nobis consubstantiale, neque genitrici ejus secundum carnem.*

Resp. ad 3. Eutychis hæresim primùm ab Eusebio Dorylæi in Phrygiâ Episcopo detectam fuisse, ac postea ad triginta Episcoporum Concilium Constantinopoli sub Flaviano coactum detulisse. Eâ damnatâ, authorem pertinaciter eam propugnantem Flavianus, de Concilii consensu removit à sacerdotio, dejecit à monasterii regimine, segregavitq; ab orthodoxorum consortio.

Latam in hæresim & hæreseos authorem sententiam confirmavit Leo Magnus epist. 15. quæ est ad Flavianum, & epistolâ 16. quæ est ad Ephesinam II. synodum. Tandem ultimò proscripta fuit ea hæresis, damnatusque Eutyches ab omnibus Concilii Chalcedonenfis Patribus.

Quæres 2. quinam Eutychianæ hæreseos patrocinium susceperint.

Resp. susceptum fuisse *primò*, à Monachis Monasterii, cui præerat Eutyches: *secundò*, à Chrysaphio eunucho, qui charissimus erat Imperatori Theodosio, & cum Eutyches, qui eum de sacro fonte levarat, arctissimè conjunctus: *tertiò*, à Dioscoro Patriarchâ Alexandrino, pluribusq; Ægyptiis Episcopis, qui in alterâ synodo Ephesinâ, quam Theodosius, Chrysaphii operâ, indixerat, Flavianum dejecerunt à sacerdotio, Eutychem restituerunt in sacerdotii gradum, apertèque Eutychianum errorem tanquam fidei dogma credendum proposuere. Quâ verò fraude, quâ vi ea omnia facta sint, diximus, agentes de Conciliorum œcumenicorum autoritate.

§. II.

De actis Concilii Chalcedonenfis.

CONCLUSIO. Multa in Concilio Chalcedonenfi acta sunt.

Probatum enumeratione. *Primò*, postquâ lectus est libellus ab Eusebio Dorylæi Episcopo oblatus adversus Dioscorum, & Ephesinum II. Conciliū, recitatis ejusdem Concilii actis, auditis etiam Alexandrinorum adversus eundem Dioscorum querelis, in Dioscorum ter secundum Canones, ut objectis responderet, vocatum, depositionis sententiam, cui consensit universa synodus, hisce verbis protulerunt Romanæ Sedis legati: *Santissimus & beatissimus Archiepiscopus magnæ & se-*

senioris Romæ Leo, per nos & per præsentem sanctam synodum, una cum ter beatissimo & omnilaudæ dignissimo beato Petro Apostolo, nudavit eum tam Episcopatus dignitate, quàm etiam & ab omni sacerdotali alienavit ministerio. Decretum, decretique causæ, legi possunt in relatione tum ad Marcianum, tum ad Pulcheriam Augustam directâ.

Secundò. Confessa est universa synodus, se fidem amplecti, quæ in symbolo, tum Nicæno, tum Constantinopolitano, continetur, quamque explicuerunt Cyrillus in epistolis synodicis, & Leo in epistolâ ad Flavianum :

Tertiò. Definivit, unum eundemque Christum, Filium, Dominum unigenitum, in duabus naturis inconfuse, immutabiliter, indivisè, inseparabiliter agnoscendum; nusquam sublata differentia naturarum propter unionem, magisque salva proprietate utriusque naturæ, & in unam personam atque substantiam concurrente.

Quartò. Explicatâ fide, de variis Episcoporum controversiis actum est. Theodoretus quem pseudo-synodus Ephesina deposuerat, quòd Nestorio visus esset consentire, restitutus est in sedem, postquam coram universâ synodo hanc protulit fidei confessionem: *Anathema Nestorio & ei, qui non dicit Dei genitricem virginem Mariam, & qui in duos filios partitur unum filium unigenitum. Ego autem & fidei definitioni subscripsi, & epistolæ sanctissimi & Deo amantissimi Archiepiscopi Domini Leonis; & sic sapio.*

Quintò. Ibæ Episcopo Edeffienæ Ecclesiæ, quem in Ephesino latrocinio Dioscorus tanquam Nestorianum damnarât, restituta est Edeffena Ecclesia; hisce verò verbis Apostolici legati absolutionis sententiam actione 10. proferentes, usi sunt: *Relectis chartis, agnovimus ex sententia Reverendissimorum Episcoporum, Ibam Reverendissimum innoxium approbari. Relecta ejus epistola ad Marim Persam, agnovimus eum esse orthodoxum.*

Et ob hoc decernimus & honorem Episcopatus, & Ecclesiam, à quâ injustè & absens expulsus est, ei restituendam.

Sextò, tandem varii editi sunt Canones, quibus itum est obviam nonnullis abusibus, qui in plures Ecclesias irrepsent.

§. III.

De Canonibus Concilii Chalcedonensis.

Non omnes hîc exscribemus Concilii Chalcedonensis Canones, sed eos tantùm, qui aut animadversione aut explicatione indigent.

Secundo Canone, simoniaci declarantur, qui propter pecunias, aut ordinationem celebraverint, aut quempiam ad aliquod officium Ecclesiasticum promoverint, vel promoveri curaverint. Hincque colligitur, simoniam eorum omnium esse, quæ aliquâ ratione spiritualia sunt.

Canone tertio, definitur Clerico licere impuberum tutelam suscipere, si ad eam, aut *ex lege*, aut *ex Episcopi mandato* vocetur. Nec decretum illud adversatur Africanæ Ecclesiæ Canon, cujus Cyprianus meminit epistolâ 66. quippè Africanus ille Canon loquitur de tutelâ voluntariâ, Chalcedonensis verò de *inexcusabili*, hoc est, absolute necessariâ.

Canone quinto, inferiorum Clericorum translationes ad alias Ecclesias, non minùs damnantur, quàm translationes Episcoporum. Hincque colligitur, quòd sicut peccant Episcopi, cum ad alias Ecclesias propter propriam, non verò propter Ecclesiæ utilitatem, convolant: ita etiam, inferiores Clerici, præsertim si ipsis cura animarum incumbat.

Canon decimus, vetat beneficiorum pluralitatem: *Non liceat Clericum conscribi in duabus simul Ecclesiis*. Nec id mirum est, quippè tunc nul-

nullum erat beneficium, quod ad personalem residentiam non obligaret. Obtinuit eadem lex, etiam postquam investita est beneficiorum distinctio in simplicia, & ea quæ personalem residentiam requirunt; id enim apertè definiit Concilium Tridentinum, ut suo loco dicetur.

Canone decimosexto, virgines Deo sacræ, quæ nuptias contraxerint, excommunicatione damnantur; à quâ tamen, ubi eas pœnituerit, absolvi possint ab Episcopo. Licet illicitæ essent eæ nuptiæ, nondum tamen erant irritæ; neque enim Ecclesia votum, etiam solemne, apposuerat, tanquam dirimens matrimonii impedimentum. Damnat ille Canon Lutheranos, qui contendunt, irritum esse quodcumque continentiae votum.

Canone vigesimo octavo, confirmatur Canon Constantinopolitanus de primatu Ecclesiæ Constantinopolitanæ supra Alexandrinam & Antiochenam; ab eo tamen differt, quod Canon Concilii Constantinopolitani solum honoris titulum, iste verò jurisdictionem in multas Ecclesias, Constantinopolitano Episcopo tribuerit. Eo Canone immeritò abutuntur recentiores hæretici, ut Romanæ Sedis ex divîno jure primatum convellant. Adeat lector, quæ de eo argumento dicemus inferiùs agentes de primatu Romanæ Sedis in omnes orbis Ecclesias.

ARTICULUS V.

De Concilio Constantinopolitano II.

Concilium Constantinopolitanum II. quod quintum est œcumenicum, anno Christi 549. celebratum est. De eo autem Concilio queremus hîc 1. quænam illius cogendi causa fuerit: 2. quid ejus acta contineant: 3. quis illud convocaverit, & quis ei præfuerit: 4. quam habuerit olim, & nunc habeat auctoritatem.

§. I.

De causa Concilii Constantinopolitani II.

CONCLUSIO. Concilium Constantinopolitanum II. celebratum est, ut Eutychianis, Nestorianis, & Origenistis iretur obviam.

Probatur ex statu, in quo versabantur Orientales Ecclesiæ ante quintam synodum, de quâ hîc agitur.

Primò. Audito Marciani Imperatoris obitu, quidum superstes fuit, Chalcedonensem fidem & legibus & armis strenuè defendit, Eutychiani, qui Dioscoro à Chalcedonensibus Patribus dejecto favebant, Proterium ex eorundem Chalcedonensium patrum decreto Alexandriæ constitutû Episcopum jugularunt in Ecclesiæ baptisterio. Paulò ante ejus mortem, hæreticorum illorum caput Timotheus Ælurus, cui successit Petrus Moggus, & deinceps alii ejusdem farinae viri, sedem Alexandrinam invaserat, anathemaque, ut narrat Liberatus cap. 15. dixerat Chalcedonensi Concilio.

Secundò. Severus ex Monacho factus Eutychianus, Flaviani Antiocheni Patriarchæ iniquè dejecti sedem invasit. Is, Evagrio teste hist. lib. 3. cap. 33. vix eâ potiri cœperat, cum Chalcedonensem synodum contra juramentum suum, palàm anathematizavit, ac per summam vim eos neci tradidit, quorum fidem minis aut promissis labefactare non potuerat.

Tertio. Eisdem ferè (ut scribit Liberatus cap. 16. & 17.) Eutychianorum furias passa est Constantinopolitana Ecclesia, tum sub Acacio Episcopo, qui (ut ait ibidem Liberatus) occultus erat Concilii Chalcedonensis impugnator; tum etiam sub Anthimo, qui (ut patet ex act. 1. Concilii Constantinopolitani sub Mennâ) abdicato Tra-

pe-

peluntis Episcopatu, Constantinopolitanum per
summum scelus arripuerat.

Quartò. Nestoriani non minùs, quàm Euty-
chiani, iis temporibus Orientem vexabant. Hi
cum viderent Nestorii libros in Ephesinâ & Chal-
cedonenſi ſynodo damnatos, evulgarunt opuscu-
la, quę Theodorus Mopsueſtię Episcopus ante ſy-
nodum Ephesinam aduersùs Apollinarem, unius
in Christo naturę assertorem, ita scripserat, (teste
hâc V. ſynodo) ut unam Christi personam,
& Deum carne indutum, & Mariam Dei ma-
trem fuiſſe, palàm fuiſſet inficiatus. Evulgarunt
quoque Theodoret Episcopi Cyrenſis opus, in
quo duodecim Ephesinę fidei capitibus à Cy-
rillo conſcriptis anathematismos duodecim op-
poſuerat. Publici etiam juris fecêre Ibæ Edeſſe-
norum Episcopî epistolam ad Marim Perſam,
in quâ arguit Rabulam deceſſorem ſuum, quòd
Theodorum Mopsueſtenum, ſtrenuum (ut aie-
bat) fidei deſenſorem, anathemate damnaſſet; &
in quâ etiam Cyrilli capitula, à Concilio Epheſi-
no probata, infectatus fuerat. Iis verò, tum Theo-
dori, tum Theodoret, tum Ibæ operibus uteban-
tur, ut Nestorianum venenum fidelibus propi-
narent.

Quintò. Nonnus & Leontius ex novâ S. Sab-
bæ laurâ monachi, collectos ex Origenis volumi-
nibus graviffimos errores, in totum fermè Orien-
tem ſparſerant; nec comprimi potuerant, aut à
Pelagio Vigilii Papæ apocriſatio, aut Mennæ
Constantinopolitani Patriarchę decretis, aut
Imperatoris Juſtiniani legibus.

Sextò. Theodorus Cęſarę in Cappadociâ
Episcopus, ægrè ferens, quòd Origeniſtę, à qui-
bus in occulto ſtabat, proſcripti eſſent, Juſtinia-
no Imperatori, cujus gratiam ſibi conciliaverat,
author fuit, ut tria capitula publico ediſto pro-
ſcriberet, cauſatus, Eutychianos, licèt in varias
ſectas diſiſos, ſi id fieret, amplexuros eſſe. Con-
cilii Chalcedonenſis fidem; ſed contra niteban-

turnon modò Nestoriani, sed etiam plures Catholicici contendentes id fieri non posse; quin fidei Concilii Chalcedonenfis, à quo Ibas & Theodoretus suscepti fuerant, labes inferretur. Hinc factum est, ut ex consensu Vigilii Papæ, qui tunc Constantinopoli versabatur, ea capitula ad Concilii œcumenici iudicium & examen deducta sint. Ipsum igitur anno Christi 549. Justinianus indixit; ipsi autem centum sexaginta quinque Episcopi adfuerunt.

§. II.

De actis Concilii Constantinopolitani II.

CONCLUSIO. Plura acta sunt in Concilio Constantinopolitano II.

Probatur enumeratione. *Primò*. Ubi patres confessi sunt, se venerari, ac suscipere, quæ jam habita fuerant, quatuor generalia Concilia, Nicænum, Constantinopolitanum I. Ephesinum I. & Chalcedonense, rogarunt per legatos Vigilium, ut synodo, ad quam convenerant, præesse dignaretur: *Et ideo petimus* (inquiunt in epistolâ, quam ad eum scripsit Eutychius Constantinopolitanus Patriarcha) *ut præsidente nobis vestra beatitudine, communi tractatu eadem capitula in medio proponenda, &c.* Concilii tamen precibus non annuit Vigilius, eò quòd Romani Pontifices per se prioribus Orientalium Conciliis non adfuissent.

Secundò. Lectis in publico cōventu, quæ Theodorus in tertio libro contra Apollinarem scripserat; auditis quoque anathematismis, quos Theodoretus objecerat Cyrillo; recitatâ etiam Ibæ ad Marim Persam epistolâ; perlectis Patrum sententiis, quibus tria illa capitula opposita videbantur; admissis uno omnium consensu, quatuor priorum Conciliorum definitionibus; explicatâ de-

decem capitibus adversùs Nestorianos & Euty-
chianos fide; damnatis etiam in capitulo undeci-
mo, Ario, Eunomio, Macedonio, Apollina-
re, Nestorio, Eutyche, Origene, & iis qui usq;
ad mortem in hæreticorum erroribus perman-
sissent; duodecimo capitulo Theodorum ejus-
que scripta hisce verbis damnarunt: *Si quis de-
fendit prædictum impium Theodorum, & impia
ejus conscripta, in quibus tam prædictas, quam
alias innumerabiles blasphemias effudit contra
magnum Deum, & Salvatorem Iesum Christum, &
non anathematizat eum, & impia ejus conscri-
pta, & omnes, qui suscipiunt, vel defendunt
eum, & dicunt, orthodoxè eum exposuisse; & qui
scripserunt pro eo; & eadem illi sapuerunt, vel
scribunt pro eo, vel impiis ejus conscriptis, & eos,
qui similia illi sapiunt, vel aliquando sapuerunt,
& usque ad mortem permanserunt, vel permanent
in tali impietate, talis anathema sit.*

Tertio. Decimotertio capitulo, Theodoretii
scripta hisce verbis damnata sunt: *Si quis de-
fendit impia Theodoretii conscripta, quæ contra
rectam fidem, & contra primam Ephesinam san-
ctam synodum, & sanctum Cyrillum, & duode-
cim capitula exposuit, talis anathema sit*. Adver-
tat lector discrimen, quod inter Theodori &
Theodoretii damnationem intercedit; illius tum
persona, tum scripta à Concilio damnantur;
istius verò proscribuntur quidem scripta, sed
personæ, quæ suscepta fuerat à Patribus Chalce-
donensibus, nulla iniusta est nota; sicut nec Ibas,
qui in eodem Concilio Chalcedonensi anathe-
ma Nestorio dixerat.

Quarto. Sic habet capitulum 14. quo Ibas ad
Marim epistola proscribitur: *Si quis defendit epi-
istolam, quam dicitur Ibas ad Marim Persam hæ-
reticum scripsisse..... & non anathematizat eam,
& defensores ejus, & eos, qui dicunt eam rectam
esse, vel partem ejus, & eos, qui scripserunt,
vel scribunt pro eâ, vel pro impietate, quæ in eâ*

continetur, & præsumit eam defendere, vel inscriptam ei impietatem nomine sanctorum patrum, vel sancti Chalcedonensis Concilii, in his usque ad mortem permanent, talis anathema sit.

Quintò. Sancta Synodus proscripsit Origenis libros, definiitque 1. animas non extitisse ante suam cum corporibus unionem, nec ad ea supplicii causâ demissas fuisse: 2. cœlum, solem, lunam, stellas, & aquas, quę supra cœlos sunt, non esse animatas, & rationales quasdam virtutes: 3. falsum esse, quòd in resurrectione corpora hominum rotunda, & orbiculari specie excitabuntur; & quòd impiorum hominum, ipsorumque etiam dæmonum, tormenta finem habitura sint: 4. tandem falsum esse, quòd pro dæmonibus Christum crucifigi, atque id ipsum sæpiùs sæculis futuris pati oportebit à spiritibus malignitatis, qui in cœlo sunt.

Observandum est, apertam illorum Origenianorum articulorum damnationem non reperiri in actis quintę generalis Synodi, ut nunc extat in editione Labbeanâ; reverà tamen in eâ proscriptos fuisse demonstrat doctissimus Cardinalis Norisius, demonstrant & alii scriptores adversus Garnerium è Societate Jesu, qui Origenem non in hâc Synodo, sed in Constantinopolitanâ sub Mennâ damnatum fuisse contendit.

§. III.

De convocatione, & præside Concilii Constantinopolitani II.

CONCLUSIO I. Solus Justinianus Imperator convocavit secundum Concilium Constantinopolitanum.

Probatur 1. Collatione primâ Concilii, de quo agitur, legere est epistolam, quâ indictum est à Justiniano Concilium: *Ideò vocavimus vos ad Regiam*

giam urbem . 2. Idem asserit Evagrius : *Instinianus* (inquit historiæ lib. 4. cap. 37.) *quintum Concilium convocavit* .

Quæres, an Vigilius Papa Concilii V. convocatiioni consenserit.

Resp. affirmativè : *Annuimus* (ait ad Euty-
chium scribens) *ut de tribus capitulis, facto re-
gulari conventu, collationem cum unitis fratribus
habeamus* . Idem patet ex ejusdem quinti Con-
cilii collatione 8.

CONCLUSIO 2. Quintæ œcumenicæ Sy-
nodo non præfuit Vigilius, sed Eutychius Pa-
triarcha Constantinopolitanus.

Probatur prior pars. Vigilius, licèt Constan-
tinopoli versaretur, & à Concilii patribus fuisset
rogatus, nusquam illi se præsentem sistere
voluit : *Ille verò respondit* (verba sunt Episco-
porum, qui actione secundâ, Concilii nomine
Vigilium rogarant, ut unâ cum ipsis adesset Sy-
nodo) *non posse unâ nobiscum convenire, eò quod
plurimi quidem hic sunt Orientales Episcopi, pauci
verò cum eo* .

Probatur altera pars. In actis Concilii legi-
tur, quòd Eutychius primo loco sederit, &
omnia ferè egerit : *Confidentibus in secretario
venerabilibus Episcopis hujus regie civitatis,
Eutychio sanctissimo Patriarchâ regie Constanti-
nopolis novæ Romæ* ; verba sunt, quæ leguntur
ad caput singularum synodi collationum.

§. IV.

De authoritate Concilii Constanti- nopolitani II.

Not. In Concilio, de quo agitur, duo, clarita-
tis causâ, distinguenda sunt. Prius quæstio juris est
damnatio nimirum hæresis, tum Nestorianæ, tum
Eutychianæ, Alterum est quæstio facti ; nempe
utrum

utrum tria capitula reverà hæresim Nestorianam continerent.

CONCLUSIO 1. Concilium Constantinopolitanum II. in iis, quæ ad jus spectant, divinæ fuit semper authoritatis.

Probatur . Concilia œcumenica in iis, quæ juris sunt, hoc est, quæ aut ad fidem aut ad mores spectant, divinæ sunt authoritatis, ut demonstravimus agentes de Conciliis in genere : atqui Concilium Constantinopolitanum II. est Concilium œcumenicum . Nam licet Occidentales Episcopi illi non adfuerint ; unanimi tamen consensu ab iis receptum est in iis, quæ ad jus spectant, hoc est, ad Nestorianæ & Eutychianæ hæreseos condemnationem .

CONCLUSIO 2. Plures olim oblocuti sunt quintæ generali Synodo in quæstione facti ; sed immeritò .

Probatur prior pars . *Primò*, rejectam aliquamdiù fuisse à Vigilio Papâ, ob idque à Justiniano Imperatore ipsum missum fuisse in exilium, plures scriptores affirmant ; sed id nonnulli alii cum doctissimo Norisio in dissertatione historica de quintâ Synodo merum putant esse commentum : *Secundò*. Pelagius primus, dum adhuc esset Vigili apocrifarius, missus fuit in exilium propter pertinacem trium capitulorum defensionem : *Tertiò*. Afri, Illyrici, Dalmatæ, Galli, Hiberni, Hispani, plures apud Italos Ecclesiæ, multo tempore detrectarunt admittere trium capitulorum condemnationem ; unde Gregorius Magnus lib. 3. epist. 37. ad Constantium Episcopum Mediolanensem, hæc scribit : *Quod autem scripsistis, quia epistolam meam reginæ Theodulindæ transmittere minimè voluistis, pro eo, quod in eâ quinta Synodus nominabatur ; si eam exinde scandalizari posse credidistis, rectè factum est, ut minimè transmitteretis . Unde nunc ita facimus, sicut vobis placuit, ut quatuor Synodos solummod. laudaremus .*

Con-

Confirmantur, quæ mox dicta sunt, testimonio Cardinalis Baronii, qui ad annum 556. num. 1. 2. & 3. sic loquitur : *Adeò visi sunt exhorruisse Occidentales Antistites ferè omnes, aliam œcumenicam synodum post quartam admittere ; ut nec potuerit Pelagius reperire Episcopos Romæ , à quibus consecraretur ; atque opus fuerit, Presbyterum Ostiensem , quod nunquam antea accidisset , loco Episcopi, munus illud obire , ipso Pelagio ita jubente .*

Probatur altera pars . Generalium Synodorum definitionibus, in iis etiam , quæ *meri sunt humani facti*, exhibenda est , religioso saltem silentio , reverentia , in eorum etiam opinione , qui cum Baronio & Bellarmino sentiunt, Ecclesiam esse infallibilem in solis factis, quæ Scripturâ , aut traditione continentur ; non autem in cæteris , quæ minimè revelata sunt . Culpani sunt igitur Facundus Hermianensis, & alii tum antiqui , tum recentiores authores, qui quintæ generalis synodi definitionem Romanis Pontificibus probatam, publicis scriptis exagitarunt . Laudanda verò est quàm maximè œconomia Romanæ Sedis, quæ nusquam à sua communione removit Gallos, Hispanos, Hibernos, quòd quintam synodum, propter trium capitulorum damnationem inter œcumenicas synodos non admitterent .

ARTICULUS VI.

De Concilio Constantinopolitano III.

Concilium Constantinopolitanum III. quod sextum est œcumenicum, celebrari cœpit die 7. Novembris anno 680. Agathonis Papæ III. Constantini Pogonati Imperatoris III.

§. I.

De causa Concilii Constantinopolitani III.

CONCLUSIO . Hæresis Monothelitarum causa fuit cogendæ tertiæ synodi Constantinopolitanæ.

Probatur ex ipsius synodi actis, in quibus quidquid reperitur, sunt aut Patrum antiquorum sententiæ adversus Monothelitas, aut damnatio, tum Monothelismi, tum personarum, quæ Monothelismum propugnabant. In eo autem positus erat Monothelitarum error, quod vellent unam esse in Christo voluntatem, unamque operationem, divinam nimirum, non autem humanam : *Ecclesiam turbaverunt* (inquit Romanæ sedis legati actione 1.) *unam voluntatem in incarnationis dispensatione unius sanctæ Trinitatis domini nostri Iesu Christi, unamque operationem, dogmatizantes & docentes*. Eundem Monothelitarum errorem Macharius Antiochenus Patriarcha, Monothelita juratus, hisce verbis exprimit actione 8. sextæ generalis synodi : *Nos voluntatem humanam in Christo non dicimus, divinam vero etiam absque carnalibus voluntatibus, vel cogitationibus humanis, sicut prolatum testimonium S. Athanasii continet : voluntas enim Deitatis tantum.*

Quæres 1. quis fuerit author hæresis Monothelitarum.

Resp. ad 1. Monothelitarum hæreseos authorem fuisse Theodorum Pharanitanum Episcopum : *Hanc, Ecclesiam, per suam hæresim turbaverunt, prius quidem Theodorus Pharanitanæ Ecclesiæ quoddam Episcopus*; verba sunt Stephani Episcopi Dorensis in Secretario 2. Concilii Lateranensis sub Martino Papâ. A Theodoro manavit illud malum ad Sergium Constantinopolitanum Episcopum,

pum, qui quòd primum palàm illud defenderit, illius author dictus est actione 13. sextæ generalis synodi: *Qui* (verba sunt synodi) *aggressus est de hujusmodi impio dogmate conscribere*. Manavit & ad Cyrum Phasidis, ac postea Alexandriæ Episcopum; is enim anno Christi 633. Episcoporum suæ sedi subditorum celebravit synodum, in quâ hocce promulgavit capitulum: *Eundem unum Christum & filium operari Deo decibilia & humana, unâ Dei virili operatione, secundum S. Dionysium*. Manavit quoque ad Pyrrhum, qui in sede Constantinopolitanâ Sergio proximè successit. Manavit etiam ad Paulum, qui ab Imperatore Constante intrusus fuerat in Pyrrhi locum. Manavit quoq; ad Macharium Patriarcham Antiochenum, & tandem ad plures alios Orientis Episcopos.

Quæres 2. quinam fuerint præcipui fautores hæretis Monothelitarum.

Resp. 1. præter Episcopos, qui jamjam recensiti sunt, Honorium Papam suis ad Sergium epistolis visum fuisse Patribus sextæ synodi Monothelitis favisse; unde ipsi unâ cum apertis Monothelitis ab eâdem synodo dictum est anathema: *Anathematibus interfecimus* (verba sunt epistolæ synodice ad Agathonem Romanum Pontificem) *ex sententia per sacras vestras litteras de iis prius lata, Theodorum Episcopum Pharan, Sergium, Honorium, Cyrum, Paulum, Pyrrhum & Petrum*.

Resp. 2. favisse quoque Monothelitis Imperatorem Heraclium, quippè promulgavit eccl'esium, hoc est, edictum, in quo apertè asseruit, duarum operationum vocem multos scandalizare, utpotè à nemine ex sanctis & præcipuis patribus dictam; non minùs apertè asseruit, unam tantùm operationem in Christo admitti debere: *Unam* (verba sunt edicti) *voluntatem Domini nostri Iesu Christi verissimi Dei confitemur*. Sergius, qui Imperatori persuaserat, ut edictum illud promul-

garet, ipsum propriâ & plurium Episcoporum subscriptione munitum, toto inspectante populo, primarii templi foribus affixit.

Resp. 3. Constantem Heraclii nepotem stetit à Monothelitarum partibus; nam anno 648. typo, seu edicto vetuit, ne quis, aut unius, aut duarum operationum vocibus uteretur: *Sancimus* (ait in typo) *nobis subiectos non habere licentiam invicem à præsentis de unâ operatione, aut duarum voluntatum, aut duarum operationum, qualemcumque proferre altercationem, aut contentionem, aut rixam.*

Quæres 3. quinam fuerint præcipui Monothelitarum impugnatores.

Resp. impiis Monothelitarum conatibus obstitisse: *Primò*, Sophronium tum datis ad Sergium & Cyrum epistolis, tum in judicio Concilii, quod coegit, ubi primùm inauguratus est Hierosolymorum Episcopus.

Secundò. Severinus Papa, qui proximè successerat Honorio, Heraclii eccliam, ut testatur Martinus Papa I. in Concilio Lateranensi, secretario 3. proscripsit.

Tertio. Joannes IV. qui post Severinum renunciatus fuerat Romanus Pontifex, coactâ Romæ synodo, edita in Oriente Monothelitarum decreta rescidit, deditque operam (ut habetur in actis S. Maximi) ut Heraclium ab hæreticorum communione deduceret.

Quarto. Theodorus, proximus Joannis successor, Paulum Constantinopolitanum Canonicè admonuit, ut hæresim ejuraret, intorsitque anathema in Pyrrhum, qui exul in Africa errorem suum damnarat quidem, sed defendit, ubi, mortuo Paulo, Sedi Constantinopolitanæ restitutus est.

Quinto. Martinus I. qui post Theodori mortem electus fuerat Romanus Pontifex, synodum ad Lateranum convocavit, ubi proscripsit Monothelitarum & hæresim, & personas, Heraclii

elii ectesim, & Constantis typum . Verba quibus decretum illud exprimitur, legere est in Synodo Lateranensi, Secretario IV. can.18.

Sextò . Monothelitis vehementer obstitit S. Maximus martyr : Pyrrhum confutavit in celebri disputatione cum ipso habitâ, illumque eò compulit, ut, fictè saltem, hæresim ejuraret suam. Obiit in exilio, ad quod, linguæ, & dextræ manus abscissione mulctatus, Constantis jussu deportatus fuerat .

Septimò . Tandem Monothelitæ damnati sunt in sexto generali Concilio, quod Constantinopoli anno Christi 680. habitum est.

§. II.

De iis, quæ acta sunt in Concilio Constantinopolitano III.

CONCLUSIO. Multa peracta sunt in Concilio Constantinopolitano III.

Probatur . Lecta sunt tertiæ, quartæ, & quintæ synodorum generalium acta. Pluribus Concilii actionibus recitata sunt varia adversus Monothelitas patrum monumenta . Recitata est pariter epistola Agathonis & Romanæ centum viginti quinque Episcoporum synodi . Audita sunt quoque patrum testimonia, quæ pro Monothelitis, Macarius Antiochiæ Episcopus, & quidem insignis Monothelita, protulit .

Inquisitum est postea de Macarii fide, auditis quæ truncharat, patrum testimoniis : actione IX. prolata fuit, tum in eum, tum in Stephanum illius discipulum, depositionis sententia; *Definivimus, ab omni vos sacerdotali dignitate, & ministerio alienos existere* . Aliis verò, quos erroris penituerat, indulgit sacra Synodus, statuitq; ut in propriis sedibus remanerent .

Deindè lectis Sergii Episcopi Constantinopolitani ad Honorium epistolis, recitato pariter
utro-

utroq; Honorii ad Sergium responso ; actione 13. anathema dictum est Monothelitarum tum scriptis, tum personis, ipsis etiam Honorii ad Sergium epistolis, imò & ipsimet Honorio : *Cum his verò , inquit Concilium de Sergio, Pyrrho, Cyro , Paulo , aliisque hæreticis agens , simul projici à Sancta Dei Catholica Ecclesia , simulque anathematizari prævidimus , & Honorium qui fuerat Papæ antiquæ Romæ , eò quòd invenimus per scripta , quæ ab eo facta sunt ad Sergium , quia in omnibus ejus mentem secutus est , & impia dogmata confirmavit .*

Damnatis hæreticis , impiisq; eorum scriptis , sacra synodus actione 18. fidei definitionem edidit : *Duas naturales voluntates in eo (Christo) & duas naturales operationes indivisè , inconvertibiliter , inseparabiliter , inconfusè secundum sanctorum patrum doctrinam adequatè prædicamus ; & duas naturales voluntates non contrarias , absit , juxta quòd impii asseruerunt hæretici , sed sequentem ejus humanam voluntatem , & non resistantem , vel reluctantem , sed potius & subjectam divinæ ejus , atque omnipotenti voluntati .*

Eam verò fidei definitionem subscriptione suâ confirmarunt : primò, Romanæ sedis legati ; ac secundo omnes, quotquot aderant Episcopi : tertio, ipse Imperator Constantinus Pogonatus; *Constantinus in Christo Deo rex , ac imperator Romanorum , legimus & consensimus .*

Tandem uno omnium consensu directa est ad Agathonem epistola Synodica, in quâ redditur ratio eorum , quæ in Concilio peracta fuerant : *Anathematibus interfecimus , ex sententia per sacras vestras litteras de iis prius lata , videlicet Theodorum Episcopum Pharam , Sergium , Honorium , Cyrum , Paulum , Pyrrhum & Petrum . Ad hoc autem & post eos anathematibus hæreticorum justè subjecimus & eos , qui vivunt , suscepta illorum impietate . . . Macarium , qui fuit Antiochen- sium magnæ urbis Episcopus , &c.*

In

In ea sexta generalis synodi acta observari potest: 1. unâ traditionis autoritate damnatum fuisse Monothelitarum errorem: 2. mortuis hominibus dictum fuisse anathema: 3. ad normam quam continebant Agathonis ad synodum litteræ, exactum fuisse, quod in Monothelitarum errorem latum est à sacra synodo iudicium: 4. Baronium contendere, interpolata fuisse ejusdem sacre synodi acta iis locis, ubi Honorii Papæ nomen legitur; sed id quantum à veritate alienum sit, supra ostendimus agentes de Conciliorum generalium autoritate.

§. III.

De convocatione, ac præside Concilii Constantinopolitani III.

CONCLUSIO I. Constantinus Pogonatus convocavit tertium Constantinopolitanum Concilium.

Probatur 1. ex Imperatoris Sacrâ ad Donum Papam, ubi hæc habentur: *Adhortamur vestram paternam beatitudinem per præsentem nostram piam Sacram, dirigere viros utiles ac modestos, notitiam habentes totius à Deo inspiratæ doctrinæ, & peritiam irreprehensibilem habentes dogmatum, indutos personam vestræ Apostolicæ Sedis, ejusque Concilii, &c.*

Probatur 2. ex litteris ejusdem Imperatoris ad Georgium Archiepiscopum Constantinopolitanum: *Sancimus (inquit) congregare vestram paternam beatitudinem omnes, qui ad ejus sanctissimam sedem pertinent, sanctissimos metropolitæ & Episcopos in hanc à Deo conservandam nostram regiam urbem, quatenus diligentissima inquisitio fiat de voluntate & operatione in dispensatione incarnatione unius de sanctâ Trinitate Domini nostri Christi veri Dei nostri.*

Pro-

Probatur 3. ex eo, quòd Concilii, de quo agitur, patres singulis actionibus profiteantur, se congregatos esse secundum imperialem sanctionem: *Conveniente sanctâ, & universali synodo, quæ secundum imperialem sanctionem congregata est in hac à Deo conservandâ regiâ urbe.*

Cur autem Ecclesia tunc passa est, ut Constantinus Pogonatus congregarit universalem synodum, cum jus illud conveniat soli Ecclesiæ, prout animarum Pastores complectitur, dictum est superius pag. 190.

CONCLUSIO 2. Agatho Romanus Pontifex per suos legatos præfuit tertio Constantinopolitano Concilio.

Probatur 1. Agathonis legati in singulis Concilii actionibus numerantur ante Orientis Patriarchas, dicunturque Agathonis tenere locum: *Conveniente autem sanctâ, & universali synodo, id est, Theodoro & Georgio venerabilibus presbyteris, & Ioanne venerabili diacono, locum adimplentibus sanctissimi ac beatissimi Archiepiscopi antiquæ Romæ Agathonis, & Georgio venerabili atque sanctissimo Archiepiscopo, hujus magnæ Constantinopoleos novæ Romæ, &c.*

Probatur 2. Apostolicæ Sedis legati, licet essent presbyteri tantum, ante omnes Episcopos, Concilii actis subscripserunt; is enim legitur subscriptionum ordo: *Theodorus humilis presbyter sanctæ Romanæ Ecclesiæ, & locum gerens Agathonis beatissimi & universalis Papæ urbis Romæ, huic prosphnetico deprecans subscripsi; mox subscribunt aliis ejusdem Sedis legati, ac deinde: Georgius misericordiâ Dei Episcopus Constantinopolitanus novæ Romæ huic prosphnetico deprecans subscripsi.*

Objicies. Undecim prioribus Concilii actionibus legitur, quòd Constantinus Concilio præfuerit: *Præsidente eodem piissimo, & Christo dilecto magno Imperatore Constantino, &c.* ergo Agathonis legati non præfuerunt tertio Constantinopolitano

no

no Concilio , sed Imperator Constantinus Pogonatus .

Resp. conc. ant. dist. conseq. Ergo Constantinus Pogonatus præfuit Concilio quoad locum materiale, & ordinem synodo conservandum, conc. conseq. tanquam controversiarum iudex, seu quoad vim suffragii, neg. ant. Solutio patet ex iis, quæ superius pag. 287. dicta sunt, ubi laudata sunt Constantini verba, ex epistolâ Gregorii Papæ II. ad Leonem Isaurum . Potest iterum confirmari ex hujusce synodi actis, ubi iudicium ac definitio de rebus controversis nusquam imperatori, sed solis Episcopis tribuitur : *Excitavit igitur Christus* (verba sunt synodi, actione 18.) *fidelissimum imperatorem, qui non dedit somnum oculis suis, donec per hunc nostrum à Deo congregatum, sacrumque conventum, ipsam rectæ fidei reperit perfectam prædicationem.*

A R T I C U L U S VII.

De Nicæno Concilio II.

Concilium Nicænum II. quod septimum est œcumenicum , habitum est anno Christi 787. Romæ sedente Hadriano , imperantibus in Oriente Irene cum filio Constantino .

§. I.

De causa Concilii Nicæni II.

CONCLUSIO . Coactum est Concilium Nicænum II. ad restituendum cultum & usum sacrarum imaginum.

Probatur 1. Constantinus & Irenes illius mater in Sacra ad Hadrianum directâ eam, de quâ in conclusione Concilii, causam laudant : *Scit vestra paterna beatitudo, quæ pridem facta sunt in*
hâc

hâc nostrâ regia civitate, propter venerabiles imagines, qualiter qui ante nos regnaverunt, eas destruxerunt, & in dehonestatem atque injuriam posuerunt. 2. De nullâ ferè aliâ re quàm de sacramentorum imaginum cultu, ac usu, agitur in singulis Concilii Nicæni II. actionibus.

Quæres I. quinam sacramentorum imaginum usum ac cultum ante Concilium Nicænum II. impugnaverint.

Resp. Leonem Isauricum inter imperatores primum indixisse bellum sacris imaginibus; idque tum ex consilio Beseis cujusdam hominis laici, qui ex Christianis ortus parentibus, ex Arabum postea consortio Mahumetanis superstitionibus imbutus fuerat; tum ex suasionem Constantinum, qui Nacoliæ erat Episcopus; quippè horum animis altè infederat Ezidi Arabum regis exemplum, qui præstigiatoris cujusdam Judæi, Sarantapechys nomine, vanâ diuturni imperii spe delusus, ex omnibus Christianorum templis, totiusque regni sui finibus, sanctas imagines detraxerat. Prodiit adversus sanctas imagines Leonis edictum anno Christi 726.

Leoni Isaurico successit Constantinus ejus filius, quem *Copronymum* propterea cognominarunt, quòd cum baptismo infans expiaretur, sacramentum lavacrum inquinaret. Is ubi adeptus est imperium, generali edicto vetuit, ne quis aut sanctos, aut eorum imagines veneraretur. Institere tres Romani Pontifices, Zacharias, Stephanus, Paulus, perditum hominis curare dementiam, sed frustra: imò Copronymus, ut suæ impietati conciliaret pondus aliquod, vocavit ad synodum centum & triginta Episcopos, qui omnium imaginum usum ac cultum publico decreto proscripserunt: Decretum verò refertur ac confutatur actione sextâ hujusce Nicæni II. Concilii.

Constantino Copronymo successit Leo IV. qui ex Irene conjuge Constantinum suscepit.

Is

Is imagines, earumque cultum infectatus est, sed non multo tempore, morte præoccupatus, potuit Ecclesiam vexare; itaque ex toto ferè Patriarchatu Constantinopolitano, tum Leonis Isauri, tum Constantini Copronymi, tum Leonis IV. edictis, sanctarum imaginum cultus exulabat; eum tamen integrum servaverant tres alii Patriarchatus, Alexandrinus, Antiochenus, Hierosolymitanus; unde nullum ex iis Patriarchatibus Episcopum ad suam pseudo-synodum Copronymus vocaverat.

Quæres 2. quinam fuerint iis temporibus præcipui sacrarum imaginum defensores.

Resp. S. Germanum Constantinopolitanum Patriarcham pro iis strenuè decertasse adversus Leonem Isauricum; unde ab eo Imperatore per vim dejectus est ex Patriarchali throno, & tandem in exilio, illius jussu, strangulatus est.

Decertavit quoque S. Joannes Damascenus, cujus dextera manus, quæ piè ac doctè pro sacris imaginibus scripserat, Leonis fraude à Saracenorum Caliphâ, in cujus aulâ versabatur, præscissa, eâdem die, orante ad Virginis Mariæ imaginem Damasceno, divinitus restituta est.

Decertarunt quoq; multi Romani Pontifices. Gregorius II. coactâ Romæ synodo, paterno ac Pontificali studio Leonem Isauricum commovit, ne Apostolicas de sacris imaginibus traditiones convelleret. Gregorius III. coactâ Romæ synodo, anathemate feriit sanctarum imaginum impugnatores. Zacharias, Stephanus, Paulus, variis synodis Romæ habitis, decretum à Gregorio III. adversus Iconomachos latum confirmarunt.

Tandem Imperatrix Irene cum filio suo Constantino, nihil prætermisere, ut sacrarum imaginum cultum in regiâ urbe restituerent. Unâ cum Tharasio, qui non ita pridem electus fuerat Constantinopolitanus Patriarcha, scripserunt ad Hadrianum Papam, ut synodus ejus autoritate

cogeretur, ad eamque, ut moris erat, legatos Apostolicos mitteret. Indicta prius fuerat ea synodus Constantinopoli; verum tumultuantibus in regia urbe Iconomachis, Nicææ in Bithyniâ celebrata est.

§. II.

De actis Concilii Nicæni II.

CONCLUSIO. Quæ acta sunt in Concilio Nicæno II. ad plura capita reducuntur.

Probatur enumeratione. Actione 1. lecta est Sacra Constantini & Irenes ad Concilium. Recitata sunt quoque varia loca Patrum, de Episcoporum, Sacerdotum, reliquorumque Clericorum tum lapsu, tum restitutionis modo.

Actione 2. lectæ sunt Hadriani Papæ ad Constantinum & Irenem litteræ: lecta est etiam ejusdem Pontificis epistola ad Tharasium; iis autem recitatis, sic Apostolicæ Sedis Legati locuti sunt: *Dicat Tharasius, si consentiat litteris sanctissimæ Papæ Hadriani*; respondit verò Tharasius, se iis litteris subscribere. Idem à legatis quæsitum sunt reliqui Præsules, qui quidem unâ voce responderunt: *Sequimur, & suscipimus, & admittimus.*

Actione 3. Præsules, quos Iconomachorum hæresis pœniteret, recepti sunt cum suis gradibus, ac honoribus.

Actione 4. & 5. pro cultu sanctarum imaginum prolatis sunt varii Patrum textus, & tandem Iconomachis dictum est anathema: *Christianos accusantibus, id est, imagines confringentibus, anathema sit.*

Actione 6. recitata, ac validissimis argumentis confutata sunt acta pseudosynodi, quam Iconomachi sub Copronymo contra sacras imagines celebraverant.

Actione 7. definitum fuit, retineri debere, tum
Chri-

Christi, tum intemeratæ Virginis, tum Angelorum, tum sanctorum virorum imagines. Explicatum est, quinam fructus ex earum usu percipiatur: *Qui has contemplantur* (ait sacra synodus) *alacrius eriguntur ad primitivorum earum memoriam & desiderium, & ad osculum.* Cultus qui eis exhibetur, vocatus est *honoraria adoratio*. Ne quis verò *honorariam illam adorationem*, de latriæ cultu interpretaretur, hæc subiecta sunt: *Non tamen ad veram latriam, quæ secundum fidem est, quæque solam naturam divinam decet, impartendam; ita ut istis sicuti figuræ preciosæ, ac vivificæ cruci, & sanctis Evangeliiis, & reliquis sacris monumentis incensorem, & luminum oblatio ad harum honorem efficiendum exhibeatur.* An cum iis sacre synodi verbis cohæreant, quæ S. Thomas asseruit de cultu Crucis, cui Christus affixus est, expendemus ad calcem nostri de Incarnatione tractatûs.

Actio 8. habita est Constantinopoli, quò Constantinus & Irenes Episcopos vocarant. Lecta est Nicææ edita fidei definitio. Jussi autem Patres, ut dicerent, *an lecta definitio omnium consensu esset edita*; omnes exclamaverunt: *Ita credimus, ita omnes sentimus, omnes consentiendo subscripsimus.* Post acclamationes Tharadius Lector definitionis tomum obtulit Principibus subscribendum: *Imperatrix subscripsit, dabatque simul regnanti filio, ut & ipse subscriberet.*

In relata synodi acta observandum est: 1. idè ante omnia lectam fuisse Hadriani Papæ epistolam, quòd Papa primatium suffragii jus in Conciliis habeat: 2. restitutionem in sedes & honores Ecclesiasticos, quæ Episcopis Iconomachis, sed pœnitentibus, indulta est, fuisse contra antiquorum Canonum rigorem; verum sic se gessit sacra synodus prudentis œconomix causâ: 3. Nicænam synodum nequaquam definiisse (ut putarunt Patres Concilii Francofordiensis) imaginibus Sanctorum exhiberi posse latriæ cultum.

§. III.

De Canonibus Concilii Nicæni II.

In Concilii Nicæni actione 8. promulgati sunt viginti duo Canones ad disciplinam spectantes.

Priore, innovantur ii omnes, qui in Oriente tum in Conciliis Generalibus, tum in Provincia- libus editi fuerant. *Not. 1.* Concilium non exci- pere Canones Concilii Antiocheni, quamvis il- lud Concilium ex Arianis præsertim coaluisset. *Not. 2.* Probavit quoq; eos, qui dicuntur Aposto- lici, censuitq; ab ipsis Apostolis editos fuisse: *Tam scilicet illorum, qui ab Apostolis editi sunt.*

Septimo Canone, prohibetur, ne templa sine reconditis Sanctorum Reliquiis dedicentur. *Not. 1.* Canonis occasione fuerant Iconoma- chi, qui non minùs in Sanctorum Reliquias, quàm in eorum imagines sævierant. *Not. 2.* Id à Patribus statuitur, non tanquam aliquid novum, sed quod ante Iconomachos ubique esset in usu.

Decimus nonus, sub excommunicationis pœ- nâ prohibet, ne ab iis, qui fiunt aut Monachi, aut Moniales, aliquid exigatur. *Not. 1.* Duo- decim prioribus sæculis determinatus erat cu- jusque Monasterii tum Monachorum, tum Mo- nialium numerus; nec plures admittebantur, quàm possent Monasterii, aut opibus, aut la- bore sustentari. *Not. 2.* Alius usus postea in- valuit; unde factum est, ut annuus census pro victu ingredientis à Monasteriis pauperibus ex- actus fuerit. *Not. 3.* Conciliari non possunt cum eo Canone pacta, quæ fiunt à plerisq; tum Mo- nachorum, tum Monialium Monasteriis.

Canon vigesimus secundus, vetat Monachis, ne secretò cum mulieribus conviventur, nisi (ut ait) ipsæ mulieres sint piæ & consanguineæ,
id-

idque ad directionem spiritualem proficiat .
Not. 1. Nonnunquam igitur Monachi exhibant è
 Monasteriis . *Not.* 2. Vacabant nonnunquam,
 servatis servandis , sæcularium directioni .
Not. 3. Convivium secretum cum mulieribus
 specificè prohibetur , ut significetur , viris Deo
 sacris periculosam esse mulierum privatam con-
 versationem , quæ etiam sæpius in populi scan-
 dalum vertitur .

§. IV.

*De convocatione , ac præside Nicæ-
 ni II. Concilii .*

CONCLUSIO I. Concilium Nicænum II.
 convocatum fuit à Constantino & Irene Au-
 gustis .

Probatur 1. ex Augustorum Sacrà , quæ pri-
 màm Concilii actione lecta est : *Congregavimus
 vos* (inquit ibidem Augusti) *sanctos sacer-
 dotes* . 2. Eadem actione primàm hæc habent-
 tur : *Conveniente sanctâ & universali synodo ,
 quæ per Dei gratiam , & piam sanctionem Im-
 peratoriam congregata est in Nicæensium Metro-
 poli* . 3. Idem passim in aliis Concilii actionibus
 legitur .

CONCLUSIO 2. Hadrianus Papa I. per
 suos Legatos præfuit septimæ generali synodo .

Probatur . Actione 1. 5. & 7. Petrus Archi-
 presbyter Ecclesiæ Romanæ , Petrus presbyter
 Monachus & Abbas Monasterii S. Sabæ dicun-
 tur , Apostolicæ Sedis tenere locum . Eidem Ro-
 manæ Ecclesiæ Presbyteri ante omnes Orientis
 Episcopos Concilio subscripserunt : *Petrus vi-
 ces agens Hadriani Papæ veteris Romæ , desinens
 subscripsit* .

ARTICULUS VIII.

De Concilio Constantinopolitano IV.

Concilium Constantinopolitanum IV. quod octavum est generale, habitum est anno Christi 869. Basilio imperante Constantinopoli, & Hadriano II. Romæ sedente.

§. I.

De causa Concilii Constantinopolitani IV.

CONCLUSIO. Causa cogendi Constantinopolitanum IV. Concilium fuit, tum abdicatio Photii, qui sedem Constantinopolitanam invaserat; tum restitutio Ignatii, qui ab eâ iniquè dejectus fuerat.

Probatur 1. ex epistolâ Hadriani II. ad Imperatorem Basilium: 2. ex actis concilii, de quo agitur; iis nimirum in monumentis de nullâ fermè aliâre agitur, quàm de Photii dejectione, & de restitutione Ignatii.

Quæres 1. quis esset Photius: 2. quibus mediis, quâ arte usus esset, ut Ignatium dejiceret, & occuparetque illius sedem.

Resp. ad 1. Photium fuisse virum sæcularem, Senatoris fungentem officio, & à Secretis Michaelis Imperatoris.

Resp. ad 2. Photium, *Primò*, quòd sedem Constantinopolitanam ambiret, conjunxisse se Gregorio Siraculano Episcopo, nonnullisque aliis Clericis, qui Ignatii promotionem improbaverant. *Secundò*, falsos de Ignatio rumores sparsit, quasi de decessoris sui Germani, sanctissimi viri, moribus & famâ detraheret. *Tertio*, Bardæ operâ usus est. Is, quòd sæpiùs sub
ex-

excommunicationis pœnâ ab Ignatio iussus fuisset discedere à propriâ nuru , quam incestu publico fœdarat , paravit insidias sanctissimo Pontifici Michaeli Imperatori nepoti suo : author fuit , ut Ignatio præciperet tondere Theodoram matrem & Theclam sororem , quæ simul cum eo imperii administrationem sortitæ fuerant . Renuit Ignatius , tum quòd Imperatrices vitæ religiosæ professionem spontè non eligerent ; tum quòd obstrinxisset se sacramento , se nihil unquam contra eas moliturum . Ob id Imperator Bardæ consilio Ignatium dejecit ab Episcopali sede , & Photium subrogavit . *Quartò* , Photius , quòd cum eo Clerus communicare detrectaret , congregavit faventium sibi Episcoporum Conciliû , in quo lata est in Ignatium depositionis sententia , assertumque est Photio Ecclesiæ Constantinopolitanæ regimen . *Quintò* , tantum scelus omnibus viris frugi indignè ferentibus , Photius , ut eos compesceret , à Nicolao Papâ I. suæ ordinationis confirmationem conatus est extorquere , causatus , Ignatium spontè cessisse Episcopatu , sibi que tum ab Imperatore , tum à Clero , tum à populo vim factam fuisse , ut Ecclesiæ , quam abdicarat Ignatius , regimen susciperet . *Sextò* , Rodoldum Episcopum Portuensensem , & Zachariam Anagninum Episcopum , in Orientem à Nicolao Papâ missos , ut de Ignatii abdicatione , quam causabatur Photius , & de ejusdem Photii ordinatione cognoscerent , muneribus corrupit , ac minis terruit , ita ut coactâ synodo , ipsum Ignatium præsentem exauctorarent , ac Photii ordinationem confirmaverint . *Septimò* , iratus in Nicolaum Papam , qui à suis legatis in Oriente contra Ignatium acta Romæ solemnî decreto resciderat , collegit conciliabulum , in quo ipsi Nicolaus Papæ sub quorundam , quos finxerat , excessuum obtentu anathema dictum est . *Octavò* , verùm interfecto Michaeli Imperatori , cujus iussu antea Bardas trucidatus fuerat , successit Ba-

filius, qui à Nicolao Papâ Concilium petiit, quodd Romæ latam in Photium pro Ignatio sententiam solemniter exequeretur. Imperatoris litteræ redditæ sunt Hadriano II. qui mortuo Nicolao successerat; annuit Pontifex, in eumque finem legatos misit in Orientem, qui ejus nomine Concilio, quod celebrandum erat, præsiderent. Quæ hucusque dicta sunt, patent ex Nicetâ in vitâ S. Ignatii, ex præfatione Anastasii Bibliothecarii in hanc synodum, & ex ejusdem synodi actis.

§. II.

De actis Concilii Constantinopolitani IV.

Actio prima, habita est die quintâ Octobris an. 869. In eâ lectum 1. est scriptum, in quo Imperator hortatur Concilium, ut negotia; ad quæ convenerat, pacificè ac sine livore pertractaret. 2. Lectæ sunt etiam Hadriani Papæ ad Basilium Imperatorem Epistolæ. Lectæ pariter sunt: 3. litteræ, quibus ab Antiochenâ & Hierosolymitanâ Ecclesiâ missi suam legationem comprobaverunt. 4. Jubentibus legatis, lectus est, ac probatus libellus, cui omnes subscribere tenerentur; in eo autem libello dicebatur anathema Photio, ei-que adhærentibus, donec eos criminis pœniteret. Confirmabantur, quæ Romanæ synodi, tum sub Nicolao, tum sub Hadriano in causâ Ignatii decreta fuerant. Declarabantur irrita, quæ Photius sive contra Ignatium, sive contra Nicolaum, in suis conciliabulis têtaverat. 5. Lecta est definitio à Vicariis Antiochenæ & Hierosolymitanæ Ecclesiæ edita Constantinopoli, antequàm in eam urbem pervenissent Apostolicæ Sedis legati; eâ autem in definitione, earum Ecclesiarum Vicarii, Nicolai & Hadriani decreta in omnibus articulis amplectuntur.

Actione secundâ, recitatus est penitentiæ libellus

hus à Clericis, qui aut à S. Methodio, aut ab Ignatio ordinati, ad Photium vel vi, vel dolo, vel spontè defecerant. Hi, acceptà à Patribus satisfactoriâ pœnâ, permissi sunt in Natalitiis Domini, & non antea, perfungi suorum Ordinum officii.

Actione tertiâ, Theodulus Metropolita Ancyranus, & Nicephorus, qui à S. Methodio, aut à S. Ignatio ordinati, invasioni Photianæ adhæserant, licèt indulgentiam postulantes, admissi non sunt à Concilio, quòd latis à Nicolao & Hadriano decretis subscribere noluisent. Lectæ sunt postea litteræ Basilii & Ignatii ad Nicolaum, tum eæ, quas Hadrianus & ad Basilium, & ad Ignatium scripserat.

Actione quartâ, auditi sunt Theophilus & Zacharias, qui quondam Episcopi à S. Methodio consecrati fuerant, & postea pro Photio legatione ad Nicolaum perfuncti fuerant: contestati sunt Photium à Nicolao Papâ fuisse receptum; sed lectis litteris Nicolai & ad Michaellem Imperatorem, & ad Photium, de mendacio convicti sunt: quippè Photius, ne Episcopus quidem in iis vocabatur; hæc enim erat inscriptio: *Nicolaus Episcopus servus servorum Dei, prudentissimo viro Photio*. Quòd autem ne audire quidem vellent libellum à Romanâ Sede transmissum ad Concilium, foras, eodem jubente Concilio, ejecti sunt.

Actione quintâ, Photius à synodo per laicos citatus est. Interrogatus, an Romanorum Pontificum Nicolai & Hadriani decreta susciperet, non respondit. Lectæ sunt postea Nicolai ad Photium litteræ. Contestati sunt Orientalium Patriarchatum Vicarii, Ecclesias Patriarchales nusquam consensisse in Photii ordinationem; quibus peractis, Photius è synodo dimissus est.

Actioni sextæ interfuit Basilius Imperator. Lectum est scriptum, quo legati Sedis Apostolicæ decretorum executionem petebant ab Imperatore. Auditi sunt, qui pro Photii ordinatione sta-

P s bant

bant Episcopi . Quæ ab eis pro Photio prolata sunt argumenta , dissolvit Metrophanes Smyrnæ Metropolita . Imperator ipse Photianos illos homines hortatus est ad pœnitentiam ; iis data sunt induciæ septem dierum , quibus elapsis , nisi resipiscerent , anathemati subjicerentur .

Actiōe septimâ , Photius præsens compellatus est , num subjiceret se Nicolai & Hadriani decretis ? sed renuit ; renuit etiam Gregorius Syracusanus , & nonnulli alii Episcopi , qui à Photii partibus steterant . Lecta sunt iterum , quæ Romæ tum contra Photium , tum contra Gregoriū , tum contra adhærentes ei Episcopos decreta fuerant . Tandem anathema dictum est Photio , ejusque sequacibus : *Photio curiali & invasori anathema : Photio seculari & forensi anathema : Photio neophyto & tyranno anathema sit : Photio schismatico & damnato anathema : Photio mæcho & parricidæ anathema Omnibus sequentibus & fautoribus ejus anathema : Gregorio dudum Episcopo Syracusano anathema .*

Actiōe octavâ , 1. lectus est apologeticus liber pro Petro Monacho , qui in suspicionem venerat oblatus contra Nicolaum Papam libelli : 2. Photius convictus est falsi crimine ; quippè Episcopi negarunt , suas esse subscriptiones , quas Photius libello à se contra Nicolaum Papam edito apposuerat : 3. lecto Nicolai adversus Iconomachos capitulo , Iconomachis dictum est anathema ; & iteratum , quod jam in Photium intortum fuerat .

Actiōe nonâ , 1. admissus est ad synodum Michaelis Alexandrini Patriarchæ legatus , à quo rata habita sunt , quæ octo prioribus actionibus decreta fuerant : 2. testes , quos Photius conduxerat , ut Ignatium accusarent , crimen confessi sunt suum , & acceptâ pœnitentiâ canonicâ , quam penès esset Ignatium minuere , Photio ejusque sequacibus anathema , jubente synodo , dixerunt .

Actio-

Differt.IV. *De Locis Theologicis.* 313

Actione decimâ: 1. editi sunt varii Canones :
2. confirmata sunt, quæ in septem prioribus œcumenicis synodis definita fuerant : 3. à Concilio edita est encyclica Epistola : 4. conscripta est synodica ad Hadrianum Papam : 5. ab Hadriani legatis primùm, deindè à cæteris omnibus Episcopis subscriptum est Concilio.

In octavi Concilii generalis acta, quæ hucusque relata sunt, observandum est 1. Romani Pontificis divinum in omnes orbis Ecclesias primatum in eis multùm elucere; nempè probata sunt omnia, quæ pro Ignatio adversus Photium à Nicolao Papâ I. & ab Hadriano II. Romæ definita fuerant; nec in aliquorum mentem tunc venit, laudatos Pontifices sibi in Constantinopolitanum Episcopum jurisdictionem immeritò arrogasse.

Observandum est 2. verè œcumenicam esse hanc synodum, tum quia omnes orbis Patriarchales Ecclesiæ ei subscripsere, tum etiam quia ipsa sæpè seipsam vocat œcumenicam: *Conveniente* (verba sunt actionis 7.) *sanctâ & universali synodo.*

Observandum est 3. quòd licèt omnes Græci Catholici, sicut & Latini, synodum hanc semper pro œcumenicâ admiserint; schismatici tamen, aut ejus loco laudent celebratam à Photio sub Joanne Papâ VIII. aut septem tantùm priora Concilia pro generalibus habeant. Id videre est in sessione sextâ Concilii Florentini, ubi Marcus Ephesiorum Episcopus Juliano Cardinali, qui synodum hanc pro œcumenicâ laudaverat, respondet, rescissam fuisse ab alterâ, quæ sub Joanne habita est; ac proindè inter œcumenicas recenserì non debere.

§. III.

De Canonibus Concilii Constantinopolitani IV.

CONCLUSIO. In Concilio Constantino-
litano IV. viginti septem Canones ad discipli-
nam spectantes editi sunt.

Probatur præcipuorum enumeratione, ac ex-
positione. *Priore* sancitur, ut Canones ab Apo-
stolicis Conciliis, sive generalibus, sive localibus,
à Patribus editi, ad unguem servantur tanquã se-
cunda eloquia. *Not. 1.* quòd Canones, qui passim
Apostolici dicuntur, insismet Apostolis adscribat.
Not. 2. Canones appellari *secunda eloquia*, quòd
divina, priora sint Ecclesiasticis. *Not. 3.* Concilia
localia vim habere, nisi à superioribus rescissa
fuerint. *Not. 4.* definiri Canones esse regulas, ad
quas Clericorum mores exigì debent; ac proin-
dè authorum recentiorum, qui eis adversantur,
nullam haberi debere rationem.

Secundus Canon, præcipit eorum observatio-
nem, quæ Nicolaus I. & Hadrianus II. in causâ
Ignatii adversus Photium *synodicè* statuerant; id-
que sub pœnâ depositionis in Clericis, in laicis
verò sub excommunicationis pœnâ. *Not. 1.* pro-
bari, quæ à Romanis Pontificibus *synodicè* pro-
mulgata fuerant, quia quæ nunc ex Concilio
Cardinalium definiunt, olim plerumque convo-
catâ Episcoporum synodo definebant. *Not. 2.*
idèò Clericos inobedientes depositione solâ, non
autem excommunicatione mulctari, quòd juxta
Canones Apostolicos, duplex pœna pro uno cri-
mine, nisi multùm sit immane, infligi non de-
beat.

Tertio Canone, decernitur, ut cultus imaginum
firmus consistat. *Not. 1.* Canonem occasionem
dedisse novos Iconomachos, qui tunc Constan-
tinopoli versabantur. *Not. 2.* *Adorationis* no-
men,

men, quo Concilium utitur, non significare latræ cultum, sed religiosam reverentiam, quæ tum Virginis Deiparæ, tum Sanctorum, tum Angelorum imaginibus, tum Evangeliorum libris, tum S. Crucis typo exhibeatur. *Not. 3.* eum cultum non terminari ad ipsas imagines, sed ad earum prototypa: *Quia* (inquit) *ad principalia ipsa referuntur.* x

Quarto Canone, definitur, nullam esse tum Photii, tum eorum, quibus manus imposuit, ordinationem; iterandæ quoque decernuntur dedicationes Ecclesiarum, altarium consecrationes, quastam ipse, quàm ab eo ordinati tentaverant. *Not. 1.* Hæc synodi verba: *Photium nunquam fuisse priorem, aut nunc esse Episcopum*, intelliguntur à Morino nostro de Episcopatu sumpto secundum substantiam; ab aliis verò de Episcopatu sumpto tantum secundum jurisdictionem. Nec obstat (inquiunt) quòd Nicolaus Papa ad Imperatorem Michaellem scribens dicat: *Igitur nihil Photius à Gregorio accepit*; nam dicit quoq; nihil habuisse Gregorium: *Nihil autem habuit, nihil dedit*; in eo tamen, licet deposito, Episcopalis character remanserat. *Not. 2.* Altaria vocantur mensæ; idque ab Apostoli exemplum, 1. ad Corinth. 10. *Not. 3.* Concilium loquitur de Ecclesiarum & Altarium dedicatione & consecratione, tanquam de re, quæ ubique esset in usu.

Quinto Canone, decernitur, ne quis è Curialibus, quem suspicio fuerit attonsum fuisse, aut Monachum factum Patriarchatûs, vel Episcopatûs capessendi gratiâ, ordinetur, licet inter singulos ordines debita interstitia fluxerint. Si nulla fuerit ejusmodi suspicio, edicit consecrari quidem posse, aut Patriarcham, aut Episcopum, modò tamen in gradu Lectoris annum compleverit, in Subdiaconi duos, in Diaconatu tres, & in Presbyteratu quatuor; posse Episcopos tempus contrahere, non quidem Curialium respectu, sed

sed eorum tantum, qui in Clericatu aut Monachatu religiosè vixerint. *Not. 1.* Occasio Canonis fuit Photii momentanea ex ordine Senatorio promotio ad Patriarchatum Constantinopol. *Not. 2.* Canon ex ordinibus minoribus, solum Lectoratum recenset, quod Ecclesia Græca nusquam tres alios admiserit. *Not. 3.* Facultas fit Episcopis, ut in canonum executione dispensent, ubi id Ecclesiæ utilitati expedierit.

Septimus Canon, vetat, ne ab hac synodo anathematizati admittantur, aut ad pingendas in templis imagines, aut ad scientias docendas; idque sub pœnâ interdicti in Clericis, & separationis in laicis. *Not. 1.* per se non esse malum, quod Canon vetat; sed prohibitum est, ut anathematizati resipiscerent. *Not. 2.* Non à sacris modò, sed etiam ab humanis scientiis docendis arcentur anathematizati. *Not. 3.* Interdictum, cujus meminit, non incurritur *ipso facto*, sed est comminatorium: *Proprio gradu periclitetur*. *Not. 4.* Separatio non semper intelligitur de excommunicatione majore; quippè hoc loco canon *separationem*, quam infligit, sic exponit: *Divinorum mysteriorum communione priventur*, hoc est, arceantur, dum sacra fiunt.

Canon decimus, prohibet, ne quis ante latam sententiam separetur à communione proprii Patriarchæ, aut Episcopi, licèt criminis reus noscatur. *Not. 1.* Communio cum Episcopo dicit Sacramentorum receptionem, precum communionem, jurisdictionis admissionem. *Not. 2.* Antiqua est regula, cujus canon meminit, Episcopi nomen in mysteriis recitandi.

Canone undecimo, damnantur ii, qui in unoquoque homine duas animas rationales admitterint. *Not. 1.* Ex Anastasio Bibliothecario, præfatione in octavam synodum, Photius fuit ejusmodi opinionis author. Id tamen non fuit omninò persuasum Concilio; alioquin enim authorem nominasset. *Not. 2.* Dogma Catho-

licum non ex Scripturâ tantum , sed ex Patribus Concilium confirmat, quod traditio unanimis non minùs, quàm Scriptura, sit fidei ac morum regula.

Canone duodecimo, statuitur, ne favore Principum eligantur Episcopi. *Not. 1.* Occasio fuit promotio Photii, qui Michaelis Imperatoris tyrannide substitutus fuerat Ignatio viventi. *Not. 2.* Canon non adversantur Concordata inter Leonem Papam X. & Franciscum I. Gallorum Regem; in iis enim, quæ spiritualia sunt, vim habent suam ex Ecclesiæ concessione.

Canone decimotertio, prohibetur, ne promoti ad Episcopatum, indecentia obsequia Principibus exhibeant, ut eos, si aberraverint, corripere valeant. *Not. 1.* Canone consulitur Episcopali dignitati, non autem Episcoporum vanitati. *Not. 2.* Canon inter indecentia obsequia recenset obviam ire procul ab Ecclesiis, aut se ab equis aut mulis multo spatio dejicere, aut intrare ad eorum mensam horâ prandii.

Canon decimus sextus, prohibet, ne quis lusûs causâ, sacra Sacerdotum vestimenta gestare, aut sacras ceremonias exhibere audeat; idq; sub gravissimis pœnis. *Not. 1.* Usui locum dederat Michael Imperator, qui eum ludendi morem in Theophilo scurrâ insigni probaverat. *Not. 2.* Graviter ergo peccant, qui adsunt spectaculis, in quibus sacris ritibus illuditur.

Canone decimo septimo, sancitur, Metropolitanos debere sistere se præsentes indicto à Patriarchâ Concilio; eorum excusationem admitti non debere, qui causantur, se à Principibus detineri. *Not. 1.* In Galliis Præsules non solent è regno discedere, nisi petita à Regibus Christianissimis licentiâ. *Not. 2.* Hæc Canonis verba: *Cum nusquam sacri canones convenire saculares Principes in conciliis sanxerint, sed solos antistites*, à Conciliis Principes non excludunt; unde in nationalibus, imò & in generalibus, sæpè præsentes fue-

fuerunt, sed significant eorum præsentiam absolute non requiri.

Canone vigesimo primo, prohibetur, ne quis adversus Patriarchas, *Et præcipue quidem sanctissimum Papam senioris Romæ*, sub criminum & prævaricationum obtentu, libellos conscribere audeat. Annuitur universalibus synodis, ut reverenter inquirant de quæstionibus, quæ moventur adversus Ecclesiam Romanam; sed vetat, ne *audacter sententiam dicant*, contra summos senioris Romæ Pontifices. *Not. 1.* Canonis occasio fuit Photii facinus, qui ausus est adversus Nicolaum I. ferre depositionis & excommunicationis sententiam. *Not. 2.* Probat Canon singularem Papæ præ cæteris Patriarchis eminentiam.

Canon vigesimus secundus, ab Episcoporum electionibus quosvis laicos, etiam Principes, excludit, nisi ab Ecclesiâ invitentur. *Not. 1.* Aliud est consensus in electionem, aliud electio, seu nominatio; ille non excluditur per Canonem, sed electio tantum. *Not. 2.* Canon non adversatur Galliarum cum Leone X. concordata; neque enim factæ à laicis nominationes excluduntur, si laici jus nominandi ab Ecclesiâ receperint.

Canone vigesimo septimo, jubet, ut Episcopi pallio utantur congruo tantum tempore; prohibet Monachis ad Episcopatum assumptis, ne monasticum habitum deponant. *Not. 1.* Secunda Canonis pars locum non habet in Galliis; nempe Clerus in regni comitiis generalibus statuit decere, ut omnes Episcopi, ex quocumque ordine, si ve Clericali, si ve monastico, assumpti fuerint, eundem habitum deferant. *Not. 2.* Monachi per Episcopalem consecrationem eximuntur quidem ab emissio in Monasteriis obedientiæ voto, sed non ab aliis; id nimirum indicant Canonis verba: *Ne per hoc inveniatur propriorum transgressor pastorum.*

§. IV.

*De convocatione, & præside Concilii
Constantinopolitani IV.*

CONCLUSIO 1. Basilius Imperator convocavit Concilium Constantinopolitanum IV.

Probatur 1. ex actione primâ, ubi sic ipsummet Concilium de Basilio loquitur: *Qui universalem synodum congregans, &c.* 2. Idem asserit Ignatius in suâ ad synodum acclamatione, actione octavâ: 3. idem hæc ejusdem synodi verba, actione decimâ: *Sancta, magna, & universalis synodus, quæ per divinam voluntatem & gratiam, & sanctionem amicorum Christi Imperatorum nostrorum Basiliæ & Constantini congregata est.*

Ex eo facto heterodoxi nihil contra Romane Sedis jura colligere possunt. Nam 1. à factis ad jura conclusio non valet, ut agentes de Conciliis in genere diximus. 2. Id non tentavit Basilius, nisi jubeante Hadriano Papâ II. *Volumus autem (inquit ad Basilium scribens) per vestræ pietatis industriam Constantinopoli numerosum celebrari Concilium.*

CONCLUSIO 2. Hadrianus Papa II. per suos Legatos præfuit Concilio Constantinopolitano IV.

Probatur 1. Legati dicuntur tenuisse locum Hadriani Papæ. 2. In singulis Concilii actionibus nominantur ante cæteros Patriarchas: *Convenientibus Donato & Stephano Episcopis, & Marino Diacono, locum tenentibus Hadriani Archiepiscopi senioris Romæ, & Ignatio Archiepiscopo Constantinopolitano, novæ Romæ, &c.* 3. Ante cæteros omnes Patriarchas subscripserunt Concilii actis, addito præsidentis nomine: *Ego Donatus huic sanctæ & universali synodo præsidentis subscripsi.*

Ob-

Objicies 1. Basilius, & ejus filii Constantinus & Leo, actionibus 8. & 10. dicuntur Concilio præfuisse : *Præsidentibus Christi dilectis Imperatoribus* : ergo Hadriani II. legati nequaquam fuerunt Concilii præfidentes.

Resp. conc. ant. dist. conseq. quoad locum materiale, conc. conseq. quoad authoritatem, seu potestatem judicandi, neg. conseq. Ratio est 1. quia Basilius in allocutione ad synodum, expressè asserit, laicis non licere de Ecclesiasticis causis movere sermonem; sed solis Pontificibus, quibus Christus concessit Ecclesiæ claves.

Objicies 2. Illi præfuerunt Concilio Constantinop. IV. quibus acclamatum est, antequam ipsi Romano Pontifici acclamaretur: atqui Imperatori Basilio acclamatum est, antequam Romano Pontifici acclamaretur; ut patet ex actione 9. ergo, &c.

Resp. nimis probare argumentum; quippè (ut constat ex actione 10.) Eudoxiæ Imperatrici acclamatum est quoq; antequam Nicolao I. & Hadriano II. acclamaretur. 2. Is honorei delatus est, non quidem tanquam controversiarum judici, sed tanquam Principi de Ecclesiâ, cujus paci consuluerat, optimè merito.

Objicies 3. Illi præfuerunt Concilio Constantinop. IV. qui rogati sunt illius actis ante Romani Pontificis legatos subscribere: atqui Imperatores id rogati sunt: *Volumus* (inquiunt legati actione 10.) *ut subscribant primitus Christi amantes Imperatores, & deinde secundum ordinem sancta hæc synodus.*

Resp. dist. maj. Qui rogati sunt, ut ante legatos jure, actis Concilii subscriberent, conc. maj. ex gratiâ ipsius Concilii, neg. maj. Id autem jure Imperatoribus debitum non fuisse, probant 1. hæc legatorum verba: *Volumus, ut subscribant, &c.* Probat 2. hoc Imperatoris Basilii ad Legatorum preces responsum: *Tranquillissimum Imperium nostrum vult subscribere post subscriptionem omnium*

Differt. IV. *De Locis Theologicis.* 321
nium sanctissimorum, Patriarchalium sedium, Vicariorum; idque sic factum est.

ARTICULUS IX.

De Concilio Lateranensi I.

CONCILIUM Lateranense I. quod nonum est œcumenicum, habitum est, secundum peritiorum calculum, anno 1123. Romæ sedente Callisto Papâ II. imperante in Germaniâ Henrico IV. Dicitur Lateranense, ex Basilicâ Lateranensi, in quâ celebratum est.

§. I.

De causa, convocatione, præside Concilii Lateranensis I.

CONCLUSIO I. Triplex fuit causa celebrandi Concilium Lateranense I.

Probatur. Celebratum fuit, ut investiturarum abrogatio, secundum pacta inter Callistum & Henricum inita, confirmaretur: *Cum apud Callistum demorando* (inquit Sugerius Abbas in Ludovico Rege) *magno Concilio trecentorum & amplius Episcoporum Laterani compositioni pacis de querela investiturarum adfuitissimus.* Celebratum fuit 2. ut Palæstina & Hispania ab infidelium tyrannide liberarentur; id nimirum ex Canone 11. colligitur. Celebratum fuit 3. ut Ecclesiasticæ disciplinæ per Clericorum simoniam & luxuriam fœdata, consuleretur; id manifestè patet ex pluribus Concilii Canonibus, de quibus dicemus subsequente paragrapho.

Quæres 1. quid investiturarum nomine intelligi debeat: 2. quid earumdem investiturarum usui occasionem dedisset: 3. quinam Summi Pontifices contra Imperatores pro investiturarum abrogatione decertaverint.

Resp.

Resp. ad 1. investiturarum nomine intelligi consensum à sæculari Principe datum, factæ alicujus ad Episcopatum, vel Abbatiam electioni, nec non bonorum Ecclesiasticorum possessionis concessionem solemnem quodam ritu demonstratam.

Resp. ad 2. investiturarum usus locum dedisse Principum sæcularium erga Ecclesias munificentiam; cum enim ab iisdem Principibus non solum prædia & latifundia, sed etiam feuda Imperatoriæ, aut Regiæ majestati subdita, Ecclesiis concessa fuissent, factum est *primò*, ut ejusmodi feuda aliorum feudorum conditionem sortirentur, seu, ut Episcopi, aut Abbates non venirent in eorum possessionem, nisi exhibito Principibus hominio, & fidelitatis præstito juramento. Factum est *secundò*, ut ejusmodi tum hominium, tum juramentum exigerentur etiam ab Episcopis & Abbatibus, quorum Ecclesiæ nullis Principum feudis fruerentur. Factum est *tertiò*, ut Principes ad ipsas etiam electiones investiturarum usum extendere tentaverint, ita ut electiones liberè fieri non sinerent. Factum est *quartò*, ut ipsam etiam jurisdictionem spiritualem concedere sibi viderentur; nempe bonorum fruitionem concedebant per traditionem baculi & annuli Pastoralis, quæ quidem sunt Ecclesiasticæ jurisdictionis insignia.

Resp. ad 3. contra investituras acriter decernisse Gregorium Papam VII. Singulis fermè annis habuit Concilia, quibus districtè prohibuit, ne quis Ecclesiarum investituras de Principum manibus acciperet. Henricum III. Imperatorem, quòd sub earundem investiturarum obtentu Ecclesias vexaret, excommunicatione multavit Victor III. qui proximè Gregorio VII. successit, à suo decessore latam in Henricum IV. sententiam confirmavit. Idem quoque præstitit Urbanus II. Paschalis II. ab Henrico IV. reiectus in carcerem, ipsi investiturarum privilegium

gium concessit ; quod quidem idem Pontifex liber postea factus, duobus in Conciliis Romæ celebratis rescidit . Gelasius, qui Paschali successit, ubi decessorum suorum statuta confirmasset, vi & armis ab Henrico IV. pulsus est ex Italiâ . Callistus II. post Gelasii mortem electus, litem de investituris, quæ tot annis Ecclesiam vexarat , in Concilio Lateranensi I. composuit iis conditionibus , quæ subsequenti paragrapho referentur .

CONCLUSIO 2. Callistus Papa II. indixit Concilium Lateranense I. illique per seipsum præfuit .

Probatur prior pars ex litteris Callisti ad Henricum, ubi hæc habentur: *Legatos itaque nostros, qui apud vos sunt, rogamus, ut quia Concilium à nobis indictum accelerat, citò ad nos, Domino largiente, remittas.*

Probatur altera pars ex eo, quòd tempore quo habitum est Concilium, Summi Pontifices non spirituali tantum potestate, sed supremâ etiam temporali, Romæ fruerentur; ac proinde, si Callistus Concilio adfuerit, ut adfuit reverà, in eo non aliam, quàm præsidis, personam egit.

§. I I.

De actis & Canonibus Concilii Lateranensis I.

CONCLUSIO I. In Concilio Lateranensi I. Henricus Imperator IV. investturas, electiones, bona Ecclesiis restituit.

Probatur ex ipso Henrici restitutionis instrumento, quod in Lateranensi Concilio lectum est: *Ego Henricus pro remedio animæ meæ dimitto Deo & sanctis ejus Apostolis Petro & Paulo, & sanctæ Catholicæ Ecclesiæ, omnem investituram per annulum & baculum, & concedo in omnibus Ecclesiis fieri electionem & liberam con-*
se-

secrationem. Possessiones & regalia Beati Petri, quæ à principio hujus discordiæ usque ad hodiernum diem, sive tempore Patris mei, sive etiam quæ meo ablata sunt, quæ habeo, eidem sanctæ Romanæ Ecclesiæ restituo.

CONCLUSIO 2. Callistus Papa II. Henrico IV. concessit 1. ut sisteret se præsentem electionibus, quæ in illius regno fierent. Concessit 2. ut electus intra imperii limites regalia per sceptrum ab ipso acciperet, iis tamen exceptis, quæ ad Ecclesiam Romanam pertinere noscuntur.

Probatur ex factæ à Callisto concessionis instrumento, quod in Concilio, de quo agitur, actis lectum & probatum est. Quid autem essent regalia, quæ Henrico concessa sunt, dicemus inferiùs agentes de Concilio Lugdunensi I.

CONCLUSIO 3. In Concilio Lateranensi I. editi sunt viginti duo Canones ad disciplinam spectantes.

Probatur. Nec plus, nec minùs quàm viginti duo Canones reperiuntur in vulgaribus hujusce Concilii editionibus. Operæ pretium est, ut hîc præcipuorum expositionem subjiciamus.

Primus Canon, definit, ordinatum aut promotum per pecuniam, sic acquisitâ dignitate carere debere. *Not.* 1. Canon non significat, irritam esse ordinationem sumptam secundùm substantiam, sed tantùm secundùm illius executionem, aut exercitium. *Not.* 2. Id tamen non habet locum, nisi post judicis declarationem.

Secundus Canon, vetat, ne fiat præpositus, aut Archipresbyter, nisi ex Presbyteris; nec Archidiaconus, nisi ex Diaconis. *Not.* 1. Id ideò sancitum est, quòd insignis quædam sapientia requiratur in iis, qui in iis dignitatibus constituti sunt. *Not.* 2. Secundùm hodiernam disciplinam satis est, ut intra annum sit Presbyter, qui eligitur ad dignitates, quæ nonnisi à Presbyteris haberi possunt.

Ter-

Tertius Canon, Presbyteris, Diaconis, Subdiaconis prohibet concubinarum & uxorum contubernia. *Not.* Uxorum nomine intelliguntur mulieres, quæ aut ante sacrum ordinem juræ ductæ fuissent, aut quæ post sacrum ordinem, contra Canones.

Quintus Canon, edicit, ne fiant conjunctiones consanguineorum, quoniam (inquit) eas & divinæ & sæculi leges prohibent. *Not.* 1. Sumit consanguineos latè, hoc est, prout consanguinei etiam affines complectuntur. *Not.* 2. his temporibus consanguinitas & affinitas usque ad septimum gradum erant impedimenta matrimonium dirimentia. *Not.* 3. Nomine *divinarum* legum intelligit Canonicas, tum quod eas opponat sæculi legibus, tum quod nuptiæ inter quaslibet consanguineas non sint irritæ jure divino.

Sextus Canon, irritas declarat factas à Burdino ordinationes. *Not.* 1. Burdinus erat Antipapa, quem ex Archiepiscopatu Bracarensi Henricus IV. vi & armis ejecto Romæ Gelasio suffecerat. *Not.* 2. Ordinationes declarantur irritæ sensu superius dicto.

Vndecimus Canon, peccatorum remissionem iis concedit, qui Hierosolymitanum aut Hispanicum iter defendendæ Ecclesiæ causâ susceperint; interdicit Ecclesiæ introitu eos, qui assumptâ in vestibus cruce, illud iter suscipere detrectaverint; præterea eorum terras interdicto subjicit. *Not.* 1. Ea peccatorum remissio intelligitur non de culpâ, sed de pænâ temporali per Canones impositâ. *Not.* 2. Ea remissio, de quâ loquitur Canon, est id quod Theologi *Indulgentiam* propriè sumptam appellant; nimirum indulgentia non est aliud, quàm remissio impositæ, aut imponendæ per Canones pænæ, quæ etiam coram Deo minuitur. *Not.* 3. Duplici de causâ damnantur, qui crucibus acceptis Hierosolymitanum aut Hispanicum iter non suscipiunt; nem.

nempè non exequuntur votum, quod suscipiendo cruces emiserunt; non perficiunt pœnitentiam publicè sibi pro gravibus criminibus impositam.

Duodecimus Canon, vetat, ne Porticanorum si-
neliberis morientium bona pervadantur. *Not.*
Porticani, secundùm aliquos, erant incolæ por-
tus Romani; eorum bona, si absque liberis more-
rentur, urbis præfectus vindicabat sibi. Secun-
dùm alios, advenæ erant & extranei, qui in por-
ticibus residebant; hos Urbis præfecti contende-
bant jus non habere condendi testamentum.

Canon decimus tertius, Treugæ infractores post
tertiam monitionem, ni satisfaciant, anathema-
te damnat. *Not.* 1. Treugæ sunt à privatis bellis
induciæ ab Episcopo indictæ. *Not.* 2. Illud ana-
thema non habebat locum, nisi post latam ab
Episcopo sententiam.

Canon vigesimus primus, illicita, ac irrita decla-
rat inita à Presbyteris, Diaconis, & Subdiaco-
nis matrimonia. *Not.* 1. Canon ille deest in co-
dice Anianensi. *Not.* 2. Non edicit matrimonia,
quæ Clerici majores inierint, fore deinceps irri-
ta, sed declarat irrita esse, quæ etiam ante edi-
tum Canonem contracta fuissent; antea igitur
Ordo sacer erat dirimens impedimentum matri-
monii.

ARTICULUS X.

De Concilio Lateranensi II.

CONcilium Lateranense II. quod decimum est
œcumenicum, celebratum est anno 1139.
Innocentio Papâ II. Romæ sedente; illud in-
dixit, illique præfuit mox laudatus Pontifex:
Proximâ mediâ quadragesimâ (inquit Otto Fri-
singenfis, illius temporis scriptor, lib. 7. cap.
23.) *Synodus maxima circiter mille Episcoporum,*
præsidente Romæ Summo Pontifice Innocentio, cele-
bratur.

§. I.

§. I.

De causa & actis Concilii Lateranensis II.

CONCLUSIO 1. Schisma à Petro Leonis conflatum, Petrobusianorum ac Arnoldistarum errores, collapsa Ecclesiæ disciplina, tres fuerunt convocandi Concilii Lateranensis II. rationes .

Probatur . Vespbergenfis in Chronico, Otto Frisingensis, aliique sæculi xii. scriptores, eas quas retulimus, convocandi Concilii Lateranensis II. rationes recensent.

CONCLUSIO 2. In actis Concilii Lateranensis II. damnatum est Leonis schisma, scripti sunt Petrobusianorum & Arnoldistarum errores, ac restituta Ecclesiæ disciplina.

Probatur. *Primò*, ita docent laudati superiùs historici: *Secundò*, Canone 30. irritæ quoad exercitium declarantur factæ à Petro Leonis, & ipsi adhærentibus ordinationes: *Tertiò*, Canone 23. damnantur præcipui Petrobusianorum & Arnoldistarum errores: *Quartò*, reliquis Canonibus collapsa restituitur disciplina.

Quæres 1. quando incœperit, quandiùque perduravit conflatum à Petro Leonis schisma.

Resp. incœpisse anno 1130. Nempè illius anni Kal. Martii, electo Canonicè Innocentio II. Petrus Leonis sub Anacleti II. nomine à factiosis quibusdam pseudo-pontifex creatus est. Is vicinorum armis Româ eiecit Innocentium, quem Gallia primùm, deindè Anglia, Germania, & plures Italiæ Provinciæ pro vero agnoverunt Pontifice. Mortuo Petro Leonis, Victor qui in ejus locum à schismaticis susceptus fuerat, depositis Pontificalibus vestibus, iniit cum Innocentio concordiam, ad cujus confirmationem habitum est anno 1139. Concilium Lateranense II. ac

proinde novem annis perduravit conflatum à Petro Leonis schisma.

Quæres 2. quinam fuerint Petrobusianorum errores.

Resp. Petrum de Bruis, à quo Petrobusiani nomen sortiti sunt (teste Petro Cluniacensi libro 1. epist. 1.) docuisse 1. inutile esse ad salutem datum parvulis baptisma : 2. everti debere templorum, vel Ecclesiarum fabricas : 3. cruces confringi, non autem adorari debere : 4. id quod in Eucharistiâ fidelibus traditur, non esse verum Christi corpus : 5. mortuos nec Presbyterorum sacrificiis, nec fidelium precibus juvari.

Quæres 3. in quo ab Arnoldistis erratum sit.

Resp. his verbis Ottonis Frisingensis eorum temporum historici : *Dicebat (sectæ author) nec Clericos proprietatem, nec Episcopos regalia, nec Monachos possessiones habentes, aliqua ratione posse salvari ; cunctaque hæc Principis esse, ab ejusque beneficentia in usum tantum laicorum cedere oportere. Præter hæc de Sacramento Altaris, de Baptismo parvulorum, non sanè dicitur sensisse.*

§. II.

De Canonibus Concilii Lateranensis II.

CONCLUSIO. Concilium Lateranense II. Ecclesiasticæ disciplinæ consuluit viginti sex Canonibus.

Probatur præcipuorum enumeratione, ac expositione. *Priore*, irrita declaratur facta per simoniam ordinatio. *Not. 1.* Intelligitur de ordinum executione, hoc est, per simoniam ordinati, fiunt irregulares. *Not. 2.* Canon locum non habet in casu ordinationis factæ per simoniam mentalem, quia Ecclesia de internis non judicat.

Altero Canone, vetatur, ne pro præbendis, pro-

mo-

motionibus Ecclesiasticis , Sacramentis, Altarium aut Ecclesiarum consecratione , aliquid ante, vel postea exigatur, aut detur, nec pro pastu , nec sub obtentu alicujus consuetudinis . *Not.* 1. Quæ Canon vetat, non sunt tantum contra jus Ecclesiasticum , sed etiam contra divinum : *Quoniam* (inquit) *simoniacum est* ; simonia autem est contra jus divinum . *Not.* 2. Hæc verba : *Nec pro pastu* , damnant praxim , pecuniam pro pastu oppignerandi, antequam electus admittatur in præbendæ possessionem . *Not.* 3. His aliis verbis : *Absque imminutione aliqua* , proscribitur praxis earum Ecclesiarum , in quibus licet quis officio suo vacet , frustratur primo saltem anno, aut toto redditu, aut aliqua ejus parte , nisi tamen id in Ecclesiæ fabricam , aut ornamentorum emptionem impendatur . *Not.* 4. Canon non distinguit inter rei sacræ pretium , aut ejus conferendæ motivum ; non minus igitur censet, simoniacum esse nonnihil temporale conferre pro pretio, aut motivo beneficii . *Not.* 5. Hæc verba : *Vel ipse dare præsumat* , damnant eos, qui sub gratitudinis obtentu, aut pecuniam, aut aliquid aliud pro resignato beneficio rependunt , præsertim si id fiat ex consuetudine, aut si sit ingens pecuniæ summa . *Not.* 6. hæc verba : *Ante vel post à quoquam aliquid exigatur* , non damnant Parochos, qui post nuptiarum celebratos ritus aliquid ad sui sustentationem exigunt ; scriptum est enim : *Non alligabis os bovis trituranti* .

Canone tertio , prohibetur, ne quis à proprio Episcopo excommunicatum absolvat . *Not.* 1. Id locum non habet in extremo vitæ periculo . *Not.* 2. In eo casu ab alio , quam à proprio Episcopo absolutus, tenetur, si convaluerit, sistere se præsentem proprio Episcopo , ut absolutionem confirmet .

Canon quintus, vetat, ne Clericorum morientium bona diripiantur . *Not.* Id probat, Clericos

habere usum , non autem donjñium bonorum Ecclesiasticorum .

Canone octavo, damnantur Monachi & Canonici Regulares , qui aut leges Imperiales, aut artem medicinæ discunt . *Not. 1.* Canon omnes omninò , tum Monachos, tum Clericos, completitur, quamvis expressè de solis Monachis & Canonicis Regularibus loquatur ; nempè laudat Imperiales constitutiones, quæ omnibus Clericis forensium disceptationum studium vertūt opprobrio . *Not. 2.* Non damnantur tamen , qui aut forenses leges, aut medicinam discunt , ut solvant nonnullos conscientiæ casus , aut charitatem in proximum exerceant ; id verba ista innuere videntur : *Gratia lucri temporalis* .

Canon duodecimus , Treguarum tempus definit à quartâ feriâ ad secundam alterius hebdomadæ ; ab Adventu Domini usque ad Octavam Epiphaniæ , & à Quinquagesimâ usque ad Octavam Paschæ . *Not. 1.* Ex dictis superiùs , Treguarum nomine intelliguntur induciæ à privatis bellis , injuriis , deprædationibus , &c. *Not. 2.* Non probavit tamen Canon Treguarum infractionem aliis à recensitis diebus ; sed œconomix causâ , eam dictis tantùm diebus mulctavit excommunicationis poenâ .

Canon decimus tertius , damnat usuram , tanquam quæ veteri & novo testamento damnetur ; edicit usurarios recipi non debere , nisi summâ cautelâ . *Not. 1.* Canon igitur censet , usuram divino jure prohiberi . *Not. 2.* Non distinguit inter pauperes & divites ; à quocumque igitur aliquid ultrâ sortem exigatur , usura est . *Not. 3.* Cautela , cujus Canon meminit , intelligitur de obligatione restitutionis usurariis ante absolutionem imponendâ .

Canon decimus quintus , excommunicat eum , qui suadente diabolo violentas manus in Monachum , aut Clericum injecerit . Casum hunc citrà mortis periculum reservat Summo Pontifici .

Not. 1.

Not. 1. Intelligitur de percussione gravi. *Not. 2.* Mos jam erat reservandi quosdam casus Summo Pontifici.

Canon vigesimus, jubet, ut Principes consultis Episcopis jus dicant. *Not. 1.* Episcopi iis temporibus jus, etiam quoad civilia, suis diœcesanis dicebant. *Not. 2.* Sæculares judices illud dicere non solebant, nisi consultis Prælati; morem illum Canon innovat.

Canon vigesimus primus, filios Presbyterorum declarat irregulares. *Not. 1.* Canon non loquitur de filiis in legitimo matrimonio genitis à Presbyteris ante ordinationem. *Not. 1.* Canon declarat, tolli eam irregularitatem per Religiosæ vitæ professionem.

Canon vigesimus secundus, definit, falsis pœnitentiis animas decipi, & in infernum pertrahi. Falsam verò dicit esse pœnitentiam, cum pro uno peccato tantum fit satisfactio, non pro omnibus; aut cum agens de uno pœnitentiam, incidit in aliud; aut cum non receditur à negotio curiali, aut negotiali, quod non valet agi sine peccato; aut cum offensus offendentem non indulget; aut cum offendens non satisfacit offenso. *Not. 1.* Imperitia, aut mollior ministri agendi ratio secorum non facit pœnitentem, quantamcumque pœnitens de illo ministro habeat æstimationem. *Not. 2.* Canon vult, ut minister de veritate pœnitentiæ judicet, non ex pœnitentis verbis, sed factis. *Not. 3.* Qui non vult convenientem pro peccatis omnibus satisfactionem subire, censeri non debet verè pœnitens. *Not. 4.* Si pœnitens non est (ut ait Canon) qui dum de uno peccato agit pœnitentiam, incidit in aliud alterius speciei; à fortiori, si ex consuetudine incidat in ejusdem peccati speciem. *Not. 5.* Ex Canone, impœnitensest, qui non discedit ab occasione, quæ etiam *per accidens*, inducit ad peccatum, ut curiale, aut negotiale negotium: à fortiori pœnitens non est, qui non discedit ab occasione, quæ *per se*,

332 Instit. Theolog. Prolegomena.
ad peccatum inducit. *Not.* 6. Satis non est ad
pœnitentiam odii depositio, sed præterea requi-
ritur externa reconciliatio. *Not.* 7. Cum iis re-
gulis molliorum hujus ævi Casuistarum praxis
conciliari non potest.

Canon vigesimus tertius, damnat, tum Petrobu-
fianorum, tum Arnoldistarum errores, de qui-
bus diximus agentes de hujusce Concilii causâ.

Canon vigesimus nonus, sub anathemate prohi-
bet, ne balistariorum & sagittariorum artes ad-
versus Christianos exerceantur. *Not.* Balistarii
(teste du Cange) homines erant, qui conducti ad
privata certamina, balistis, aut sagittis utebantur.

Canon trigessimus, irritas & vacuas declarat or-
dinationes factas, tum à Petro Leonis, tum ab
aliis schismaticis, tum ab hæreticis. *Not.* Falsò
(ut articulo superiore dictum est) Gratianus &
Magister sententiarum Canonem exponunt de
ordinatione secundum substantiam & caracte-
rem sumptâ.

A R T I C U L U S XI.

De Concilio Lateranensi III.

Concilium Lateranense III. quod undeci-
mum est œcumenicum, celebratum est an-
no 1179. imperante in Germaniâ Friderico I.
Romæ sedente Alexandro Papâ III. Trecentos
ei adfuisse Episcopos, scribit testis oculatus Guil-
helmus Archiepiscopus Tyrius lib. 21. cap. 2. de
bello sacro.

Hoc Concilium ab Alexandro Papâ III. con-
vocatum fuisse, certum est ex ejusdem Alexandri
litteris ad Episcopos per Tusciam constitutos;
quas litteras, mutato tantùm nomine, ad cæteros
orbis Episcopos directas fuisse, evincitur ex con-
stanti Ecclesiæ praxi.

Illi eundem Papam præfuisse, constat ex ejus-
dem Concilii præfatione, ubi id expressè asseritur.

§. I.

§. I.

De causa Concilii Lateranensis III.

CONCLUSIO . Tres fuerunt Concilii Lateranensis III. convocandirationes .

Probatur enumeratione. *Primò*, coactum est, ut schismati deinceps vitando consulereetur . Id scilicet probant prior & alter Concilii Canon . *Secundò*, coactum fuit contra Vvaldensium & Albigenfium errores . Id patet ex Canone 27. *Tertiò*, coactum fuisse, ut reformarentur mores usurâ, simoniâ, aliisque vitiis corrupti, demonstrant editi in eo Concilio Canones .

Quæres I. cur in Concilio Lateranensi III. de mediis ad schisma deinceps vitandum actum fuerit.

Resp. occasionem dedisse Octaviani schisma . Mortuo Hadriano Papâ IV. anno 1159. Alexander III. à saniori & majori Cardinalium parte electus est in Pontificem maximum: Octavianus verò, licet à tribus tantum designatus fuisset, sub Victoris IV. nomine Pontificatus insignia ausus est usurpare . Hunc, & qui ipsi mortuo successerunt, Guidonem Cremonensem, quem Paschalem II. vocarunt, & Joannem Strumensem Abbatem, tota Germania, agente Friderico, tanquam veros Pontifices coluit; Alexandri verò partes Gallia, Britannia, Hispania, plures Italiæ urbes, & ferè reliquæ orbis Christiani provinciæ, partes constanter susceperunt . Mortuo Abbate Strumensi, anno nimirum 1177. Fridericus, qui per viginti duos annos apertas inimicitias cum Alexandro gesserat, ejurato cum Episcopis & Principibus sibi adhærentibus schismate, supplex ad ejusdem Alexandri pedes se abjecit, cum eoque iniit concordiam . Hanc ut firmaret Alexander Papa, totius orbis Epi-

scopos evocavit ad III. Lateranense Concilium.

Quæres 2. quinam essent præcipui Vvaldensium & Albigenſium errores.

Resp. Vvaldensium errores ad tria capita reduci à Reinerio, qui sectæ primùm dederat nomen, sed postea in Ordine Prædicatorū acerrimus fuit hæreseos impugnator. Primum caput continet Vvaldensium blasphemias in Ecclesiam Romanam: *Afferunt (inquit) quòd Romana Ecclesia non sit Ecclesia Iesu Christi, sed Ecclesia malignantium; eamq; sub Silvestro defecisse, cum venenum possessionum temporalium in Ecclesiam infusum est. Sectam suam esse Ecclesiam Christi, quia doctrinam Christi, Evangelii, & Apostolorum verbis & exemplis observabant.* Alterum caput continet eorum de Sacramentis errores. Contendūt aliqui, eos admisisse duo tantum Sacramenta, Baptismum & Eucharistiam; sed id falsum est; nempè in Commentarii nostri historici de Sacramentis tom. I. ostendimus, admissum ab eis fuisse septenarium Sacramentorum numerum; errasse tamen, quòd crederent irrita esse, quæ conficerentur à Ministris in peccato mortali jacentibus; reprobarunt quoque ritus, quibus Confirmatio & Extrema-UNCTIO in Ecclesiâ Romanâ administratur. Ibidem ostensum fuit, Vvaldenses credidisse panem in Eucharistiâ transubstantiari in verum Christi corpus, saltem antequàm elapso proximè sæculo cum Genevenſibus, agente Farello, communionem iniissent. Tertium caput continet errores circa Sanctorum invocationem, quam negabant; circa cultum imaginum, quem abiciebant; circa sacros ritus, Altarium consecrationem, Sacerdotalium indumentorum, aquæ Ecclesiæ precibus consecratæ usum deridebant; exorcismos, & omnem in energumenos Ecclesiæ curam improbabant. Multa alia non minùs impia docebant, de quibus consuli possunt Reinerius, Ermengardus, Phildoroffius, & Claudius Seyſellus Archiepiscopus Taurinensis.

§. I I.

De Canonibus Concilii Lateranensis III.

In omnibus Concilii, de quo agitur, editionibus leguntur viginti septem Canones, quibus labefactatæ Ecclesiasticæ disciplinæ integritati consulitur.

Prior Canon, decernit, Summi Pontificis electionem non fore deinceps Canonicam, nisi duæ partes Cardinalium ad eam conspirent. *Not. 1.* Canonis occasio fuit Octaviani factum, qui (ut jam observavimus) à tribus tantum Cardinalibus electus, Pontificis insignia sub Victoris IV. nomine sumpserat. *Not. 2.* Id ne ad aliorum, quam summorum Pontificum, electionem extendatur, vetat altera Canonis pars: *Ex hoc tamen nullum Canonicis constitutionibus præjudicium generetur, in quibus majoris & sanioris partis debet sententia prævalere.*

Secundus Canon, irritas, quoad usum, declarat ordinationes, quæ ab Antipapis celebratæ fuerant. Definit nullas, esse impetratas ab eis beneficiorum provisiones. Multat ab ordinibus & dignitatibus suspensione eos, qui de tenendo schismate juramentum spontè præstiterant. *Not. 1.* Addit adverbium, *spontè*, ne eos includere videatur, qui Friderici Imperatoris minis ad illud juramentum coacti fuerant. *Not. 2.* Qui de tenendo schismate non jurarant, nec fuerant ab Antipapis ordinati, permissi sunt obire suorum ordinum munera, licet schismati adhæsisent.

Tertius Canon, vetat, ne quis ante trigessimum ætatis annum in Episcopum, & ante vigesimum quintum in Archidiaconum, Decanum, Parochum eligatur. Jubet, ut electi intra tempus per Canones definitum consecrentur. Declarat post

Q 5 con-

consecratione vacare omnia alia consecrati beneficia . *Not. 1.* Iis temporibus plerumq; per summam corruptelam juvenibus credebantur Ecclesiasticæ dignitates , ut videre est apud Bernardum epist. 42. & Hildebertum Cenomanensem epist. 12. *Not. 2.* Non est necesse , ut expletus fuerit annus Canone præscriptus , sed satis est , ut incæptus sit .

Quartus Canon , prohibet , ne Archiepiscopi , Episcopi , Archidiaconi , Decani sibi subditos in visitatione gravent . *Not. 1.* Par est , ut visitatores ab iis , quos visitant , petant necessarios sumptus , si beneficium , cuius sunt titulares , ad id satis non sit ; secus , si ad id sufficiat . *Not. 2.* In Galliis Episcopi tallias inferioribus imponere non possunt ; unde in iis locum non habet hæc Canonis pars : *Sustinemus autem , ut cum charitate moderatum ab eis valeant auxilium postulare* : Id nempe juris solis sæcularibus magistratibus convenit . *Not. 3.* Vetatur , ne Episcopi , cum canibus venatoriis & avibus proficiantur ; nec immerito , cum clamorosa venatione Clerici semper interdicti fuerint . *Not. 4.* Permittit Archiepiscopo in visitatione quinquaginta equos ; Cardinalibus viginti quinque ; Episcopis viginti ; inde tamen autoritas conciliari non potest mundano Prælatorum sumptui ; nam Canon addit id permitti , non tanquam rem licitam , sed quam propter sæculi corruptelam non castiget : *Secundum (inquit) tolerantiam dictum est* .

Quinto Canone , edicitur , ne quis in Presbyterum , aut Diaconum , sine certo titulo ordinetur . Jubet , ut Episcopus ei , quem sine titulo ordinaverit , subministret ad vitam necessaria , nisi ordinati hæreditariæ facultates ad id satis sint . *Not. 1.* Canon loquitur tantum de ordinatione in Presbyterum & Diaconum ; ac proinde non vetat , quin Subdiaconi sine certo titulo ordinentur , sed jam alia obtinet consuetudo . *Not. 2.* Episcopus , qui sine titulo Clericali Presbyterum , aut Diaconum

num ordinaverit , non absolvitur peccato , quod admisit infringendo Canones ; sed præterea tenetur ad Clerici , quem ordinavit sine titulo , sustentationem . *Not.* 3. Licet Canon non probeat ordinationem sub titulo patrimonii , ei tamen dedit locum .

Sextus Canon , vetat , ne Prælati suspensionis , vel excommunicationis sententiam proferant in subjectos , nisi Canonicâ commonitione præmissâ . Vetat iterum , ne subjecti ad superiorem judicem appellent ante ingressum causæ . Vetat etiam Religiosis omnibus , ne contra regularem Prælati sui & Capituli disciplinam appellare præsumant . *Not.* 1. Commonitione canonicâ opus non est , ut suspensus , aut excommunicatus declaretur , qui incidit in infractionem , cui ipso facto annexa erat pœna , aut suspensionis , aut excommunicationis ; è contra monitione opus est , cum actus prohibetur tantum sub pœnâ ferendæ sententiæ . *Not.* 2. Ex Canone , peccant Clerici , qui ne corrigantur , à justâ judicis sententiâ ad judicem superiorem appellant ; neque enim appellatio instituta est ad defensionem iniquitatis , sed ad innocentia subsidium .

Septimo Canone , prohibetur , ne quid exigatur , aut pro personis Ecclesiasticis ponendis in sede , aut pro sepulturis , aut exequiis mortuorum , & benedictionibus nuptiarum . *Not.* 1. Schisma ab Octaviano conflatum , variis modis simoniam in Ecclesias invexerat . *Not.* 2. Canon non vetat Notario , ne debitum sibi stipendium exigat pro instrumento , quo fidem facit , Clericum missum fuisse in beneficii possessionem . *Not.* 3. Ad Canonem quartum Concilii II. Lateranensis dictum est , quomodo excusari possit Parochorum praxis , qui sepulturæ jura exigunt à defuncti hæredibus .

Octavus Canon , vetat , ne beneficia ante possidentis mortem alicui promittantur . *Not.* Cum eo Canone , aliquarum Ecclesiarum Canonici concilient ,

lient, si possint, suam praxim de assumendis sibi coadjutoribus cum certâ spe futuræ successionis, etiam si firmâ valetudine fruantur.

Nono Canone, sancitur, ne fratres Templi & Hospitalis Ecclesias de laicorum manibus recipiant; ne ab Episcopis interdictos, aut excommunicatos in suas Ecclesias admittant; ne in Ecclesiis, quæ *pleno jure* ad eos non pertinent, Presbyteros Episcopo non præsentatos exhibeant; ne eorum domestici sub obtentu privilegiorum ordinis, eximant se ab Episcopi jurisdictione. *Not.* 1. Si Templarii Clericos in Ecclesiis, quæ *pleno jure* ad eos pertinent, instituerint, id ex se non habent, cum sint laici; sed ex Ecclesiæ concessione. *Not.* 2. Præsentatus à Templariis, si post examen idoneus ab Episcopo judicatus non fuerit, jure excidit suo.

Decimo Canone, prohibetur, ne quid exigatur, aut detur ad Monasterii ingressum; ne Monachi peculium habeant; ne sepeliantur cum fratribus, qui in extremis inventi fuerint cum peculio. *Not.* 1. Ad Concilium Nicænum II. jam observatum est, cum Ecclesiæ decretis vix conciliari posse Monasteriorum, alioquin divitum, praxim; dictum quoque fuit, quid in pauperibus Monasteriis exigi possit. *Not.* 2. Canon non vetat, quin in Monasterium admittendus quippiam det in eleemosynam, modò exacta non fuerit ejusmodi eleemosyna: *Si quis autem exactus*, (inquit Canon) *pro sua receptione aliquid dederit, &c.* *Not.* 3. Peculium indulgeri non debet à superioribus, nisi ad bonorum Monasterii administrationem; *Nisi ei ab Abbate pro injuncta fuerit administratione permissum*; verba sunt hujus Canonis. *Not.* 4. Peculium censetur, quod ex superiorum permisso apud œconomum deponitur eâ lege, ut Monachus ipsum pro libito in proprium usum convertere valeat; aut cum ita fert Monasterii consuetudo, ut nunquam impendatur, nisi dependenter à deponentis arbitrio.

Duo-

Duodecimus Canon, vetat, ne Clerici in majoribus ordinibus constituti, ad sæcularia tribunalia causas agant, nisi proprias, vel Ecclesiæ, vel miserabilium personarum; ne villarum procuraciones, aut jurisdictiones sæculares assument. *Not. 1.* Tunc Clericis non licebat, nec modò licet, magistratus sæculares gerere. *Not. 2.* Quamvis Canon non sit in usu ratione pœnæ, quæ Clerico villarum procuraciones suscipienti imponitur; viget tamen quoad scopum, quem sibi Concilium proposuit; nempe ne Clericus, nisi aliundè id exigit charitas, sese negotiis sæcularibus implicet.

Decimo tertio, & decimo quarto Canone, prohibetur beneficiorum pluralitas. *Not. 1.* Canon *XIII.* loquitur de dignitatibus & Parochialibus Ecclesiis; at *XIV.* loquitur de quibuslibet præbendis. *Not. 2.* Tunc omnia ac singula beneficia obligabant ad personalem residentiam.

Decimus quintus Canon, præcipit, ut Clericorum bona, siue intestati decesserint, siue aliis conferre voluerint, penès Ecclesias remaneant. *Not. 1.* Demonstrat Canon, Clericos non habere dominium in Ecclesiasticis redditus. *Not. 2.* Ad restitutionem igitur in foro interiori cogendi sunt Clericorum hæredes. *Not. 3.* Canon non intelligitur tantùm de immobilibus, sed etiam de mobilibus: *Præsentibus innotescat, quòd Clerici de mobilibus, quæ per Ecclesiam sunt adepti, jure testari non possunt*; verba sunt Alexandri Papæ *III. can. Ad hæc.*

Quæ Canonibus *20. 21. 23. 25.* de torneamentis, treugis, & pace servandâ, publicis usurariis, fanciuntur, explicuimus agentes de Concilio Lateranensi *II.*

Canon vigesimus septimus, damnat *Vvaldenses* & *Albigenses*, aliosque hæreticos, qui in partibus *Tolosanis* grassabantur; tum adversus illos sacram edicit expeditionem. *Not. 1.* *Vvaldenses* pro locis, ubi grassabâtur, varia sortiti sunt nomi-

na;

na; hincque patet, cur Bohemi, Bulgari, Albigenes nonnunquam appellati sint. *Not. 2.* Canon in hæreticos expeditionem sacram decernit, tum jure defensionis, nimirum omnia popu-
labantur; tum etiam ad eorum correctionem: *Catholicorum Principum constitutionibus* (*Ec-
clesiastica disciplina*) *adjuvatur, ut sæpè quæ-
rant homines salutare remedium, dum corporale
super se metuant evenire supplicium.* *Not. 3.*
Clarè docet Canon, quid intelligi debeat no-
mine remissionis peccatorum, quæ adversus
hæreticos pugnaturis indulgetur: *Biennium de
pœnitentia injuncta relaxamus.* Docet quoque
eos, qui indulgentias largiuntur, debere at-
tendere ad eorum laborem, quibus concedun-
tur: *Secundum modum laboris, major eis indul-
gentia tribuatur.*

ARTICULUS XII.

De Concilio Lateranensi IV.

Concilium Lateranense IV. quod quidem
est œcumenicum duodecimum, habitum
est anno 1215. Coactum est Innocentii Papæ
III. Litteris, quæ ejusdem Concilii actis præ-
fixæ sunt. Ei quoque præfuit laudatus Ponti-
fex: *Anno ab Incarnatione Verbi 1215. cele-
brata est sancta universalis synodus Romæ in Ec-
clesia Salvatoris, quæ Constantiniana vocatur,
mense Novembri, præsidente Domino Innocentio
Papa III. Pontificatus ejus anno 18. in qua fue-
runt Episcopi 412. inter quos extiterunt de præ-
cipuis Patriarchis duo, videlicet Constantinopo-
litanus & Hierosolymitanus.* Verba sunt Vesper-
genſis, qui eo tempore floruit.

§. I.

De causa, & actis Concilii Lateranensis IV.

CONCLUSIO 1. Concilium Lateranense IV. triplici de causâ coactum est.

Probatur enumeratione. *Primò*, coactum est, ut eligerentur media, quibus urbs Hierosolymitana liberaretur è Saracenorum manibus. *Secundò*, ut damnarentur variæ, quæ tunc exortæ fuerant, hæreses. *Tertiò*, ut universæ Ecclesiæ reformationi consuleretur: *Vt* (verba sunt Innocentii Papæ III. in litteris hujusce synodi convocatoriis) *generale Concilium convocemus, in quo ad corrigendos excessus, & reformandos mores, eliminandas hæreses, ad inducendos Principes & populos Christianos ad succursum & subsidium Terræ sanctæ, tam à Clericis, quàm à laicis impendendum.*

CONCLUSIO 2. In Concilio Lateranensi IV. explicata est: 1. Catholica fides: 2. damnatus liber Abbatis Joachim in Petrum Lombardum de unitate Sanctissimæ Trinitatis: 3. damnatum quoque fuit perversum Almarici dogma: 4. multa de coercendis, ac puniendis hæreticis decreta sunt: 5. amplissimæ indulgentiæ concessæ sunt ad sacrum contra Saracenos bellum euntibus: 6. varia edita sunt capitula ad disciplinæ restitutionem spectantia.

Probantur eæ omnes conclusionis partes ex hujusce Concilii capitulis, quæ subsequente paragrapho exponentur; iis nimirum in capitulis continentur, quæ in conclusione posita sunt.

§. I I.

*De Canonibus , seu capitulis Concilii
Lateranensis IV.*

Prius capitulum, continet fidem de Sanctissimâ Trinitate, de rerum omnium creatione, de Verbi Incarnatione, de reali præsentia corporis Christi in Eucharistia. *Not. 1.* Ea fidei expositio necessaria fuit propter Albigenes, aliosque sectarios, qui damnatos iis de articulis errores innovarant. *Not. 2.* Ex his verbis: *Qui simul ab initio temporis utramque de nihilo condidit creaturam, Angelicam videlicet & humanam*; nonnulli colligunt, de fide esse, Angelos simul cum mundo corporeo conditos fuisse; id tamen alii negant, contendentes, Concilium voluisse tantum damnare errorem Origenis asserentis, Angelos & animas rationales *per se* tantum productas fuisse, corpora verò *per accidens*; hoc est, propter demerita spiritualium substantiarum; nempe Origenes censuit, creata fuisse corpora, ut substantiæ spirituales in peccati vindictam in iis, tanquam carceribus, includerentur; ita Canonem interpretatur S. Thomas opusculo 23. *Not. 3.* Verbum, *Transsubstantiatio*, quo inter synodos prima usa est hæc Lateranensis, perfecte explicat Eucharistiæ mysterium.

Secundum capitulum, damnat libellum Abbatis Joachim, quod in eo assereret, Petrum Lombardum esse hæreticum, eò quod docuisset, esse quandam summam rem, quæ nec generaret, nec esset genita, nec procedens. Reprobat quoque tanquam insanam & hæreticam Almarici doctrinam. *Not. 1.* Joachimi persona non fuit damnata; nec mirum; nam damnari possunt authorum libri, licet authores non damnentur, præsertim si (ut Joachimus) scripta sua Ecclesiæ correctioni subjecerint. *Not. 2.* Hæc Canonis verba;

ba : Si quis igitur sententiam, sive doctrinam præfati Ioachim defendere, vel approbare præsumpserit, tanquam hæreticus ab omnibus confutetur; intelliguntur de doctrinâ, quam Concilium Joachimo tribuit, non autem de aliâ, quam seu per errorem, seu aliter (quod hîc non expendimus) nonnulli scriptores ei tribuunt. Not. 3. De Almarico hæc habet Genebrardus libro quarto Chronologiæ : *Almaricus, Carnotensis, vir eruditus, sed hæreticus, convictus est viginti errorum, quorum unus erat : Corpus Christi non magis esse in Sacramento Eucharistiæ, quàm in qualibet alia re. Idem testatur Sanderus lib. 7. de visibile Monarchiâ, ubi hæc addit : Negabat, aut generationem filiorum, aut distinctionem sexuum in Paradiso futuram, nisi Adam peccasset... Thuri-ficationem, qua in Ecclesiis utuntur, idololatriam vocabat. Negabat resurrectionem corporum, Paradisum, & infernum, & idearum in mente divina eternitatem. Dicebat, quemlibet fidelem teneri, ut credat se esse membrum Christi, & hoc esse de articulo fidei.*

Capitulo tertio, damnantur omnes hæretici : Damnati sæculari potestati traduntur puniendi. Dominorum temporalium, qui eos toleraverint, vassallos decernit absolvendos à fidelitatis sacramento, eorumque terras Catholicis occupandas exponit. Not. 1. Hæreticos, qui contumaces fuerint, meritò potestati sæculari tradi puniendos, libro 1. contra duas Epistolas Gaudentii, Epist. 66. lib. 1. contra Epistolam Parmeniani, cap. 7. Epist. 48. docet Augustinus. Not. 2. Domini temporales, quorum vassalli per Canonem à fidelitatis sacramento eximuntur, non sunt Reges, aliiq; supremi Principes; nam Canon hoc addit, quod supremis Principibus non convenit: *Salvo jure domini principalis*. Nec obstant hæc, quæ adduntur verba : *Eadem nihilominus lege servata circa eos, qui non habent dominos principales*; iis enim intelligi possunt ii, qui ab Ecclesiâ solâ beneficia-

ficiario jure suas ditiones obtinent. Eo sensu loquitur Tridentina synodus sess. 25. cap. 19. *Not.* 3. Ea canonis pars lata est adversus Raymundum Tolosanum Comitem, Raymundum Rogerium Comitem Fuxensem, Bernardum Comitem Convenarum, & Gastonem Vicecomitem Bearnensem, qui ad Albigensum hæreticorum defensionem confœderati erant; ii verò non supremi Principes, sed feudatarii erant. *Not.* 4. Potestas expoliandi inferiore dominos, qui favebant hæreticis, concilio delata est ex consensu supremorum Principum, quorum oratores aderant concilio Lateranensi IV.

Capitulo quarto, damnantur Græci, qui non prius sacrificare volebant in altaribus, in quibus Latini sacrificassent, quàm ea lavissent; quique baptizatos à Latinis iterum baptizabant. *Not.* 1. In illud Græcorum odium Latini venerant propter schisma ab eisdem Græcis undecimo sæculo per Michaelem Cærularium conflatum. *Not.* 2. Fides eadem esse potest etiam inter eos, in quibus diversi sunt ritus: *Licet Græcos* (ait Canon) *honore velimus, mores ac ritus eorum, in quantum cum Domino possumus, sustinendo.*

Capitulo decimo quarto, in Clericos incontinentes decernuntur pœnæ, & quidem graviores in eos qui labuntur, etiam si secundum regionis suæ morem, non abdicarint copulam conjugalem. *Not.* Loquitur de Græcis, qui non nubunt quidem post susceptos sacros ordines, sed utuntur uxoribus ante suam ordinationem ductis.

Capitulum vigesimum primum, quod incipit: *Omnis utriusque sexus fidelis*, jubet 1. ut quisque fidelis, postquam ad annos discretionis pervenerit, omnia sua solus peccata confiteatur, saltem semel in anno, proprio sacerdoti, & injunctam sibi pœnitentiam studeat pro viribus adimplere: 2. ad minus in Paschate Eucharistiæ Sacramentum reverenter suscipiat: 3. sub depositionis pœnâ prohibet sacerdoti ne signo, vel verbo, vel quovis alio mo-

modo prodat peccata, quæ quis ei cōfessus fuerit. *Not. 1.* Nomine *propriis sacerdotis*, Canon non intelligit quemvis Presbyterum, licet debite ac indefinite approbatum; nempe declarat, neminem alieno posse confiteri, nisi à proprio facultatem obtinuerit; at ea facultas indulgeri non potest ab iis, quibus ex officio non incumbit animæ cura, licet indefinite approbati fuerint ab Ordinario. Præterea Canone 32. Concilium Lateranense proprium sacerdotem vocat Vicarium perpetuū; at id non convenit iis qui ex officio Sacramenta non dispensant. *Not. 2.* Canon parochum intelligit, ita tamen, ut nec summus Pontifex, nec Episcopus excludantur: scilicet datur medium inter proprium sacerdotem, & alienum, communis nimirum, ut sunt Papa in totâ Ecclesiâ, & Episcopus in totâ suâ diœcesi. *Not. 3.* Tempus annuæ confessionis non determinatur in specie: fit igitur satis Canon, quocumque anni tempore confessio fiat. *Not. 4.* Præscriptam in Paschate communionem confessarius potest propter causam in aliud tempus differre: *Nisi forte de consilio proprii sacerdotis ob aliquam rationabilem causam, ad tempus ab ejus perceptione duxerit abstinendum.* *Not. 5.* Canon eos damnat, qui contendunt, cōnitentem prohibito posse rejicere, aut acceptare injunctam sibi à sacerdote satisfactionem: *Et injunctam* (inquit) *sibi pœnitentiam studeat proviribus adimplere.* Ii pariter proscribuntur, qui contendunt, posse fidelem se eximere satisfactione in hâc vitâ, ac eligere pœnam temporalem in alterâ perferendam. *Not. 6.* Non illicita est modò, sed etiam irrita confessio annua, quam quis alieno sacerdoti sine proprii licentiâ fecerit: *Cùm aliter ille ipse non possit solvere, vel ligare.* Prolixiorem ejusdem Canonis expositionem legere est tomo 2. nostri Commentarii historici de Sacramentis, à paginâ 619. ad 627.

Alia sunt in Concilio Lateranensi IV. capitula, quæ pertinent ad simoniam, quæ tum in dispen-

san-

sanctis Sacramentis, tum in conferendis beneficiis, tum in Monialibus ad Monasterium admittendis, committi solet. Nonnulla etiam sunt, quæ ad iudiciorum Ecclesiasticorum formam spectant: Cum verò ea omnia capitula in decretales Gregorii IX. relata sint, eorum hinc explicationem non tradimus. Unum tantum monitum velim Lectorem; nempe in Jure Canonico intelligi Concilium Lateranense IV. quoties sine addito Concilium generale laudatur.

ARTICULUS XIII.

De Concilio Lugdunensi I.

CONCILIUM Lugdunense I. quod est generale decimum tertium, celebratum est anno Christi 1245. Romæ sedente Innocentio Papâ IV. in Germaniâ imperante Friderico II. regnante in Galliis sanctissimo Rege Ludovico IX. Illi adfuerunt duo Orientales Patriarchæ, Constantinopolitanus & Antiochenus, quadraginta supra centum Episcopi, Balduinus Imperator Constantinopolitanus, Oratores Regum Franciæ, Angliæ, Aragoniæ, pluriumque aliorum Principum.

§. I.

De causa, actis, & Canonibus Concilii Lugdunensis I.

CONCLUSIO I. Quintuplex fuit causa cogendi Concilium Lugdunense I.

Probatur. Quinque Concilii celebrandi causas recitavit Innocentius Papa IV. in oratione, quam in ipso Concilio habuit; nimirum 1. excessus Prælatorum, ac aliorum Clericorum, qui mores non exigebant ad Canonum regulas: 2. sub-

subsidium Orientalibus Christianis ferendum adversus Saracenos, qui captâ Hierosolymorum urbe, præsentem ruinam toti fideli populo minabantur: 3. media, quibus comprimerentur Tartarorum impetus, qui Poloniam, Hungariam, finitimasque regiones populabantur: 4. Græcorum schisma, quod in dies augebatur: 5. tandem Friderici II. in Ecclesiam Romanam persecutionem. Eas causas legere est pariter in literis, quibus laudatus Pontifex Episcopus evocavit ad Concilium.

CONCLUSIO 2. Tribus actionibus absolutum est Concilium Lugdunense I.

Probatur ex eo, quod nec plures, nec pauciores reperiantur in hujusce Concilii editionibus.

In priore, quæ habita est quarto Kalendas Julii, Innocentius conquestus est de Prælatorum excessibus; infelicem Christianorum tum in Oriente, tum in Septentrione, statum exposuit; multa dixit de Friderici in Ecclesiam tyrannide.

Actione secundâ, Episcopus Calamensis Friderici sacrilegia, cæteraque scelera, vim ac tyrannidem, Patrum oculis subiecit; ea quidem diluere conatus est Thadæus Friderici Procurator; id tamen non impedit, quin Episcopi, Hispani præsertim, contenderint, animadvertendum esse adversus eundem Fridericum secundum formam juris.

Actione tertiâ, lata est in Fridericum excommunicationis & depositionis sententia. Ubi Innocentius retulit, quæ in Ecclesiam Romanam tentaverat, descripsitque varia ejus scelera, hisce verbis tulit, tum excommunicationis, tum depositionis decretum: *Nos itaque super præmissis & compluribus aliis ejus nefandis excessibus, cum fratribus nostris & sacro Concilio deliberatione præhabita diligenti memoratum Principem, qui se Imperio & Regnis, omni que honore ac dignitate reddidit tam indignum, qui que propter suas iniquitates à Deo, nè regnet, vel imperet, est abje-*

*abjectus, suis ligatum peccatis, & abjectum, omni-
 nique honore & dignitate privatum à Domino
 ostendimus, denuntiamus, ac nihilominus sen-
 tentiando privamus. Omnes, qui ei juramento fi-
 delitatis tenentur adstricti, à juramento hujus-
 modi perpetuò absolventes, auctoritate Apostolica
 firmiter inhibendo, ne quisquam de cætero sibi
 tanquam Imperatori vel Regi pareat, vel inten-
 dat; & decernendo quoslibet, qui deinceps ei ve-
 lut Imperatori, aut Regi consilium, vel auxilium
 præstiterint, seu favorem, ipso facto excommunica-
 tionis vinculo subjacere. Hactenùs Innocentius.
 Not. 1. Afferunt aliqui, Innocentium censuisse, Im-
 perium Germanicum haberi jure beneficiario se-
 dis Apostolicæ, quòd Romanus Pontifex ele-
 ctos Imperatores confirmare soleret. Not. 2. Scri-
 bunt alii, Fridericum spontè se primùm subjecisse
 Innocentii judicio; unde (inquiunt) Oratorem
 misit, qui suo nomine crimina ipsi objecta dilue-
 ret. Not. 3. Fridericus tamen Innocentii decreto
 postea non paruit, adversùs illud plures querelas
 egit, quas legere est in epistolis ad Francorum &
 Anglorum Reges datis. Not. 4. Exauçtorationis
 decretum sic Innocentius inscripsit: *Sacro præ-
 sente Concilio ad memoriam sempiternam*; alia ve-
 rò decreta aliis terminis exprimuntur; nempè
 Canone xiii. de Usuris, sic loquitur: *Præsentis
 Concilii approbatione sancimus*. Canone xiv. de
 subsidio Constantinopolitanis ferendo, hæc ha-
 bet: *Ex communi Concilii approbatione statui-
 mus*. Canone xvi. de impediendis Tartarorum
 incurfibus, sic quoque loquitur: *Sacro suadente
 Concilio universitatem vestram monemus*. Sic etiam
 Canone xvii. de subsidio Terræ Sanctæ: *Diffi-
 nientes sacro approbante Concilio*. Not. 5. Me-
 ritò Innocentius hæc habet in suo decreto: *Cum
 fratribus nostris & sacro Concilio deliberatione præ-
 habita diligenti*; siquidem reverà cum Concilio
 deliberarat, an Fridericus censuris Ecclesiasticis,
 ipsâ etiam excommunicatione, plecti deberet in*

pœnam scelerum, ac sacrilegiorum, quorum reus ab ipso Concilio judicatus fuerat : Ea autem scelera , ea sacrilegia figillatim in Innocentii adversus Fridericum sententiâ recensentur ; nempè declaratur reus violatæ pacis inter Ecclesiam & Imperium initæ , sacrilegii in captione & violentâ detentione Cardinalium, & aliorum Antistitum, qui ad Concilium à Gregorio IX. Romæ indictum proficiscebantur ; Pontificiæ dignitatis famosis in Gregorium IX. epistolis læsæ ; invasionis patrimonii S. Petri ; contemptûs censurarum , quibus à Gregorio IX. fuerat innodatus ; Ecclesiæ in sacris præsertim electionibus oppressæ ; tyrannidis in Clericos, quos duella subire coegerat ; Romanæ Ecclesiæ frustratæ censu debito propter Siciliam, quam ab Ecclesiâ Romanâ habebat jure beneficiario . Not.6. Post latum illud ab Innocentio decretum , plures Germaniæ , Italiæ & aliorum regnorum Principes Fridericum pro Imperatore habuerunt ; hincque factum est , ut populi in diversas factiones abierint , ex quibus innumeræ clades in Rempublicam Christianam redundarunt .

§. II.

De Canonibus, Convocatione, Praside Concilii Lugdunensis I.

Septemdecim editi sunt Canones in Concilio Lugdunensi I. Duodecim priores judiciorum Ecclesiasticorum formæ consulunt ; unde in juris Canonici corpus postea relati sunt. In aliis agitur de ferendo subsidio Imperio Constantinopolitano, de impediendis Tartarorum excursionibus , de Cruciatibus, hoc est, iis, qui acceptâ cruce profectionem in Palæstinam voverant . Definitur, ejusmodi Cruce signatos censuris Ecclesiasticis, ipsâ etiam excommunicatione, cogi debere, ■

re, ut votum suum in terræ sanctæ subsidium fideliter exequantur.

Certo certius est, ab Innocentio Papâ IV. convocatum fuisse Lugdunense I. Concilium; convocationis litteras, quæ incipiunt, *Dei virtus*, Concilii actis præfixas legere est.

Constat quoque, laudatum Pontificem eidem Concilio per seipsum præfuisse. Ipse nimirum orationem habuit ad Patres ad Concilium congregatos; ipse in Fridericum vivâ voce primùm, & deindè scripto tulit sententiam; ipsi tribuuntur pleræque ejusdem Concilii sanctiones; ipsius enim sunt hæ formulæ, quæ in plerisque Canonibus leguntur: *Præsentis Concilii approbatione sancimus*.

ARTICULUS XIV.

De Concilio Lugdunensi II.

CONCILIUM Lugdunense II. quod est generale XIV. celebratum est Christi anno 1274.

§. I.

De causa, convocatione, præside Concilii Lugdunensis II.

CONCLUSIO I. Concilium Lugdunense II. coactum est à Gregorio X. quadruplici de causâ: 1. ad auxilium ad Christianos in Syriâ degentes mittendum; 2. ut Græci ad Catholicam communionem traducerentur; 3. ut Christianorum mores ad puriorem Ecclesiæ disciplinam reformarentur; 4. ut præscriberetur modus aliquis ad celerem Romani Pontificis electionem faciendam; multa enim acciderant mala ex Romanæ Ecclesiæ vacatione, quæ ante Gregorium biennio perdurarat.

Pro-

Differt.IV. De Locis Theologicis. 351

Probatur ex litteris, quibus Gregorius omnes orbis Episcopos vocavit ad Concilium : *Non solum scissuras (inquit) multiplicatas aperte videmus , sed & ruinæ magnæ periculum in subtrahitione populi Græcorum , qui à sedis Apostolicæ devotione ac obedientia se subtraxit, in occupatione maxima, & vastatione validâ terræ sanctæ, in subversione morum, quæ universaliter in Clero graviter obrepisse videtur & populo , jam non tam cernimus , quàm palpamus .*

CONCLUSIO 2. Gregorius X. per seipsum præfuit Concilio Lugdunensi II. Ipsi ingens adfuit Episcoporum & Doctorum hominum numerus, nec non & præcipuorum orbis Principum oratores.

Probatur 1. Gregorius adfuit Concilio, de quo agitur, proindèque ipsi præfuit. Præter Patriarchas Constantinopolitanum & Antiochenum, adfuere quingenti Episcopi; adfuerunt pariter Jacobus Aragoniæ rex; Michaelis Palæologi Græcorum imperatoris, regum Franciæ, Germaniæ, Angliæ, Siciliæ, Tartariæ oratores. Vocatus fuerat & S. Thomas Aquinas, qui obiit in itinere; nec non S. Bonaventura, quem Gregorius Lugduni Cardinalem Episcopum Albanensem creavit. Patent ea omnia ex Ptholomæo Lucensi auctore cœvo, Hist. Ecclesiasticæ lib.23. cap.3.

§. II.

De actis, & Canonibus Concilii Lugdunensis II.

CONcilium Lugdunense II. infrà très menses sex sessionibus absolutum est. In primâ sessione, Gregorius Papa X. tres, quæ superiùs relatæ sunt, cogendę Synodi causas recitavit. Peractâ secundâ sessione, Pontifex, Cardinales, & Episcopi polliciti sũt, se daturos decimas omnium proven-

Tom.I.

R tum

tuum Ecclesiasticorum pro belli Hierosolymitani subsidio . Post tertiam sessionem ad Concilium advenerunt legati imperatoris Græcorum . In solemni Missâ, quam Pontifex celebravit, ter Græcè decantatum est symbolum cum additione : *Filioque* . In quartâ, lectis Imperatoris & Græcorum Episcoporum litteris, in quibus Catholicam fidem profitebantur, & primatum Romanę Ecclesię divinitus concessum agnoscebant, eorum legati Summo Pontifici obedientiam exhibuerunt . In quintâ sessione, unus ex nuntiis Tartarorum cum duobus sociis solemniter baptizatus est ; lectę sunt etiam Gregorii X. constitutiones, tum ad fidem, tum ad disciplinam spectantes . In sextâ, lectę sunt etiam duę alię constitutiones, quę incipiunt : *Religionum diversitatem, Cum sacrosancta* .

Inter Canones à Gregorio X. editos, *sacro approbante Concilio* , tres sunt magni momenti : Priore definitur, Spiritum sanctum à Patre, Filioque procedere, tanquam ex uno, non autem tanquam ex duobus principiis . *Not.* Ad multiplicatam principii non sufficit multiplicitas personę, sed præterea requiritur multiplicitas naturę, quę (ut docet fides) in divinis non reperitur .

Altero Canone, qui inscribitur : *De electione & electi potestate* , præscribitur modus, quo Cardinales sese in conclavi gerere debent, ut Summi Pontificis electionem accelerent . *Not.* 1. Ea constitutio relata est in Sextum à Bonifacio VIII. titulo de electione & electi potestate . *Not.* 2. Revocata fuerat per Hadrianum V. & Joannem XXI. sed eam renovarunt, tum Cœlestinus V. tum Bonifacius VIII.

Canone XII. Excommunicatione ipso facto incurrendâ damnantur, qui contra jus *regalia* de novo usurpare conantur, & qui hæc fieri procurant : *Generaliconstitutione sancimus, universos & singulos, qui regalię custodiam, sive guardiam*
ad-

advocationis, vel defensionis titulum, in Ecclesiis, Monasteriis, sive quibuslibet aliis piis locis, de novo usurpare conantes, bona Ecclesiarum, Monasteriorum, aut locorum ipsorum vacantium occupare præsumunt, quantacumque dignitatis honore præfulgeant, Clericos etiam Ecclesiarum, Monachos Monasteriorum, & personas cæteras locorum eorundem, qui hæc fieri procurant, eo ipso excommunicationis sententiæ subjacere. Clericos, qui regalia de novo usurpantibus sese non opposuerint, idem Canon frustrat proventibus earum Ecclesiarum, aut locorum, in quibus regalia de novo usurpantur: Illos verò Clericos, qui se, ut debent, talia facientibus non opponunt, de proventibus Ecclesiarum, seu locorum ipsorum pro tempore, quo præmissa sine debita contradictione permiserint, aliquid percipere districtius prohibemus. Addit Canon, eos, qui ab ipsarum Ecclesiarum, cæterorumque locorum fundatione, vel ex antiqua consuetudine, jura sibi hujusmodi vindicant, ab illorum abusu sic prudenter abstineant, & suos ministros in eis sollicitè faciant abstinere, quòd ea, quæ non pertinent ad fructus sive redditus provenientes vacationis tempore, non usurpent, nec bona cætera, quorum se asserunt habere custodiam, delabi permittant, sed in bono statu conferrent. In eum Canonem. Not. 1. Evidenter patet, regalia, quæ contra jus usurpata non fuerint, minimè damnari. Not. 2. In Galliis regalia hoc ritu clauduntur: Novus Episcopus fidelitatis juramentum regi præstat; regię litteræ præstici ab Episcopo sacramenti, testes in cameræ Computorum Regesto conscribuntur, ab ipsâque camerâ impetratur mandatum, quo jubetur, manum Regiam temporalibus bonis injectam auferri.

ARTICULUS XV.

De Concilio Viennensi.

Concilium Viennense, quod est Generale decimum quintum, indictum anno 1307. apertum est quadriennio post, Kalendis Octobris anni 1311.

Quadruplici de causâ à Clemente Papâ V. convocatum est: 1. ob causam Templariorum quorum Ordo publicâ gravissimorum criminum infamiâ laborabat: 2. ob fidei causam; Fratricelli nimirum, Dulcinistæ, Beguardi & Beguinæ, quibus omnibus præverat frater Joannes Petrus Olivi ex Ordine Minorum, varios errores sparserant: 3. ob subsidium terræ sanctæ: 4. denique ad restituendam in integrum Ecclesiæ disciplinam. Patent ea omnia tum ex constitutionibus, quæ *Clementinæ* vulgò dicuntur; tum etiam ex convocationis diplomate, quod incipit: *Regnans in Calis*.

Concilio præfuit summus Pontifex Clemens V. Scilicet ipse orationem ad Patres habuit; acta ipsum ubique loquentem inducunt; ipsius nomine inscriptæ sunt constitutiones omnes, quæ in Concilio editæ dicuntur. Præter Cardinales, & Patriarchas Alexandrinum & Antiochenum latinis ritibus, ipsi adfuerunt (teste Guilielmi Nangii continuatore) centum quatuordecim Episcopi; trecenti verò secundum Joannem Villanum: plurimum Princeipum oratores, Philippus vulgò dictus Pulcher, Francorum rex, qui (ut narrat Nangii continuator) *sedet à dextris summi Pontificis, præ cæteris omnibus; in sede tamen aliquantulum inferiore*.

Tribus sessionibus absolutum est Viennense Concilium. In priore, quæ habita est in Basilicâ S. Mauritii, quæ est Metropolitana, Cle-

Clemens convocationis causas recensuit ; postea variæ de Templariorum causâ ; de subsidio terræ sanctæ ; de clericorum reformatione deliberationes habitæ sunt . In alterâ , quæ coram Philippo Francorum rege habita est tertiâ die Aprilis, debitè discussis, qui in Templariorum causâ conscripti fuerant, processibus, *sacro approbante Concilio*, promulgata est sententiâ, quâ planè extinctus est Templariorum ordo, eorumque bona S. Joannis Hierosolymitani equitibus attributa fuere. Tertia sessio habita est pridie Nonas Maii. Videtur, quòd in eâ promulgata fuerit Clementina prima *de Summa Trinitate, & de fide Catholica*, ubi damnantur tres Petri Joannis Olivi errores. Priore assererat, Christi adhuc viventis latus lanceâ perforatum fuisse: altero negabat, animam rationalem esse formam corporis; tertio, fidem & virtutes in baptismo non infundi. Promulgata est etiam Clementina *Ad nostrum*, & legitur inter Clementinas, titulo *de Hæreticis*. Eâ Beguardorum, & Beguinarum errores damnati sunt. Volunt & aliqui cum S. Antonino, promulgatas pariter fuisse Clementinas, *Nè in agro. De statu Monachorum. Dudum. De Sepulturis. Religiosi. De privilegiis, & excessibus privilegiatorum.*

In relata Concilii Viennensis acta subsequentes notas subjicimus. *Not. 1.* Dammati sunt Templarii post duorum millium testium adversus eos depositionem; post factam tum in Franciâ, tum in Aragoniâ, tum in Angliâ, tum in Italiâ per judices Ecclesiasticos & civiles diligentem inquisitionem; post præcipuorum ordinis professorum confessionem: ac proinde æquissima fuit lata in eum ordinem extinctionis sententiâ. *Not. 2.* Philippus Pulcher non promovit Templariorum extinctionem, ut eorum bonis potiretur; siquidem post extinctionis decretum, omnium bonorum, quæ ad Templarios pertinuerant, fruitionem S. Joannis Hierosolymitani equitibus per investitu-

ram concessit. Not. 3. Petrus Joannes Olivi, professione fuit Minorita, patriâ Aquitanus in dicecesi Biterrensi: cæco in Regulam S. Francisci zelo docuit, esse propriè, ac verè eam, quam Christus ipse servavit, & Apostolis imposuit, & in Evangelis suis conscribifecit. Plures alios similes errores scripsit in suo in Apocalypsim commentario. De iis consuli potest Eymericus in Directorio Inquisitorum. Not. 4. Fratricellorum sectæ initium dederunt Petrus de Macerata & Petrus de Forosempronio Ordinis Minorum apostatæ. Sub obtentu litteralis observationis regulæ S. Francisci, rebellarunt in legitimos Ordinis præpositos; rebellarunt quoque in Ecclesiam Romanam, quæ eorum correctionem tentaverat; contenderunt, Ecclesiam duplicem esse, carnalem unam & divitem, cui præesset Romanus Pontifex; spirituales alteram & pauperem, quam ipsi constituerent. De aliis eorum erroribus legi potest Joannis 22. constitutio adversus eos apostatas edita ann. 1318. Not. 5. Unde Beguardi & Beguinæ nomen sortiti sint, incertum est; verum constat, commune fuisse cum Fratricellis, qui ex Franciscanorum Ordine prodierant. Eorum errores recenset & damnat Clemens V. Cap. *Ad nostram de hæreticis*. Grassatam, in Germaniâ præsertim, sectam illam docete eadem Clementis constitutio. Not. 6. Hæc Clementinæ, *Ad nostrum*, verba, *Doctrinam omnem asserentem, aut vertentem in dubium, quod substantia animæ rationalis, aut intellectiva verè, ac per se humani corporis non sit forma, velut erroneam & veritati Catholicæ fidei inimicam, sacro approbante Concilio, reprobamus*; non damnant philosophos, qui formam (ut aiunt) corporeitatis ab animâ distinctam admittunt; hæc enim præcipuæ formæ, animæ nimirum rationali, subordinata est. Prætereà eo sensu definitur, animam per se, & verè esse corporis humani formam, quod corporis motus ex eâ, tanquam cau-

cau-

causâ, procedant. Not. 7. Cum his ejusdem constitutionis verbis : *Opinionem secundam, quæ dicit, tam parvulis, quàm adultis conferri in baptismo gratiam informantem & virtutes, tanquam probabiliorē & dictis Sanctorum, ac Doctorum modernorum Theologiæ magis consonam & concordem, sacro approbante Concilio, duximus eligendam* ; conciliantur oppositæ in scholâ sententiæ de distinctione gratiæ sanctificantis à charitate. Thomistæ, qui eam distinctionem admittunt, docent, fidem, spem, & charitatem, quæ in baptismo infunduntur, designari per hanc vocem : *Virtutes* ; gratiam verò formaliter sanctificantem, per istas, *Gratiam informantem*. E contra Scotistæ aiunt, *charitatem*, hisce vocibus, *Gratiam informantem*, significari ; hâc verò alterâ, *Virtutes*, fidem & spem tantum. Sed de his in tractatu de justificatione dicetur uberius. Not. 8. Definit quidem Clementina, de quâ agitur, probabilius esse, quòd gratia informans, quæ per baptismum infunditur, sit habitus ; sed in eo sensu intelligi debet, quòd permanens sit, ac inhærens per modum aliorum habituum ; non autem, quòd sit habitus similis habitibus naturalibus acquisitis, qui subjectum, cui inhærent, ad actus similes inclinant.

ARTICULUS XVI.

De Concilio Constantiensi.

Concilium Constantiense, quod est generale decimum sextum, celebrari cœpit die 5. mensis Novembris anni 1415. habuit verò finem quatuor post annis ; nempe die 22. Aprilis anni 1418.

§. I.

*De convocatione, ac præside Concilii
Constantiensis.*

CONCLUSIO 1. Joannes Papa XXIII. coegit Concilium Constantiense.

Probatur ex bullâ convocationis, quam Concilii Constantiensis sessione 1. legere est, quæque incipit: *Ioannes Episcopus servus servorum Dei ad futuram rei memoriam. Ad pacem, &c.*

CONCLUSIO 2. Non unus fuit Concilii Constantiensis præles.

Probatur. *Primò*, Joannes Papa per seipsum præfuit duabus prioribus sessionibus; id enim expressè testantur earundem sessionum acta. *Secundò*, postquam idem Joannes ex Concilio discessisset, ipsi præfuerunt Cardinales; à sextâ nimirum sessione ad quadragesimam primam inclusivè præfuit Joannes Episcopus Ostiensis, Cardinalis Vivariensis. *Tertio*, Martinus Papa V. per seipsum præfuit postremis Concilii sessionibus, scilicet 42. 43. 44. & 45. quæ Concilio finem imposuit: *Sanctissimo* (verba sunt, quæ cujusque ex postremis sessionibus initio leguntur) *Domino nostro Papa prædicto personaliter præsentem, ibidem & præsentem.*

§. II.

De causa Concilii Constantiensis.

CONCLUSIO. Triplex fuit causa celebrandi Concilium Constantiense.

Probatur. Celebratum fuit *primò* ad extinctionem schismatis, quo jam diù laborabat Ecclesia: *Secundò*, ad universalis Ecclesiæ reformationem: *Tertio*, ad stabiliendam fidem adversus Vvicleffum, Joannem Hus, & Hieronymum de

de Pragâ . Posteriorem hanc causam probant acta sessionis 8. 15. 16. & 21. Duas verò priores ipsamet Constantiensis Synodus recenset sessione 4. & 5. ubi sic loquitur : *Hæc sancta Synodus Constantiensis generale Concilium faciens pro extirpatione præsentis schismatis , & unione , ac reformatione Ecclesiæ Dei in capite , & in membris fienda , &c.*

Quæres 1. quodnam esset schisma, ad quod tollendum celebrari debuit Concilium Constantiense.

Resp. eo tempore , quo laudata Synodus habitata est , dubium apud multos fuisse, quinam legitimus esset Pontifex, an Joannes XXIII. an Gregorius XII. an verò Benedictus XIII. unusquisq; nimirum se pro vero Pontifice jactabat ; cuique nonnulla regna, nonnullæque provinciæ parebant ; cuique sui erant Cardinales.

Si quis verò roget , quid trium illorum Pontificum electioni causam dedisset , res paulò altiùs erit repetenda . *Primò*, Clemens Papa V. anno 1305. Sedem Apostolicam in Gallias transtulerat , ibique tum ipse , tum illius successores , septuaginta annorum spatio permansere . *Secundò*, Gregorius XI. licèt natione Gallus , reliquit tamen Gallias, commigravitque Romam, ubi Sedem suam fixit. Illi autem mortuo Cardinales Urbanum VI. suffecere . Verùm cum illius severitatem ferre non possent, Fundos secesserunt, ubi cōtestati se per vim à Romanis illatam Pontificatum Urbano detulisse, ejus electionem irritam esse declararunt , communique consensu Romanum Pontificem designarunt Clementem VII. qui mox in Gallias recedens, Avenione Pontificatus sedem collocavit . Cum autem reges & provinciæ non intelligerent, uter verus esset Pontifex, alii hunc, alii illum, variis rationibus permoti sequebantur . *Tertiò*, in locum Urbani, qui annis ferè duodecim vixit , Bonifacius IX. successit, & in locum Clementis Benedictus XII. Bo-

nifacio successit Innocentius VII. & Innocentio Gregorius XII. *Quarto*, Cardinales utriusque Pontificis schismate pertæsi, cum eos adducere non potuissent, ut in unum locum convenirent, quo de mediis tollendo schismati aptioribus deliberarent, Pisas advolarunt, ubi congregato ex pluribus Episcopis Concilio, Gregorium & Benedictum in jus vocarunt, & utroque ex Pontificatu dejecto, Pontificem renuntiarunt Alexandrum V. Verum cum nec Gregorius, nec Benedictus Synodo parerent, tres nomine Summi Pontifices visi sunt in Ecclesiâ. Alexandro paulò post mortuo successit Joannes XXIII. qui ut schisma tolleretur, agentibus Sigismundo Romanorum Imperatore, cæterisque piis Principibus, Concilium, de quo hîc agitur, Constantiæ coegit.

Quæres 2. quis esset Vvicleffus? quis Joannes Hus? quis Hieronymus de Pragâ.

Resp. ad 1. Joannem Vvicleffum, natione fuisse Anglum, professione Presbyterum, & cujusdam Parochialis Ecclesiæ Lincolnienfis diocesis rectorem. Is per decretum Summi Pontificis dejectus ex Collegii Cantuariensis Oxonii præfecturâ, ac Episcopatus Vvigornienfis repulsam passus, in Ecclesiam virus evomuit; multos nimirum errores, tum in Deum, tum in Christum, tum in sacramenta, tum in Ecclesiam, tum in plura alia religionis capita, tam vivâ voce, quam editis libris apud Anglos disseminavit: eosque quamvis in variis Angliæ Synodis damnatos ad extremam usque vitæ periodum defendit.

Resp. ad 2. Joannem Hus, natione fuisse Bohemum, professione Presbyterum, & in Academiâ Pragensi professorem. Is Vvicleffi libros, licet ab academiâ damnatos, ac eorum authorem jam mortuum, miris laudibus extollebat; ejectis Vvenceslai regis operâ Catholicis doctoribus, palam eosdem errores disseminavit in suis concionibus; libris consignavit, addiditque plu-

plures alios, quos apud Patres in Synodo generali se defensurum esse jactabat .

Resp. ad 3. Hieronymum de Pragâ fuisse Magistrum Artium in Bohemiâ , ac virum laicum ; plures ex erroribus à Joanne Hus disseminatis publicè vir eloquens populum edocuit , atque ob id tum ab Archiepiscopo Pragensi, tum ab Academia in jus vocatus est .

Quæres 3. quæ vitia iis temporibus in Ecclesiæ mores irrepsissent .

Resp. irrepsisse præsertim simoniæ labem ; exemptiones contra jus datas à Pontificibus in suis obedientiis ; unde eas Martinus Papa V. approbante Concilio abrogavit, ut videre est in postremis ipsius Concilii sessionibus, quibus laudatus Pontifex præfuit .

§. III.

De actis Concilii Constantiensis .

CONCLUSIO . Acta Concilii Constantiensis ad varia capita reduci possunt .

Probatur enumeratione . *Primò*, lectâ convocationis bullâ, Joannis XXIII. promisit, vovit ac juravit se cessurum Papatui, ubi & quoties Concilium judicaret, id ad Ecclesiæ pacem fore necessarium .

Secundò, absente Papâ, qui ne cogeretur promissis stare, furtivè Constantiâ discesserat, Concilium se agnovit pro œcumenico , declaravitq; se potestatem à Christo immediatè habere , cui quilibet, etiamsi Papalis dignitatis existat, obedire teneatur .

Tertiò, prolata est depositionis sententia contra Joannem XXIII. tanquam contumacem , schismatis fautorem, perjurii, simoniæ , aliorumque gravium criminum reum ; quam quidem sententiam Joannes scripto ratam habuit, ac confirmavit .

R 6 *Quar-*

Quartò, sessione XIV. designatus à Gregorio procurator, ejus nomine sic locutus est: *Istud sacrum Concilium generale convoco, & omnia per ipsius agenda auctorizo & confirmo.* Exhibita est deindè ab Imperatore Sigismundo ejusdem Gregorii cessio, quæ unanimi consensu admissa fuit à Synodo; confirmata quoq; fuerunt omnia, quæ idem Gregorius in suâ obedientiâ Canonicè peregerat.

Quintò, cum Petrus de Lunâ, Benedictus XIII. in suâ obedientiâ nuncupatus, Papatui cedere noluiſſet, inter Sigismundum Imperatorem, & Concilii legatos ex unâ parte, & inter Principes ac Prælatos de obedientiâ ejusdem Benedicti ex alterâ, duodecim capitula, quæ ad schisma tollendum Narbonæ concordata fuerant, probata sunt à sacrâ Synodo, omnesque ejusdem obedientiæ, tum Clerici, tum laici, ad unionem admissi sunt, ac tandem in eundem Benedictum prolata est sessione 37. definitiva sententia, quâ spoliatus est dignitate Papali, quam obtenderat; ac ab Ecclesiâ Catholicâ tanquam membrum aridum præcisus est.

Sextò, in octavâ sessione, quadraginta quinque articuli Joannis Vvicleſſi damnati sunt respectivè tanquam notoriè hæretici, erronei, scandalosi, blasphemii, piarum aurium offensivi, temerarii & seditiosi. Editi ab eodem Vvicleſſo libri, ac tractatus, igne damnati sunt; confirmata etiam fuit censura, quam Doctores Oxonienses tulerant in 260. ejusdem authoris articulos, in relatos 45. saltem quoad substantiam, incidentes.

Septimò, sessione 15. damnati sunt triginta articuli Joannis Hus; quos cum abjurare noluiſſet, jussu sacræ Synodi degradatus est, ac traditus sæculari potestati. Probata fuit communio sub unâ tantùm specie, ac præcepta non celebrantibus. Damnata quoque fuit tanquam hæretica, hæc propositio: *Quilibet tyrannus potest & debet licite, & meritorie occidi per quemcumque vassallum suum, vel subditum, etiam per clanculares insidias, & subtiles blanditias, vel adulationes, non*

ob-

obstante quocumque præstito juramento, seu confederatione factis cum eo, non expectata sententia, vel mandato judicis cujuscumque. Cujus autem authoris esset ea propositio, Concilium non aperit.

Octavò, Hieronymus de Pragâ, qui sessione 19. Joannis Vviclef, ac Joannis Hus errorum damnationi subscripserat, subscriptionem suam sessione 21. palàm in Synodo revocavit; ob idque multatus est excommunicatione, traditusque sæculari brachio, vivus exustus est.

Nonò, Sessione 40. decretum est, ut non obstante absentia Cardinalium Petri de Lunâ, ad novi Pontificis electionem procederetur. Deindè de consensu Cardinalium sancitum est, ut hæc vice tantùm, illis ad eligendum Romanum Pontificem adjungerentur sex Prælati, vel aliæ honorabiles personæ in sacris Ordinibus constitutæ, de quâlibet natione in Synodo pro tunc existentes, quos seu quas quælibet ipsarum nationum per se, ad hoc infra decem dies eligeret. Tandem sess. 41. Martinus V. renuntiatus est Pontifex à triginta Cardinalibus & triginta Electoribus, qui simul in conclave introierant.

Decimò, Post electionem Martini Papæ V. ab eodem Summo Pontifice sess. 42. 43. 44. & 45. sacro approbante Concilio, variæ constitutiones promulgatæ fuerunt: De Exemptionibus; Unionibus; Annatis seu fructibus percipiendis; Dispensationibus; Decimis & aliis oneribus Ecclesiasticis; De vita & honestate Clericorum; De loco futuri Concilii proximè celebrandi; De absolutione & dissolutione Concilii. In iis autem constitutionibus plura sunt ecclesiasticæ disciplinæ multùm utilia. Hortamur igitur lectorem, ut eas percurrat, nec non ejusdem Martini bullam, quæ est de Joannis Vviclef & Joannis Hus erroribus in Concilio Constantiensi damnatis.

§. III.

*Utrum Concilium Constantiense sit
Oecumenicum.*

CONCLUSIO. Concilium Constantiense est Concilium œcumenicum.

Probatur 1. Ipsa Constantiensis Synodus in omnibus ferè sessionibus declarat, se *Concilium œcumenicum facere, in Spiritu Sancto legitime congregatum, universam Ecclesiam representans.*

Probatur 2. Martinus Papa V. in bullâ de erroribus Joannis Vviclef, Joannis Hus, & Hieronymi de Pragâ, jubet, ut hæreticus in Ecclesiâ finem rediens, de tribus his articulis interrogetur: *Utrum credat, teneat & asserat, quod quodlibet Concilium generale, & etiam Constantiense, universalem Ecclesiam representet.* — Item *utrum credat, quod illud, quod sacrum Concilium Constantiense, universalem Ecclesiam representans, approbavit & approbat infavorem fidei, & salutem animarum, quod hoc est ab universis Christi fidelibus approbandum & tenendum; & quod condemnavit & condemnat, esse fidei, vel bonis moribus contrarium, hoc ab eisdem esse tenendum pro condemnato, credendum & asserendum.* — Item *utrum credat, quod condemnationes Joannis Vviclef, Joannis Hus & Hieronymi de Praga, factæ de personis eorum, libris & documentis per Sacrum Generale Constantiense Concilium, fuerint ritè & justè factæ, & à quolibet Catholico pro talibus tenenda & firmiter asserenda.*

Probatur 3. In ultimâ Concilii sessione, hæc ipsius Martini Papæ V. verba leguntur, quod omnia & singula determinata, conclusa & decreta in materiis fidei per præsens Concilium concilia-

liariter, tenere & inviolabiliter observare volebat, & nunquam contraire quoquo modo. Ipsaque sic conciliariter facta approbat & ratificat, & non aliter, nec alio modo.

Objicies. Illud Concilium non fuit œcumenicum, cui ingens Europæ pars non adfuit: atqui ingens Europæ pars non adfuit Concilio Constantiensi; nempè Prælati, qui erant ex obedientiâ Gregorii XII. non adfuerunt tredecim prioribus sessionibus, & in quartâ expressè protestati sunt, se non probare Concilii convocationem factam à Joanne Papâ XXIII. Cardinales, qui stabant à Benedicto XIII. nusquam eidem Concilio præsentés fuerunt: ergo, &c.

Resp. 1. dist. maj. Cui ingens Europæ pars non adfuit sine contumaciâ, conc. maj. cum contumaciâ, neg. maj. Episcopi regionum, quæ parebant Gregorio XII. & Benedicto XIII. poterant ac debebant sistere se præsentés Concilio Constantiensi, ac proindè contumaces fuerunt; contumacia verò Episcoporum, qui Canonice vocati sunt, non impedit, ne Concilium sit œcumenicum. Vide quæ superiùs diximus agentes de conditionibus ad Concilium œcumenicum requisitis.

Resp. 2. dist. min. Si ea pars, quæ non adfuit, postea non adhæserit Concilio, conc. min. si adhæserit Concilio, neg. min. Tota obedientia Gregorii XII. à sessione 14. ad finem usque adfuit, adhæsitque Concilio, ac probavit, quæ in prioribus ejusdem Concilii sessionibus statuta fuerant; obedientia Benedicti XIII. idem, relicto eodem Benedicto, præstitit, ut videre est sessione 35. & sequentibus.

ARTICULUS XVII.

De Concilio Basileensi.

Concilium Basileense convocatum est à Martino Papâ V. in executionem, tum Decreti *Frequens*, à Synodo Constantiensi sess. 39. promulgati, tum etiam Decreti sessionis primæ Concilii Senensis. Qui Martino proximè successerat Eugenius IV. ejusdem Concilii Basileensis convocationem confirmavit, deditq; in mandatis Juliano Cardinali Diacono S. Angeli, ut illi suo nomine præsideret; ut patet datis ad ipsum litteris lectis in priore hujusce Concilii sessione, ubi hæc habentur: *Prætereà cum felicis recordationis Martinus Papa V. prædecessor noster inter cætera tibi injunxerit præsidere debere auctoritate Apostolica in Concilio Generali in Basileensi civitate celebrando placet nobis & volumus, tibi que mandamus, quatenus gressus tuos dirigas ad prædictam civitatem Basileensem, & tibi (prout opus videris esse) juxta tibi injuncta & ordinata in Concilio Constantiensi, optimè provideas, prout in tua prudentia & circumspèctione plenè confidimus.*

§. I.

De causa, & actis Concilii Basileensis.

CONCLUSIO I. Concilium Basileense triplici de causâ coactum est.

Probatur. Coactum est *primò*, ad tentandam Bohemorum unionem cum Ecclesiâ Catholicâ; perstabant enim in erroribus Joannis Hus, & Hieronymi de Pragâ, quos Concilium Constantiense damnaverat: *Secundò*, ad conciliandam pa-

pacem inter Principes Christianos, qui bellis Rempublicam Christianam lacerabant: *Tertio*, ad Cleri reformationem, quam tentarat quidem Concilium Constantiense, sed ad exitum non perduxerat. Triplex illa causa recensetur ad caput secundæ sessionis hujusce Concilii.

CONCLUSIO 2. Concilii Basileensis acta continentur 45. sessionibus.

Probatur brevi relatione earumdem sessionum, quas quidem methodi causâ reducemus ad capita, quæ ad auctoritatem Concilii, processum illius adversus Eugenium Papam IV. fidem ac disciplinam pertinent.

Primò, Sessionibus II. III. XVIII. & XXIX. recitata ac confirmata sunt duo capitula de potestate cujuslibet Concilii œcumenici legitime congregati, quæ promulgata fuerant sessionibus IV. & V. Concilii Constantiensis. Declaratum quoque fuit, quòd Synodus Basileensis per nullum, quâvis auctoritate, etiam si Papali præfulgeat, dissolvi, aut ad alium locum transferri, seu ad aliud tempus prorogari debuit aut potuit, debet aut potest, debet aut poterit in futurum, absque ejusdem Synodi Basileensis deliberatione & consensu. Sessione XXXIII. eadem Oecumenici Concilii potestas hisce duobus articulis iterum explicata fuit: *Veritas de potestate Concilii generalis, universalem Ecclesiam repræsentantis supra Papam & quemlibet alterum, declarata per Constantiense & hoc Basileense generalia Concilia, est veritas fidei Catholicæ. — Veritas hæc, quòd Papa Concilium generale universalem Ecclesiam repræsentans, actu legitime congregatum super declaratis in præfata veritate, aut aliquo eorum, sine ejus consensu nullatenus auctoritative potest dissolvere, aut ad aliud tempus prorogare, aut de loco ad locum transferre, est veritas fidei Catholicæ.*

Secundò, Sessione III. declaratum est, irritam esse ejusdem Concilii Basileensis dissolutionem ab

Eu-

Eugenio Papâ IV. factam. Sess. XII. editum est decretum citationis adversus eundem Eugenium Papam. Sessione XXIX. irrita declarata fuit translatio Concilii ab eodem Eugenio in urbem Ferrariam. Sessio XXXI. Eugenius, quod post iteratas monitiones Concilii translationem rescindere detrectasset, declaratus est suspensus ab omni administratione Papatûs, tum in spiritualibus, tum in temporalibus. Sess. XXXIV. lata est in Eugenium depositionis sententia. Sessione XXXIX. confirmata fuit Amadei Sabaudiaë ducis in Papam electio facta à Cardinalibus, aliisque ad eam electionem peragendam specialiter à Concilio deputatis; cui quidem electioni idem Amedeus consentiens, Papatûs insignia sub Felicis V. nomine sumpsit.

Tertio. Sessione IV. probata sunt pacta, quæ in Egra oppido ad unionem Bohemorum inter Concilii & eorundem Bohemorum nuntios conventa fuerant. Sessione XXII. damnatus est libellus fratris Augustini de Româ, Archiepiscopi Nazareni, in quo præter cætera continebatur hæc propositio: *Christus quotidie peccat, & ex quo fuit, Christus quotidie peccavit*; declarata est autem scandalosa & erronea in fide, quamvis (ait Concilium) idem frater Augustinus diceret, se eam non intelligere de capite Ecclesiæ Christo, sed de membris, seu fidelibus, qui cum Christo capite unum Christum constituunt. — Sessione XXX. definitum est, fideles, sive laicos, sive Clericos non celebrantes, non adstringi ex præcepto Domini ad communionem sub utrâque panis ac vini specie: Sancitum est quoque, consuetudinem communicandi sub unâ tantum specie, haberi debere pro lege, quam nemini liceat immutare sine Ecclesiæ auctoritate. — Sessione XXVI. actum est de conceptione Beatæ Mariæ Virginis, declaratumque fuit, doctrinam quâ asseritur, Virginem Deiparam fuisse semper immunem ab originali & actuali culpâ, esse appro-

probandam, tenendam, amplectendam, *tanquam*
piam & consonam cultui Ecclesiastico, fidei Catholi-
cæ, rectæ rationi, & Sacræ Scripturæ.

Quartò, Sessione XII. restitutæ sunt electiones Canonicae in Ecclesiis Metropolitanis, Cathedralibus, Collegiatis, & Monasteriis. — Sessione XV. præscriptum est, ut in quâlibet diœcesi fiat semel in anno diœcesana Synodus, habeaturque in singulis Provinciis Concilium Provinciale, saltem de triennio ad triennium. — Sessione XX. edita sunt decreta de Clericis publicè concubinariis; de excommunicatis aliquo modo non evitandis; de interdictis non leviter ponendis; de non appellando ante diffinitivam sententiam. Eæ autem constitutiones postea sub Carolo VII. relatæ sunt in Pragmaticam Sanctionem in Bituricensi Gallicanorum præsum conventu, & ex Pragmaticâ in Concordata Leonis Papæ X. & Francisci I. Francorum Regis. Verùm quæ est de vitandis excommunicatis, nullibi observatur ad formam Basileensis Synodi, sed Constantiensis tantùm, quâ jubetur, post expressam judicis denuntiationem tantùm, vitandos esse excommunicatos, etiamsi aliundè factum notoriè constiterit. — Sessione XXI. agitur de annatis communibus, de pacificis per triennium possessionibus, de modo celebrandi divinum officium in Ecclesiâ. Hunc modum consulant, qui ad Breviarium, aut in Choro, aut privatim recitandum tenentur. — Sessione XXIII. agitur de electione Summi Pontificis; de Cardinalibus, quorum numerus ad 24. restringitur. — Sessione 24. referuntur acta quædam Concilii cum Græciis; indulgentiæ iis concessæ sunt, qui in favorem subsidii pro Græcorum reductione procurandâ aliquid contulissent. Subsequentibus aliis sessionibus rescissa sunt, quæ promulgaverat Eugenius, tam pro transferendo Concilio, quàm ad semetipsum in Papatu post depositionem conservandum. — Sess. XLV. sta-

statutum est, ut infrà triennium ab hâc Sessione Concilium Oecumenicum Lugduni celebraretur. Declaratum est quoque, Concilium Basileense censei non debere dissolutum, etiamsi deinceps actus conciliares fortè propter varia impedimenta Basileæ haberi non possent; sed continuandum esse in Civitate Lausanensi. Habita est postrema hæc sessio septimo Kalendas Junii, anno 1442. proindèque cum prior celebrata sit decimo nono Kalendas Januarii, anno 1431. Concilium Basileense per undecim annos perduravit.

§. I I.

*Utrum Concilium Basileense sit
Oecumenicum.*

CONCLUSIO I. Concilium Basileense haberi debet pro Oecumenico quoad eas sessiones, in quibus ipsi Eugenius Papa IV. adhæsit.

Probat. *Primò*, Concilium Basileense legitime convocatum fuit; nempe coactum est ex decreto Oecumenici Concilii Senensis; ex litteris tum Martini Papæ V. tum Eugenii Papæ IV. quas ejusdem Concilii sessione 1. legere est. *Secundò*, legitimus fuit ejusdem Concilii præses, Julianus nimirum Cardinalis S. Angeli, cui ante Concilii inchoationem, Eugenius suas vices commiserat. *Tertiò*, universalem repræsentavit Ecclesiam; scilicet ex omnibus orbis Christiani partibus ad ipsum vocati fuerant Episcopi; quorum licet initio perbrevis esset numerus, ingen tamen postea accessit. *Quartò*, Martinus in bullâ convocationis, idem Concilium vocat Oecumenicum. Eugenius quoque eodem ipsum nomine appellavit, tum in litteris pro revocatione translationis in Civitatem Bononiensem, tum aliis, quæ datæ sunt ad Julianum Cardinalem, tum denique

in

in iis, quæ anno 1434. ad ipsummet Concilium direxit; hæc enim est earum superscriptio: *Eugenius Episcopus servus servorum Dei venerabilibus fratribus & dilectis filiis in sacro Generali Basileensi Concilio congregatis, salutem & Apostolicam benedictionem.* Tandem quintò, idem probatur ex iis, quæ mox dicuntur in responsione ad primam adversariorum objectionem.

Objicies 1. Concilium Basileense est Oecumenicum solum quoad priorem sessionem; nempe Eugenius Papa IV. dissolvit idem Concilium, ac Bononiam transtulit, statim post priorem illius sessionem; revocavit potestatem Juliano Cardinali factam, ut ei præesset Summi Pontificis loco: id patet ex bullâ revocationis promulgatâ Romæ 15. Kalendas Januarii, anno 1431. ex litteris ad Sigismundum Romanorum regem, ex litteris ad ipsum Concilium Basileense, datis Romæ 16. Kalendas Martii, anno 1432. Illa monumenta, aliaque ad causam, de quâ agitur, spectantia legere est in appendice primâ Concilii Basileensis, editionis Labbeanæ.

Resp. Eugenium Papam IV. revocasse postea bullas, ac litteras quascumque scriptas pro dissolutione Concilii, ac illius translatione in Civitatem Bononiensem: *Vt mentis nostræ integritas* (inquit laudatus Pontifex in bullâ promulgatâ Romæ 18. Kalendas Januarii, anno 1433. quæque incipit: *Dudum sacrum generale Concilium Basileense.*) *ac devotio, quam ad universalem Ecclesiam & sacrum generale Concilium Basileense gerimus, omnibus constet evidenter, duas nostras litteras pridem in Palatio Apostolico promulgatas; nam tertias, quæ dicuntur incipere, Deus novit, cum à nobis, aut de scitu nostro nunquam emanarint, licet superfluum videatur, quod non extat revocare, quia petutum est, & ad cautelam, si ullo unquam tempore apparerent; & alias quascumque, & quidquid per nos, aut nostro nomine in præjudicium, aut derogationem prædicti sacri*

Con-

Concilii Basileensis , seu contra ejus auctoritatem factum & attentatum , seu assertum est , cassamus , revocamus , irritamus , & annullamus , nullas & irritas fuisse declaramus .

Ne quis verò dicat , laudata Eugenii verba intelligi tantum de sessionibus , quæ deinceps habendæ erant , hoc est , à tempore revocationis bullarum , quæ contra Concilium emanarant , obstant hæc , quæ ab eodem Eugenio laudatis verbis præmittuntur : *Decernimus & declaramus , præfatum generale Concilium Basileense à tempore prædictæ inchoationis suæ legitimè continuatum fuisse & esse , prosecutionemque semper habuisse , continuari , ac prosecutionem habere debere ad prædicta & pertinentia ad ea (extirpationem nimirum hæresum , pacem populi Christiani , ac generalem Ecclesiæ reformationem in capite & in membris) perinde ac si nulla dissolutio facta fuisset . Quinimò præfatam dissolutionem irritam & inanem de consilio & assensu simili declarantes , ipsum sacrum generale Concilium Basileense , purè , simpliciter , & cum effectu , ac omni devotione & favore prosequimur , & prosequi intendimus .*

Objicies 2. Pauci admodum Basileæ erant Episcopi , cum habitæ sunt sessiones , quæ præcedunt decimam sextam , in quâ Eugenii litteræ de revocatione dissolutionis , seu translationis admittæ sunt : ergo tunc Concilium non fuit Oecumenicum ; nec enim exiguus Episcoporum numerus satis est ad repræsentandam universalem Ecclesiam .

Resp. 1. non ingentem quidem Episcoporum numerum priori sessioni adfuisse ; verum cæteris multi , tum Cardinales , tum Episcopi , tum secundi Ordinis presbyteri , præsentés fuere . 2. Ad Concilium Oecumenicum , quod universam Ecclesiam repræsentet , non requiritur , ut plures omnium nationum Episcopi conveniant ; sed satis est , ut omnes legitimè vocentur , alioquin enim

enim vacillarent decreta, quæ in prioribus Concilii Tridentini sessionibus edita sunt; nempe nulli ferè ex Galliâ, ex Germaniâ, ex Poloniâ præsules adfuere Concilio, cum promulgata sunt.

3. Certum est, ingentem ex omnibus nationibus numerum, tum Cardinalium, tum Episcoporum, Basileam convenisse, sive cum in eo promulgata est Eugenii adhæsiō, sive toto post quadriennio, quo inter Eugenium & Concilium pax & concordia perdurarunt: Ii verò tum Cardinales, tum Episcopi, tum etiam ipse Eugenius confessi sunt, Concilium Basileense à primo sui exordio ad ea usque tempora fuisse Oecumenicum & legitimè continuatum; unde si quid ei prius defuit, Eugenius Papa abundè per suam declarationem & sui adhæsiōnem supplevit.

Objicies 3. Illud Concilium non est Oecumenicum, in quo omnia non conciliariter, sed tumultuosè facta sunt: atqui in sessionibus, quæ præcedunt Eugenii declarationem, ac adhæsiōnem, omnia non conciliariter, sed tumultuosè facta sunt: ergo, &c.

Resp. neg. min. Ratio est 1. quia id, quod asseritur in argumento, nullus Concilii Basileensis historicus scripsit: 2. Ejusdem minoris propositionis falsitas patet ex modo, ac ordine, quo res in Concilio pertractatæ sunt; ejusmodi autem fuit ille ordo. *Primò*, quatuor nationes, Italica, Gallicana, Germanica, & Hispanica, in quatuor conventus distributæ sunt, quos *sacras deputationes* vocarunt, quibus quidem pro negotiorum diversitate varia nomina, *Fidei nimirum, Pacis, Reformationis, & Communium* indita sunt. Pari numero, ex omni ordine constabant, propriosque habebant Magistratus, Ministros, Præsides, Promotores, Notarios. Ter in hebdomadâ iisdem horis conveniebant, ac post oblatum Missæ sacrificium, negotiis operam dabant. *Secundò*, ex quatuor Conventibus,

bus, duodecim viri seligebantur, terni ex singulis, eorumque magistratus mense concludebatur; finito autem mense, quatuor ex antiquis remanebant, qui octo recens electos dirigerent. Duodecim illi viri, ter in hebdomadâ conveniebant; ad hos omnia negotia, cujuscumque essent generis primùm referebantur; priùs discussa, vel rejiciebant, si judicarent nullius esse momenti, vel si censerent gravia, ad aliquem ex conventibus remittebant. Duodecim virùm præsides, cum id exposcebat negotiorum gravitas, quatuor conventus extra ordinem convocare poterat. *Tertiò*, quæ à Decemviris ad aliquem ex conventibus referebantur, proponebantur ab illius conventus præsidente; de propositis verò non licebat quidpiam primâ die decernere, sed negotium differebatur ad aliam congregationem, ut de eo singuli consultiùs deliberare possent. *Quartò*, statuta communi consilio in aliquo ex tribus conventibus, ad alios tres conventus deferrebantur, exponebanturque rationes, cur ita fuisset statutum. Si verò duas in sententias abiisset congregatio, quamvis altera numero superior esset, res ad generalem conventum deferrebatur à duobus ex utrâque opinione, cum argumentis, quibus nitebatur, ut omnium judiciis cognitis, quod magis expediret, decerneretur; consuli tamen debebat primus conventus, ad quem spectabat res, de quâ in generali conventu erat decernendum. *Sextò*, Concilii præsides, nihil ad Patres referre poterat, nisi de quo priùs à quatuor conventibus, seu deputationibus, deliberatum fuisset. *Septimò*, priusquam generalis conventus haberetur, quatuor Deputationum præsides Concilii præsidi exponebant, quæ in suis conventibus deliberata fuerant; in quibus, si quatuor unanimiter, aut tres saltem conventus consentirent, res ad ipsum Concilium referebatur. *Octavò*, quod in conventu, seu quatuor nationum congregatione generali approbatum fuerat, redactum in De-

Decreti formam in publicâ Concilii sessione ritu solenni statuebatur, ac promulgabatur. De eo deliberandi, ac statuendi ordine in Concilio Basileensi servato, vide Augustinum Patricium cap.26.

CONCLUSIO 2. Concilium Basileense non fuit Oecumenicum, in iis sessionibus, in quibus Eugenius Papa IV. ipsi non adhæsit.

Probatur. Cum habitæ sunt sessiones, quibus Eugenius Papa IV. non adhæsit, Concilium Basileense non repræsentabat universam Ecclesiam: ergo tunc non erat Concilium Oecumenicum. Probatur ant. *Primò*, Sedis Apostolicæ legati iis sessionibus aut non adfuerunt, aut contra eas reclamaverunt. *Secundò*, sanior Concilii pars obstitit alteri in iis omnibus, quæ à sessione 25. inclusivè habita sunt. *Tertiò*, Concilium ex decreto tum ejusdem sanioris partis, tum Eugenii Papæ IV. Florentiam aut in alium in Italiâ locum Papæ, ac Græcismagis accommodum, legitime traslatum fuerat. Nam cum ingens Græcorum Episcoporum numerus, cum suo imperatore Joanne Palæologo, ac Josepho Constantinopolitano Patriarchâ, ad Orientalis Ecclesiæ cum Latina unionem faciendam jamjam in Italiam appellere deberent, expressèque protestarentur, sicut jam antea Basileæ per suos oratores protestati fuerant, se non posse montes transilire ac se conferre vel Avenionem, vel Basileam, vel in Sabaudiam, quæ loca erant à pluribus quidem, sed contra saniores partem, à Concilio Basileensi sessione 25. designata, contra quod sessione 19. conventum fuerat cum eorumdem Græcorum oratoribus; par fuit, ut Eugenius Papa adhæreret iis Basileensis Concilii Patribus qui Basileæ sessione 25. post promulgatum aliorum decretum, suum quoque promulgaverant, quo Concilium Ferrariam aut in alium locum Græcis, ac Papæ magis accommodum transfulerant.

De hoc argumento vide Augustinum Patricium

cium Senensem in Summario Actorum Concilii Basileensis, quod quidem ab eo compositum est iussu Francisci Cardinalis Piccolominei, anno 1480. Vide etiam Eugenii Papæ IV. constitutionem de translatione Concilii Basileensis & indicatione Concilii Ferrariensis, Bononiæ primo Kalendaris Octobris, anno 1437. promulgatam. Extant ea monumenta par. 1. Concilii Florentini editionis Labbeanæ, pag. 858. ac sequentibus.

Objicies. Eugenius Papa IV. Concilium Basileense transferre non potuit Ferrariam: ergo immeritò disiensit à Patribus Basileensibus, qui sessione 25. decreverant, Concilium haberi debere aut Basileæ, aut Avenione, aut in Sabaudia. Probatum ant. *Primò*, sessione secundâ ejusdem Concilii Basileensis definitum fuerat, neminem, etiamsi Papali dignitate fulgeret, posse Concilium aut dissolvere, aut prorogare, aut transferre, *absque ejusdem Concilii Basileensis deliberatione & consensu*. *Secundò*, sessione 25. à majore Concilii parte editum fuerat decretum de non transferendo Concilio alio, quàm aut Avenionem, aut in Sabaudiam; quæ autem à majore Conciliorum parte statuuntur, firma ac immota stare debent: ergo, &c.

Resp. ad 1. neg. ant. Ad 2. dicendum est, decretum sessionis secundæ, intelligi debere in casu, quò non esset evidens, ac necessaria transferendi causa, ut erat reverà, cum Eugenius laudatum Concilium transtulit. Confirmatur solutio ex decreto Concilii Constantiensis, quod incipit: *Frequens*, quodque Concilium Basileense sessione primâ promulgavit tanquam regulam, quam deinceps sequeretur: *Locum autem* (inquit) *pro futuro Concilio celebrando deputatum absque evidenti necessitate Romanus Pontifex non mutet. Sed si forè casus aliquis occurrerit, quo necessarium videretur ipsum locum mutari, tunc liceat Summo Pontifici de prædictorum fratrum suorum, aut duarum partium ipsorum consensu, atq; subscriptione, alium*
lo-

locum subrogare. Ad 3. dicendum est, fanio-
rem illam Episcoporum partem, quæ judicavit Con-
cilium propter Græcos Ferrariam, aut in alium
eis commodum locum transferri debere, non
fuisse solam; nempe ea sanior pars adjunxit se Pa-
tribus, à quibus habita fuerat sessio 19. in eâ enim
(ut jam observatum) promissum fuerat Græcis
Concilium in loco, qui tum eis, tum Summo
Pontifici commodior esset.

Ex iis, quæ hucusque dicta sunt, colligitur 1.
nullius esse auctoritatis sessiones, quæ Basileæ à
25. ad finem usque Concilii celebratæ sunt. Col-
ligitur 2. duas veritates, quæ sessione 33. sub no-
mine *veritatum fidei Catholicæ* promulgatæ sunt,
reverà non esse veritates fidei Catholicæ, ita ut
hæreticus haberi debeat, qui eas negaverit. Col-
ligitur 3. monitorium, quod sessione 26. decretum
est in Eugenium Papam IV. sententiam deposi-
tionis in eum latam, electionem Amadei in Pa-
pam, irrita fuisse ac inania.

ARTICULUS XVIII.

De Concilio Florentino.

CONcilium Florentinum, quod Ferrariæ in-
cœpit die 9. Aprilis, anno 1438. continua-
tio fuit Concilii Basileensis. Nempe (ut superius
observatum est) sanior Concilii Basileensis pars
decreverat, Concilium transferri debere aut Fer-
rariam, aut Utinum, aut in alium locum Sum-
mo Pontifici, ac Græcis magis at commodum.
Sanioris illius partis decretum confirmavit Euge-
nius bullâ, quæ incipit: *Doctores gentium*, indi-
xitque Ferrariam pro loco, in quo sessiones habe-
rentur. Verum cum post eâ pestis Ferrariæ grassa-
retur, in eâque urbe per annum integrum Græci
cum Latinis commorati fuissent, Eugenius Con-
cilium Florentiam transtulit.

§. I.

De causa, & actis Concilii Florentini.

CONCLUSIO 1. Concilium Florentinum habitum est ad unionem Orientalis Ecclesiæ cum Occidentali.

Probatur. Causam illam recenset Eugenius Papa IV. in bullâ, *Doctores gentium*, quâ Concilii Basileensis translationem in Urbem Ferrariam probat ac decernit: 2. non de aliquo alio negotio quàm de illa unione sanciendâ ac firmandâ, actum est viginti quinque sessionibus, ex quibus constat Florentinum Concilium.

CONCLUSIO 2. Acta Concilii Florentini continent *primò*, varias collationes, ac disputationes habitas inter Græcos & Latinos de processione Spiritus Sancti à Patre, & Filio; de particulâ, *Filioque*, à Latinis additâ symbolo; de consecratione azymi, aut fermentati panis; de purgatorio; de primatu Romani Pontificis. Continent *secundò*, Concilii definitionem, seu capita quæ definita sunt post disputationes, quæ per annum Ferrariæ, & per quatuor menses Florentiæ, Græcos inter & Latinos habitæ sunt: duodecim nimirum ex Græcis, duodecim etiam ex Latinis, sive præfules, sive theologi, selecti fuerant, qui in sessionibus de rebus, circa quas Orientales ab Occidentalibus dissidebant, disputarent: inter illos eminebant præ cæteris Bessarion Niceæ, Marcus Ephesiorum, Isidorus Ruthenorum Archiepiscopi. Inter istos verò Julianus Cardinalis S. Sabini qui à Concilio Basileensi cui præfuerat, post sessionem 26. ad Eugenium Papam accesserat, Nicolaus Albergattus è Carthusianorum Ordine ad Cardinalitum evectus, Joannes de Monte nigro, visitator Prædicatorum in provinciâ Longobardiæ.

Quæ-

Quæres, quid contineat synodi definitio edita post disputationes, ac collationes, quæ ferè per sexdecim menses, sive Ferrariæ, sive Florentiæ Græcos inter & Latinos habitæ fuerant.

Resp. definitam fuisse 1. Spiritus Sancti à Patre, Filioque processionem: *In nomine igitur sanctæ Trinitatis, Patris, Filii, & Spiritus Sancti* (inquit Eugenius Papa, qui Concilio præerat) *hoc sacro universali approbante Florentino Concilio diffinimus, ut hæc fidei veritas ab omnibus Christianis credatur & suscipiatur, sicque omnes profiteantur, quod Spiritus Sanctus ex Patre & Filio æternaliter est, & essentiam suam, suumque esse subsistens habet ex Patre simul & Filio, & ex utroque æternaliter tanquam ab uno principio, & in unica spiratione procedit.* Addit Eugenius illi definitioni non esse contrarios textus, quibus Patres asseruerunt, Spiritum Sanctum ex Patre per Filium procedere: *Quod sancti Doctores & Patres dicunt, ex Patre per Filium procedere Spiritum Sanctum, ad hanc intelligentiam tendit, ut per hoc significetur, Filium quoque esse, secundum Græcos quidem, causam, secundum verò Latinos principium subsistentiæ Spiritus Sancti, sicut & Patrem.* Reddit rationem, cur Spiritus Sanctus à Filio non minùs, quàm à Patre, procedat: *Ecce quoniam omnia, quæ Patris sunt, Pater ipse unigenito Filio suo gignendo dedit, præter esse Patrem, hoc ipsum, quod Spiritus Sanctus procedit ex Filio, ipse Filius à Patre æternaliter habet, à quo etiam æternaliter genitus est.*

Definitum fuit 2. particulam, Filioque, meritò additam fuisse symbolo: *Diffinimus insuper* (inquit idem Eugenius) *explicationem verborum illorum, Filioque, veritatis declarandæ gratia, & imminente tunc necessitate, licitè ac rationabiliter symbolo fuisse appositam.*

Definitum fuit 3. valere consecrationem, sive in azymo, sive in fermentato pane: *Item, in azymo, sive fermentato pane triticeo, corpus Christi*

veraciter confici ; sacerdotesque in altcro ipsum Domini corpus conficere debere ; unumquemque scilicet juxta suæ Ecclesiæ, sive Occidentalis, sive Orientalis, consuetudinem.

Definitum fuit 4. animas piorum, qui plenè pro peccatis in hac vitâ non satisfecerint, in alterâ pennis purgatorii purgari, antequam Dei visione fruantur : Item, si verè pœnitentes in Dei charitate decesserint, antequam dignis pœnitentiæ fructibus de commissis satisfecerint & omissis, eorum animas pœnis purgatorii post mortem purgari. Addit prodesse oblatas pro eis preces : Et ut à pœnis hujusmodi releventur, prodesse eis fidelium vivorum suffragia, Missarum scilicet sacrificia, orationes & eleemosynas, & alia pietatis officia, quæ à fidelibus pro aliis fidelibus fieri consueverunt, secundum Ecclesiæ instituta. Definitum est 5. animas plenè in hac vitâ purgatas, statim post mortem videre Deum intuitivè : Illorumque animas, qui post baptismum susceptum, nullam omninò peccati maculam incurrerunt, illas etiam, quæ post contractam peccati maculam, vel in suis corporibus, vel eisdem exutæ corporibus, prout superius dictum est, sunt purgatæ, in cælum mox recipi & intueri clarè ipsum Deum trinum & unum, sicuti est ; pro meritorum tamen diversitate alium alio perfectius.

Definitum est 6. eos, qui in statu peccati mortalis, sive originalis, sive actualis, moriuntur, statim in infernum torquendos descendere : Illorum autem animas, qui in actuali mortali peccato, vel solo originali decedunt, mox in infernum descendere, pœnis tamen disparibus puniendas.

Definitum est 7. Romanum Pontificem jure divino habere primatum in omni Ecclesiâ : Item, definimus, sanctam Apostolicam sedem, & Romanum Pontificem in universum orbem tenere primatum, & ipsum Pontificem Romanum successorem esse Beati Petri Principis Apostolorum, & verum Christi Vicarium, totiusque Ecclesiæ caput,
& om-

& omnium Christianorum patrem ac doctorem existere, & ipsi in Beato Petro pascendi, regendi, ac gubernandi universalem Ecclesiam, à Domino nostro Iesu Christo plenam potestatem traditam esse, quemadmodum etiam in gestis Oecumenicorum Conciliorum & in sacris Canonibus continetur.

Definitum est 8. servari debere jura, quæ Canones aliis Patriarchis concesserunt: Renovantes insuper Ordinem traditum in Canonibus cæterorum venerabilium Patriarcharum, ut Patriarcha Constantinopolitanus secundus sit post sanctissimum Romanum Pontificem, tertius verò Alexandrinus, quartus autem Antiochenus, & quintus Hierosolymitanus, salvis videlicet privilegiis omnibus, & juribus eorum.

In descriptam hætenus Synodi definitionem: Notandum est 1. hæresim de processione Spiritus sancti à solo Patre, sæculo nono inventam fuisse à Photio, qui rebellarat in Ecclesiam Romanam, à quâ dejectus fuerat à Pontificatu, quem vivente Ignatio Constantinopolitano Patriarchâ invaserat: Notandum est 2. Patres Græcos, cum dixerunt, Patrem esse causam Spiritus sancti, nomine *cause*, non intellexisse causam strictè sumptam, sed latè tantum, seu, quatenus sumitur pro eo omni, à quo alius sumit suum esse, sive sit esse independens, ut est esse Spiritus sancti, sive dependens, ut est esse creaturarum respectu Dei: Notandum est 3. quòd licet Græci in Concilio Florentino probaverint particulam, *Filioque*, symbolo à Latinis insertam; eam tamen suo symbolo nusquam, etiam post synodum, inseruerint: De additione (inquiunt Græci sessione 25. editionis Labbeanæ pag. 498.) nos illam nunquam admittimus, sed eam vobis in vestris Ecclesiis habere permittimus, non autem in Orientalibus. Rationem, quâ Græci nitebantur, ibidem legere est. Notandum est 4. Græcos admisisse semper Purgatorium, quod admittunt Latini; sed cum hoc discrimine, quòd Latini passim credant animas in

Purgatorio existentes igne torqueri, Græci verò velint, Purgatorium esse locum caliginosum, in quo animæ tristitiâ quidem, ac mœrore afficiantur, sed tamen igne non torqueantur. Verùm circumstantia ea ad fidem non pertinet; unde eam Synodi definitio non recenset, indifferens ipsimet Græcis visa est: *Medias autem* (inquiunt, loquentes de animabus iis, quæ in hac vitâ plenè pro peccatis non satisfecerunt) *esse in loco tormentorum; sed sive ignis sit, sive caligo, ac turbo, sive quid aliud, non contendimus*; leguntur ea Græcorum verba sess. 25. paulò ante Synodi definitionem. *Notandum est 5.* Concilium Florentinum, primam esse synodum Oecumenicam, in quâ expressè definitum est, animas pias, quæ in hac vitâ, aut in alterâ plenè satisfecerint, statim ac sine morâ frui intuitivâ Dei visione. Illi definitioni occasione fuerunt verba quorundam Græcorum, qui docuerunt, animas, de quibus agitur, non fore beatas, nisi post corporum resurrectionem: non erraverant tamen cum Mil-lenariis; nempè (ut legitur sessione 25.) id de perfectâ beatitudine, quæ tum ad animam, tum ad corpus pertinet, intellexerant. *Notandum est 6.* Florentinam Synodum, definitione quam loco sexto retulimus, favere eorum theologorum sententiæ, quibus placet, infantes, qui nō recepto baptismo moriuntur, igne torqueri; nempè vult eos in eundem locum descendere, in quo adulti igne torquentur. *Notandum est 7.* ad fidem non satis esse, ut quis credat, Romanū Pontificem habere primatum in totâ Ecclesiâ; sed præterea requiri, ut credat primatum quem habet, *juris esse divini*. In quo autem positus sit ille primatus, quo sensu Romanus Pontifex plenam habeat potestatem regendi, ac gubernandi universalem Ecclesiam, Synodus Florentina peti vult ex gestis, ac Canonibus Oecumenicorū Conciliorum: *Quemadmodum etiam* (inquit) *in gestis Oecumenicorū Conciliorum, & in sacris Canonibus continetur.*

§. I I.

*De iis, quæ Florentinam Synodum
subsecuta sunt.*

CONCLUSIO. Multa Florentinam Synodum subsecuta sunt.

Probatur enumeratione. Primò, Latini post finitam Synodum Græcis proposuere varias quæstiones, inter quas istæ præcipuum tenent locum: *Quare Episcopi non inungunt sacro chrismate, sed sacerdotes, cum hoc Pontificibus sit datum. — Quare non contenti estis Domini verbis: Accipite & comedite, sed postea dicitis: Et fac quidem panem hunc preciosum corpus Christi tui; & transmutans ea Spiritu sancto tuo. Amen, Amen, Amen. — Quare conjugia dirimitis, dicente Domino: Quod Deus conjunxit, homo non separet. — Quare de causa non eligitis hic Patriarcham.* Græcorum ad eas quæstiones responsa non referuntur in actis Concilii, sed Latinis probata fuisse, fidem faciunt hæc eorundem actorum verba; *Hæc à Latinis objecta Mitylenensis Canonice omnia, legitimèque dissolvit, præterquam duo, de quibus Papa significavit Imperatori; cur scilicet matrimonia dirimantur, & Patriarcha non eligatur.* Hinc patet, Latinos probasse praxim Græcorum, apud quos Presbyteri tanquam ministri extraordinarii conferunt confirmationis sacramentum. Patet iterum, eorundem Græcorum praxim circa dissolubilitatem matrimonii in casu adulterii, licet à Latinis minimè probatam, non habitam fuisse tanquam apertam hæresim; neque enim, si tanquam hæresis aperta apud Latinos audisset, Latini cum Græcis eam hæresim apertè profitentibus unionem absolvissent. Quid autem postea in Concilio Tridentino de eâ quæstione definitum fuerit, suo loco dicetur.

Secundò, Post solutam Florentinam Synodum, quatuor post Græcorum discessum mensibus, decimo nimirum Kalendas Decembris, anno 1439. promulgatum est Eugenii decretum pro instructione Armenorum, quod incipit: *Exultate Deo adjutori nostro*. Io eo autem decreto Eugenius Armenis pro regulâ tradidit 1. Symbolum Constantinopolitanum cum particulâ, *filioque*, quæ ipsi deinceps inserta fuit ab Ecclesiâ Romanâ. Tradidit 2. definitionem quarti universalis Concilii Chalcedonenfis, in quinto postea & sexto universalibus Conciliis renovatam, de duabus naturis in unâ Christi personâ. Tradidit 3. definitionem de duabus voluntatibus, duabusque Christi operationibus in sexto Concilio Generali promulgatam. Tradidit 4. universales omnes Synodos, quæ legitimè celebratæ fuerant, seu, cum Armeni Nicænam I. Constantinopolitanam I. & Ephesinam I. tantum Synodos admitterent, Eugenius decrevit, ut non solum tres dictas Synodos, sed & Chalcedonensem & alias universales auctoritate Romani Pontificis legitimè celebratas, sicut & cæteri fideles, reverenter susceperent. Tradidit 5. Ecclesiæ Romanæ praxim circa septem novæ legis sacramenta. Tradidit 6. compendiosam illam fidei regulam, quæ incipit: *Quicumque vult salvus esse*. Tradidit 7. decretum unionis cum Græcis consummatæ in Concilio Florentino pridie nonas Julii, anno 1439. quodque incipit: *Latentur cæli & terra*. Tradidit 8. usum Ecclesiæ Romanæ circa dies, quibus festivitates Annuntiationis Beatæ Mariæ Virginis, Nativitatis Beati Joannis Baptistæ, & consequenter Nativitatis & Circumcisionis Domini nostri Jesu Christi, ac Præsentationis ejusdem in Templo, seu Purificationis Beatæ Virginis Mariæ, celebrari debeant.

Circa relatum Eugenii pro Armenis decretum: *Notandum est* 1. ipsum non fuisse editum, quamdiu Florentinum Concilium erat Oecumenicum, cum

cum enim promulgatum est, jam tota Orientalis Ecclesia Florentiâ discesserat; ac proindè Patres Occidentales, qui Florentiæ remanserant, non repræsentabant universalem Ecclesiam. Nec obest, quod ipse Eugenius declarat, decretum pro Armenis editum fuisse, *sacro approbante Concilio Florentino*; nam id intelligitur de Concilio Occidentalium, qui cum Eugenio remanserant Florentiæ, non autem de Concilio, quod tunc esset Oecumenicum. Confirmatur ex ipsâ decreti inscriptione comparatâ cum inscriptione decreti unionis Græcorum. Istud inscribitur: *Definitio sanctæ Oecumenicæ Florentinæ Synodi*; illud verò: *Decretum Eugenii Papæ IV.* — *Notandum est* 2. inter theologos non esse omninò certum, an sacramento Ordinis, materiæ ac formæ, quæ in illo decreto recensentur, sint essentielles, an accidentales tantùm. Probabiliùs nobis sentire videntur, qui contendunt, accidentales esse; neq; enim verisimile est, Eugenium voluisse id statuere, ex quo sequeretur irritas esse Ordinationes Græcorum, quibuscum, sacro approbante Concilio, strictissimam unionem sanciverat; nempè Græci in conferendis Ordinibus solâ manuum impositione, ac oratione, non adhibitâ aliquâ instrumentorum porrectione, aut recitatis formis absolutis, quæ in decreto leguntur, usi sunt semper & nunc etiam utuntur. Eugenius eo in capite, ac in pluribus aliis, quorum ibidem fit mentio, Armenos ad Latinorum usum ac praxim adducere voluit. Vide Morini nostri librum de sacris Ordinationibus. *Notandum est* 3. Armenos amplexos fuisse errorē Eutychetis, duas in Christo naturas in unam confundentis; unde Eugenius meritò eis injunxit, ut præter Synodos Nicænam I. Constantinopolitanam I. & Ephesinam I. reciperent quoque Chalcedonensem, ac scripta Leonis Magni, qui Nestorii & Eutychetis oppositas hæreses in Synodicâ ad Flavianum epistolâ confixerat.

Tertiò. Quamvis felix fuerit exitus Concilii Florentini, eventum tamen postea habuit diversum, seu diù non stetit sancita Græcos inter & Latinos unio. Nam 1. (ut scribit Nicolaus Papa V. in litteris, quas ad Constantinum Imperatorem Joannis Paleologi fratrem dedit) Joannis ipsius, quo præsentè celebratum est Concilium, nimio erga res civiles studio factum est, ut unitatis negotium ad optatum finem non pervenerit. 2. Unionis firmitatem impediit Marcus Ephesus, qui cum Florentiæ unus ex Græcorum omnium Episcoporum numero sese segregasset, ac pertinaciter perstitisset in opinione, quam semel imbiberat, noluisseque Concilii definitioni subscribere; redux in patriam, scriptis adversus sacrâ Synodum variis epistolis, impedimento fuit, ne Græci antiquâ schismatis consuetudine malè affecti, unitatem amplecterentur. Hinc factum est, ut præter eos Patres Orientalis Ecclesiæ, qui Synodo interfuerant, Græci nunquam hoc generale Concilium receperint. 3. Eandem unionis firmitatem impediunt Turcæ, qui paucis post Concilium Florentinum annis Græcos & Imperio, & libertate spoliarent.

§. III.

Utrum Concilium Florentinum sit Oecumenicum.

CONCLUSIO. Concilium Florentinum verè fuit Oecumenicum.

Probatur. *Primò*, auctoritate legitimâ, sanioris nimirum partis Concilii Basileensis, ac decreto Eugenii Papæ IV. convocatum est. *Secundò*, debitum habuit præsidem, eundem scilicet Eugenium; unde quæ in eo factæ sunt definitiones, Eugenio, sacro approbante Concilio, tribuuntur. *Tertiò*, universam Ecclesiam repræsen-

sentabat ; Occidentalis enim illi præsens fuit per Eugenium Papam , Cardinales octo , Episcopos 51. ac plures , tum Abbates , tum Ordinum præpositos generales , tum Doctores ; Orientalis verò illi adfuit per Josephum Patriarcham Constantinopolitanum , per Vicarios Alexandrini & Antiocheni Patriarcharum , per Basilium Patriarcham Hierosolymitanum , per plures tum Merropolitanos & Episcopos ; ipsum etiam Joannem Paleologum Imperatorem .
Quartò, quæ in eo definita sunt , Oecumenicæ sunt fidei , seu dogmata sunt , quæ Ecclesia Catholica quovis sæculo professæ est , ac nunc etiam ubique proficitur .

Objicies 1. Nulli ex Germaniâ , pauci ex Galliis Episcopi , unus tantum ex Angliâ , nullus ex iis , qui Amedæo , in suâ obedientiâ Felix Papa V. nuncupatus , parebant , adfuerunt Concilio Florentino ; Præsules qui adhuc Basileæ congregati erant , ipsi contradicebant , contendentes irritam esse illius convocationem ab Eugenio Papâ IV. contra (ut aiebant) Basileensis Concilii decretum : ergo Concilium Florentinum repræsentare non potuit universam Ecclesiam ; ac proinde non fuit Oecumenicum .

Resp. dist. ant. Nulli ex Germaniâ , &c. adfuerunt Concilio Florentino , & tamen ad illud Canonicè vocati fuerant , conc. ant. Et non fuerant ad illud Canonicè vocati , neg. ant. Eugenius convocationis litteras ad omnes orbis Episcopos miserat , enixèque Principes rogarat , ut præsules suæ ditioni subditos ad Concilium mitterent ; atque adeò per eum nō fterit , quin de facto omnes ad illud se conferrent . Ut autem Concilium sit Oecumenicum , non requiritur , ut omnes Episcopi sint illi præsentes ; sed satis est , ut ad illud vocentur , tantaque sit præsentium copia , ut de eis dici possit , quòd universam Ecclesiam repræsentent . ---
Quod spectat ad præsules , qui adhuc Basileæ conventum agebant , dicendum est , conventum , quem age-

agebant post Concilii Basileensis translationem in urbem Ferrariam, ac postea Florentiam, non fuisse Concilium legitimum; ac proinde nullius adversus Florentinum ponderis fuit eorum contradictio. Vide quæ hujusce tomi pag. 202. agentes de Conciliis in genere diximus.

Objicies 2. In Galliis Concilium Florentinum non semper audit tanquam Oecumenicum. Nam 1. Præsules Galli à rege prohibiti sunt, ne Ferrariam primum, ac postea Florentiam se conferrent. 2. Ipsimet præsules Galli ipsum pro Oecumenico non habuerunt: *Apud Gallos* (verba sunt Cardinalis à Lotharingiâ ad Britonem secretarium, ac suum in Curia Romanâ ministrum scribentis) *Constantiense Concilium in partibus suis omnibus ut generale habetur: Basileense in auctoritatem admittitur: Florentinum nec legitimum, nec generale reputatur.*

Resp. dist. ant. In Galliis Concilium Florentinum non semper audit tanquam Oecumenicum, re nondum plenè discussâ, conc. ant. plenè discussâ, neg. ant. Ideò Florentinum Concilium quibusdam Gallis non semper pro Oecumenico habitum est, quòd per verba, quibus in Synodi definitione asseritur, Romano Pontifici divinitus traditam fuisse potestatem regendi ac gubernandi universalem Ecclesiam, credidissent iis inferri labem, quæ de Conciliorum generalium potestate leguntur sessionibus IV. & V. Concilii Constantiensis: Verùm, re deinceps diligentius excussâ, Galli judicarunt verba, de quibus agitur, rectè cum Concilio Constantiensi conciliari; nempe adverterunt verborum, de quibus est quæstio, sensum his aliis, quæ immediatè sequuntur explicari: *Quemadmodum etiam in gestis Oecumenicorum Conciliorum & in sacris Canonibus continetur.* Ad antecedentis confirmationem dicendum est, quòd licet Galli Concilio Florentino, corpore non adfuerint, illi tamen mente, ac affectu fuerint præsentes; omnes enim ad unum, seu

feu nullo contradicentes, Græcorum unioni in eo sancitæ, & articulis ad fidem spectantibus, qui in eo definiti sunt, consensere.

ARTICULUS XIX.

De Concilio Tridentino.

Not. **C**oncilium Tridentinum, quod quidem apud Gallos est decimum nonum Oecumenicum, ab anno 1545. usq; ad annum 1563. sub tribus Romanis Pontificibus Paulo III. Julio III. & Pio IV. celebratum est. Nemini dubium est, quin à Romano Pontifice coactum sit; nempè Pauli Papæ III. bulla indictionis, ejusdem Concilii actis præfixa legitur, data Romæ xi. Kalendas Junii, anno 1542. Certum est quoque, eidem Concilio Romanos Pontifices præfuisse; singulis nimirum sessionibus fit mentio legatorum, qui eorum locum tenuerint: *Sacro-sancta Tridentina Synodus in Spiritu sancto legitime congregata, in ea præsidentibus tribus Apostolicæ Sedis legatis;* verba sunt, quibus singulæ serè sessiones incipiunt.

§. I.

De causa Concilii Tridentini.

CONCLUSIO. Duplex fuit causa cogendi ac celebrandi Concilium Tridentinum.

Probatur. Concilium Tridentinum coactum, ac celebratum est: 1. ad confirmandam fidem contra Lutheri, Zuinglii, Calvini, ac plurium aliorum hæreticorum errores: 2. ad restituendam Ecclesiæ disciplinam, quam bella ac hæreses plurimum labefactaverant: *Placetne vobis* (verba sunt decreti primæ sessionis) *ad extirpationem hæ-*

hæresum, ad pacem & unisonem Ecclesiæ, ad reformationem cleri & populi christiani, decernere & declarare, sacrum Tridentinum & generale Concilium incipere & incipitum esse? Ut autem sacra Synodus scopum assequeretur suum, singulis ferè sessionibus post fidei definitionem subiectum est decretum de reformatione.

Quæres, quinam essent Lutherus, Zuinglius, Calvinus, alique hæretici, qui elapso proximè sæculo Ecclesiam vexarunt, & contra quos Concilium Tridentinum celebratum fuit.

Resp. 1. Martinum Lutherum Islebii in Saxoniâ natum esse, ann. 1483. Augustinensium Ordini in cœnobio Erfordienfi ætatis anno 22. nomen dedit. Anno 1508. Vvitebergam translatus, post actus academicos, quibus acre & vehemens ingenium probaverat, Doctoratus lauream consecutus est. Anno 1517. occasione indulgentiarum, quas Leo Papa X. concesserat, & quarum promulgatio, omissis præter consuetudinem Augustinensibus, commissa fuerat Dominicanis, scripsit primum contra indulgentiarum abusum, deinde contra ipsasmet indulgentias, purgatorium, sacramentorum virtutem, justificationem, aliaque capita, quæ in bullâ Leonis adversus Lutherum edita, legere est. Intelligens se brevi Romæ damnandum, die 28. Novembris anno 1518. à Summo Pontifice non rectè consulto provocavit ad futurum Concilium legitimè, ac in loco tuto congregandum. Ubi Leo Papa X. anno 1520. unum supra quadraginta illius articulos damnasset, Lutherus eosdem articulos triplici libello defendit: priorem inscripsit: *Adversus execrabilem bullam Antichristi*: alterum: *Affertio articulorum à Leone X. damnatorum*: tertium: *Articuli Martini Lutheri, quare damnati sint?* Ab eo tempore in pejus profecit semper, ac tandem, tum religionis, tum fidei jugum excussit. Mortuo Fridrico Saxonix Duce, qui prætenfæ reformationi faverat, monialem *Catharinam de Borè*, ex Monasterio

sterio raptam duxit in matrimonium . Obiit Is-
lebbii anno 1546. die 17. Februarii .

Resp. 2. Huldricum Zuinglium , urbis Tigurinae apud Helvetios Parochum , adversus indulgentias & Romani Pontificis primatū , ann. 1519. prædicare cœpisse . Articulos sexaginta de indulgentiis , de justificatione , de sacramentis , ac aliis permultis capitibus Tigurinus magistratus in conventu publico propugnatos probavit , edixitque , ne quis adversus illos quidquam auderet asserere ; postea verò prohibita fuit Missa , abrogati Ecclesiae ritus , ac in vecta prætensa reformatio , quæ jam temporis apud Helvetios protestantes obtinet . Zuinglius in acie contra Catholicos pugnans , interfectus est die 11. Octobris , anno 1531. Quenam autem fuerint præcipua illius dogmata , & in quibus à Luthero dissenserit , dicemus agentes de actis Concilii Tridentini .

Resp. 3. Joannem Calvinum Novioduni sexto idus Julii , anno 1509. ex Catholicis parentibus in lucem prodierit . Ann. 1524. apud Bituricas , ubi Andreæ Alciatum Jurium professorem audiit , inijt amicitiam cum Melchiorè Vvolmaro , Græcarum litterarū professore ; à quo erroris Lutherani rudimenta edoctus , eū in castellis , ac pagis disseminare cœpit . Anno 1535. ætatis 26. Basileæ , quò se receperat territus Francisci I. Francorum regis edictis adversus novatores latis , libros promulgavit , quos inscripsit : *Institutiones religionis Christianæ* . Paulò post Genevam , quæ non ita pridem agentibus Farello Vapincensi , & Petro Viseto ex agro Bernensi ad Sacramentarios , expulsis Episcopo ac Clero , defecerat , Argentorati uxorem duxit ex consilio Bucer , præcipui illius urbis Sacramentariorum ministri , ibique theologum per aliquot annos egit . Genevæ mortuus est die 26. Maii , anno 1564. natus menses decem supra annos quinquaginta quatuor .

Respondeo 4. Anabaptistæ , anno 1522. prodierunt auctore Nicolao Storkio , Silesio , qui primum
Lu.

Luthero adhæsit; sed postea à jactans acceptas per Michaellem Archangelum insolitas revelationes, sectam excogitavit singularem. Præcipua Anabaptistarum dogmata, hæc sunt; parvulis, quòd fidem profiteri non possint, non prodesse baptismum; Parvulos, cum adoleverint, iterum baptizandos esse; Magistratus, cum omnes in republicâ sint æquales, abjici debere. In omnibus ferè aliis capitibus Sacramentariorum errores profitebantur. Adversus illos, similesque hæreticos habita est Tridentina Synodus, quæ illorum errores post diligens examen proscripsit.

§. I I.

De actis Concilii Tridentini.

Acta Concilii Tridentini continentur viginti quinque sessionibus, quarum undecim priores habitæ sunt sub Paulo Papâ III. sex sub Julio III. reliquæ sub Pio IV.

De Actis Sessionum I. II. III. & IV.

Prima sessio, habitâ die 13. mensis Decembris, anno 1545. declaratum est, Concilium esse Oecumenicum, incipere ac inceptum esse. *Not. 1.* Mos est Conciliis declarare se Oecumenica, ac per id supplere iis, quæ aliundè deesse possent. *Not. 2.* Præsules per verbum, *Placet*, suam sententiam dixere publicis in sessionibus; nempe decreta, quæ tum in privatis theologorum congregationibus, tum in generalibus, quibus aderant Episcopi, excussa ac examinata, per verbum *Placet*, in sessionibus conciliariter probabantur.

Sessio secunda, editum est decretum de modo vivendi, & aliis in Concilio servandis. *Not. 1.* Decreto oblatrarunt hæretici, quòd Missæ oblationem, ac Litaniarum recitationem commen-

da-

daret: verum par fuit, ut Patres ad veterum potius, quam ad novatorum normam suas preces exigerent. *Not. 2.* In antiquis Conciliis habita est ratio Sedium in assignando cuique præfati loco, sed in posterioribus habita est ratio ordinationis, declaratumque est hinc nulli novum jus acquiri.

Sessio tertia, quod in dies Episcopi expectarentur, nihil novi decretum est, sed recitato fidei symbolo, indicta est quartæ sessionis dies. *Not. 1.* Symbolum Constantinopolitanum præ Apostolico ac Nicæno recitatum est, quod prolixius fidem explicet, ac multis ante sæculis intra Missarum solemnia caneretur. *Not. 2.* Patres symbolum recitarunt, ut omnibus notum facerent, se in suis definitionibus ab eo non esse recessuros.

Sessio quarta, promulgatum est decretum de numero librorum Canonorum; de traditionibus; de vulgatæ editionis authenticitate; de usu ac impressione sacrorum librorum. *Not. 1.* Editum est decretum contra Lutheranos & Calvinistas, qui (ut retulimus hujusce tomi pag. 75.) plures libros ex Canonorum albo expunxerant. *Not. 2.* Quo sensu Latina vulgata Bibliorum editio, declarata fuerit authentica, dictum est pag. 108. *Not. 3.* Quinam traditiones rejecerint; quid intelligendum sit traditionum nomine; quibus regulis veræ à falsis dignosci possint, fusè pertractatum est superius à pag. 161. ad pag. 182. *Not. 4.* Multa pecuniaria, quæ impressoribus imponitur, locum habet in iis locis, in quibus impressores subduntur temporali Ecclesiæ dominio, aut in quibus Principes sæculares illi statuto non contradicunt.

De actis Sessionis V.

Sessio quinta, actum est de peccato originali; nempe definitum fuit 1. Adamum per divini mandati transgressionem excidisse ex sanctitate & ju-

sti-

stitia, in qua constitutus fuerat. *Not.* Adhibita est vox *Constitutio*, non autem *Creatus*, quod nonnulli theologi fateantur quidem Adamum creatum fuisse in integritate, tum mentis, tum corporis; sed negant creatum fuisse in iustitiâ & sanctitate supernaturali.

Definitum fuit 2. Adamum in posteros suos peccatum transfundere non imitatione, sed propagatione. *Not.* De modo, quo peccatum originale transfunditur in Adami posteros, disputatum quidem fuit in Concilio Tridentino, ut docet Palavicinus hist. lib. 7. cap. 8. sed nihil postea in sessione fuit definitum.

Definitum fuit 3. parvulos, etiamsi fuerint à baptizatis parentibus orti, baptizari debere, quod ex Adamo trahant originale peccatum. *Not.* Rationem illam negavit Zuinglius, scilicet lib. de baptismo, tractatu 3. contendit, peccatum originale esse quidem morbum, sed negat esse peccatum propriè dictum, quod hominem Deo inimicum reddat. Vide Bellarminum lib. 4. de amissione gratiæ & statu peccati cap. 2. Concilium addit alioquin formam baptismatis in remissionem peccatorum non fore veram, sed falsam. *Not.* Nomine *formæ*, Concilium hîc non intelligit invocationem SS. Trinitatis, sed ritus, qui in baptismo adhibentur, exorcismos, exsufflationes, orationes, quæ illius collationem præcedunt.

Definitum fuit 4. per baptismi gratiam id totum tolli, quod veram & propriam peccati rationem habet. *Not.* Iis verbis non damnantur ii, qui docent, peccatum originale positum esse materialiter in concupiscentiâ; nam in concupiscentiâ in se sumptâ non reperitur reatus peccati, seu malitia, quæ hominem Deo inimicum reddat.

Definitum fuit 5. Deum in renatis nihil odisse; concupiscentiam in renatis propriè non esse peccatum, sicutamen appellari, quod ex peccato sit, & ad peccatum inclinet. *Not.* Odii nomine hîc intelligitur odium inimiciæ, quod supponit pec-

peccati reatum; non autem odium displicentiæ; reverà enim concupiscentia Deo displicet, cum à Deo non sit, & inclinet ad peccatum. Declaratum est postea non fuisse Concilii intentionem in decreto de peccato originali comprehendere Virginem Deiparam, sed observandas esse constitutiones Sixti Papæ I V. *Not.* Concilium neutri parti, sive neganti B. Virginem conceptam fuisse in peccato originali, sive affirmanti conceptam fuisse, officere voluit; imò nec declarare voluit opinionem affirmantem esse opinionem *piam*, quamvis Pacecus id (Palavicino teste) vehementer urgeret. Edixit postea Pius Papa V. anno 1570. ne quis in concionibus popularibus assereret, B. Virginem conceptam fuisse in peccato originali; sed permisit, ut in academiis & scholis id propugnaretur. Paulus V. anno 1617. vetuit, ne id fieret etiam in academiis & scholis. Gregorius Papa XV. prohibuit, ne id in privatis etiam colloquiis fieret; sed anno 1622. Dominicanis concessit, ut in suis privatis scholis, ubi non essent alii, quàm religiosi ex suo Ordine, defenderent antiquam Ordinis de eâ controversiâ sententiam.

Eadem sessione quinta, actum est de reformatione, ac declaratum fuit, Episcopos per se teneri ad prædicandum Jesu Christi Euangelium. *Not.* 1. Quo jure ad id teneantur, definitum est sessione 23. cap. 1. de reformatione. Declaratum fuit 2. regulares non posse prædicare sine Episcopi licentiâ extra Ecclesias, quæ non sunt suorum Ordinum; imò nec in Ecclesiis suorum Ordinum, nisi petita ab Episcopis benedictione. *Not.* 2. Tunc nō ferebat eorum status, ut eo in capite abolerentur omnia privilegia, quæ in Clementinis concessa fuerant; sed postea sessione 24. cap. 4. de reform. decretum est regulares non posse prædicare, etiã in Ecclesiis suorum Ordinū, Episcopo contradicente. Declaratum fuit 3. lectionem Sacræ Scripturæ instituendâ esse in Metropolitanis & Cathedralibus Ecclesiis, necnon in Collegiatis insignium

nium oppidorum, si Clerus ibi numerosus fuerit; idque per assignationem præbendæ, quæ ad id specialiter deputetur. *Not.* Illi decreto fit satis ab eo, qui theologiam scholasticam docet. Divinis officiis theologus eâ die præsens censetur, quibus vacat publicæ lectioni. Scholares, licet in academiis studeant ex licentiâ Capituli, jus non habent in distributiones quotidianas, sed tantum in præbendarum proventus.

De actis Sessionis VI.

Sessio sexta, actum est de justificatione, ac definitum 1. naturam & legem satis non esse ad justificationem, sed necessaria esse merita Christi, qui licet pro omnibus mortuus sit, non omnes tamen mortis ejus beneficium recipiunt; sed ii tantum, quibus meritum passionis ejus communicatur. *Not.* Aliud est sufficientia mortis Christi, aliud illius applicatio; illa ad omnes omnino spectat; ista verò ad eos tantum, quibus per gratiam actu datam meritum passionis illius communicatur.

Definitum fuit 2. adultos quibusdam actibus, fidei nimirum, spei, charitatis, timoris ad justificationem præparari. *Not.* 1. Lutherus contrarium senserat; docuerat enim omnes actus, qui justificationem præcedunt, esse peccata. *Not.* 2. Quæ Concilium hîc definit de actuum fidei, spei & charitatis necessitate ad Cathecumeni justificationem, locum etiam habent in lapsi justificatione in sacramento Pœnitentiæ recipiendâ. Vide quæ de eo argumento dicta sunt in nostro Commentario Historico de sacramentis, nec non harum Institutionum tom. 6. *Not.* 3. Fidem *explicitam* in Christum necessariam esse necessitate medii, probant hæc capitis sexti verba: *Credentes vera esse, quæ divinitus revelata & promissa sunt, atque illud imprimis, à Deo justificari impium per gratiam ejus, per redemptionem,*
quæ

quæ est in Christo Iesu. Not. 4. Ex his ejusdem capituli sexti verbis: *Disponuntur autem ad justitiam, dum excitati divina gratia & adjuti, fidem ex auditu concipientes, liberè moventur in Deum*; plures è scholâ Thomisticâ theologi colligunt, gratiam sufficientem ad salutem non dari infidelibus, qui nihil unquam de Euangelio audire potuerunt. Vide nostrum tractatum de gratiâ.

Definitum fuit 3. hominis justitiam esse homini intrinsecam, ac inhærentem. Not. 1. Lutherus voluit esse extrinsecam tantum; nempe per non imputationem peccatorum, quorum reatus remaneat in viris etiam sanctissimis. Not. 2. An ea justitia inhærens, sit donum à charitate infusâ distinctum, non definit sacra Synodus; imò ne definire videretur, justitiam inhærentem, tum gratiæ, tum doni, tum etiam charitatis nomine appellat. Expressè quoque non definit, an ea justitia sit ipsemet actus charitatis Dei super omnia antea elicitus, & virtualiter remanens; an verò (ut censemus) habitus ab illo actu distinctus.

Definitum fuit 4. eo sensu impium per fidem justificari, quòd fides sit humanæ salutis initium; addit, ideò etiam impium justificari gratis, quia nihil eorum, quæ justificationem præcedunt, ipsam justificationis gratiam promeretur. Not. per hoc verbum, *Promeretur*, intelligitur meritum de condigno, non autem de congruo; neque enim (ut ait Augustinus) fides suo caret merito.

Definitum fuit 5. ad justificationem impii non requiri, ut impius certò credat se absolutum & justificatum esse. Not. Est contra, tum Lutheranos, tum Calvinistas, quibus placet per illum solum actum, impium justificari. Eum autem actum vocant actum fidei de misericordiâ speciali, seu actum, per quem impius credit sibi applicari misericordiam, quam Deus in genere, credentibus pol-

pollicitus est . Concilium rationem reddit , cur actus ille non sit necessarius : *Cum* (inquit) *nul-
lus scire valeat certitudine fidei , cui non potest
subesse falsum , se gratiam Dei esse consecutum .* Am-
brosius Catharinus in congregationibus ante pu-
blicam sessionem habitis asseruerat , iustum pos-
se scire , se gratiam Dei esse consecutum , fide divi-
nâ , cui tamen falsum subesse posset , eò quòd
non esset Catholica , seu circa articulum , quem
ut à Deo revelatum Ecclesia proponeret ; eo ferè
modo (inquebat) quo presbyter credit parvu-
lum quem baptizavit , iustitiam consecutum es-
se . Dominicus Soto post habitam sessionem
scripsit , Catharini eo in capite sententiam à Con-
cilio proscriptam fuisse . Catharinus è contra
editâ apologiâ conatus est ostendere eam , etiam
post sessionem , in integro stare . Vide Palavicini-
um Hist. lib. 8. cap. 12.

Definitum fuit 6. mandata Dei homini iustifi-
cato non esse ad observandum impossibilia . *Not.*
1. Est contra Lutherum & Calvinum , qui contem-
derant , mandata Dei esse impossibilia iusto adju-
to gratiâ etiam efficacissimâ ; unde concluderant
iustum in quolibet opere , eo etiam , quod ex gra-
tiæ auxilio præstiterit , saltem venialiter peccare ,
quia concupiscentiæ venenum (inquebant) sin-
gulas illius actiones inquinat . Concilium con-
firmat definitionem ex Augustino , qui asserit
mandatorum possibilitatem contra Manichæos ,
qui docebant , idèd ea esse impossibilia , quòd in
homine esset natura mala , opus principii nequam ,
ratione cuius peccatum vitari non possit . Confir-
mat iterum ex eo , quòd cum iusti sint filii Dei ,
adjuti actuali gratiâ Deum diligant , ac proindè
servent mandata . *Not.* 2. Hæc verba , quæ Con-
cilium ex Augustino laudat : *jubendo monet &
facere , quod possis , & petere quod non possis* , sup-
ponunt aliquibus iustis , iis etiam , qui (cum
orent) gratiâ sufficiente , seu excitante , move-
ntur , possibile non esse præceptum eâ possibilita-
te,

te, quæ complectitur omnia auxilia, quæ necessaria sunt, ut præceptum actu servetur. *Not.* 3. Eadem verba supponunt quoque, præter gratiam excitantem, seu (ut nunc loquuntur) præter sufficientem, requiri aliam, ad actu operandum, quam omnes justī non habent; si enim eam haberent, frustra eam à Deo peterent. *Not.* 4. Hæc verba: *Adjuvat ut possis*, quæ non sunt Augustini, sed Concilii, eam gratiam significant, quam justī petere jubentur: *Petere quod non possis*; ac proinde cum justī, ut mox dictum est, non petant gratiam possibilitatis, cum supponantur eam jam habere, sed actionis; hoc est, non petant sufficientem, sed efficacem, de efficace, non autem de sufficiente intelliguntur hæc verba: *Adjuvat ut possis*. Nec obstat vox hæc *possis*, quā Concilium utitur; nempe intelligitur (ut jam observatum est) de potentiā secundum tritum ac grammaticalem loquendi modum sumptā, hoc est, de potentiā, quæ complectitur ea omnia, quæ necessaria sunt, ut præceptum actu & de facto servetur.

Definitum fuit 7. justos non peccare in iis actibus, in quibus suam socordiam excitando, & sese ad currendum in stadio cohortando, mercedem quoque intuetur æternam. *Not.* 1. Merces illa, vel est Dei visio ac amor perfectus, vel effectus, qui ex illā visione, & ex illo amore sequuntur, pax nimirum & gaudium. Si primum, actus ille est actus spei simul, ac veræ charitatis; spei quidem, quatenus est expectatio boni absentis & ardui; charitatis verò, quatenus est desiderium unionis cū objecto amato; ac proinde actus ille, tum in specie, tum in individuo, bonus est ac pius. Si secundum, actus erit quidem bonus in se, quia licitum est pacis internæ desiderium, sed in individuo imperari debebit à charitate, seu in gloriam Dei ultimò referri; idque non obscure ipsamet sacra Synodus innuit: *Cum hoc* (in-

quit) *ut in primis glorificetur Deus, mercedem quoque intuentur eternam.*

Definitum fuit 8. neminem usque adeò præsumere debere, ut certò statuatur, se omninò esse in numero prædestinatorum. *Not. 1.* Est contra Calvinum, qui ex unâ parte asseruit Deum non alios, quàm prædestinatos, justificare; & ex aliâ, impium justificari per actum, quo certò credit, sibi peccata non imputari. *Not. 2.* Concilium vocat prædestinationem ad gloriam *arcanum mysterium*; ac proindè supponit illam esse omninò gratuitam, hoc est, independentem à prævisis pietatis operibus; neque enim arcanum erit mysterium, si operum cum gratiâ versatili facientium prævisionem supponat.

Definitum fuit 9. perseverantiam esse Dei donum, quod nemo certò sibi polliceri possit. *Not. 1.* Igitur perseverantia non est posita in consensu, quem voluntas præbeat gratiæ versatili; à nobis enim, non à Deo, est ille consensus. Prætereà Deus, quantum est in se, omnibus justis perseverantiam largiretur; daret enim id omne, quod ex parte sui esset necessarium ad actu perseverandum: perseverantia falsò diceretur, *magnum donum*; nempè nihil ex parte Dei diceret, quod aliæ gratiæ non complectantur. *Not. 2.* Ea Concilii definitio est contra Calvinum, cui placet, justificationem positam esse in actu, quo quis credat se esse de justificatorum, ac proindè, secundum ipsum, de prædestinatorum numero; in illius nimirum systemate soli prædestinati justitiam in tempore consequuntur.

Definitum fuit 11. Non solo infidelitatis peccato, sed etiam quovis alio mortali, acceptam justificationis gratiam amitti. *Not. 1.* Est contra Lutheranos & Calvinistas; scilicet contendunt justificationem esse positam in non imputatione peccatorum; at (ex ipsis) Deus nusquam hominibus prædestinatis imputat peccata, quantumcumque sint gravia. *Not. 2.* Nomine infide-

delitatis Lutherani & Calvinistæ non intelligunt, aut apostasiam à fide Catholicâ, aut actum aliquem contra illam fidem; sed intelligunt actum, quo quis desineret credere (quod tamen putant esse impossibile) peccata sibi non imputari.

Definitum fuit 12. Justificatis hominibus, si in justitiâ perseveraverint, vitam æternam deberi tanquam veram mercedem, quæ ob id eis sub eâ ratione proponi debet. *Not.* 1. Contrarium negarunt Lutherani & Calvinistæ contententes, pia justorum opera, coram Deo nihil aliud esse, quàm sordes & inquinamenta. *Not.* 2. Si omnibus justificatis vita æterna proponi debeat tanquam merces, agere intuitu mercedis æternæ, non est imperfectorum tantùm hominum, (ut volunt illuminati quidam) sed etiam perfectorum. Ad pleniorē intelligentiam eorum, quæ hucusque à Concilio definita retulimus, vide Canones, quibus idem Concilium oppositos fidei Catholicæ errores proscribit.

Fidei explicationi Concilium subjicit decretum de reformatione, decernitque 1. teneri Prælatos ad personalem residentiam. *Not.* 1. Quo jure, divino, an Canonico tantùm, innuitur sess. 23. cap. 1. de reform. *Not.* 2. Quæ causæ excusent à residentiâ, & quandonam eo in capite peccatum mortale committatur à non residenti-bus, atque etiam quando defectu residentie, ad fructuum restitutionem teneantur, ibidem clarè definitur. Decernit 2. excessus Clericorum, ac regularium agentium extra Monasterium, corrigi debere ab Ordinario loci tanquam Sedis Apostolicæ delegato. *Not.* In Galliis Episcopi contendunt jus illud sibi ratione Episcopatus convenire, nec unquam in corrigendis excessibus dicunt se Apostolicæ Sedis delegatos. Decernit 3. Ecclesias quascumque majores, ac illarum personas, posse ab Episcopis visitari, quoties opus fuerit. *Not.* Ubique promulgatum non est il-

Iud decretum , nec ubique viget . Decernit 4. Episcopum in alienâ diœcesi, nec Pontificalia exercere, nec Ordines conferre posse . *Not. 1.* Pontificaliorum nomine , intelliguntur omnia (exceptâ tamen jurisdictione) quæ pertinent ad Episcopos . *Not. 2.* Ordines hîc latè sumuntur , ita ut in illis ipsa etiam tonsura Clericalis intelligatur .

De actis Sessionis VII.

Sessione VII. Concilium Tridentinum de Sacramentis agit . Definit 1. Sacramenta novæ legis fuisse à Jesu Christo instituta . *Not.* Non dicit omnia à Christo *immediatè* instituta fuisse, ne damnaret scholasticos, quibus placet, Apostolos, acceptâ tamen à Christo potestate, instituisse Confirmationem & Extremam-Unionem. Addit, ea nec esse plura, nec pauciora, quàm septem . *Not.* Est contra Lutherum, qui inter sacramenta propriè dicta recensuit tantùm baptismum, Eucharistiam & Pœnitentiam : est etiam contra Calvinum, qui exceptis baptismo, eucharistiâ & ordine, non alia admisit: est quoque contra Zuïnglium, qui sacramentorum albo inscripsit baptismum tantùm & eucharistiam .

Definit 2. Sacramenta novæ legis continere, ac conferre gratiam ex opere operato, semper & omnibus, quantum est ex parte Dei . *Not. 1.* Est contra recentiores omnes hæreticos, quibus placet, sacramenta esse sigilla gratiæ independentè ab eis acceptæ, seu esse mera signa extrinseca, quibus homines utuntur, ut sese confirment in fide, hoc est persuasionem acceptæ per Christum justitiæ . *Not. 2.* Concilium non ait sacramenta gratiam continere *physicè aut moraliter* ; nempe utrumque in scholis disputatur . *Not. 3.* Illæ voces: *Ex opere operato*, innuunt discrimen sacramentorum veteris legis à sacramentis novæ legis ; illa enim gratiam conferebant
ex

ex opere operantis , seu ex vi dispositionum , quæ erant & in ministro , & in subjecto ; ista verò ex vi applicationis formæ supra materiam , modò tamen subjectum debite præparatum sit .
Not. 4. In hæreticorum systemate sacramenta habent suum effectum in solis iustificatis , quia (ex ipsis) sunt signa extrinseca , ac confirmativa fidei , quæ jam subjectum suum iustificaverit .

Definit 3. Tria sacramenta , non autem omnia , producere characterem . *Not.* 1. Damnantur hæretici recentiores , qui sacramentis nullam prorsùs efficientiam tribuunt . *Not.* 2. Non definitur , in quo posita sit characteris natura : par fuit , ut id theologorum scholis permitteretur . *Not.* 3. Concilium non distinguit inter sacramenta , aut in Ecclesiâ per Catholicos ministros , aut in hæresi per hæreticos collata ; de utrisque igitur Canon intelligi debet .

Definit 4. Christianos omnes in verbo & omnibus sacramentis administrandis non habere potestatem . *Not.* 1. Contrarium docuerat Lutherus , ut potestatem , quâ contra Romanam Ecclesiam Altare erexerat , in tuto poneret ; voluit tamen ratione scandali , omnium sacramentorum administrationem singulis fidelibus permitti non debere . *Not.* 2. Cum omnes Christiani validè administrent baptismum , meritò Concilium dixit *in omnibus sacramentis* .

Definit 5. In ministris , dum sacramenta conficiunt & conferunt , requiri intentionem faciendi , quod facit Ecclesia . *Not.* 1. Ecclesia unum tantum facit , cum per ministros suos sacramenta conficit ; nempè formam cum materiâ conjungit ; satis est ergo , ut minister intentionem habeat eam cõjungendi ; eam verò intentionem semper habet , quoties de facto seriò & liberè eam conjungit : neque enim potest seriò eam conjungere , nisi habeat intentionem conjungendi . *Not.* 2. Lutherus , quem Concilium damnare proposuit , contendebat , satis

esse formæ cum materiâ conjunctionem , quæ etiam exterius mimicè fieret : nec mirum ; nempè in illius systemate, sacramentis mimicè, etiam exterius , datis quilibet uti potest tanquam signis , quibus suam de justificatione fidem faciat sibi certam . *Not. 3.* Concilium non dicit requiri totam intentionem , quam Ecclesia sibi proponit ; nec enim ad sacramenti valorem requiritur , ut minister habeat intentionem conferendi effectû sacramenti ; sed dicit requiri intentionem, *saltem faciendi , quod facit Ecclesia*, hoc est (ut dictum est) seriò conjungendi formam cum materiâ ; ex illa nimirum conjunctione , velit nolitve minister, resultat sacramentum , quod Christus instituit .

Definit 5. in solemnibus sacramentorum administratione non licere cuique ministro omittere, aut contemnere , aut mutare receptos & approbatos Ecclesiæ Catholicæ ritus . *Not. 1.* Solemnis est administratio , quoties minister non arctatur imminente subjecti morte . *Not. 2.* Quale sit peccatum omissio ritûs , pendet ex gravitate, aut levitate materiæ . *Not. 3.* Est contra Lutherum & Calvinum , qui docent , Ecclesiam non posse de ritibus , aut aliis rebus à Christo non præscriptis , leges ferre , quæ citrà scandalum obligent in conscientiâ .

Definit 6. in Ecclesiâ Romanâ veram esse de baptismo doctrinam . *Not. 1.* Est contra Lutheranos & Calvinistas , quibus placet , Ecclesiam Romanam errare ratione effectûs , quem baptismo tribuit , & ratione ceremoniarum , quas illius administrationi conjungit . *Not. 2.* Nomine Ecclesiæ Romanæ non intelligitur sola fidelium congregatio , quæ Romæ sita est , sed omnes Ecclesiæ , quæ cum Apostolicâ Sede communionem conjunctæ sunt .

Definit 7. baptismum esse ad salutem necessarium . *Not.* Intelligitur de necessitate mediî , scilicet hæretici quos damnat , fatebantur baptismum .

ptismum esse necessarium necessitate divini præcepti.

Definit 8. baptizatos universæ legis Christi servandæ debitores fieri, non autem solius fidei. *Not.* Contendebant Lutherus & Calvinus, solum præceptum fidei; hoc est, persuasionis de acceptâ justificatione, esse possibile; ac proindè mirum non est, quòd senserint baptizatos non esse aliorum præceptorum debitores; addebant aliorum præceptorum prævaricationem iis non imputari, qui fidem illam haberent.

Definit 9. vota, quæ post baptismum fiunt, vi promissionis in baptismo ipso jam factæ non esse irrita. *Not.* 1. In baptismo vovetur observatio legis Christi, in votis verò, quæ ipsum sequuntur, voventur media quædam libera, quæ ad legis Christi observationem conferunt. *Not.* 2. Lutherus contrarium docuit, ut excussum religionis, quam professus fuerat, jugum excusaret.

Definit 10. peccata post baptismum commissa, nec dimitti, nec venialia fieri solâ recordatione & fide suscepti baptismi. *Not.* Lutherus & Calvinus contrarium senserunt, hoc argumento nixi: Peccata (inquirebant) dimittuntur, cum venialia fiunt, hoc est, non imputantur per fidem misericordiæ specialis: ergo cum baptismus sit illius fidei protestatio, ac confirmatio, per recordationem recepti baptismatis, ac proindè elicitæ actûs fidei, de quâ agitur, propter eam baptismi recordationem peccata non imputantur.

Definit 11. baptismum ab hæreticis datum in nomine Patris, & Filii, &c. valere; iterari non debere ei, qui apud infideles Christum negavit. *Not.* 1. Quæstionem quam Patres aliqui post Cyprianum immeritò judicarant solius esse disciplinæ, Concilium determinavit ad fidem pertinere. *Not.* 2. Licèt Canon non recenseat hæc verba: *Ego te baptizo, vel Baptizatur servus Christi*; ea tamen supponit, cum definit valere baptis-

mum. *Not.* 3. Nec Lutherus, nec Calvinus rejecerunt baptismum ab hæreticis datum; alioquin à se receptum in sinu Ecclesiæ Romanæ, quam dicebant esse diaboli synagogam, rejecissent. *Not.* 4. Canon Anabaptistas damnat, qui quosvis homines extra suam sectam baptizatos, iterum baptizabant, cum eorum hæresi dabant nomen.

Definit 12. parvulos licet actum credendi non habeant, baptizari debere; nec cum ad annos discretionis pervenerint, esse rebaptizandos. *Not.* 1. Est contra Anabaptistas, quibus visum est irritum esse datum parvulis baptismum defectu actus credendi. *Not.* 2. Licet Pelagiani negarent existentiam peccati originalis, docebant tamen, parvulos baptizari debere ad regnum cœleste consequendum, non autem ad vitam æternam, quam sine baptismo mortuis concedebant.

Definit 13. homines in infantiâ baptizatos, cogi debere ad Christianam vitam, quamvis ratum habere nolint, quod patrini, eorum nomine, dum baptizarentur, polliciti sunt. *Not.* 1. Canon ille perstringit Erasmus, cui placuit quod hic rejicitur. *Not.* 2. Censuris, non solâ sacramentorum privatione, homines, de quibus agitur, ad Christianam vitam cogi debent; imò à principibus exilio aliisque pœnis castigari possunt. *Not.* 3. Christiana vita importat obedientiam Ecclesiæ: peccant igitur hæretici, cum latas ab illâ leges infringunt.

Definit 14. Confirmationem esse verum, & propriè dictum sacramentum. *Not.* Est contra Lutheranos, Calvinistas, aliosque omnes hæreticos recentiores. --- Damnantur ii qui asserunt, injuriosos esse Spiritui sancto, qui sacro confirmationis chrismati virtutem aliquam tribuunt. *Not.* Non dicitur, quod sit aliqua virtus in chrismate; sicque non damnantur Theologi quibus placet chrisma non esse materiam essentialem confirmationis sacramento. Unum tantum pro-
scri-

scribitur, nempe censura quam protestantes inuerebant opinioni theologorum, qui virtutem producendi gratiam, ac characterem chrismati tribuebant. --- Additum fuit, confirmationis *ordinarium* ministrum esse solum Episcopum. *Not.* Ex Palavicino in congregationibus quæ sessionem præcesserunt, de voce illâ *ordinarium*, diù disputatum est; sed tandem addita est, ut illæsa servaretur opinio S. Thomæ contendentis, presbyterum simplicem posse delegari ad conferendum confirmationis sacramentum.

Post fidei definitionem statuta sunt plura capita ad disciplinam spectantia.

Determinatum est 1. quoniam sint capaces regiminis Ecclesiarum Cathedralium. *Not.* Hæc verba: *Ex legitimo matrimonio natus*, intelliguntur etiam de legitimo per subsequens matrimonium, seu habilis declaratus ad Episcopatum.

Determinatum est 2. eos qui, vel in titulum, vel in commendam tenent plures Cathedrales Ecclesias, teneri omnes, exceptâ unâ, dimittere. *Not.* Lex illa non obtinet in Germaniâ: nempe Episcopis Germanis, ut Lutheranis obfistere possint, plures Ecclesiæ etiam in titulum committuntur.

Determinatum fuit 3. simul haberi non posse plura incompatibilia beneficia. *Not.* Incompatibilia sunt, quæ requirunt personalem residentiam: sic capellania quæ exigit servitium in choro, est incompatibilis cum canonicatu. Dignitas verò seu personatus, in locis ubi id fert consuetudo, non est incompatibilis cum canonicatu; unde idem, servatis servandis, potest esse thesaurarius, & canonicus.

Determinatum fuit 4. Episcopum posse examinare, ac irritas declarare beneficiorum uniones. *Not.* Causa legitima unionis est necessitas, aut utilitas Ecclesiæ. In unione faciendâ citari debent omnes ii, quorum interest. Rectoris seu possessoris beneficii consensus non exigitur in unione facien-

dâ ab Episcopo, si illa debet effectum sortiri tantum post obitum rectoris.

Determinatum fuit 5. beneficia curata, licet perpetuò unita, posse ab Ordinario visitari. *Not.* Id intelligitur, tum de regularibus, tum de sæcularibus, seu & Ecclesiam, licet sit Ordinis caput, & illius Rectorem, etiam regularem, Episcopus potest visitare.

Determinatum fuit 6. litteras dimissorias à capitulo, sede vacante, intra annum vacationis, dari non posse, nisi arctatis. *Not.* Arctati occasione beneficii recepti, sunt ii, qui obtinent aliquod beneficium requirens personale servitium, quod sine hoc, vel illo ordine præstari non potest. Arctati ratione beneficii recipiendi, sunt illi, qui habent jus ad beneficium, ad cujus possessionem obtinendam certus ordo requiritur.

Determinatum fuit 7. neminem, à quocumque sit præsentatus, institui debere sine prævio Episcopi examine. *Not.* Id intelligitur etiam ratione beneficiorum simplicium. Excipit Concilium præsentatos ab universitatibus; sed ea exceptio locum non habet in Galliis.

*De actis Sessionum VIII. IX. X. XI. XII.
& XIII.*

Sessio VIII. Promulgatum est decretum de translatione Concilii ex civitate Tridentinâ ad Bononiensem, propter pestem, quæ Tridenti grassabatur. *Sessio 9.* Bononiæ habita est sub Julio III. die 21. mensis Aprilis, ann. 1547. Nihil aliud edixit, quàm prorogationem sessionis. *Sessio 10.* aliud prorogationis decretum promulgatum est. *Sessio 11.* Tridenti, quo reductum fuerat Concilium, habita est Kalendis Maii, anno 1551. decretum est resumere Concilium Tridentinum. *Not.* Non aliud igitur fuit tunc Concilium ab eo, quod Paulus Papa III. primùm indixerat. *Sessio 12.* prorogata est iterum sessio.

Sessio-

Seffione XIII. actum est de Eucharistiâ , ac definitum fuit 1. Christum esse corporaliter præsentem in Eucharistiâ . *Not.* Est contra Zuin-
gianos & Calvinistas, qui putant, Eucharistiam continere non ipsum corpus , sed figuram & virtutem corporis Christi . Additum est, Christum instituisse hoc sacramentum , cum post panis & vini benedictionem, se suum corpus præbere testatus est . *Not.* 1. S. Thomas per benedictionem illam intelligit prolationem verborum : *Hoc est corpus meum , Hic est sanguis meus* . Alii intelligunt invocationem divinæ potentiæ à consecratione distinctam . *Not.* 2. Concilium non definit an per illam benedictionem, an verò per euangelica verba : *Hoc est corpus meum* ; Christus Eucharistiam consecraverit . In congregationibus discipuli Angelici Doctoris contenderant, sententiam S. Thomæ esse proponendam tanquam de fide; sed obstiterunt alii , opposcentes opinionem Innocentii Papæ IV. Definitum fuit 2. Corpus Christi esse realiter in Eucharistiâ ante illius usum . *Not.* Est contra Lutheranos , qui contendunt, Corpus Christi esse in Eucharistiâ solum, dum actu sumitur . *Not.* 2. Voces istæ, *vi verborum* , intelliguntur de euangelicis, *hoc est corpus meum ; hic est sanguis meus* , scilicet corpus & sanguis, clare in eis exprimuntur . ---- Additum est, conversionem panis & vini rectè vocari transubstantiationem . *Not.* Vox illa paulò ante Concilium Lateranense IV. adhibita est , sed res per eam significata, semper credita fuit . ---- Additum est iterùm , venerabili sacramento deberi patriæ cultum . *Not.* Sacramentum sumit pro re contentâ , non autem pro continente; nam species, quæ in se continent corpus Christi, sunt creaturæ ; ac proindè ipsis patriæ cultus non debetur . Ratio reddita est , cur instituta fuerit festivitas in honorem Corporis Christi . *Not.* Fusè de eâ festivitàte , ac processione egimus in Commentario Historico de Sacramentis.

Probatum quoque fuit perpetuus mos Eucharistiam asservandi, ac eam ad infirmos deferendi. *Not.* Morem illum damnant Lutherani, quòd velint corpus Christi non esse in Eucharistiâ extra actuale illius usum, aut saltem (ut ipse Lutherus docuit) post peractam liturgiam.

Definitum fuit 3. statum gratiæ requiri in eo, qui accedit ad Eucharistiam. *Not.* Est contra Lutherum, cui placuit fidelem eò magis esse dispositum ad Eucharistiam, quòd plurimum criminum sibi conscius est. — Additum est eum, qui sibi conscius est alicujus peccati mortalis, non debere absque præmissâ sacramentali confessione ad Eucharistiam accedere. *Not.* 1. Dicit quidem *contra Lutheranos* requiri confessionem, sed non dicit eam satis esse. *Not.* 2. Cum ait necessitate urgente, sacerdotem lapsum, si non habeat copiam confessoris, posse absque præmissâ sacramentali confessione celebrare, loquitur de eo, cui incumbit animarum cura, & de casu, in quo hostiæ defectu, aliquis fidelis esset absque viatico moriturus, aut quo (si tamen non esset quæstio de externo peccato carnis, aut immani aliquo alio facinore, aut flagitio, aut de peccato ex consuetudine contracto) populus fidelis die festo dimitti deberet sine sacrificio. Vide quæ de hoc casu dicuntur tomo 6. ubi referuntur dispositiones ex parte sacerdotis ad celebrandam Missam requisitæ. *Not.* 3. Hæc verba, quæ synodus addit de sacerdote, qui peccati mortalis sibi conscius, celebravit absque præviâ confessione: *Quamprimum confiteatur*, non sunt consilium, sed strictum præceptum; quod quidem non urget tâtum pro eo tempore, quo sacerdos suo tempore celebraturus est, sed quamprimum, ita ut sine morâ teneatur confessarium quærere. Vide tomo 6. quæstionem de dispositionibus ad celebrandam Missam requisitis.

Post explicatam octo capitibus Catholicam de Eucharistiâ fidem, Concilium undecim Canoni-

nibus errores oppositos proscribit . In Canonem 111. *nota*, Dominicanos nullum non movisse lapidem, ut Concilium determinaret, totum Christum contineri sub singulis speciei partibus ante earum separationem; verum obstiterunt alii theologi. Concilium litem illam dirimere noluit, fat ei fuit definire id, in quo Catholici omnes conveniebant; nempè totum Christum esse sub singulis cujusq; speciei partibus, *separatione facta*.

Capita, quæ ad reformationem spectant, hæc sunt. 1. Prohibetur, ne in causis visitationis & correctionis, sive habilitatis & inhabilitatis, nec non in criminalibus, ante definitivam sententiam ab interlocutoriâ appelletur. *Not.* 1. Illi decreto Gallicana jura consentiunt, seu statuunt, effectum appellationis ab interlocutoriâ sententiâ non esse suspensivum, sed simpliciter devolutivum ad judicem ecclesiasticum superiorem. *Not.* 2. Excipi tamen debet casus, quo per interlocutoriam sententiam infertur damnum irreparabile, ut est pœna corporalis. 2. Episcopo fit facultas, ut tanquam Apostolicæ Sedis delegatus summarie cognoscat de gratiis, quibus peccatum remittitur, aut pœna. *Not.* Cautio illa non est necessaria in Galliis; neque enim admittitur pœnæ remissio, nisi inferioris judicis sententia per sententiam superioris Canonicè rescissâ fuerit. 3. Prohibetur, ne Episcopus personaliter citetur, nisi ob causas, propter quas deponi posset. *Not.* Id decretum est, ut consulatur, tum episcopali dignitati, tum residentiæ, quæ plerumque à malevolis impediretur. 4. Definatur, causas de Episcoporum personis ad Pontificem maximum referri debere, ac coram ipso terminari. *Not.* Varia variis temporibus fuit circa judicia de Episcopis disciplina. In Galliis Episcoporum causæ majores referuntur quidem ad Romanum Pontificem, sed in regno à duodecim vicinioribus Episcopis ab ipso Romano Pontifice designatis terminantur.

De actis Sessionis XIV.

Sessione XIV. actum est de pœnitentiæ & extremæ unctionis sacramentis.

Definitum fuit 1. pœnitentiam esse sacramentum à Christo post resurrectionem institutum. *Not.* Est contra Zuinglium & Calvinum. ---- Additum est, in illius institutione Christum sacerdotibus dedisse potestatem remittendi & retinendi peccata. *Not.* Est contra Lutherum, qui contendit, absolutionem esse sententiam merè declaratoriam remissi per fidem peccati. ---- Assertum est quoque, Novatianos idèò damnatos fuisse, quòd eam potestatem in Ecclesiâ non agnoscerent. *Not.* Eo sensu intelligi debet assertio, quòd Novatiani aliquorum tantùm criminum, non autem omnium, remittendorum potestatem in Ecclesiâ non agnoverint.

Definitum fuit 2. pœnitentiæ sacramentum esse lapsis post baptismum ad salutem necessarium, ut est nondum regeneratis ipse baptismus. *Not.* Contrarium docuerunt omnes hæretici sæculi proximè elapsi. ---- Additum est, per pœnitentiæ sacramentum lapsum non pervenire ad acceptam per baptismum novitatem & integritatem sine magnis fletibus & magnis doloribus. *Not.* Falsò quidam eam novitatem, eam integritatem interpretantur de solâ pœnæ temporalis remissione, quam Catechumenus in baptismo consequitur. Nam Scriptura & Patres fletus & labores præscripserunt non hominibus justis, à quibus sola pœna temporalis Deo esset persolvenda, sed lapsis ac jacentibus in peccato: *Facite fructus dignos pœnitentiæ*. Præterea si fletus & dolores ad remissionem pœnæ temporalis requirantur, à fortiori requiruntur pro remissione culpæ, ac pœnæ æternæ. Vide Augustinum in Psalm. 6. & 106. Hincque colligitur, lapsum non ita faciliè converti, ut nonnulli arbitrantur.

De-

Definitum fuit 3. formam sacramenti pœnitentiæ in his ministri verbis: *Ego te absolvo, &c.* positam esse. *Not. 1.* Apud Græcos absolutio modo deprecativo exprimitur. *Not. 2.* Reticentia, &c. intelligitur de expressâ invocatione SS. Trinitatis: *In nomine Patris, & Filii, & Spiritus sancti*; an autem requiratur, ut absolutio valeat, Concilium definire noluit.

Definitum fuit 4. pœnitentis actus, contritionem, confessionem, & satisfactionem, esse quasi materiam hujus sacramenti. *Not. 1.* Scotistæ locum illum interpretantur de materiâ circa quam, seu volunt, contritionem & confessionem ideò vocari quasi materiam, quòd sint dispositiones ad recipiendum sacramenti effectum requisitæ; è contra Thomistæ interpretantur de materiâ ex qua, quæ tamen dicitur quasi materia, quòd non, sicut in aliis sacramentis, physicè sit extra recipientem. *Not. 2.* Concilium non aliud voluit, quàm damnare Lutheranos, qui nec contritionem, nec confessionem, nec satisfactionem requirebant ad lapsi justificationem.

Definitum fuit 5. Contritionem includere dolorem ac detestationem de peccato commisso cum proposito non peccandi de cætero. *Not.* Lutherus solum vitæ novæ propositum requirebat, abutens hoc Patrum effato: *Optima pœnitentia, nova vita*. ---- Additum est, contritionem quovis tempore ad impetrandam veniam peccatorum fuisse necessariam. *Not.* Contritio quovis tempore necessaria est, contritio concepta ex inchoatâ saltem charitate: cum ergo Concilium cap. 3. asseruerit, eam contritionem esse quasi materiam sacramenti pœnitentiæ, sequitur, cum sacramento pœnitentiæ requiri contritionem, quæ ex inchoatâ saltem Dei charitate super omnia concepta sit. ---- Deindè Concilium proponit divisionem contritionis in perfectam & imperfectam. *Not. 1.* Dubium est, an duplex illa contritio specificè differat, seu
utrum

utrum habeat diversum motivum præcipuum. Nonnulli contendunt, utramque præcipuè concipi ex charitate Dei super omnia; differre verò tantum secundum majorem, vel minorem numerum graduum charitatis. *Not. 2.* Non conveniunt authores circa sensum horum Concilii verborum: *Hominemque Deo reconciliare, priusquam hoc sacramentum actu recipiatur.* Estius non vult id semper fieri, sed aliquando tantum, unde apud illum hæc est textus Concilii constructio: *Docet, etsi contritionem hanc aliquando charitate perfectam esse contingat, hominemque aliquando reconciliare, priusquam hoc sacramentum actu suscipiatur.* Alii è contra volunt hominem semper, seu etiam extra necessitatis casum, justificari per contritionem charitate perfectam; si tamen, ut supponitur, cum voto sacramenti conjuncta sit. Quid nos de eâ controversiâ sentiamus, fusè explicuimus in Commentario Historico pag. 534. & sequentibus. *Not. 3.* Circa hoc verbum *Disponit*, quod imperfectæ contritioni tribuitur, variant sententiæ. Nonnulli volunt, ipsum intelligi de dispositione proximâ, seu, quæ satis sit ad gratiam in sacramento pœnitentiæ recipiendam; idque (aiunt aliqui) quòd per imperfectam contritionem Concilium eò loci intelligat eam, quæ ex charitate, licèt inchoatâ tantum, præcipuè concipitur; idque etiam (aiunt alii) licèt nomine contritionis Concilium intelligat dolorem ex solo pœnarum metu conceptum. Vide nostram de eo argumento dissertationem in Commentario Historico pag. 543. & sequentibus. Hic satis sit observare, decreti confectores primùm scripsisse *Sufficit*, sed Patres in Congregatione generali jussurunt deleri *Sufficit*, ac substitui *Disponit*. Vide Palavicinum in hunc locum.

Definitum fuit 6. integram apud sacerdotem peccatorum confessionem lapsis necessitate mediæ necessariam esse ad justitiam consequendam.

dam . Not. Est contra Lutherum & Calvinum. — Additum est, omnia peccata mortalia declarari debere . Not. Lutherus voluit aliqua declarari debere, & quidem publicè tantùm, tum ad humilitatem, tum ad populi fidelis ædificationem . — Declaratum est, accusandas esse circumstantias, quæ peccati speciem mutant, nec immeritò; siquidem actus, in quo reperitur circumstantia mutans peccati speciem, duplex peccatum includit . Not. Concilium idem non dicit quidem expressè de circumstantiis multùm intra eandem speciem aggravantibus, quòd id controversum sit inter Catholicos: sed ratio, quæ utitur cap. 8. ut probet, sacerdotem teneri proportionatam peccatis satisfactionem injungere, probat quoque, pœnitentem teneri circumstantias, de quibus agitur, confiteri .

Definitum fuit 6. non ad omnes Christi fideles, sed ad solos Episcopos & sacerdotes, hæc Christi verba : *Quorum remiseritis peccata, &c.* spectare . Not. 1. Lutherus ratus ea verba non aliud importare, quàm potestatem declarandi peccatum remissum esse credenti, contrarium senserat . Not. 2. Concilium in ministro præter potestatem ordinis & jurisdictionis, non aliam intentionem requirere videtur, quàm quæ opponitur mimicæ ac jocosæ : *Atque adeò* (inquit) *non debet pœnitens* (ut putarat Lutherus) *adeò sibi de sua ipsius fide blandiri, ut etiamsi nulla illi adsit contritio, aut sacerdoti animus seriò agendi & verè absolvendi desit, putet tamen se propter suam solam fidem, verè & coram Deo esse absolutum .*

Definitum fuit 7. in ministro pœnitentiæ præter potestatem ordinis requiri jurisdictionem; Episcopos posse sibi nonnullos casus reservare; ita tamen, ut in articulo mortis nulla sit reservatio . Not. Nonnulli censent, Concilium loqui solùm de ministris Catholicis, sed obstant hi generales termini, quibus idem Concilium utitur : *Atq; adeò*

om-

omnes sacerdotes quoslibet pœnitentes à quibusvis peccatis & censuris absolvere possunt.

Definitum fuit 8. totam pœnam cum culpâ per pœnitentiam non remitti. *Not.* Contrarium visum est omnibus recentioribus novatoribus. Hinc Concilium conclusit, jure divino niti praxim confessis ac contritis, ac absolutis imponendi satisfactionem. Cum autem ex justitiâ petatur illud debitum, conclusit iterum, eam satisfactionem debere esse proportionatam cum gravitate criminum. *Not.* 1. Peccant igitur ministri, qui leves admodum pœnas pro gravibus criminibus imponunt. *Not.* 2. Ut satisfactio sit proportionata, debet id in pœnitentibus operari, quod ibidem Concilium exigit.

Iis, quæ spectant ad pœnitentiæ sacramentum, Concilium ea subjungit, quæ pertinent ad Extremam-Unionem.

Definit 1. eam esse sacramentum propriè dictum. *Not.* 1. Rejicitur à Luthero & Calvino. *Not.* 2. Concilium non definit eam à Christo *immediatè* institutam fuisse; unde cum decreti confectores loco istius vocis, *Insinuatam apud Marcum*, istam inseruissent, *Institutam*, Patres in congregatione generali probarunt decretum, ut nunc legitur. *Not.* 3. Licet Concilium in oleo, quod est hujus sacramenti materia, requirat episcopalem benedictionem, non definit tamen eam esse *jure divino* necessariam; unde plures theologi docent eam solo Ecclesiastico jure requiri. *Not.* 4. Idèd Concilium, dum loquitur de hujus sacramenti formâ, reticentiâ, &c. utitur, quòd noluerit definire scholasticam quæstionem, utrùm omnia verba, ex quibus constat, requirantur, ut sacramentum valeat.

Definit 2. Extremam-Unionem delicta, ac peccati reliquias abstergere, alleviare animam ægroti, & corporis sanitatem interdum conferre, ubi salutî animæ expedierit. *Not.* 1. Per hanc vocem *Delicta*, Sambovius intelligit non tantum pec-

peccata venialia, sed etiam lethalia; atq; quòd, cum extrema unctio sit sacramenti poenitentiae veluti pars consummativa, non tantum *per accidens*, sed etiam *per se*, peccata lethalia dimittat, primamque gratiam conferat. *Not. 2.* Non definit Concilium, an hoc sacramentum corporis sanitatem conferat ex opere operato, an verò opere operantis tantum. Utraque sententia theologorum disputationi permittitur. *Not. 3.* Concilium non definit corporis sanitatem per extremam-unctionem conferri *semper*, etiam ubi animae salutis expedierit; sed *interdum* tantum. Vide Estium in 4. sentent.

Definit 3. hujus sacramenti ministros esse presbyteros. *Not. 1.* Concilium ait presbyterorum nomine intelligi ministros, qui *rite ordinati fuerint per impositionem manuum presbyterii*; hinc plures theologi concludunt impositionem manuum esse solam materiam essentialem presbyteratus. --- Additum est *infirmis* extremam-unctionem conferri debere. *Not. 1.* Non dicit, quòd *solis infirmis* conferri debeat, unde non damnat apertè praxim Græcorum, qui eam etiam sanis hominibus conferunt. --- *Not. 2.* Modus loquendi, quo utitur, innuit non in eodem infirmitatis statu, sed in diverso tantum, iterari debere extremam-unctionem. Vide Canones, quibus Concilium proscribit errores mox allatis definitionibus oppositos.

Ubi Concilium in hâc sessione XIV. ea definiit, quæ ad fidem spectant, agit de reformatione.

Et quidem *primò*, qui prohibentur, etiam ob occultum crimen, ascendere ad ordines, si ascendant, puniri debent, nullaque eis licentia de se promoveri faciendo suffragari potest. *Not. 1.* Illud decretum locum habet etiam in iis, qui sunt arctati propter beneficium seu, Ordinarius, ex causâ, cujus ipse judex est, potest ab Ordinibus arcere Clericum, cui collatum est beneficiũ
ha-

habens annexam animarum curam. *Not. 2.* Quod Episcopus potest respectu ordinum, id etiam potest ratione primæ tonsuræ, seu potest negare primam tonsuram cuilibet laico, nec ex illâ negatione provocari potest ad tribunal alicujus judicis superioris.

Secundò, Episcopis titularibus sub pœnâ suspensionis per annum ab exercitio Pontificalium, prohibetur, ne alienum subditum, imò nec familiarem suum, ad Ordines, ipsam etiam primam tonsuram, etiam in loco, qui nullius sit diœcesis, sine proprii Episcopi litteris commendatitiis promoveant. *Not.* Vide Innocentii Papæ XII. constitutionem, quam harum institutionum tom. 6. inseruimus.

Tertiò, Clericis, qui aut in sacris Ordinibus constituti sunt, aut ecclesiastica beneficia possident, præscribitur, ut utantur veste ordini, ac dignitati congruente. *Not. 1.* Quænam vestis cuique ordini, ac dignitati congruat, Episcopi est determinare; *juxta ipsius Episcopi ordinationem & mandatum*, verba sunt ipsiusmet Concilii. *Not. 2.* Nomine beneficiorum, de quibus Concilium loquitur, non debent tantùm intelligi ea, quibus animarum cura annexa est; sed omnia, cujuscunque sint generis ac speciei: *Aut* (inquit Concilium) *beneficia qualiacunque Ecclesiastica obtinerint.*

Quartò, Prohibetur, ne voluntarii homicidæ aliquando ordinentur; aut si jam sunt ordinati, Concilium jubet, ut à ministerio separentur, ac omnibus beneficiis careant. E contrà ei, qui homicidium casu commisit, aut vim vi repellendo, vult ut dispensatio concedatur, resq; Ordinatio, aut ex causâ, Metropolitano, seu viciniore Episcopo committatur, qui nonnisi causâ cognitâ ac probatis precibus dispenses. *Not. 1.* Canon complectitur non tantùm homicidium publicum, sed illud etiam, quod est prorsus occultum. *Not. 2.* Homicidium casuale tunc tantùm

parit irregularitatem, cum oritur ex negligentia; illud enim, quod post moralem diligentiam adhibitam ab eo fit, qui rei illicitæ non vacabat, irregularitatem non parit. *Not. 3.* In Galliis beneficia Clerici, qui incidit in homicidium voluntarium, non censentur vacare ante juridicam sententiam iudicis.

Quintò, translati ad alium ordinem, in clauetro sub obedientia manere debent, & beneficiorum sæcularium incapaces existunt. *Not. 1.* Eo Canone iis itum est obviam, qui ut suæ religionis jugum excuterent, sub libertatis spe ad alias religiones translationem obtinere conabantur. *Not. 2.* Attendant ad eam regulam Prælati regulares, qui tam facile translatis indulgent, ut extra Monasterium divagentur.

Sextò, decernitur, ut jus patronatus nemo, nisi ex fundatione, vel dotatione obtineat; ediciturque præsentatus, ab alio, quàm ab ordinario instituatur. *Not. 1.* Id non intelligitur de quibusdam capellaniis, quæ propriè non sunt beneficia, sed meræ Missarum commissiones. *Not. 2.* Quomodo probandum sit jus patronatus, edicitur sess. 25. cap. 9. de reformatione.

De Actis Sessionis XV.

Sessio decima quinta, & aliæ usque ad vigesimam primam exclusivè, nihil aliud sunt, quàm sessionum prorogationes, tum in gratiam protestantium Germanorum, quorum adventus de die in diem expectabatur, tum in gratiam Episcoporum Gallorum, qui ingenti numero Tridentum accessuri erant.

De Actis Sessionis XXI.

Sessione 21. quæ habitæ est die 16. Julii anno 1562. actum est de communione sub utraq; specie, & de communione parvulorum.

De-

Definitum fuit 1. laicos & clericos non conficientes, non adstringi jure divino ad communionem sub utrâque specie. *Not.* 1. Est contra Lutheranos & Calvinistas, quorum errorem Canon prior expressius proscribit. *Not.* 2. Licet Concilium, sextum Joannis caput applicet Eucharistiæ, non definit tamen, quòd de eâ debeat intelligi: *Vscumque* (inquit) *juxta varias sanctorum Patrum & Doctorum interpretationes intelligatur.*

Definitum fuit 2. justis de causis ab Ecclesiâ abrogatam fuisse consuetudinem communicandi sub utrâque specie. *Not.* 1. Desit ea consuetudo labente sæculo 12. *Not.* 2. Concilium asserit, niti eam abrogationem potestate, quæ divinitus Ecclesiæ circa sacramentorum dispensationem concessa est, *salvatamen illorum substantia*; cum quibus quidem verbis vix conciliari potest sententia theologorum, qui contendunt omnium, ac singulorum sacramentorum materias & formas jam non esse easdem secundum speciem, ac erant antiquitus.

Definitum fuit 3. nullâ gratiâ ad salutem *necessaria* eos defraudari, qui sub unâ tantum specie communicant. *Not.* Non dicit Concilium, quòd ii, qui sub unâ tantum specie communicant, non minus gratiæ recipiant, quàm qui sub duplici; sed tantum asserit, eos per unius speciei subtractionem non defraudari aliquâ gratiâ *ad salutem necessaria*, quâ Lutherani eos defraudari contendebant.

Definitum fuit 4. parvulos nullâ obligari necessitate ad Eucharistiæ communionem; Patres qui eam eis tribuerunt, culpari non debere. *Not.* Lutherani & alii hæretici id eis vitio vertunt, sed quàm immeritò, vide harum institutionum tom. 6.

Quæ sessione 21. de reformatione decreta sunt, ad subsequencia capita reducuntur.

Edicitur 1. ut Episcopi gratis ordines conf-

ferant, concedantque dimissorias & testimoniales litteras . *Not.* 1. Tolluntur omnes prætexus ; quippè statuitur nec pro sigillo , nec aliâ quâcumque de causâ , aliquid , etiam spontè oblatum, accipi posse . *Not.* 2. Notariis tamen indulgetur, ut decimam aurei partem accipiant ; sed tribus suppositis conditionibus, scilicet dummodò eis nullum salarium ab Episcopo constitutum sit ; dummodò non sint in locis, in quibus viget laudabilis consuetudo nihil accipiendi ; dummodò tandem Episcopis ex notarii commodis aliquod emolumentum directè, vel indirectè provenire non possit . *Not.* 3. Concilium asserit contrarias illi decreto consuetudines esse abusus & corruptelas simoniacæ pravitati faventes. *Not.* 4. Cum eo Synodi decreto concilient Episcopi, si possint, praxim notariorum suorum . *Not.* 5. Hæc clausula, *In locis ubi viget laudabilis consuetudo nihil accipiendi* , inserta est ad Episcoporum Gal-
lorum petitionem .

Edicatur 2. ne quis sine beneficii, aut patrimonii titulo ad sacros Ordines promoveatur . *Not.* 1. Potest Episcopus absque titulo ordinare , sed tunc tenetur ordinato alimenta præstare . *Not.* 2. Eorum respectu, qui sub ficto titulo ordinantur , innovantur antiquorum Canonum pænæ . Hæ autem pænæ sunt hæ, quæ in decreto Gratiani continentur ; ac proindè irregularitatem complectuntur : unde incurritur iis in locis, ubi promulgatum est Concilium Tridentinum ; non autem in iis, in quibus non est promulgatum , aut in quibus speciales eâ de re leges editæ non fuerunt .

Edicatur 3. ut quotidianæ distributiones au-
geantur per tertiæ partis detractiōem ex pro-
ventibus dignitatum , Canonicatum , portio-
num & officiorum . *Not.* 1. Id locum habet tan-
tùm in Ecclesiis Cathedralibus & Collegiatis ;
earum enim tantùm Concilium in suo decreto
meminit . *Not.* 2. Vim non habet in dignitati-
bus;

422 Instit. Theolog. Prolegomena.

bus, quæ licet locum habeant in Choro, nullas tamen distributiones percipiunt. *Not.* 3. Non uni, aut duabus tantum horis, sed omnibus, servatâ proportionem, applicari debet ea, de quâ agitur, fructuum detractio.

Edicitur 4. Episcopos posse facere uniones perpetuas in casibus à jure permissis. *Not.* 1. Tres sunt casus, in quibus id licet; nempe cum multum crevit populus; cum ingens est locorum distantia; cum Ecclesiæ ita pauperes sunt, ut aliorum rectorum sustentationi satis esse non possint. *Not.* 2. Id habet locum etiam in Parochiis, quarum rectores sunt regulares; modò tamen fiat sine obtinentium præjudicio.

Edicitur 5. ut Monasteria commendata, in quibus non viget regularis observantia, & beneficia quæcumque quotannis ab Ordinario visitentur; ut Quæstorum tum nomen, tum officium aboleantur. *Not.* Quæstores erant ii, quibus committebatur indulgentiarum promulgatio, quique colligebant eleemosynas, quas erogabant ii, quibus indulgentiæ concedebantur.

De actis Sessionis XXII.

Sessione XXII. proposita, ac explicata est Ecclesiæ doctrina; proscripti quoque fuerunt hæreticorum errores de Missæ sacrificio.

Definitum fuit 1. Christum sub speciebus panis & vini corpus & sanguinem suum Deo Patri obtulisse, ac Apostolis, quos tunc novi testamenti sacerdotes constituerebat, ut ea sub earundem rerum symbolis offerrent, præcepisse. *Not.* 1. Non eo sensu Christus, tunc Apostolos novi testamenti sacerdotes constituit, quòd sacerdotii sacramentum eis contulerit; neque enim usus est signis sensibilibus, quibus sacramentum essentialiter constat; sed quòd ordinis potestatem, non collato tamen ipsomet ordine, eis tradiderit. *Not.* 2. Concilium asserit, celebrato veteri Pascha, Christum insti-

instituisse novum, cujus illud erat figura; hincq; concluditur, Christum, eo quo passus est anno, Paschalem Agnum comedisse. Parùm verò theologicè, (ne quid dicam duriùs) locutus est quidam recentior, qui ut solvat illum Concilii locum objectum sibi contra sententiam, quã asserit, Christum non manducasse Agnum Paschalem anno quo mortuus est, respondet, eandem non deberi fidem capitibus, quibus Concilium doctrinam proponit, quæ debetur Canonibus, quibus damnantur hæreticorum errores: Quasi verò Ecclesia minùs sit infallibilis in tradendâ veritate, quàm in damnandis erroribus. Prætereà author ille cum suâ responsione conciliet, si possit, hæc Synodi verba, quæ habentur in præmio, quod præfigitur capitibus de justificatione: *Intendit omnibus Christi fidelibus veram, sanamque doctrinam ipse justificationis, quam Sol justitiæ Christus Iesus docuit, Apostoli tradiderunt, & Catholica Ecclesia, Spiritu sancto suggerente, perpetuò retinuit; districtiùs inhibendo, ne deinceps audeat quisquam aliter credere, prædicare aut docere, quàm præsentis decreto statuit, ac declarat.*

Definitum fuit 2. Eucharistiam esse visibile sacrificium propitiatorium pro vivis & defunctis. *Not. 1.* In hoc posita est hujus sacrificii propitiatio, quòd per illud cruenti in cruce sacrificii merita nobis applicentur: tantùm abest, ut illi (prout Luthero visum est) per istud quovis modo derogetur. *Not. 2.* Ex eo, quòd Missæ sacrificium per modum propitiationis suum effectum producat, plures theologi concludunt, ipsum non agere ex opere operato, sed tantùm ex opere operantis, ratione nimirum dispositionis fidelium, qui se ei præsentem sistunt. Vide in hunc locum Commentarium Historicum de sacramentis. *Not. 3.* Contritio, quam Concilium requirit, ut quis aliquem fructum colligat ex Missæ sacrificio, non est contritio super omnia; nempè ex ipso Concilio, via est, quã pœnitentiæ donum obtinetur. Hincque

colligitur, eum non sine fructu sistere se præsentem sacrificio, qui dominante peccati amore implicatus, Missæ adest, ut obtineat auxilium, per quod illo dominante peccati amore liberetur.

Definitum fuit 3. Missam offerri quidem in honorem sanctorum, non autem ipsismet sanctis, sed Deo soli. *Not.* Lutherani contrarium Catholicis imponebant. — Probatum est postea Missæ Canon. *Not.* Lutherus ab illo expunxit verba omnia, quibus innui potest, Missam esse verè, ac propriè dictum sacrificium. — Commendatæ sunt solemnes Missæ sacrificii ceremoniæ. *Not.* Quasdam Lutherus in suâ liturgiâ retinuit, sed omnes à Calvinistis rejiciuntur. — Probatum quoque fuit usus Missarum, in quibus solus sacerdos communicat. *Not.* Lutherus eas proscripserat, non advertens eas Missas verè esse communes, eò quòd à publico Ecclesiæ ministro non pro se tantum, sed pro omnibus fidelibus, qui ad Christi corpus pertinent, celebrentur. — Confirmatus quoque fuit usus miscendi aquam cum vino in Calice offerendo. *Not. 1.* Concilium dicit, præceptum esse ab Ecclesiâ. Igitur non divini, sed humani juris est illud præceptum. *Not. 2.* An illa aqua in Christi sanguinem muteatur, an verò in propriâ specie remaneat, non est in Concilio definitum.

Ubi sacra Synodus Ecclesiæ de Eucharistiæ sacrificio fidem exposuit, subjicit decretum de observandis & evitandis in celebratione Missæ. In eo autem decreto jubet Episcopis, ut curent è medio tollere, quæ in Missæ celebrationem, vel avaritia, vel irreverentia, vel superstitio invexerunt. Et quidem quod ad avaritiam pertinet, prohiberi vult cujusvis generis mercedum conditiones, pacta, & quidquid pro Missis novis celebrandis datur; nec non importunas, atque illiberales elemosynarum exactiones. *Not. 1.* Lutherani corruptelas hujusmodi, quas quorumdam cupiditas invexerat, Ecclesiæ Catholicæ tribuebant. *Not. 2.*

Per

Per ea decreti verba non prohibentur spontaneæ eleemosynæ, quæ à fidelibus offeruntur, aut intra Missarum solemnias, aut extra, ad sacerdotalis sustentationis subsidium; sed tantum illæ eleemosynarum exactiones, aut pacta, quæ mercedum conditionem redoleant. Vide quæ de sacramento Eucharistiæ agentes diximus de Missarum stipendiis.

Quod autem spectat ad irreverentiam, idem decretum vetat, ne cui vago & ignoto sacerdoti Missas celebrare liceat. *Not.* Parisiis nemo sacerdos admittitur ad Missæ celebrationem, nisi specialem Archiepiscopi Parisiensis licentiam scripto probet. — Vetat iterum, ne is, qui publicè & notoriè criminofus est, sacris interesse permittatur. *Not.* Non est Parochi, sed Episcopi, publicè ac notoriè criminofos, qui per specialem denuntiationem non sint excommunicati, è templis, cum Missæ sacrificium offertur, expellere. — Vetat quoq; ne Episcopi patiantur Missam celebrari privatis in domibus, & extra oratoria ab eisdem Episcopis visitanda. *Not.* Decretum non aufert ab Episcopo potestatem concedendi facultatem in aliquibus casibus celebrandi extra Ecclesiam in Altari portatili. Quæ à Romano Pontifice obtinetur facultas ad celebrandum in oratorio privato, vim non habet, nisi postquam ordinarius de non subreptione judicaverit. — Vetat præterea, ne peragatur Missæ sacrificium, nisi prius, qui intersunt, decenter cõposito corporis habitu, declaraverint se mente etiam, ac devoto cordis affectu, non solum corpore adesse. *Not.* 1. Authores qui censent ab eo, qui voluntarias patitur evagationes mentis, fieri satis ecclesiastico de audiendâ Missâ præcepto, concilient, si possint, suam sententiam cum mox relatis Concilii verbis. *Not.* 2. Sacerdos, qui nondum consecravit, debet ex Altari recedere, si ii, qui immodestiam præferunt, ac confabulantur, sese ad modestiam post debitas monitiones non se com-

ponant. --- Vetat tandem, ne adhibeatur musica, ubi sive organo, sive cantu lascivum, aut impurum aliquid miscetur. *Not.* Nonnunquam canuntur quidem res sacræ, sed quæ ex certâ vocis modulatione cor ad lasciviam emolliunt: eam igitur vocis, aut instrumenti modulationem ab Ecclesiæ cantu Concilium vult ablegari.

Quod pertinet ad superstitionem, Concilium caveri vult, ne sacerdotes aliis, quàm debitis horis celebrent; ne alias ceremonias aut preces in Missarum celebratione adhibeant, præter eas, quæ ab Ecclesiâ probatæ sunt. *Not.* Hora Missæ celebrationi destinata, est ab aurorâ, seu ab eo instanti, quo prima solis irradiatio aerem perfundit, ad meridiem usque. Parisiis, ex decreto illustrissimi Archiepiscopi, presbyteris non licet Missam incipere post meridiem: si tamen cœpta fuerit, perficere debent. --- Vult quoque à divino cultu ablegari quarundam Missarum, & candelarum certum numerum. *Not.* Non prohibetur tamen numerus novem Missarum, qui à populis exigi solet à sacerdote, modò exigens non putet, illi præcisè numero alligatam esse virtutem, quam sperat se ex sacrificio consecuturum. --- Tandem fidelem populum moneri vult, ut frequenter ad suas parochias, saltem diebus Dominicis, & majoribus festis accedat. *Not.* Vox illa, *Moneant*, præceptum non autem consilium indicat. Confirmaturque ex eo, quòd sacra Synodus ibidem jubeat, ut Episcopus populum fidelem ad frequentandam parochiam censuris Ecclesiasticis compellat.

Iis traditis, quæ ad Missæ sacrificium pertinent, concilium progreditur ad capita, quibus reformatio continetur. *Primò*, veteres de vitâ & honestate clericorum canones innovantur. *Not.* Igitur Concilium choreis, lusibus, luxu, negotiis sæcularibus, venatione, meritò clericos interdicit, cum ea omnia antiquis canonibus prohibeantur. *Secundò*, præscribitur, ut ad cathedrales Ecclesias assumendi, præter morum probitatem, hujusmodi scien-

scientiâ polleant, quâ muneris sibi injungendi necessitati possint satisfacere. *Not.* Graviter igitur peccant, qui cum ignorantia, in quâ versantur, conscii sint, Episcopatum tamen, aut ambiunt, aut sibi delatum suscipiunt. *Tertio*, prohibetur ne Subdiaconatu non initiatus suffragium ferat in Ecclesiis cathedralibus, aut collegiatis. *Not.* Decanus, aut quivis alius cui jurisdictio competit, si non sit subdiaconus, potest quidem convocare capitulum ac ei præesse, sed non potest de re propositâ ferre judicium decisivum. *Quarto*, præscribitur, ut ii qui in dictis Ecclesiis obtinent beneficia, quibus onera varia sunt annexa, infra annum ordines suscipiant requisitos. *Not.* Viri quidam nobiles qui ferè nusquam ordines sacros suscipiunt, quamvis fruantur canonicatibus quibus annexum est onus Missam ordine suo canendi, cum eo, si possint, Synodi decreto suam praxim concilient. Nec enim excusantur, quòd suas eà de re partes aliis committant: nempe Concilium jubet Episcopis, ut eos cogant diebus statutis sua officia per se ipsos exercere. *Quinto*. Committuntur locorum ordinariis dispensationes obtentæ in curiâ, ut ab eo examinentur. *Not.* 1. Per locorum Ordinarios hîc non intelliguntur soli Episcopi, sed quicumque alii prælati habentes jurisditionem quasi Episcopalem ac proprium districtum. *Not.* 2. An propter falsi narrationem subreptitiæ sint ejusmodi dispensationes, summarie & extrajudicialiter, citatis tamen partibus, cognoscere debent. *Sexto*, præscribitur, ut ad commutandas ultimas voluntates adsit justa & necessaria causa. *Not.* 1. Utraque conditio copulativè requiritur. Justa verò ac necessaria est causa, cum legata pecunia ad usum à defuncto præscriptum non sufficit; cum onus legatâ pecuniâ præscriptum adimpleri non potest; cum, si tamen consentiat hæres, sit alius utilior pecuniæ usus. *Not.* 2. Eam facultatem Concilium Episcopis tribuit tanquam ab apostolicâ sede delegatis, sed in Galliis id juris habent

428 Instit. Theolog. Prolegomena.

Ordinarii jure. *Septimò*, decernitur, ut locorum ordinarii quæcumque pia loca visitent. *Not.* Id intelligitur de hospitalibus, collegiis, ac laicorum confraternitatibus, etiamsi apud exemptos erectæ sint. *Octavò*, Notarii, etiam auctoritate regiâ creati, episcoporum examini & judicio subjiciuntur. *Not.* Decretum illud locum non habet in Galliis; nempe officiales regiâ auctoritate creati, ab Episcopis non pendent in iis, quæ pertinent ad officium suum exercendum. *Nonò*. Bonorum cujuscunque Ecclesiæ, aut pii loci occupatores, anathemati subjiciuntur, ipsoque facto privantur jure patronatus, si illud possideant. *Not.* Statutum quoad ultimam partem non obtinet in Galliis. *Decimò*, Clerici qui nefandæ fraudis & usurpationis fabricatores, seu consentientes fuerint, iisdem pœnis subjiciuntur, suisque beneficiis spoliuntur. *Not.* Id locum non habet in Galliis, nisi post juridicam ecclesiastici judicis sententiam.

De actis Sessionis XXIII.

Sessione XXIII. actum est de sacerdotio novæ legis. *Primò*, definitum est ipsum à Christo institutum fuisse, ac complecti potestatem consecrandi, offerendi & ministrandi corpus & sanguinem Christi, nec non peccata dimittendi & retinendi. *Not.* Isti sessioni ac aliis ad finem usque Concilii celebratis adfuerunt Gallicani, tum Episcopi, tum Theologi, qui cum Cardinale à Lotharingiâ Tridentum à Carolo IX. Francorum rege missi fuerant.

Definitum fuit *secundò*, esse septem Ordines quorum tres dicuntur majores, alii verò quatuor, minores. *Not.* I. Concilium non obscure innuit, Diaconatum (contra quod asseruit Durandus) esse ex institutione divinâ, cum ait Sacras Scripturas de diaconis apertam mentionem facere, & quæ maximè in illorum ordina-
tio-

tione attendenda sunt, gravissimis verbis docere. *Not. 2.* Concilium non definit, quatuor esse minores Ordines, tum in Orientali, tum in Occidentali Ecclesia; nempè certum est, solum lectoratum, ex quatuor minoribus à mille & amplius annis in usu esse apud Græcos. *Not. 3.* Non definitur quoque, nec plures, nec pauciores esse, quàm septem Ordines; unde non damnantur ii, qui contendunt Episcopatum esse Ordinem & sacramentum à cæteris Ordinibus distinctum.

Definitum fuit *tersiò*, Ordinem verè esse sacramentum. *Not. 1.* Lutherus contrarium censuit. *Not. 2.* Licèt fide certum sit, Ordinem esse sacramentum propriè dictum; non est tamen de fide, id singulis in specie Ordinibus convenire. *Not. 3.* Ut Concilium probet sacram Ordinationem, quæ verbis & signis exterioribus perficitur, esse verè sacramentum, laudat locum primæ ad Timoth. 4. ubi dicitur, gratiam dari per manuum impositionem; innuit igitur, manuum impositionem esse essentialè sacramenti Ordinis materiam.

Definitum fuit *quartò*, in sacramento Ordinis imprimi characterem; hincque Concilium concludit, temporariam non esse potestatem sacerdotum novi testamenti. *Not.* Non dicitur simpliciter characterem in Ordine imprimi, sed in sacramento Ordinis; nec immeritò, nempè cum dubium sit, an quilibet Ordo sit sacramentum, dubium est quoque, an per quemlibet character imprimatur.

Definitum fuit *quintò*, Episcopos, inter cæteros ecclesiasticos gradus ad ordinem hierarchicum præcipuè pertinere. *Not.* Cum, ex Canone VI. hierarchia, quæ est in Ecclesiâ, divinâ ordinatione sit instituta, sequitur necessariò Episcopos esse ex institutione divinâ. — Additum est eos esse presbyteris superiores. *Not. 1.* Est contra Lutheranos & Calvinistas, qui presbyteros cum Episcopis confundebant. *Not. 2.* Superioritas illa

est, tum ratione Ordinis, scilicet Episcopi ex vi Ordinis Episcopalis, præ presbyteris habent potestatem confirmandi & ordinandi; tum ratione jurisdictionis, siue gratiosæ, siue contentiosæ. *Not.* 3. An superioritas ratione jurisdictionis Episcopis conveniat jure divino immediatè accepto à Christo, disceptatum est in congregationibus, quæ sessionem præcellerunt; verùm licèt major, tum Theologorum, tum Episcoporum, pars judicaret, superioritatem jurisdictionis jure divino immediatè accepto à Christo, Episcopis convenire; tamen quòd nonnulli contradicerent, Concilium ab eà quæstione dirimendâ temperavit.

Definitum fuit *sextò*, in ordinatione episcoporum, sacerdotum & cæterorum Ordinum, nec populi, nec cujusvis sæcularis potestatis, & magistratûs consensum, siue vocationem, siue auctoritatem, ita requiri, ut sine eâ irrita sit ordinatio. *Not.* Aliquibus sæculis requisitum quidem fuit ad ministrorum ordinationem populi consensus, sed ea conditio non divini, sed humani juris erat; nec illius defectu irrita erat potestas Ordinis, sed jurisdictionis tantùm. --- Decretum est præterea eos, qui à populo tantùm, aut sæculari potestate, ac magistratu vocati & instituti, ad sacra ministeria exercenda ascendunt, non Ecclesiæ ministros, sed fures & latrones habendos esse. *Not.* Est contra Lutherum, aliosq; sectarios, qui non ex Ecclesiæ ministris, sed ex magistratûs sæcularis vocatione & auctoritate suam missionem habuerunt.

Ubi Concilium tradidit veram Ecclesiæ fidem de Ordinis sacramento, errores hæreticorum octo Canonibus proscribit. In quartum Canonem *notandum est*, hæc verba: *Ac proinde frustra Episcopos dicere: Accipe Spiritum sanctum*, non significare, quòd per ea præcisè verba, sacræ Ordinationis gratia producat; sed tantùm, quòd gratia per Ordinationem conferatur, ac proinde Episcopum, qui sacram Ordinationem celebrat, frustra non dicere: *Accipe Spiritum sanctum*. In

Ca-

Canonem VIII. notandum est, ex Palavicino, sic primum paratum fuisse; *Anathema sit. Si quis dixerit, B. Petrum per institutionem Christi non fuisse primum inter Apostolos, & ejus Vicarium in terris; vel necesse non esse, ut sit in Ecclesia unus Pontifex Petri successor, eique aequalis in auctoritate regiminis; atque in Romana Sede legitimos ejus successores, ad hoc usque tempus, non habuisse jus principatus in Ecclesia, nec fuisse Pastores, Pastores, ac Doctores omnium Christianorum, nec fuisse ipsis traditam à Domino nostro Iesu Christo plenam potestatem pascendi, regendi, & gubernandi Ecclesiam universalem.* Verum propter dissidia, quæ inter Episcopos circa postrema hæc verba: *Gubernandi Ecclesiam universalem*, orta sunt, Canon suppressus est, isq; qui modò legitur, ejus loco fuit substitutus.

Fidei expositioni, errorum damnationi, subjecta sunt octodecim de reformatione capitula.

Priore capitulo declaratum est *primò*, eos quibus incumbit animarum cura, quacumq; dignitate fulgeant, teneri ad personalem in suâ Ecclesiâ, vel diœcesi, residentiam. *Not.* Quo jure, an divino, an verò humano tantum, pastores ad personalem residentiam teneantur, *in plicite*, licet non *expresse*, definitum est. Nempè definitum est, præcepto divino omnibus, quibus animarum cura commissa est, mandatum esse, ut oves suas agnoscant, pro iis sacrificium offerant, verbique divini prædicatione, sacramentorum administratione, ac bonorum operum exemplo pascant. Definitum est iterum, ea omnia nequaquam ab iis præstari & impleri posse, qui gregi suo non invigilant neque assistunt. — Declaratum fuit *secundò*, Episcopos posse singulis annis per tres menses, sive interruptos, sive continuos, & non amplius, abesse à diœcesi. *Not.* Concilium vult, ut id æquâ ex causâ fiat, & absque ullo gregis detrimento; quod quidem an ita sit, abscedentium conscientia relinquit. — Declaratum est *tertiò*, eos, qui contra

decreti dispositionem à suis Ecclesiis abfuerint, præter mortalis peccati reatum, quem incurrunt, pro rata temporis absentiae, fructus non facere suos, nec tutam conscientiam, aliam etiam declaratione non secutam, illos sibi retinere posse; sed teneri eos, aut fabricae Ecclesiarum, aut loci pauperibus erogare. *Not.* Quænam sint legitimæ causæ, propter quas pastores abesse possunt, ac per id tempus facere fructus suos, sacra Synodus hisce verbis declarat: *Nam cum Christiana charitas, urgens necessitas, debita obedientia, ac evidens Ecclesiae, vel reipublicae utilitas, aliquos nonnunquam abesse possulent & exigant, &c.* *Not.* Ad illud Concilii decretum, quod quidem non aliud est, quam juris divini, imò & naturalis declaratio, attendant ii, qui Episcoporum confessiones excipiunt.

Capitulis iv. v. & sequentibus præscribuntur, quæ in Clericorum ordinatione servanda sunt. *Not.* 1. Quæ iis in capitulis præscripta sunt, puriorem veteris Ecclesiae disciplinam redolent. Si exactè ab Episcopis servarentur, brevi antiquus Cleri splendor restitueretur. *Not.* 2. Seminariis regendis præpositi, legant sapiùs capitulum xvi. de erectione seminariorum, & ad normas in eo præscriptas, Clericos suæ curæ creditos regant, ac erudiant. *Not.* 3. Quæ de seminariorum erectione sancita sunt, edicta regia in Galliis confirmarunt.

Capitulo xv. privilegia circa confessiones audiendas olim Mendicantibus concessa, rescissa sunt. Nempè decretum est, ut nullus secularium confessiones audiat, nisi approbatus fuerit ab Ordinario. *Not.* 1. Satis non est, ut quis approbationem petierit, sed prætereà requiritur, ut eam de facto obtinuerit. *Not.* 2. Per illud decretum regulares non prohibentur, ne religiosorum sui Ordinis, ex approbatione superiorum regulariù confessiones audiant. *Not.* 3. Vide eo super argumento tomum 2. Commentarii Historici & Dogmatici de Sacramentis.

De

De actis Sessionis XXIV.

Sessione vigesima quarta, actum est de sacramento matrimonii, declaratumque fuit *primò*, primum humani generis parentem pronuntiasse perpetuum, indissolubilemque matrimonii nexum, cum Genesis 2. dixit: *Hoc nunc os ex ossibus meis, & caro de carne mea; quamobrem relinquet homo Patrem suum & Matrem, & adhærebit uxori suæ, & erunt duo in carne una.* Not. Verba, quæ Concilium Adamo tribuit, Christus Matth. 19. refert tanquam à Deo prolata. Nulla tamen est contradictio, quia Deus non immediate per seipsum illa verba protulit, sed mediatè per Adamum.

Declaratum fuit *secundò*, matrimonii vinculo duos tantummodò copulari & conjungi. Not. 1. Id ipsemet Christus docet, Matthæi 19. ubi hæc Genesis verba: *Relinquet, &c.* tanquam à Deo prolata referens, dicit: *Itaque jam non sunt duo, sed una caro.* Ex iis quoque indissolubilem matrimonii nexum confirmat, cum subjicit: *Quod ergo Deus conjunxit, homo non separet.* Not. 2. Concilium *expresse* quidem non definit, quo jure, naturali, an divino positivo, matrimonium sit indissolubile; sed videtur, quòd implicite innuat id ei jure naturali convenire; scilicet laudans Adami verba: *Quamobrem relinquet, &c.* supponit indissolubilitatem matrimonio convenisse in statu naturæ innocentis; at in eo statu præter prohibitionem eius fructus cujusdam, non erat positivum aliquod præceptum.

Declaratum fuit *tertiò*, matrimonium inter novæ legis sacramenta meritò recenseri, eò quòd in lege evangelicâ veteribus connubiis gratiâ per Christum collatâ præstet. Not. 1. Concilium asserit quidem, matrimonii gratiam *innui* his Pauli verbis ad Ephes. 5. *Viri diligite uxores vestras, sicut Christus dilexit Ecclesiam & tradidit seipsum*

pro ea . Sacramentum hoc magnum est : ego autem dico in Christo & in Ecclesia ; sed non dicit eam invictè probari ; nec immeritò , cum Paulus alloquatur eos etiam fideles , qui matrimonium inierant , antequam religioni Christianæ darent nomen . Not. 2. Quod Synodus ex Scripturâ non asseruit , asserit ex unanimi Patrum ac traditionis consensu ; ex quo etiam capite theologi argumenta petunt , ut idem adversùs heterodoxos confirment . Adversùs traditam Ecclesiæ de matrimonio fidem , hæretici , qui elapso proximè sæculo grassati sunt , varios errores sparserant , quos Concilium duodecim Canonibus proscribit .

*Primò , anathemate eos damnat , qui negant matrimonium esse propriè dictum sacramentum novæ legis . Not. Est contra Lutherum , Calvinum & alios , quibus placet , matrimonium esse merum contractum naturalem & civilem . --- Secundò , eos , qui dicunt licere Christianis plures simul habere uxores , & hoc nullâ lege divinâ prohibitum . Not. 1. Est contra Lutherum , qui polygamiam Hassiæ Lantgravio expressè permisit . Not. 2. Posita est hæc vox *Christianis* , quòd contendunt aliqui , polygamiam solâ evangelicâ lege prohibitam fuisse ; unde concludunt homines , tum in lege naturæ , tum in lege Mosaicâ , potuisse sine dispensatione plures simul uxores ducere : contendunt iterùm ethnicos , qui jam temporis pluribus simul nubunt , non peccare , si laborent invincibili evangelii ignorantia . --- Tertiò , damnati sunt quoque , qui docent eos tantùm consanguinitatis gradus , qui in Levitico exprimuntur , posse impedire matrimonium contrahendum & dirimere contractum . Not. Catholici fatentur quidem gradus illos dirimere matrimonium , sed contendunt eos vim illam non habere præcisè , quòd in Levitico statuatur . Nonnulli (inquiunt) jure naturali dirimunt matrimonium , alii verò jure tantùm Canonico ; unde concludunt , Ecclesiâ in nonnullis posse dispensare . --- Quartò , pro-*
scri-

scripti sunt, qui asserunt, Ecclesiam non potuisse constituere impedimenta matrimonium dirimentia. *Not. 1.* Nomine Ecclesiæ hîc non intelligitur (ut voluit Launoïus) cœtus fidelium, prout & clericos, & laicos continet; sed prout solos Ecclesiæ pastores, seu ordinē sacerdotalem completur. *Not. 2.* Canon ferit Lutherum, non autem theologos, qui fatentes Ecclesiam posse constituere impedimenta matrimonium dirimentia, id quoque juris, contractus respectu, principibus sæcularibus concedunt. ----- *Quinto*, damnantur ii, qui asserunt Ecclesiam errare, cum docuit & docet, juxta euangelicam & apostolicam doctrinam, propter adulterium alterius conjugum matrimonii vinculum non posse dissolvi, & utrumque, vel etiam innocentem, qui causam adulterio non dedit, nō posse altero conjuge vivente aliud matrimonium contrahere. *Not.* Canon (inquit Palavicinus lib. 22. historiæ Trid. cap. 4.) paratus fuerat cum anathemate in eum, qui diceret matrimonia consummata, ob adulterium dissolvi; sed propter Græcos, qui in casu, de quo agitur, matrimonium dissolvunt, sub eâ formâ, quâ nunc legitur, promulgatus est: unde expressè non damnatur Græcorum praxis, sed sola censura, quam Lutherani inurebāt Ecclesiæ Romanæ, quæ docuit, ac docet, matrimonia, de quibus agitur, minimè dissolvi. Vide Commentarii Historici de Sacramentis tomum 2. pag. 972. ----- *Sexto*, damnatur ii, qui docent ordines sacros, aut solemnem in approbatâ religione professionem nō esse matrimonii impedimenta dirimentia. *Not. 1.* Concilium ait quidem, Ordines sacros dirimere matrimonium *ex lege ecclesiastica*, sed idem non definit de voto solemni; nempe plures Catholici contendunt, ipsum jure divino matrimonium dirimere; unde concludunt, Ecclesiam non posse cū religioso professō dispensare, ut matrimonium contrahat. *Not. 2.* Canon ferit Lutheranos, aliosque recentiores sectarios, qui, ut post emissum solem-

lemne religionis votum, impunè nuberent, contenderunt, votum illud non dirimere matrimonium. ----- *Septimò*, tandem damnantur ii, qui dicunt, causas matrimoniales non spectare ad iudices ecclesiasticos. *Not. 1.* Lutherani contententes matrimonium non aliud esse, quàm civilem contractum, asseruerunt causas, quæ ad illud spectant, non ad Ecclesiam, ad quam solæ causæ spirituales deferri debent, sed ad magistratus sæculares pertinere. *Not. 2.* Canon edicit quidem causas matrimoniales spectare ad iudices ecclesiasticos, sed non ait, quòd ad eos *solos* spectent; neque enim damnare voluit magistratus, qui iudicium ferunt de effectibus civilibus matrimonii, aliisque ad rempublicam spectantibus.

Post doctrinam & canones subjicitur decretum de reformatione matrimonii, ediciturque *primò*, matrimonia clandestina fuisse valida, quamdiù Ecclesia ea irrita non fecit; sed deinceps fore invalida, si aliter, quàm præsente Parocho, vel alio sacerdote, de ipsius Parochi, seu ordinarii licentiâ, & duobus, vel tribus testibus, contracta fuerint. *Not. 1.* Decretum ad Gallorum postulationem latum est. *Not. 2.* An matrimonia clandestina valuerint sub ratione sacramenti, an verò contractus tantùm naturalis, Concilium non definiit; quæstio est, quæ theologorum disputationibus permittitur. *Secundò*, anathemate damnantur, qui affirmant, matrimonia à filiis familias sine consensu parentum contracta irrita esse, & parentes ea rata, vel irrita facere posse. *Not. 1.* Est contra Lutheranos, qui docebant, huiusmodi matrimonia esse irrita jure naturali, ac divino. *Not. 2.* In iis matrimoniis sæpè reperitur impedimentum, quod vocant raptum seductionis. *Not. 3.* iudices sæculares in Galliis ea matrimonia declarant irrita quoad effectus civiles. Edicitur *tersiò*, ut nullum deinceps celebretur matrimonium, non præmissis proclamationibus. *Not. 1.* Hic clausula irritans non additur, sicut addita fuit, cum actum

actum est de Parochi præsentia . Not. 2. Quæ in hoc decreto sancita sunt, non habent locum in iis locis, ubi specialiter promulgata non fuerunt : *Decernit insuper* (verba sunt sacræ Synodi) *ut hujusmodi decretum in unaquaque Parochia suum robur post triginta dies habere incipiat , à die primæ publicationis in eadem Parochia factæ numerandos .* Vide Concilia provincialia, quæ in Galliis post Tridentinum habita sunt . Vide etiam Edictum Blesense sub Henrico III. Francorum rege . Quartò, varia statuuntur de cognitione spirituali ; de impedimento publicæ honestatis ; de affinitate, de raptu , aliisque matrimonii impedimentis, de quibus lector consulere poterit tomum 2. nostri Commentarii Historici de Sacramentis .

Decretum ad matrimonii reformationem spectans, subsequitur decretum de morum ac disciplinæ reformatione, quod quidem viginti capitulis continetur .

In quartum *notandum est* 1. prædicationis munus dici Episcoporum præcipuum Officium, indeq; colligitur, graviter peccare Episcopos, qui, licet legitimè impediti non sint, nusquam, aut saltem perrarò concionantur . *Notandum est* 2. Parochos juberi prædicare, seu docere creditum sibi populum, saltem omnibus Dominicis & solemnibus diebus festis . Parochi suam in prædicando socordiam ac negligentiam concilient, si possint, cum eo sacræ Synodi decreto . *Notandum est* 3. ex hisce capituli verbis : *Moneaturque Episcopus populum diligenter , teneri unumquemque Parochiæ suæ interesse , ubi commodè id fieri potest , ad audiendum Verbum Dei , certò inferri debitum audiendi Missam Parochialem ; nempè Parochi , ex hujus sessionis capitulo 7. intra Missarum solemnities concionari debent , ac fidelem populum docere .* Vide nostram de eo argumento dissertationem Gallico idiomate conscriptam .

In quintum capitulum *notandum est*, illud in Galliis non esse receptum. Vide quæ superius dicta sunt de judiciis in Episcopos ferendis. ---- In sextum *notandum est*, illud exactè in Galliis observari etiam quoad absolutionem ab hæresi; nec enim sunt in usu cōstitutiones, quibus ea potestas ab Episcopis aufertur. ---- In octavum, quod est de pœnitentiâ publicâ publicis peccatoribus injungendâ, *notandum est*, ipsum editum fuisse ad postulationem Gallorum; unde mirum non est, quòd in provincialibus Galliarum Conciliis promulgatum sit, ac plerisque Ritualibus præscriptum, ut videre est in Parisiensi pag. 96.

In duodecimum *notandum est*, eo rectè præscribi, quæ à Cathedralium Canonicis agenda sunt; nempe prohibetur, ne ultra tres menses vigore cujuslibet statuti, aut consuetudinis, quolibet anno à suis Ecclesiis abesse possint. Hincque inferitur, perniciosam corruptelam esse consuetudinem aliquarum insignium Ecclesiarum Cathedralium, quarum Canonici per tres tantum menses in suis Ecclesiis resident. Inferitur præterea, Canonicos illos non tantum peccare graviter, sed etiam ad restitutionem pro ratâ absentiae teneri. Decernitur quoque, Canonicos teneri *per se* sua obire officia, atque in Choro ad psallendum instituto hymnis & canticis, Dei nomen reverenter, distinctè, devotèque laudare. Hincque concluditur, eos suo officio non facere satis, cum, dum alii canunt, ipsi submissâ voce horas canonicas recitant.

In capitulum decimumquintum *notandum est*, cum eo conciliari non posse praxim Canonicorum, qui à Canonicis in possessionem admittendis, fructuum aut distributionum deductionem, aut pecuniam, aut cœnam, aut quidlibet aliud ad usus pios non convertendum exigunt.

In capitulum decimum septimum, quo vetatur beneficiorum etiam simplicium pluralitas. *Notandum est* 1. illud ad petitionem Episcoporum Gal-

Gallorum editum fuisse . *Notandum est* 2. ipsum habere locum etiam respectu Cardinalium . *Notandum est* 3. honestam sustentationem , de quâ loquitur , peti non debere ex nobilitate beneficiarii , sed ex dignitate beneficii ; neq; enim erecta fuerunt beneficia , ut mundano fastui consulere-
tur . *Notandum est* 4. beneficiorum pluralitatem in seipsâ consideratam , habere difformitatem , quæ contra ipsam rationem pugnet : *Cum* (inquit Concilium) *Ecclesiasticus Ordo pervertatur , quando unus plurimum officia occupat Clericorum .* In aliquibus tamen circumstantiis , ubi nempe manifestè expedit Ecclesiæ utilitati , si absit scandalum , ex legitimâ dispensatione , ejusmodi difformitas tollitur . Vide quæ in tractatu de Beneficiis inferiùs dicentur .

In capitulum decimum octavum *notandum est* , illud in Galliis non esse in usu ; scilicet Episcopus per se solum , non adhibitis examinadoribus (ut vocant) synodalibus , potest ad regimen Parochialis Ecclesiæ præsentatum examinare .

De actis Sessionis XXV.

Sessione XXV. quæ habita est die 4. Decembris , ann. 1563. promulgatum est 1. decretum Fidei de Purgatorio , de Invocatione , Veneratione & Reliquiis Sanctorum , de cultu imaginum . Promulgatum est 2. decretum de regularibus & monialibus . Promulgatum quoque fuit 3. decretum de reformatione . Ac tandem 4. aliud promulgatum est de indulgentiis , de delectu ciborum , jejuniiis & diebus festis , de indice librorum , Cathéchismo , Breviario , & Missali .

De Purgatorio , hoc unum definit , ipsum scilicet existere , ac animas in eo detentas juvari fidelium suffragiis . *Not.* De loco , in quo positum est , de specie pœnarum , quæ in eo perferuntur , altum est in Concilio silentium .

De

De sanctis, qui unà cum Christo regnant, definit 1. eos orationes suas Deo pro viatoribus offerre; 2. bonum ac utile esse suppliciter eos invocare. *Not. 1.* Sacra Synodus eo in loco supponit sanctos jam in cœlis frui intuitivâ Dei visione, contra quod tamen nonnulli Patres ante Concilium Florentinum senserant: vide harum institutionum tomum 2. pag. 129. *Not. 2.* Licet Concilium doceat bonum esse, ac utile sanctos suppliciter invocare, non dicit tamen quosvis fideles ad id divino, aut ecclesiastico præcepto specialiter teneri. Monendi sunt nihilominus, ut dum fiunt se præsentem, aut Missæ sacrificio, aut Ecclesiasticis Officiis, unà cum sacerdote, qui Ecclesiæ nomine, sanctorum suffragia exposcit, mentem ac voluntatem conjungant. *Not. 3.* Quâ ratione vivorum orationes sanctis in cœlis regnantibus innotescant, Concilium non aperit, unde ea quaestio theologorum examini permittitur.

De sanctorum martyrum & aliorum cum Christo regnantium corporibus definit, venerationem ac honorem eis deberi, nec inutiliter eorum memorias frequentari. *Not. 1.* Concilium triplicem affert causam, cur sanctorum corporibus veneratio exhiberi debeat; nempe, quod fuerint viva Christi membra, ac templum Spiritus Sancti; quod ab ipso ad æternam vitam suscitanda & glorificanda sint; quod denique per ea, multa beneficia à Deo hominibus præstentur. *Not. 2.* Concilium non asserit, sanctorum corporibus inesse virtutem aliquam physicam, aut moralem, quæ statâ lege, sicut novæ legis sacramenta, in eos operetur, à quibus, etiam piè, exhibetur veneratio.

De imaginibus Christi, Deiparæ Virginis, & aliorum sanctorum, definit 1. eas in templis habendas & retinendas esse; 2. eis debitum honorem esse impertiendum; 3. honorem eis exhibitum, ad prototypa referri. *Not. 1.* Absolutus igitur non est, sed relativus est cultus, qui sancto-

ctorum imaginibus exhibetur . *Not.* 2. Discrimen, quod reperitur inter venerationem, quâ prosequimur sanctorum imagines, & eam, quâ gentiles simulacra Deorum suorum prosequiebantur, Concilium hisce verbis tradit : *Non quòd credatur inesse aliqua in iis divinitas, vel virtus, propter quam sint colendæ; vel quòd ab eis sit aliquid petendum, vel quòd fiducia in imaginibus sit fingenda, veluti olim fiebat à gentibus, quæ in idolis spem suam collocabant.*

Ne autem in sanctorum, sive reliquias, sive imagines, sive miracula, abusus irrepat, decernit sancta Synodus, nemini licere ullo in loco, vel Ecclesiâ quomodolibet exemptâ, ullam insolitam ponere, vel ponendam curare imaginem, nisi ab Episcopo approbata fuerit; nulla etiam admitenda esse nova miracula, nec novas reliquias recipiendas, nisi eodem recognoscente & approbante Episcopo . *Not.* Ex eo decreto patet hæreticos immeritò Ecclesiæ crimini vertere abusus, ac superstitiones, quæ circa sanctorum, tum imagines, tum reliquias, tum externum cultum apud imperitos ac supersticiosos quosdam irreperunt.

Decreto, quo agitur de purgatorio, ac sanctorum invocatione, reliquiis, imaginibus, Concilium subjicit decretum de regularibus & monialibus, quod quidem *xxix.* capitulis constat.

Primò, præcipitur, ut regulares omnes, tam viri, quàm mulieres, ad regulæ, quam professi sunt, præscriptum, vitam instituant . *Not.* Graviter igitur peccant regulares, qui monasteriorum ad regulæ præscriptum reformationem impediunt.

Secundò, proprietas iisdem regularibus omninò prohibetur . *Not.* Cum eâ prohibitionem conciliari non potest usus pensionum, quæ monialibus post professionem à parentibus traduntur, & de quibus, etiamsi apud superiores depositæ fuerint, pro libito disponunt.

Ter-

Tertiò, omnibus monasteriis, exceptis domibus Cappucinatorum, & Minorum de Observantiâ, permittitur, ut bona immobilia possideant. *Not.* Ante illam Concilii indulgentiam, id nulli Ordini Mendicantium permissum erat.

Quartò, jubetur Episcopis, ut monialium clausuram, ubi violata fuerit, diligenter restituant; ac inobedientes, etiam exemptos, per censuras ecclesiasticas, quâcumque appellatione postpositâ, compescant. *Not.* Hinc patet, graviter peccare moniales, quæ Episcopo clausuram restituere conanti contradicunt.

Sextò, præscribitur ratio eligendi superiores, decerniturque id fieri debere per vota secreta; nec suppleri posse absentium suffragia; nec ad electionem faciendam constitui posse Provinciales, Abbates, Priores, aut alios quoscumque titulares. *Not.* Illi decreto non adversatur praxis, per quam aliqui ex variis monasteriis, per vota secreta electi, mittuntur ad capitulum, ut superiores pro se, ac pro absentibus eligant.

Septimò, jubetur, ne professio in religione, sive virorum, sive mulierum fiat, nisi exacto probationis anno, & decimo sexto ætatis completo. *Not.* Nonnullis visum fuerat, ad professionem expectandum esse annum 25. sed id à cæteris rejectum est propter pericula, quibus puberes in sæculo exponuntur. Præscribitur quoque, ut novitii finitâ probatione, aut profiteantur, aut ejiciantur. *Not.* Decreto adversatur praxis, quâ nonnullarum monialium professio ad multum tempus post expletum novitiatum differtur, eò quod promissa pro dote pecuniæ summa, quæ ut plurimum sine simoniâ, nec datur, nec accipitur, parata non sit. ----- Prohibetur pariter, ne quid à novitio ante professionem, excepto victu & vestitu, tribuatur. *Not.* Victum & vestitum à novitiis, quibus suppetunt opes, monasterium potest exigere.

Octavò, decernitur, quomodo ex causis deficientium à religione procedendum sit. *Not.* Post quin-

quinquennium audiri non debet religiosus, qui contendit irrita esse vota, quæ emisit in professione; nec etiam intra quinquennium, si sub obtentu nullitatis eorundem votorum, habitum aut monasterium spontè dimiserit.

Nonò, vetatur, ne monasteria, & ea præsertim, quæ sunt ordinum capita, dentur in commendam. *Not.* Non tulit temporum iniquitas, ut illud disciplinæ caput in omnibus Catholicis provinciis obtinuerit.

Decreto de regularibus & monialibus Concilium subjicit unum supra viginti capita de reformatione.

In primum autem caput *notandum est* 1. meritò Concilium præscribere, ut Episcopi modestâ suppellectili, ac frugali victu contenti sint; nempè ratione status, ac proindè naturali ac divino jure, populo fideli tenentur esse modestiæ, frugalitatis ac aliarum virtutum exemplo. *Notandum est* 2. eodem capite meritò innovari Canonem Apostolicum, quo Episcopi prohibentur, ne res ecclesiasticas consanguineis donent, iisve familiares suos augere studeant. Nimirum (ut ait idem Concilium) bona Ecclesiæ, Dei sunt, hoc est Deus, non autem homines, earum est Dominus; proindèq; qui eas à beneficiariis recipiunt, nisi tamen sint pauperes, ad restitutionem tenentur.

In secundum reformationis caput, quo præcipitur, ut in proximo Concilio provinciali palàm recipiantur, quæ in Tridentino definita ac statuta sunt, *notandum est*, ea quæ ad fidem pertinent, ab omnibus Ecclesiis Catholicis recepta fuisse; non autem, quæ ad reformationem, tum quòd nonnulla probatis provinciarum usibus adversarentur, tum quòd id non permetteret temporum iniquitas, tum deniq; quòd magistratus civiles iis contradicerent. Vide quæ de eo argumento §. 3. inferiùs dicentur.

In caput quartum, quo circa numerum Missarum,

rum, quibus celebrandis propter nimium earum numerum, aut tenuiorem eleemosynam, satis non sunt Ecclesiæ, Episcopis sit facultas ea statuendi, quæ magis ad Dei honorem & Ecclesiarum utilitatem viderint expedire. *Notandum est* 1. decretum non intelligi de Missis votivis, quæ in dies à fidelibus petuntur; sed de fundatis, seu de iis, ad quas pecuniæ summa per testamentum relicta sit. *Notandum est* 2. vi ejusdem decreti posse Episcopos idem statuere de Missarum foundationibus, quæ post Concilium Tridentinum in variis Ecclesiis factæ fuerunt.

In caput sextum, in quo agitur de visitatione capitulorum exemptorum, *notandum est*, ipsum in omnibus Galliarum provinciis non esse in usu. Idem dicendum est de septimo, quoad primam partem, quâ tollitur regressus ad beneficia; quoad posteriorem verò, quæ est de coadjutoribus, usum corrigit, qui in multas Ecclesias irrepserrat, qui-que his etiam temporibus, in nonnullis adhuc grassatur; in iis nimirum è Canonicis, licet sanitate fruantur, coadjutores, à quibus non adjuventur, sub certa spe futuræ successionis eliguntur.

In caput decimum octavum, in quo præcipitur, ut Canones adamussim ab omnibus, quoad ejus fieri poterit, indistinctè observentur, *notandum est* 1. non agi de omnibus, ac singulis Conciliorum Canonibus; nonnulli enim quoad externam disciplinam abrogati sunt per non usum, cui per suam praxim Ecclesia Catholica tacitè consensit: sed agitur de iis Canonibus, quorum executionem his etiam temporibus Ecclesia præscribit. *Notandum est* 2. probari quidem dispensationes, sed eas tantum, quæ ex parte concedentis præsupponunt causæ cognitionem, & ex parte recipientis urgentem causam, justamque rationem, & ex parte Ecclesiæ majorem utilitatem.

In caput decimum nonum, quo monomachia pœnis gravissimis punitur, *notandum est* 1. pœnas

nas temporales, quæ duello confligentibus per Canonem infliguntur, intelligi de confligentibus, qui civitatis, castrî, aut loci, dominium ab Ecclesiâ obtinent; neque enim Canones Ecclesiastici aliquam in bona temporalia potestatem exercere solent. *Notandum est* 2. Excommunicationem ipso facto incurrere dominos temporales, qui locum ad duellum concesserint; eos qui pugnam commiserint; eos etiam qui pugnantium patrini vocantur; eos quoque, qui in causâ duelli, tam jure, quàm facto consilium dederint, aut aliâ quâcumque ratione id alicui suaserint; eos deindè, qui pugnantes spectaverint. *Notandum est* 3. Disciplinam eo capitulo præscriptam, ubique ferè, sed in Galliis præsertim, per Synodos provinciales, quæ post Tridentinam habitæ sunt, promulgatam fuisse, eique rubor maximum additum fuisse regiis, tum Ludovici XIII. tum XIV. edictis.

In caput vigesimum, quo Ecclesiæ & personarum ecclesiasticarum immunitas principibus commendatur, *notandum est*, ecclesiasticæ immunitatis ideam non esse omninò eandem in singulis orbis Christiani provinciis. In aliquibus omnes, tum civiles, tum ecclesiasticæ clericorum causæ ad judices ecclesiasticos spectant, in nonnullis ecclesiasticæ solum, in aliis verò etiam mixtæ.

In caput vigesimum primum, quo declaratur omnia & singula, quæ de morum reformatione, atque ecclesiasticâ disciplinâ in Concilio statuta sunt, ita decreta fuisse, ut in his salva semper Sedis Apostolicæ auctoritas & sit, & esse intelligatur, *notandum est*, ipsum sic exponi debere, ut Summus Pontifex de Concilii decretis pro loco & tempore, servatis servandis, aliquando dispensare valeat. Nempè, cum Concilium non semper sit congregatum, ac circa disciplinâ ab eo præscriptâ dubia nonnunquam occurrant, ac prætereâ major Ecclesiæ utilitas interdum postulet,
ut

ut ea disciplina ab omnibus ad litteram non observetur, par est, ut is, qui divino jure primum habet in Ecclesiâ, Conciliorum statuta moderetur, interpretetur, ac nonnunquam de eis dispenset: *Necessaria rerum dispensatione constringimur* (inquit Gelasius Papa I. in epistolâ ad Episcopos Lucaniæ) & *Apostolicæ Sedis moderatione convenimur*, sic Canonum paternorum decreta librare, & retrò præsulum, decessorumque nostrorum præcepta metiri, ut quæ præsentium necessitas temporum restaurandis Ecclesiis relaxanda deposcit, adhibita consideratione diligenti, quantum fieri potest, temperemus.

Post decretum de reformatione morum, sacra Synodus aliud de indulgentiis promulgavit, definiitque 1. potestatem conferendi indulgentias à Christo Ecclesiæ concessam fuisse: 2. illarum usum Christiano populo maximè salutarem esse: 3. abusus, qui in earum usum per corruptelam irrepserint, ab Episcopis tolli, ac corrigi debere. Not. 1. Eæ de indulgentiis definitiones sunt contra Lutherum, Zuinglium, Calvinum, aliosque elapsi proximè sæculi sectarios. Not. 2. Indulgentiæ, quas Concilium probat, ejusdem sunt naturæ, ac speciei cum iis, quæ antiquorum Conciliorum Canonibus firmatæ sunt; atque ita cum indulgentiæ antiquorum Conciliorum Canonibus firmatæ, nihil aliud sint, quàm Canonum pœnitentialium relaxatio, & pœnarum iis præscriptarum, aut imponendarum vera coram Deo remissio, ita nec aliud sunt hodiernæ. Not. 3. hæc sacre Synodi verba: *In his tamen concedendis moderationem, juxta veterem & probatam in Ecclesia consuetudinem, adhiberi cupit*; probant, in indulgentiarum concessione, ac applicatione haberi debere rationem contritionis, ac laborum hominis pœnitentis; neque enim majores nostri eas largiebantur hominibus lapsis, nisi intensam contritionem probassent pœnitentiæ laboribus, aut saltem, nisi pro-

proportionatam peccatis pœnam & suscipere, & exequi parati essent, quamvis aut præ infirmitate, quâ detinebantur, aut propter instans mortis periculum, proportionatam suis peccatis pœnam actu subire non possent. *Not.* 4. Quodnam sit indulgentiarum fundamentum, unde illarum virtus desumatur, Concilium non aperit quidem in suo de indulgentiis decreto; sed id explicatum supponit sessione sextâ, ubi definitum est, quælibet hominis merita, quamlibet satisfactionem, peti ex Christi meritis, ac satisfactione; illud verò fundamentum à scholasticis *thesaurus* dicitur, in quo etiam thesauro locum habent sanctorum merita, ac satisfactio, non quidem per modum redemptionis, ac solutionis, sed per modum suffragii ad impetrandam nobis sanguinis Christi, ac exhibitæ ab eo satisfactionis, applicationem. Alia quæ ad indulgentiarum argumentum spectant, vide fusè pertractata ad calcem Commentarii Historici & Dogmatici de Sacramentis, nec non harum Institutionum Theologicarum tomo 6.

Post decretum de indulgentiis actum est de delectu ciborum, jejniis & diebus festis, de indice librorum, Catechismo, Breviario & Missali, de loco oratorum, de recipiendis & observandis decretis Concilii, de recitandis in publicâ sessione decretis Concilii sub Paulo III. & Julio III. ac tandem de fine Concilii, & de confirmatione petendâ à Pio Papâ IV. *Not.* Petitioni de petendâ à Summo Pontifice confirmatione Concilii, Granatensis Archiepiscopus, Palavicino teste, contradixit quidem; sed tamen decretum unanimi Patrum consensu promulgatum est.

§. III.

Utrum Concilium Tridentinum sit Concilium Oecumenicum.

Not. Ubi Lutherus à Leone Papâ X. damnatus est, provocavit ad Generale Concilium. Qui Luthero sub Protestantium nomine adhæserunt in Germaniâ, nihil frequentius habuerunt in ore, quàm Oecumenicum Concilium, cujus iudicio (inquiiebant) & seipfos, & fidem suam parati erant subicere. Verum, ubi à Paulo Papâ III. illud, quod petere fingeant, Concilium indictum est Tridenti, varias adversus ipsum querelas moverunt; nempe contenderunt ipsum non esse legitimum, quod à Summo Pontifice convocatum esset; quod idem Pontifex Maximus per suos legatos ei præesset; quod extra Germaniam, ubi quæstiones de fide, ac reformatione morum cœperant, haberetur; quod suarum partium theologis, ac prætensæ suæ reformationis ministris suffragium decisivum non concederetur. Iis querelis, aliisque causis, quas ante ac post celebratum Concilium obtulerunt, probarunt manifestè, (quod est palmarium in suâ sectâ principium) se non alios, quàm seipfos agnoscere fidei iudices.

CONCLUSIO. Concilium Tridentinum est Concilium legitimum ac œcumenicum.

Probatur. Ad legitimum & œcumenicum Concilium requiritur, ut Canonicè convocetur; ut debitum habeat præsidem; ut Episcopi ex præcipuis orbis partibus in illo sedeant; ut iidem Episcopi summâ in ferendo suffragio libertate fruantur; ut de causis, propter quas indictum est, non feratur iudicium, nisi post diligens ac maturum examen; ut præcipuè orbis Ecclesiæ illi consensum suum præbeant: Atqui eæ omnes conditiones in Concilio Tridentino reperiuntur.

riuntur: ergo Concilium Tridentinum est Concilium legitimam ac œcumenicum. Minor argumenti propositio subsequētibz momentis ostenditur.

Primò, Concilium Tridentinum Canonicè convocatum est, à Summo nimirum Pontifice ad quem (ut superius ostensum est) pertinet jus convocandi Concilia generalia, & à quo plurima ex Orientalibus, & omnia quæ in Occidente celebrata sunt, reipsâ convocata fuerunt.

Secundò, habuit quoque debitum præsidem, scilicet eundem Romanum Pontificem, qui omnibus Conciliis Generalibus (excepto tamen Constantinopolitano I. quod quidem non fuit œcumenicum, nisi post Occidentalium consensum,) quæ tum in Oriente, tum in Occidente celebrata sunt, per suos legatos præfuit, ac jure (ut agentes de Conciliis in genere demonstravimus) præesse debuit.

Tertiò, Concilio Tridentino adfuerunt Episcopi ex præcipuis orbis Christiani provinciis, & quidem ingenti numero; nempe decretis ab eo latis subscribere quatuor Sedis Apostolicæ legati præfides, duo alii Cardinales, tres Patriarchæ, vigintiquinque Archiepiscopi, centum sexaginta octo Episcopi, triginta novem Procuratores Prælatorum absentium, septem Abbates & totidem Religiosorum Ordinum præpositi generales.

Quartò, Episcopi in ferendis suffragiis summâ potiti sunt libertate; quamvis enim legati de præcipuis capitibus definiendis per litteras certiozem facerent Pontificem maximum, ipseque Pontifex ad eos rescribens, suam de eis mentem aperiret, nunquam (ut videre est apud Palavicinum lib. 8. cap. 12.) id factum est per modum imperii, sed admonitionis & consilii, ut scilicet complurium judicio perspecto, Synodus posset id statuere, quod optimum

esset. Præterea, Pontifices maximi nonnunquam Tridentinos Patres monuerunt, ut iis inconsultis, sive fidei, sive reformationis capita prosequerentur: *Ne tempus servatis amplius in petendo hinc consilio* (verba sunt Cardinalis Boromæi ad legatos, nomine Pii Papæ IV. rescribentis) *eoque citius vobis expedire liceat id, quod superest.*

Quintò, de quæstionibus, sive fidei, sive reformationis, nusquam definitio lata fuit sine præcedenti maturo examine. Scilicet hæc observata est agendi ratio. 1. Legati, aut motu proprio, aut ad oratorum preces, aut ad vota patrum, aliquos theologos committebant, ut controversias, de quibus agendum erat in sessione, in ordinem redigerent. 2. Eadem quæstiones in ordinem à selectis theologis redactæ, subiciebantur examini ac discussioni privatæ theologorum congregationis, cui aliquis Episcopus præerat, cuique alii omnes Episcopi pro libito adesse poterant. 3. Quæ in privatâ illâ theologorum congregatione decreta fuerant, referebantur ad congregationem generalem, in quâ, omnibus fermè præsentibus Episcopis, iterato examine discutiebantur. 4. Quæ in congregatione generali decreta fuerant, referebantur ad publicam Concilii sessionem, in quâ Episcopi, aliq; quibus juserat ferendi decisivum suffragium, suum de rebus propositis iudicium ferebant, per verbum, *Placet*; si tamen nihil in decreto mutandum esse censerent. Vide Palavicinum, aliosque sacri Concilii historicos.

Sextò, Concilii Tridentini decretis, præcipuæ orbis Christiani Ecclesiæ consenserunt. Suscepta sunt à Catholicis Germaniæ regionibus in Synodo Augustanâ, quæ ab Otthone Cardinale Truxesio celebrata est anno 1567. Suscepta quoque fuerunt ab Hispaniâ, Siciliâ, cæterisque Catholici regis ditionibus, anno 1564. idque per edictum præcipiente Philippo Hispaniarum rege. Suscepta

pta quoque fuerunt à Lusitaniâ, ut patet ex Sebastiani regis litteris ad Pium Papam IV. quas refert Palavicinus hist. lib.24.cap.9. Suscepta pariter fuerunt à Poloniâ in regni Comitibus, quæ anno 1564. habita sunt. Suscepta etiam fuerunt à Republicâ Venetorum, ac (ut refert Morosinus lib.8. historiæ Venetorum) intra Missarum solemniam, promulgata sunt.

Septimò. Licet quoad aliqua disciplinæ capita, Ecclesia Gallicana ejusdem Concilii decreta non promulgaverit; amplexa tamen est ea omnia, quæ in eo de fide & moribus definita, ac statuta fuerunt. Id nimirum patet ex Synodo Remensi, quæ Præside Carolo Cardinale à Lotharingiâ, anno 1564. celebrata est; ex Rothomagensi, quæ habita est anno 1581. præside Carolo Cardinale Borbonio; ex Burdigalensi, anno 1583. ex Turonensi, ann. 1583. ex Bituricensi, ann. 1584. ex Aquensi, ann. 1585. ex Tolosanâ, ann. 1590. ex Avenionensi, ann. 1594.

Octavò. Clerus Gallicanus ad generalia Comititia coactus, frequenter à christianissimis regibus postulavit, ut sibi liceret Concilium Tridentinum promulgare, non tantum quoad fidem, ut jam ubique promulgatum fuerat, sed etiam quoad ea disciplinæ capita, quæ regni juribus & consuetudinibus, ex veterum Canonum præscripto servari solitis, non adversantur. Libellum supplicem Henrico III. in eum finem, oblatum videre est in Comitibus Blesensibus. Iteratas de eodem argumento preces legere est in actis Conventus, qui anno 1579. Meloduni celebratus est; in actis Conventuum Parisiensium, ann. 1585. 1586. & 1596. Ex, pluresque aliæ Cleri Gallicani supplicationes de verbo ad verbum descriptæ reperiuntur tom.1. Commentariorum Cleri Gallicani.

Objicies 1. Papa præesse non poterat Concilio in causâ Protestantium celebrato, cum ipse pars esset, in quam iidem Protestantes movebant litem: 2. Concilium in causâ, de quâ agitur, cele-

brari debuisset in Germaniâ ; par nimirum erat, ut negotio finis imponeretur , ubi incœperat : 3. Lutherani , Calvinistæ , inauditi damnati sunt , quod quidem omnia jura vetant : 4. In Concilio Tridentino multa sunt , quæ regnorum, ac inprimis imperii Gallicani , juribus adversantur : 5. Licet Clerus Gallicanus sæpius petierit Concilii Tridentini promulgationem , nusquam tamen à regibus Christianissimis eam obtinere potuit : Ergo Concilium Tridentinum non est Concilium legitimum ac œcumenicum .

Resp. ad 1. Papam per suos legatos adfuisse Concilio tanquam judicem , non autem tanquam partem , in quam Protestantes (ut aiebant) litem moverant ; nec is , cui divino jure concessa est potestas ferendi judicium de fidei controversiis , jure excidit suo , quod ii , in quos protulit condemnationis sententiam (ut reverà Leo X. adversus Lutheranos tulerat,) eum tanquam fidei perduellem ausi fuerint accusare ; nam alioquin, nec Cyrillus de Nestorio , nec Leo I. de Eutychē , nec Agato de Monothelitis , judicium ferre potuissent .

Resp. ad 2. lites , quæ de personis sunt , ut plurimum quidem , juxta Canonum normam , dirimi debere in locis , ubi cœptæ sunt ; nec enim testes , ex quorum testimonio res facti pendent , facile in loca dissita advocari possunt . Sed idem ferri non debet judicium de causis fidei ; cum enim ad omnes spectent , ubique possunt examinari ac definiri . Confirmatur ex eo , quod hæresis Ariana Nicææ in Bithyniâ damnata sit , quamvis in Ægypto ab Ario cœpta fuisset . Nestoriana lues , quæ Constantinopoli primum prodiit , Ephesi proscripta fuit ; & ita in pluribus aliis actum fuisse , præteritis experimentis docemur .

Resp. ad 3. Lutheranos , Calvinistas , aliosque sectarios , sæpius ad Concilium vocatos fuisse , obla-

oblatis etiam (ut loquuntur) salvis conductibus . Præterea discrimen est inter causas de personis & causas de dogmatis . Causæ, quæ ad personas spectant , quantum fieri potest, dirimi non debent, nisi prius personæ auditæ fuerint ; ac proinde, nec ordinariè extra locum, in quo facta per testes probari possunt : è contra causæ, quæ sunt de dogmatis , examinari ac definiri possunt extra locum, in quo primum ortæ sunt , imò & inauditis partibus . Ratio est , quia dogmata (ut supponitur) produntur authorum scriptis ; scripta verò discuti, ac examinari possunt secundum sensum obviu , seu , quem termini præseferunt , etiamsi illorum authores non audiantur ; neque enim sensus obuius alicujus scripti pendet ex sensu , quem author contra ordinariam verborum significationem , aut contra naturalem sententiarum connexionem potest interiùs effingere .

Resp. ad 4. equidem in disciplinâ , quam Concilium Tridentinum præscripsit , nonnihil reperiri, quod probatis aliquorum regnorum usibus adversatur ; sed id nihil officit fidei aut morum causæ, unde licet ea disciplinæ capita singulæ orbis Catholici provinciæ non admiserint , nulla est , quæ fidei aut morum decretis non subscripserit .

Resp. ad 5. Clerum Gallicanum non absolute , sed conditionatè tantum , seu salvis regni juribus , & Ecclesiarum immunitatibus , petiisse à regibus christianissimis promulgationem disciplinæ , quæ in Concilio Tridentino sancita est : *Comme aussi n'entendons prejudicier par cette publication aux immunités & franchises de l'Eglise Gallicane* (verba sunt Claudii d'Angennes Episcopi & Comitis Noviodunensis , apud regem christianissimu oratoris Cleri Parisiis ad comitia congregati, d.e 14. Octobris ann. 1595.) *lesquelles nous promettons & assurons , que le saint Pere en ayant ete supplie , sera bien content maintenir & conserver : ces reservations*

ayant été faites ja par deux fois à la publication de ce Concile, à sçavoir aux Etats de Blois, & par l'assemblée du Clergé tenue à Melun, nous pensons ne nous en devoir départir. Quænam autem sint ea regni jura, quænam immunitates, non est hic aperiendi locus; sed de iis, vide Febretium de Abusu, Bochellum, libro 5. Decretorum Ecclesiæ Gallicanæ, pag. 916. editionis Parisiensis, ann. 1609. Cur verò reges christianissimi votis Cleri, licet (ut observavimus) conditionatis, non annuerint, nostrum non est definire.

Objicies iterum. Prioribus Concilii sessionibus pauci adfuerunt præfules. Sessioni quartæ, in quâ de libris Canonicis, & de traditionibus actum est, præter Cardinales legatos adfuerunt tantum novem Archiepiscopi, & Episcopi quadraginta duo: ergo, in iis saltem sessionibus, Concilium Tridentinum non fuit Concilium Oecumenicum; neque enim dici potest, in exiguo illo Episcoporum, non aliorum ferè, quàm Italorum numero, universam Ecclesiam repræsentari.

Resp. prætermisâ responsione, quâ (ut jam superius observatum est) asseritur, omnes orbis Catholici Episcopos Canonicè ad Concilium Tridentinum vocatos fuisse, dicendum esse ingentem numerum Episcoporum, qui postremis sessionibus adfuerunt, suo judicio priores sessiones comprobasse; nempe hæc leguntur in ultimâ Concilii sessione, capitulo VI. continuationis, sessionis 25. *Quoniam diversis temporibus, tam sub felicitis recordationis Paulo III. quàm Julio III. multa in hoc sacro Concilio quoad dogmata, ac morum reformationem statuta & definita sunt, vult sancta Synodus, ut illa nunc recitentur, & legantur.*

Q U Æ S T I O I V .

De Ecclesia .

Not. **I**Nitio dissertationis quartæ, in quâ versamur, observatum est, Ecclesiæ Catholicæ consensum, judicium, auctoritatem, esse locum theologicum, ex quo pro confirmandâ fide & regulandis moribus argumenta desumi possunt. Verùm id frustrâ (quod tamen nobis in hac quæstione propositum est) assereretur, nisi intelligeretur, quid intelligatur nomine Ecclesiæ Catholicæ, quænam sit illius essentia, quibus membris constet, quibus notis cognoscatur, quas habeat proprietates. Igitur, ut loci theologici, de quo hic agitur, vis ac firmitas stabiliantur, operæ pretium est, ut ea quinque capita accuratè hic à nobis exponantur.

C A P U T I .

De nomine Ecclesiæ .

CONCL. **E**Cclesiæ nomen tribus modis sumi potest.

Probatur enumeratione . Sumi potest 1. pro loco materiali, in quo homines congregari solent, de quo dicitur : *Domus mea, domus orationis vocabitur* . Sumitur 2. pro aliquâ locali fidelium congregatione : *Primum quidem* (ait Paulus 1. ad Cor. 11.) *convenientibus vobis in Ecclesiam, audio scissuras esse inter vos, & ex parte credo Aut Ecclesiam Dei contemnitis, & confunditis eos, qui non habent ?* Sumitur 3. pro fidelium cœtu ac societate, abstrahendo à locis, in quibus ejusmodi societas reperitur . De Ecclesiâ in eo sensu sumptâ intelligi debent hæc Aposto-

Ad Galatas scribentis verba : *Persequebar Ecclesiam Dei , & expugnabam illam .* Ad Ecclesiam in eo tertio sensu sumptam referuntur omnia, quæ in hâc quartâ quæstione dicuntur.

Quæres, cur fidelium cœtus in antiquâ lege vocaretur *Synagoga*, in novâ verò *Ecclesia* dicatur.

Resp. Synagogam dici à congregatione, Ecclesiam è contra ab evocatione. Judæi, quod carnales essent, pecorum more congregari dicebantur; Christiani verò, quod sint spirituales, more creaturarum ratione præditarum evocari debent. Augustinus illud discrimen advertit in epistolam ad Romanos, ubi sic loquitur : *Ecclesia ex vocatione appellata ; Synagoga verò ex congregatione .* Convocari enim hominibus magis congruit, congregari autem magis de pecoribus dici solet ; unde greges propriè pecorum dici solent . Quamvis ergo, plerisque Scripturarum locis, ipsa Ecclesia grex Dei, & ovile Dei, & pecus Dei vocetur ; tamen cum in comparatione homines pecora dicuntur, ad vitam veterem pertinet, & apparet, hujusmodi homines non esse sempiternæ veritatis, sed temporalium promissionum tanquam terreno pabulo esse contentas : Paulus ergo vocatus Apostolus, segregatus in Evangelium Dei, unde, nisi ex grege Synagoga ?

C A P U T II.

De essentia Ecclesie .

Not. **E**ssentia Ecclesiæ convenire debet Ecclesiæ tum militanti in terris, tum triumphanti in cœlis, tum patienti in purgatorio ; reverà enim sive fideles, qui militant in terris, sive beati, qui in cœlis triumphant, sive animæ, quæ patiuntur in purgatorio, ad Ecclesiam pertinent.

CONCLUSIO . Ecclesiæ essentia hâc defi-

ni-

nitione continetur : Cœtus sanctorum sub uno capite Christo ; Deo servientium.

Probatur . Allata definitio continet genus & differentiam Ecclesiæ in communi sumptæ : ergo debet admitti. Probatur ant. *Primo*, prout Ecclesia dicitur *Cætus*, convenit cum quâlibet congregatione, sive ex infidelibus, sive ex hæreticis constet.

Secundò, prout dicitur *Cætus Sanctorum*, ab eâ excluduntur, tum infideles, tum aperti hæretici ; quippè iis ne externa quidem sanctitas convenit.

Tertiò, eadem verba : *Cætus sanctorum*, complectuntur eos omnes, qui habent aliquam sanctitatem, sive interna sit, sive externa tantum . Internâ & quidem perfectâ beati in cœlis fruuntur, juxtâ illud Apostoli ad Hebræos 12. *Accessistis ad Sion montem & civitatem Dei viventis, Hierusalem cœlestem, & multorum millium Angelorum frequentiam, & Ecclesiam primitivorum, qui conscripti sunt in cœlis, & judicent omnium Deum, & spiritus justorum perfectorum*. Internam sanctitatem, sed imperfectam, habent omnes justî, qui adhuc militant in terris : *Christus* (ait Paulus ad Ephes. 5.) *dilexit Ecclesiam & seipsum tradidit pro ea, ut illam sanctificaret, mundans eam lavacro aquæ in verbo vitæ*. Solam verò externam sanctitatem habent ii omnes, qui gratiâ sanctificante destituti, exteriori fide profitentur : *Habentes quidem* (inquit Paulus 2. ad Timoth. 3.) *speciem pietatis, virtutem autem ejus abnegantes*. Impii propter eam sanctitatem externam, sub eorum etiam nomine continentur, ad quos hæc scribit Petrus 1. epist. cap. 2. *Vos autem genus electum, regale sacerdotium, gens sancta, populus acquisitionis, qui aliquando non populus, nunc autem populus Dei*. Nempè Petrus scribebat non tantum ad justos, sed etiam ad omnes, qui baptizati, fidem Christianam exteriori profitebantur.

Quartò, hæc verba : *Sub uno capite Christo* , continent discrimen essentialè , quod inter Ecclesiam & Synagogam reperitur : Ista enim expectat Christum venturum , illa è contra advenisse credit , eumque agnoscit pro capite : *Et ipsum* (ait Apostolus ad Ephes. 1.) *dedit caput supra omnem Ecclesiam* . Capite 5. *Quoniam vir caput est mulieris* , sicut Christus caput est Ecclesiæ . Ibidem , *Sicut Ecclesia subiecta est Christo* , ita & *mulieres viris suis in omnibus* . Eodem spectant multa alia Scripturæ loca .

Quintò , hæc verba : *Deo servientium* , denotant Ecclesiæ finem , qui quidem alius non est , quàm ut creaturæ Deo serviant , aut perfectè , ut fit in cælo , aut saltem imperfectè , ut fit in terris . Inde verò sequitur , ut Ecclesia ex omni gente ac populo coalescat ; nulla nimirum est gens , quæ Deo servire non possit ; nec curat Ecclesia de populorum , aut genere , aut moribus , aut legibus , quibus iidem populi non impediuntur , ne Deo serviant : *Cum cælestis civitas* (hoc est , Ecclesia Christiana) *unum Deum colendum nosset* (inquit Augustinus lib. 19. de civit. Dei cap. 17.) *ei que tantummodò serviendum servitute illa* , quæ Græcè *latría* dicitur , factum est , ut religionis leges cum terrenâ civitate (hoc est , cupiditati serviente) communes non posset habere . Hæc igitur cælestis civitas , dum peregrinatur in terra , ex omnibus gentibus cives evocat , atque in omnibus linguis peregrinam colligit civitatem , non curans quidquid in legibus , moribus , institutisque diversum est , quibus pax terrena conquiritur , vel tenetur , nihil eorum rescindens , vel destruens , imò etiam servans , ac sequens , si religionem , qua unus summus , ac verus Deus colendus docetur , non impedit .

C A P V T III.

De membris Ecclesiæ.

Not.1. **C**irca difficultatem, de quâ agitur, variè opinati sunt hæretici. Vvicleffus censuit, Ecclesiam esse cœtum eorum tantum, qui ad cœleste regnum prædestinati sunt; id patet ex sessione 15. Concilii Constantiensis.

Not.2. Donatistæ docuerunt, eam constare quidem ex pluribus reprobis, sed qui nunquam fidem, vel factò, vel verbo, negaverint; ita enim asserere videtur Augustinus lib.3. contra Parmenianum cap.2. In eundem errorem Novatiani antea abierant, ut videre est apud Cyprianum lib.4. epist.2. Epiphanium, ubi refert hæresim Catharorum; quamvis enim non absolverent gravium criminum reos, eos tamen ex suo cœtu non eliminabant.

Not.3. Lutherani, qui Augustanæ confessioni subscripserunt, asseruerunt, solos justos ad veram Ecclesiam pertinere; malos verò, qui fidem exterius profitentur, ad externam quandam societatem, quæ non re, sed nomine tantum, sit Ecclesia.

Not.4. Calvinus Lutheranis adhæsit, seu voluit, solos justos ad veram Ecclesiam pertinere. Verum cum in illius sententiâ nulli sint verè justi, nisi qui ad æternam felicitatem prædestinati sunt (ut ex illius principiis colligunt theologi agentes de justificatione) sequitur, in ejus systemate, veram Ecclesiam (ut antea Vvicleffus docuerat) ex solis prædestinatis constare.

Not.5. Ab eâ Calvinî doctrinâ non recedunt hodierni Calvinistæ, qui contendunt, hæreticos, schismaticos, apostatas, modò credant fundamentales (ut loquuntur) Christianæ religionis articulos, esse veræ Ecclesiæ membra; nempe
con-

contendunt, hæresibus, schismatis, apostasiâ, quibus fidei fundamenta non subvertuntur, nec charitatem, nec justitiam amitti.

Not. 6. Catholicorum doctrina iis omnibus sectariorum erroribus planè opposita est. Scilicet Catholici docent, Ecclesiam adæquatè sumptam, hoc est, prout est quoddam totum, quod constat ex animâ & corpore, complecti non tantum ad vitam æternam prædestinatos, sed etiam plures reprobos; non tantum justos, sed etiam plures impios; modò tamen, tum illi reprobi, tum illi impii fidem sub legitimis pastoribus exterius profiteantur. Ut autem cum methodo Catholicorum fides explicetur, necesse est, ut hocce caput in plures articulos dividamus.

ARTICULUS I.

Utrum soli prædestinati sint Ecclesiæ membra.

CONCLUSIO. Soli prædestinati non sunt Ecclesiæ membra.

Probatur. Reprobi, qui sub legitimis pastoribus fidem exterius profitentur, sunt veræ Ecclesiæ membra: ergo soli prædestinati non sunt Ecclesiæ membra. Antecedens, in quod vertitur difficultatis cardo, subsequenter momentis ostenditur.

Primò, Area, de quâ hæc habentur Matth. 3. *Permundabit aream suam, & congregabit triticum in horreum suum, paleas autem comburet igni inextinguibili*, est vera Christi Ecclesia: atqui in illâ areâ non solum est triticum, hoc est, qui tritico designantur, prædestinati nimirum, quos Christum in horreum suum, id est, cælum congregabit; sed præterea sunt paleæ, seu reprobi, quos Christus igne inextinguibili damnabit.

Se-

Secundò, Convivium, cujus Euangelium meminit Matthæi 22. adumbrat veram Dei Ecclesiam: atqui in illo convivio non solum sunt prædestinati, sed etiam reprobi; quippè nonnulli ex iis supremi judicis iussu in tenebras exteriores projiciendi sunt cum homine, qui non habebat vestem nuptialem.

Tertiò, Decem virgines, de quibus Christus ipse loquitur Matthæi 25. sunt Ecclesiæ figura: atqui inter illas virgines nonnullæ fuerunt reprobæ; fatuæ nimirum, quæ cum sponso non intraverunt ad nuptias, quæque hisce sponsi verbis rejectæ sunt: *Amen dico vobis, nescio vos.*

Quartò, Gravissima sequuntur absurda ex sententiâ, quæ asserit, solos prædestinatos ad veram Christi Ecclesiam pertinere. Sequitur nimirum 1. nec infantes baptizatos, qui non sunt ex prædestinatorum numero, nec adultos, qui nondum per aliquod peccatum mortale exciderunt ex iustitiâ, esse Ecclesiæ membra. E contra fatendum erit, plures idololatrias, qui nihil unquam audierunt de Christo, plures Judæos, qui cum Saulo Ecclesiam Dei persequuntur, esse veræ Ecclesiæ membra; scilicet plurimi, tum ex idololatriis, tum ex Judæis, licet nondum credant, sunt è prædestinatorum numero. 2. Ecclesia in eo systemate erit omninò invisibilis; oves non poterunt cognoscere legitimos suos pastores, nec vicissim pastores suas oves; neque enim oves scire possunt, quinam ex iis, qui externo pastore funguntur, sint è prædestinatorum numero; nec vicissim pastores, quænam ex ovibus, à quibus audiuntur, ad eum numerum pertineant. 3. Infideles, non nisi temerariò nomen Ecclesiæ dare poterunt; quippè, quòd nullis omninò signis cognoscere poterunt, quænam & ubi sit vera Ecclesia; neq; enim aliquibus indiciis detegere poterunt, quinam & ubi sint illi homines prædestinati, qui soli (ut adversariis placet) vera sunt Ecclesiæ membra.

Objicies 1. Vera Christi Ecclesia adumbratur
horto

horto concluso, fonte signato, puteo aquæ viventis, de quibus Scriptura loquitur Canticum cap. 4. Atqui in illo horto, fonte, puteo soli prædestinati reperiuntur; ergo soli prædestinati pertinent ad veram Christi Ecclesiam. Minor propositio ostenditur autoritate Augustini, qui lib. 5. de Baptismo, cap. 26. locum illum de solis prædestinatis exponit: *Numerus ergo ille iustorum, qui secundum propositum vocati sunt sancti, de quibus dictum est: Novit Dominus, qui sunt ejus; ipse est hortus conclusus, fons signatus, puteus aquæ vivæ.* Inde verò Sanctus Doctor concludit, multos ad veram Christi Ecclesiam pertinere, qui in hæresibus, imò & in idololatriâ turpiter vivunt: *Sunt quidam ex eo numero, qui adhuc nequiter vivant, aut etiam in hæresibus, vel in gentiliū superstitionibus jaceant; & tamen etiam illic novit Dominus, qui sunt ejus.* Idem S. Pater lib. 3. de doctrinâ Christianâ, cap. 32. asserit, eos, qui non sunt prædestinati, non esse ex vero, sed tantum ex simulato corpore Christi: *Secunda (inquit agens de Tichonii regulis) est de Domini corpore bipartito, quod quidem non ita debuit appellari. Non enim revera Domini corpus est, quod cum illo non erit in æternum. Sed dicendum fuit, de Domini corpore vero, atque permixto, aut vero, atque simulato, vel quid aliud, quia non solum in æternum, verum etiam nunc hypocritæ, non cum illo esse dicendi sunt, quamvis in ejus esse videantur Ecclesia: Ergo, ex Augustino, Ecclesia constat ex solis prædestinatis.*

Resp. ad 1. neg. min. Ad 2. conc. ant. dist. conseq. Ergo, ex Augustino, Ecclesia quantum ad esse finale, constat ex solis prædestinatis, conc. conseq. quantum ad esse formale, aut quantum ad esse materiale, neg. conseq. Esse finale Ecclesiæ est status patriæ, in quo haud dubiè soli prædestinati reperiuntur. Esse formale est status viæ, sed cum charitate conjunctus;
nem-

nempe *charitas* est forma, seu anima Ecclesiæ. Esse materiale, est idem viæ status, sed destitutus *charitate*: in isto sunt iniqui omnes, licet sint ex prædestinatorum numero. Augustinus *locis* in argumento relatis Ecclesiam sumit in priore existibus sensibus, non autem in posterioribus; indèque concludit, nimis probare argumentum, quod ex laudato Canticorum textu Cyprianus sumpserat pro nullitate baptismatis extra Ecclesiam dati. Textus ille (rationatio est Augustini) intelligitur de prædestinatis: ergo si faveret Cypriano, probaret, baptismum à non prædestinatis datum, irritum esse; quod tamen negabat ipse Cyprianus: *Hoc intelligere non audeo* (inquit Augustinus) *in avaris & fraudatoribus, & raptoribus, & feneratoribus, & ebriosis, & invidis, quos tamen cum iustis baptismum habuisse communem, cum quibus communem non habebant utique charitatem, ex ipsius Cypriani litteris, sicut sæpè commemoravi, uberius discimus & docemus.*

Confirmatur responsio. Augustinus ibidem asserit, non hortum simpliciter, sed hortum conclusum esse illam Ecclesiam, de quâ ipse laudato loco loquitur; illum autem hortum conclusum dicit esse, quasi lilium inter spinas: ergo quemadmodum spinæ, licet non sint in lilio, sunt tamen in horto; ita reprobi, qui fidem exterius profitentur, sunt in Ecclesiâ, quam ille hortus adumbrat, quamvis non sint in lilio, hoc est, è numero prædestinatorum: Nam dicat mihi aliquis (inquit S. Doctor) quomodo irrepperint in hortum conclusum, & fontem signatum, quos sæculo solis verbis, & non factis renunciasse, Cyprianus, & tamen intus fuisse, testatur? An istæ sunt spinæ, in quarum medio est illa (Ecclesia prædestinata) sicut lilium, quod in eodem Cantico dicitur?

Objicies 2. Arca Noe adumbravit veram Christi Ecclesiam, ut docet Augustinus lib. 5. de baptif-

tismo cap. 18. Ergo quemadmodum in arcâ Noe non fuerunt, nisi ii, qui à diluvio salvi facti sunt; ita non sunt in Ecclesiâ, nisi ii, qui salutem consequi debent; ii verò sunt soli prædestinati: ergo, &c.

Resp. conc. ant. neg. conseq. In hoc nimirum valet Ecclesiæ cum arcâ Noe comparatio, quòd quemadmodum nullus à diluvio salvatus est, nisi per arcam; ita nullus salutem consecuturus est, nisi per Ecclesiam, hoc est, qui in Ecclesiæ sinu sacramenta non receperit: *Sicut ergo* (inquit Augustinus solvens argumentum Cypriani petitum ex Ecclesiæ cum arcâ comparatione) *non alia, sed eadem aqua, & in arca positos salvos fecit, & extra arcam positos interemit; sic non alio, sed eodem baptismo, & boni Catholici, salvi fiunt, & mali Catholici, vel hæretici pereunt.*

Objicies 3. Ii tantum sunt in Ecclesiâ, qui sunt filii Dei: Atqui soli prædestinati, sunt filii Dei: *Ex nobis exierunt* (verba sunt primæ Joannis cap. 1.) *sed non erant ex nobis; nam si fuissent ex nobis, mansissent utique nobiscum.*

Resp. 1. neg. maj. Ratio est, quia (ut dicitur inferius) gravissimi quidam peccatores verè sunt in Ecclesiâ sumptâ secundum suum esse materiale, quamvis non sint filii Dei, hoc est, quamvis charitate sint destituti. Resp. 2. neg. min. Ratio est, quia in laudato ex Joanne loco loquuntur, non qui justi sunt simpliciter, sed qui prætereà sunt prædestinati; unde ii, qui non perseverant, non sunt filii Dei secundum esse finale; sed sunt secundum formale, eò quòd habeant formam divinæ filiationis, quæ est charitas, seu gratia sanctificans.

ARTICULUS II.

Vtrum soli baptizati sint in Ecclesia.

Not. 1. Certum est, infideles, qui non sunt baptizati, ad Ecclesiam non pertinere; nam Paulus 1. ad Corinth. 5. apertè testatur, eos non intus, sed extra Ecclesiam esse: *Quid enim mihi (inquit) de iis, qui foris sunt, judicare?*

Not. 2. Dubitarunt nonnulli, an Catechumeni ad Ecclesiam pertineant. Illud verò dubium nitebatur Ecclesiæ praxi, quæ pro Catechumenis mortuis sine baptismate actu recepto, quondam offerebat Missæ sacrificium.

CONCLUSIO. Catechumeni non sunt actu in Ecclesiâ.

Probatur 1. ex Scripturâ. Actorum 2. hæc habentur: *Qui ergo receperunt verbum, baptizati sunt, & appositæ sunt in die illa animæ circiter tria millia.* Ea autem verba: *Appositæ sunt*, significant ingressum in Ecclesiam: ergo illi homines, antequam baptizarentur, licet jam crederent, nondum erant in Ecclesiâ.

Probatur 2. ex Patribus. Catechumeni nusquam à Patribus fidelium nomine vocati sunt; imò semper ab eis distincti fuere. Tertullianus libro de Præscript. hæreticis vertit crimini, quòd Catechumenos à fidelibus non distinguerent. Chrysostomus hom. 24. in Joannem, docet, Catechumenum nihil habere cum fidelibus commune.

Probatur 3. ratione Theologicâ. Ecclesia, ex dictis superiùs, est cætus fidelium sub legitimis pastoribus, & eorundem sacramentorum communionem, sub capite Christo, Deo servientiam. Atqui id Catechumenis non convenit, tum quòd (ut dictum est) Catechumeni non sint fideles, tum quòd sacramentorum communionem

466 Instit. Theolog. Prolegomena.
cum Ecclesiæ membris colligati non sint.

Objicies. Illi sunt actu in Ecclesiâ, qui salutem consequuntur; neque enim quisquam potest extra Ecclesiam salvari: Atqui catechumeni salvantur, quippè pro iis offertur sacrificium, quamvis baptismum actu non susceperint.

Resp. neg. maj. Nam ut quis salutem consequatur, non requiritur absolutè, ut actu sit in Ecclesiâ; sed satis est, ut sit in eâ per sincerum cordis desiderium, nec per eum stet, quin in eam actu per baptismum ingrediatur.

Instabis. Illi sunt actu in Ecclesiâ, qui habent Ecclesiæ formam, seu animam, hoc est, charitatem: Atqui Catechumeni habent charitatem, cum, licet non sint baptizati, salvari possint.

Resp. neg. maj. Scilicet satis non est informari animâ Ecclesiæ, ut quis sit in ejus sinu; sed præterea necesse est, ut sit in ejus corpore, hoc est, ut per visibilem eorundem sacramentorum communionem cum fidelium societate conjunctus sit.

ARTICULUS III.

Utrum vera Ecclesia ex solis justis constet.

Not. 1. Affirmativam sententiam propugnant quidam heterodoxi recentiores, ut patet ex hujusce articuli paragrapho primo. Negativam è contra defendunt catholici; quippè contendunt, peccatores omnes, sive sint occulti, sive publici, esse in Ecclesia, donec ab eâ, aut per excommunicationem ejiciantur, vel ipsi ab eâ voluntariè per schisma, aut hæresim, aut apostasiam discedant.

Not. 2. Aliqui possunt voluntariè ab Ecclesiâ discedere, vel interiùs tantùm, ita ut propter motivum temporale fidem, quam corde abnegarunt, exteriùs profiteantur; vel interiùs simul & exteriùs,

rius, ita ut nec corde, nec opere sese fideles exhibeant.

Not. 3. Ecclesia duobus modis considerari potest, vel secundum esse formale, seu animam, quæ est charitas; vel secundum esse materiale, seu corpus, quod est fidei professio conjuncta cum eorumdem sacramentorum communione. His præmissis, difficultas, de quâ agitur, triplici conclusione solvenda est.

CONCLUSIO 1. Soli justi sunt in Ecclesiâ secundum esse formale, tum secundum esse materiale sumptâ.

Probatur. Soli justi habent Ecclesiæ formam, seu informantur illius animâ, quæ non aliud est, quàm charitas: Præterea cum cæteris fidelibus conjunguntur per visibilem sub legitimis pastoribus sacramentorum participationem.

CONCLUSIO 2. Non soli justi, sed gravissimi etiam peccatores, sive sint occulci, sive sint publici, sunt in Ecclesiâ secundum esse materiale sumptâ, si fidem exterius non negaverint.

Probatur 1. Ecclesia sumpta secundum esse materiale, est societas hominum, qui sub legitimis pastoribus, Christi fidem profitentur, & eorumdem sacramentorum participatione inter se colligantur. Atqui peccatoribus, de quibus agitur, id convenit: ergo sunt in Ecclesiâ quoad esse materiale, seu secundum visibile suum corpus, sumptâ.

Probatur 2. Illi sunt in Ecclesiâ, qui possunt ejici ex Ecclesiâ: atqui peccatores, de quibus agitur in conclusione, possunt ejici ex Ecclesiâ. Et quidem *primò*, ejici possunt, qui correpti ab Ecclesiâ, eam audire noluerint: *Si peccaverit in te frater tuus, vade, corripe eum, &c. Si eos non audierit, dic Ecclesiæ: si Ecclesiam non audierit, sit tibi velut ethnicus, & publicanus;* verba sunt Christi apud Matthæum cap. 18. *Secundò*, re ipsa incestuosus Corinthius ex Ecclesiâ propter infandum suum crimen ejectus est ab Apostolo: *Auditur* (inquit 1. ad Corinth. 5.) *inter vos for-*

ni-

nicatio, & talis fornicatio, qualis nec inter gentes, ita ut uxorem patris sui aliquis habeat. Et vos inflati estis, & non magis luctum habuistis, ut tollatur de medio vestrum, hoc est, de Ecclesiâ, qui hoc opus fecit. Ego quidem absens corpore, præsens autem spiritu, jam judicavi ut præsens eum, qui sic operatus est, in nomine Domini nostri Iesu Christi, congregatis vobis & meo spiritu, cum virtute Domini nostri Iesu Christi, tradere huiusmodi sathanæ in interitum carnis.

Probatur 3. Constans fuit semper Ecclesiæ traditio, peccatores, de quibus agitur, esse in Ecclesiâ.

Tertullianus, Cyprianus, aliique omnes, qui datum ab hæreticis baptisma censuerunt irritum esse, constanter supposuerunt valere datum peccatoribus, de quibus est quæstio. Hanc enim protulerunt discriminis rationem, quod hæretici non sint in Ecclesiâ, è contra in ea reverà sint adulteri, homicidæ, aliique peccatores, de quibus agitur in conclusione.

Augustinus & alii Episcopi Catholici in collatione, quam Chartagine cum Donatistis habuerunt, hæc tria probare conati sunt. *Primum*, Cæcilianum à Traditore (ut Donatistæ contendebant) ordinatum non fuisse: *Secundum*, quod licet id supponeretur, non sequeretur tamen periisse Ecclesiam, quæ cum Cæciliano communicaverat: *Tertium*, ideò autem non periisse, quod Ecclesia, quæ militat in terris, non ex iustis tantum, sed etiam ex iniquis constet. Idque etiam confessi sunt 296. Episcopi Donatistæ, ut hisce verbis docet Augustinus Breviculo collationis diei tertiæ: *Cum ad Evangelicam similitudinem venissent, quam Catholici in mandato suo posuerant de retibus in mare missis, quibus congregari dixit Dominus omnia genera piscium, & bonos à malis in litore, hoc est, in fine sæculi separari; etiam ipsi fassi sunt in Ecclesia esse permixtos saltem oculos malos.* Idem S. Doctor,

Et or, latè illud argumentum profèquitur libro de unitate Ecclesiæ cap. 14. *Innumerabilia (inquit) testimonia de mixtione malorum cum bonis in eadem communione sacramenti In Canticis Cantico- rum , quod de Ecclesia sancta dictum omnis Chri- stianus agnoscit : Sicut lilium in medio spinarum, ita proxima mea in medio filiarum . Unde appel- lat spinas , nisi propter malignitatem morum ? & easdem unde filias , nisi propter communionem sa- cramentorum ?* Ejusdem libri cap. ult. idem hi- scè verbis docet : *Tunc quisque infructuosus & nondum à radice præcisus est , cum mala cupidita- te agit quidem illa opera , de quibus dictum est : Quoniam qui talia agunt , regnum Dei non possi- debunt .*

Hieronymus in dialogo adversùs Luciferianos ait , quòd sicut in arcâ Noe fuerunt pardus , hæ- di, lupi & agni ; ita & hîc , hoc est in Ecclesiâ , cu- jus, ex ipso Hieronymo, arca Noe fuit typus , ju- sti & peccatores reperiuntur .

Fulgentius lib. de fide ad Petrum cap. 45. af- ferit, de fide esse , quòd mali cum bonis in Christi Ecclesiâ permisceantur. Idem pluribus argumen- tis demonstrat Gregorius Magnus homil. 38. in Euangelia.

CONCLUSIO 3. Occulti infideles ; hoc est, qui interiùs contradicunt fidei articulis , si baptizati sint , & in externâ cum fidelibus com- munionem sub legitimis pastoribus permaneant , sunt in Ecclesiâ.

Probatur . Ii sunt in Ecclesiâ , qui jurisdictionem habent in Ecclesiam ; neque enim probabile est eum, qui est extra Ecclesiam, habere aliquam in fideles jurisdictionem ; ideò enim Patres con- tenderunt, hæreticos, hoc est, hæresim palâm pro- fitentes , nihil omninò auctoritatis habere , quòd foris sint, non intùs . Ita ratiocinantur Cyprianus lib. 1. epist. 6. Ambrosius libro 1. de Pœnitent. Hieronymus in dialogo adversùs Luciferianos , Augustinus in Enchyridio cap. 65. ubi ait, extra Ec-

Ecclesiam non remitti peccata : Atqui infideles occulti, de quibus in conclusione, habent jurisdictionem in Ecclesiam : Scilicet Parochi, Episcopi, ligare possunt & solvere, quamvis interius fidei contradicant; nec excidunt ex suo jure, nisi cum præbuerunt manifesta infidelitatis argumenta.

Confirmatur argumentum ex Augustino, qui lib. 3. de Baptis. cap. 29. asserit, pseudochristianos, qui fraternæ charitatis sunt inimici, *foras* exire, ubi se dederit occasio; at *foras* exire non potuerunt, qui *intus* non erant.

Objicies 1. Illi non sunt in Ecclesiâ, qui non pertinent ad corpus Christi: sed impii non pertinent ad corpus Christi, cum non habeant ejus spiritum: *Qui spiritum Christi non habet* (ait Apostolus) *hic non est ejus.*

Resp. dist. min. Impii non pertinent ad corpus Christi sumptum secundum esse formale, seu formam, hoc est, charitatem, per quam vivit & informatur, conc. min. sumptum secundum esse materiale, neg. min. Solutio patet ex dictis superius.

Objicies 2. Impii se habent Ecclesiæ respectu sicut paleæ respectu panis: *Vnus panis* (ait Paulus 1. ad Cor. 10.) *& unum corpus multi sumus*: Atqui paleæ non pertinent ad panem: ergo neque impii pertinent ad Ecclesiam.

Resp. neg. maj. Nempè in eo valet similitudo fidelium cum pane, quòd sicut multa frumenti grana unum panem efficiunt; ita baptismus ex pluribus hominibus unam societatem efficiat.

Objicies 3. Ecclesia sancta est; id nimirum profiteamur in symbolo: ergo impii non sunt in illius sinu.

Resp. dist. ant. Sancta est quoad plura sui membra, conc. ant. quoad omnia, neg. ant. Cum denominatio sumatur à nobiliori parte, par est, ut Ecclesia, sancta dicatur à sanctis, quos in suo sinu fovet, quamvis minor sit sanctorum, quàm ini-

iniquorum numerus . Præterea aliis etiam modis, de quibus infra dicetur , sanctitas Ecclesiæ convenit.

Objicies 4. Qui non habent Deum pro Patre, non possunt habere Ecclesiam pro Matre; sed impii Deum non habent pro Patre, sed diabolum , dicente Christo: *Vos ex patre diabolo estis*. Verum qui non habent Ecclesiam pro Matre, non sunt in Ecclesiâ: ergo, &c.

Resp. dist. maj. Qui nullo modo habent Deum pro Patre, non possunt Ecclesiam habere pro Matre, conc. maj. qui habent aliquo modo, neg. maj. Impii, seu, qui non sunt in statu gratiæ sanctificantis, habent Deum pro Patre, non quidem per imitationem, sed ratione generationis; nam revera à Christo geniti sunt in Ecclesiæ sinu; ac proinde ratione ejusdem generationis habent Ecclesiam pro Matre. Illis eo quidem titulo deberetur hæreditas æterna, sed cum generationem suam vitiis deturpaverint, exciderunt ex jure, quod ad eam habebant; unde de iis sic Ecclesia conqueritur Isaïæ 1. *Filios enutrivimus & exaltavi, ipsi autem spreverunt me*.

Objicies 5. Augustinus libro de Unitate Ecclesiæ cap. 25. multa docet, quibus evincitur, infideles occultos, licet in Ecclesiâ baptizati sint, & cum fidelibus in externâ sacramentorum communione permaneant, non esse Ecclesiæ membra. Afferit 1. cum omnem, qui veritati contradicit, ipsâ contradictione præscindi ab Ecclesiâ: *Sed (inquit) cum pro ipsis operibus, etiam veritati apertissime, quæ redarguitur, resistere cæperit, tunc præciditur*. Afferit 2. illam præcisionem fieri etiam in homine, qui externâ sacramentorum communione fruatur: *Multi tales sunt in sacramentorum communione cum Ecclesia, & tamen jam non sunt in Ecclesia*. Afferit 3. præcisum non fieri Ecclesiæ membrum, si fictus reconciliationis ritui exterius se subjiat: *Quid si ergo fictus accedat, atque adversus veritatem, & Ecclesiam cor*

inimicissimum gerat, quamvis peragatur in illo ea solemnitas, numquid reconciliatur, numquid inseritur? Absit.

Resp. ad 1. neg. ant. nempe per baptismum, externam fidei professionem, exhibitam legitimis pastoribus obedientiam, sacramentorum communionem, infidelis occultus unitur veris Ecclesiæ membris. Ad 2. dico, Augustinum loqui de contradictione manifestâ, non autem de occultâ. Ad 3. dicendum est, textum illum intelligi de insertione, & reconciliatione quoad fructû; neque enim ille hypocrita quidquam emolumentum percipit fictâ suâ reconciliatione; membrum est aridum, insertum quidem corpori, sed vitâ, & qualibet actione sibi propriâ destitutum.

Objicies 2. Infideles occulti, sunt vel pagani, vel judæi, vel hæretici: atqui nec pagani, nec judæi, nec hæretici sunt in Ecclesiâ: ergo, &c.

Confirmatur argumentum: Baptizatus, qui liberè adhæret, aut paganorum, aut judæorum, aut hæreticorum erroribus, est ipso jure excommunicatus: Sed excommunicatus non est in Ecclesiâ: ergo neq; qui aut gentilem, aut judaicum, aut hæreticum animum gerit, licet exterius fidem catholicam profiteatur.

Resp. veram esse minorem, si intelligatur de paganis, judæis, hæreticis publicis; falsam verò, si intelligatur de occultis: Idem dici debet de excommunicatis, si sint occulti; secus si sint publici. Ratio solutionis est, quia hypocritæ, de quibus agitur in argumento, excommunicati, de quibus est quæstio, si sint Episcopi, aut Parochi, aut simplices presbyteri, non desinunt, etiam quoad potestatem jurisdictionis, esse veri Episcopi, veri Parochi, veri Sacerdotes; unde quamdiù tolerati fuerint ab Ecclesiâ, hoc est, quamdiù contra eos depositionis sententia lata non fuerit, fideles debent cum eis communicare, & licitè possunt ab eis sacramenta recipere; ut in Concilio Constantensi definitum est.

AR-

ARTICULUS IV.

Vtrum publici hæretici, manifesti schismatici sint in Ecclesia.

Not. 1. Per publicos hæreticos, intelligimus eos, qui palàm adhærent erroribus, quos norunt ab Ecclesiâ expressè fuisse damnatos; sive exteriùs in sacramentorum participatione, ac reliquis Christianæ religionis officiis communicent cum aliquâ societate Christianâ, sive non communicent. Per publicos schismaticos intelliguntur ii, qui publicè rebelles sunt in legitimos pastores, sive contra eos Altare erexerint, sive non erexerint.

Not. 2. Quidam recentiores Calvinistæ, inter quos Jurius, docent, publicos hæreticos, manifestos schismaticos, esse in verâ Christi Ecclesiâ, ac salutem posse consequi, in quâcumque sint sectâ, quibuscumque pastoribus adhæreant, modò ea secta, modò ii pastores profiteantur fundamentales (ut loquuntur) christianæ fidei articulos. Nèpè contendunt, veram Christi Ecclesiam, non esse individuum aliquam societatem, sed congeriem omnium sectarum, quæ fundamentales (ut aiunt) fidei articulos non everterint, quamvis illæ sectæ ita à se invicem separatæ sint, ut sese mutuò anathemate confodiant.

Not. 3. In eam verò sententiam abierunt Calvinistæ duplici de causâ: 1. ut suorum pastorum missioni consulerent: 2. ut liberarent se anathematis vinculo, quod Ecclesia in eos intorsit. Ecclesia Romana (inquiunt) priores nostros reformatores aluit in suo sinu, eis Evangelicum ministerium credidit; accepto autem in Ecclesiâ Romanâ jure non exciderunt, discedendo ab illius communione, & altare contra ipsam erigendo; quippè divina missio legitimum ministerium

conservantur, in quâlibet societate, quæ fundamentales fidei articulos profitetur, quamvis ab eâ ex quâ se ipsam separavit, anathemate confixa sit. Præterea (inquiunt) licet Ecclesia Romana nostris dogmatibus opponat œcumenica Concilia, nos ejusmodi Conciliorum non ducimus haberi debere rationem, quia non sunt Concilia, ad quæ omnes societates Christianæ convenerint; ac proinde non sunt infallibilia, cum non sint Concilia œcumenica, hoc est, quæ totam Ecclesiam Christianam repræsentent.

Not. 4. Una omnium est Catholicorum vox extra Ecclesiam esse manifestos hæreticos, publicos schismaticos, ac eos omnes, qui aut propugnant errores, quos sciunt ab Ecclesiâ apertè damnatos, aut qui legitimis pastoribus subesse detrectant, sive cum sectis aliquibus communione colligentur, sive non colligentur, sive ii errores ex iis sint, quorum explicita fides est necessitate medii necessaria ad salutem, sive sint ex iis, quorum fides est necessaria solâ necessitate præcepti.

Not. 5. Hoc principio nititur mox relatâ Catholicorum doctrina, quod vera Christi Ecclesia sit unica & individualis societas, cujus membra eorumdem articulorum definitorum fide, eorumdem sacramentorum participatione, eorumdem pastorum communione inter se colligata sunt.

CONCLUSIO. Publici hæretici, manifesti schismatici non sunt in verâ Christi Ecclesiâ, ac proinde salutem consequi non possunt.

Probat^{ur} 1. Illi non sunt in Ecclesiâ, quos nullus christianus per sexdecim priora sæcula credidit esse in Ecclesiâ: atqui nullus christianus per sexdecim priora sæcula credidit, publicos hæreticos, manifestos schismaticos esse in verâ Christi Ecclesiâ: ergo reverâ in eâ non sunt. Major propositio videtur evidens: Quod enim nemo credidit per sexdecim priora sæcula, decimo septimo non potest esse articulus fidei; siquidem ut quid sit articulus fidei, debet esse revelatum: id autem quod

quod nemo per tot sæcula credidit, non fuit revelatum; nempe in Ecclesiâ non sunt novæ revelationes, sed id totum, quod ad fidem & mores pertinet, fuit Apostolis revelatum, juxta illud Scripturæ: *Ille (Spiritus Sanctus) docebit vos omnia*. Minor verò propositio sic ostenditur: Illud per sexdecim priora sæcula non fuit creditum, quod non fuit auditum; fides enim (Apostolo teste) est ex auditu: atqui per sexdecim priora sæcula non fuit auditum, publicos hæreticos, manifestos hæreticos esse in Ecclesiâ; scilicet id non fuit auditum, quod non fuit prædicatum: atqui à nemine per illud sæculorum spatium prædicatum fuit publicos hæreticos; manifestos schismaticos esse in Ecclesiâ; neque enim in Patribus, qui iis sæculis vixere, reperitur aliquid, quo probetur, illos prædicasse articulū, de quo agitur: ergo, &c.

Probatur 2. Tantū abest, ut aliquis per sexdecim priora sæcula docuerit, publicos hæreticos, & manifestos schismaticos esse in Ecclesiâ, quin potius omnes ab eâ illos excluderint.

Primò, quoties Patres verbum, *Ecclesia*, simpliciter ac sine addito protulerunt, semper intellexerūt societatem, ex quâ publici hæretici & manifesti schismatici exclusi essent: ergo, &c. Antecedens subsequētibz momentis sic ostenditur.

Irenæus lib. 3. adversus hæreses cap. 4. hæc habet: *Tantæ igitur ostensionis cum sint hæc, non oportet adhuc (de hæreticis loquitur) quærere inter alios veritatem, quam facile est ab Ecclesiâ sumere, cum Apostoli, quasi in depositarium dives, plenissimè in ea contulerint omnia, quæ sunt veritatis, ut omnis quicumque velit, sumat ex ea potum vitæ. Hæc est enim vitæ introitus; omnes autem reliqui, fures sunt & latrones, propter quod oportet devitare quidem illos; quæ autem sunt Ecclesiæ, cum magna diligentia diligere, & apprehendere veritatis traditionem. Evidens est, Irenæum eo in loco opponere Ecclesiam sectariis, quos postea hæreticos appellât, propriisq; nominibus*

exprimit, atque specialiter de Marcione, quòd sæpè in Ecclesiam veniens, & exomologesim faciens, in his, quæ dicebat malè, abstentus sit. Ergo Iræneus Ecclesiæ nomine intellexit societatem, à quâ hæretici ac schismatici essent exclusi.

Tertullianus libro de Præscriptionibus cap. 4. scribit hæreses persequi Ecclesiam: *Hoc erunt (inquit) hæreses non minùs doctrinarum perverseitate Ecclesiam laceffentes, quàm tunc Antichristus persecutionum atrocitate persequetur*; unde sic arguitur: Illi excluduntur ab Ecclesiâ, qui eam persequuntur: atqui, ex Tertulliano, hæretici Ecclesiam persequuntur: ergo hæretici excluduntur ab Ecclesiâ.

Clemens Alexandrinus Stromatum lib. 7. pag. 765. sic loquitur: *In unius ergo naturæ sortem cooptatur Ecclesia, quæ est una, quam conantur hæreses in multas discindere*. Ex quibus verbis sic conficitur argumentum: Ille excludit hæreticos ab Ecclesiâ, qui asseruit, hæreticos conari eam in multas Ecclesias discindere: atqui (ut ex mox laudato textu patet) Clemens Alexandrinus id asseruit: ergo, &c.

Hilarius lib. 7. de Trinitate cap. 12. hæc habet in eundem scopum: *Hæretici omnes contra Ecclesiam veniunt, sed dum hæretici omnes se invicem vincunt, nihil tamen sibi vincunt; victoria enim eorum, Ecclesiæ triumphus ex omnibus est*. Hincque sic conficitur argumentum: Ille publicos hæreticos, & manifestos schismaticos excludit ab Ecclesiâ, qui asseruit hæreticos venire contra Ecclesiam, eorum à se invicem victoriam, non illorum esse, sed Ecclesiæ: atquid id asseruit Hilarius: ergo, &c.

Hieronymus adversùs Luciferianos, sub finem, sic loquitur: *Sicubi audieris eos, qui dicuntur Christi, non à Domino Iesu Christo, sed à quocumque alio nuncupari, utpotè Marcionitas, Valentiniānos, Montenses, sive Campitas; scito non*

non Ecclesiam Christi, sed Antichristi esse synagogam. Qui docuit hæreticos, ipsos etiam Montanenses, sive Montanistas, non esse Ecclesiam Christi, sed Antichristi synagogam, exclusit hæreticos à verâ Ecclesiâ : atqui id docuit Hieronymus : ergo, &c.

Quod Patres egerunt in privatis suis scriptis, idem præstiterunt ad synodos adunati, seu hæreticos ac schismaticos excluderunt ab Ecclesiâ.

Concilium Laodicænum canone 9. vetat iis, qui sunt in Ecclesiâ, ne ad hæreticorum cæmeteria, vel ad ea, quæ ab eis martyria appellantur, orationis causa, vel sanitatis, accedant. Canone 10. edicit, non oportere eos, qui sunt Ecclesiæ, indiscriminatim suos filios hæreticis matrimonio conjungere. Eos igitur, qui sunt in Ecclesiâ, distinguit ab hæreticis; ac proindè hæreticos exclusit ab Ecclesiâ.

Concilium Constantinopolitanum I. non minùs apertè sumit Ecclesiam in sensu hæreticorum exclusivo : *Hæreticos autem dicimus* (verba sunt Canonis 6. Gentiano Herveto interprete) *& qui olim ab Ecclesia abdicati sunt, & qui sunt postea à nobis anathematizati; ad hæc autem & eos, qui se sanam quidem fidem confiteri præseferunt, avulsi autem sunt & abscissi, & adversus Canonicos nostros Episcopos congregationem faciunt.* In ea autem verba notandum est 1. Concilium hæreticos & schismaticos opponere Ecclesiæ. Notandum est 2. ipsum hæreticorum nomine non intelligere tantùm eos, qui negant, aut Trinitatis, aut Incarnationis mysterium; sed omnes sectarios, qui ab Ecclesiâ abdicati sunt; ac proindè Montanistas & Novatianos, qui circa illa mysteria nusquam errarunt. Vide septimum ejusdem Concilii Canonem, in quo Montanistæ & Novatiani recensentur inter hæreticos, quos adhibito quodam externo ritu in Ecclesiam admitti debere decernit.

Concilium Ariminense sic, cum adhuc esset

catholicum, in Valentem & Ursacium protulit depositionis sententiam: *Detrahantur ab Ecclesia, ut Catholica Ecclesia in pace permaneat.* Synodus quæ iussit, ut Valens & Ursacius detraherentur ab Ecclesiâ, non censuit, eos post eam de tractionem, adhuc esse in Ecclesiâ: atqui, &c. ergo, &c.

Concilium Chartaginense IV. canone 71. prohibet, ne hæreticorum conventicula appellentur Ecclesiæ nomine: Illi igitur persuasum fuit, hæreticos non esse in Ecclesiâ.

Quinta Synodus generalis, actione 3. sic loquitur: *Hæc igitur recta confessione in sancta Dei Catholica & Apostolica Ecclesia servanda & prædicanda: Si quis semetipsum ab ejus communione separet, contraria ei sapiens, talis semetipsum alienans rectæ fidei, & hæreticis communicans, justè à sancta Dei Ecclesia condemnatur & anathematizatur.* Unde sic arguitur: Qui condemnantur & anathematizantur ab Ecclesiâ, non sunt in Ecclesiâ: Atqui hæretici, & ii, qui seipso illis adjungunt, condemnantur & anathematizantur ab Ecclesiâ: ergo, ex quintâ Synodq generali, non sunt in Ecclesiâ.

Secundò, Patres veram Christi Ecclesiam vocarunt Ecclesiam Catholicam: atqui ab Ecclesiâ Catholicâ excluderunt omnes publicos hæreticos, & omnes manifestos schismaticos: ergo, &c. Minor propositio, in quâ positus est difficultatis cardo, ipsismet Patrum textibus ostenditur.

Tertullianus Catholicam opponit hæresibus; hæc enim habet libro de Præscriptionibus cap. 30. *Constat* (inquit de Valentino & Marcione) *in Catholica primò doctrinam credidisse apud Ecclesiam Romanensem, donec ob inquietam semper eorum curiositatem... semel & iterum ejecti, &c.*

Concilium Nicænum I. in suo symbolo hisce verbis exprimit eorum damnationem, qui cōtendebant, Verbum non esse consubstantialiale Patri:

Ana

Anathematizat Catholica & Apostolica Ecclesia ; ea autem verba omni carerent sensu , si Catholica nomen, ipsis etiam hereticorum synagogis cōveniret . Canone 8. idem Concilium manifestè supponit, Novatianos non fuisse in Ecclesiâ Catholicâ, imò ab eâ fuisse reverà separatos ; hæc enim habet : De his , qui se nominant Catharos , id est , mundos , si aliquando venerint ad Ecclesiam Catholicam , placuit sancto & magno Concilio , ut impositionem manus accipientes , sic in Clero permaneant . Hæc autem præ omnibus eo scriptis convenit profiteri , quòd Catholica & Apostolica Ecclesiæ dogmata suscipiant , & sequantur .

Concilium Constantinopolitanum I. eâdem, quâ Nicænum I. ratione sumit *Catholica* nomen cum canone 7. decernit, Arianos, Macedonianos, Novatianos, hæc lege recipi debere : *Omnem hæresim anathematizantes , quæ non sentit ut sancta Dei Catholica & Apostolica Ecclesia .*

Catholicæ nomen ita prioribus sæculis proprium erat veræ Ecclesiæ , sumptæ pro societate, quæ hæreticos & schismaticos excludit , ut ipsi etiam heretici conventiculis suis nomen illud tribuere non auderent : Tenenda est nobis (inquit Augustinus lib. de verâ religione , cap. 6.) Christiana religio , & ejus Ecclesiæ communicatio , quæ Catholica est , & Catholica nominatur , non solum à suis , verum etiam ab omnibus inimicis . Velint enim , nolintve ipsi quoque hæretici & schismatum alumni , quando non cum suis , sed cum extraneis loquuntur , Catholicam nihil aliud , quàm Catholicam vocant . Non enim possunt intelligi , nisi hoc eam nomine discernant , quo ab universo orbe nuncupatur .

Tertiò , quæ adversarii respondent ad loca , quæ hucusq; tum ex Patribus , tum ex Conciliis prolata sunt , nullius omninò sunt ponderis ; nempe ajunt , ea intelligi debere de hæreticis , qui negant articulos fundamentales fidei ; non autem de iis , qui negant eos , qui nō sunt fundamentales . Ea

(inquam) solutio nullius omnino est ponderis: Nam 1. iis locis, in quibus Patres & Concilia hæreticos excludunt ex Ecclesiâ Catholicâ, nequaquam distinguunt inter hæreticos, qui negant articulos fundamentales, & eos qui negant non fundamentales; imò &e omnibus prorsus hæreticis absque exceptione loquuntur: *Omnem hæresim anathematizantes* (inquit Concilium Constantinopolitanum I. can. 7.) *quæ non sentit, ut sancta Dei Catholica & Apostolica Ecclesia*. Idem quoque patet ex canone 8. Concilii Nicæni I. ubi præscribitur, ut qui in Ecclesiam redeunt, omnia Ecclesiæ Catholicæ dogmata suscipiant. 2. Montanistæ, Novatiani, Quartodecimani, Sabbatiani, non negabant articulos fundamentales; neque enim aut circa Trinitatem, aut circa Incarnationem, aut circa Gratiâ errabant; sed tantum circa nonnulla capita, quæ aut ad disciplinam, aut ad Ecclesiæ potestatem spectabant; Montanistæ tamen, Novatiani, Quartodecimani, Sabbatiani ab Ecclesiâ exclusi sunt à Patribus, ut patet ex locis, quæ à nobis relata sunt. 3. Qui in Concilio Gangrensi canonibus 11. 12. 13. 17. 18. 19. anathemate damnantur, proindèque eiciuntur ex Ecclesiâ, non negabant articulos fundamentales, sed errabant tantum circa quædam disciplinæ capita, ut cuique laudatos canones legenti manifestum fiet. 4. Sectarii, qui articulos fundamentales à non fundamentalibus distinguunt, nullam aut ex Scripturâ, aut ex traditione regulam proferre possunt, per quam articuli fundamentales à non fundamentalibus distinguantur; ac proindè nullus, aut gentilis, aut judæus, aut hæreticus, qui voluerit dare nomen Ecclesiæ Catholicæ, scire poterit, ubinam sit Ecclesia Catholica; cum enim variæ Christianorum sectæ propter quædam dogmata in se invicem anathematis fulmen intorqueant, Gentilis ille, aut Judæus, aut Hæreticus cognoscere non poterit, an illa dogmata sint articuli fundamentales, an verò non

non fundamentales . Scilicet quælibet secta, putat dogmata, quæ damnat anathemate, esse fundamentalia; sic Arianis persuasum est, articulum de Consubstantialitate Verbi, quem Ecclesia Romana profitetur, esse errorem fundamentalem; sic etiam Nestoriani censent, articulum de hypostaticâ Verbi unionem cum naturâ humanâ esse errorem fundamentalem; & ita de cæteris hæreticis.

Solvuntur adversariorum argumenta.

Objicies 1. Hieronymus in dialogo adversus Luciferianos docet, justos & peccatores esse in Ecclesiâ: *Arca Noe* (inquit cap.8.) *Ecclesiæ typus fuit Ut in illa omnium animalium genera, ita & in hac universarum & gentium, & morum homines sunt: ut ibi pardus & hædi, lupus & agni; ita & hic justus & peccatores*: Atqui per justos & peccatores Hieronymus hic intelligit catholicos & hæreticos: ergo Hieronymus censuit catholicos & hæreticos esse veræ Ecclesiæ membra. Probatur min. Ille per peccatores intelligit hæreticos, qui ex eo, quod peccatores sint in Ecclesiâ, concludit, valere baptismum ab hæreticis datum; sed Hieronymus id reverâ concludit; nempe docet, Cyprianum, quod illū articulum ignoravit, seu in Ecclesiâ esse justos & peccatores, iterasse baptismum ab hæreticis datum: *Conatus est B. Cyprianus contritos lacus fugere, nec bibere de aqua aliena; & idcirco hæreticorum baptismum reprobandum, ad Stephanum tunc Romanæ urbis Episcopum, qui à Beato Petro vigesimus tertius fuit, super hac re Africanam Synodum direxit; sed conatus ejus frustra fuit.*

Resp. 1. nimis probare illud argumentum; nempe probat, Saturninum, Carpocratem, Cerinthum, Hebionem, aliosq; qui (ut loquuntur adversarii) negarūt fundamentales fidei articulos fuisse veræ Ecclesiæ membra. Scilicet ex eo, quod

injusti & peccatores sint in Ecclesiâ, Hieronymus concludit, baptisma ab illis hæreticis datum valuisse : *Ad eos (inquit) venio hæreticos, qui Evangelia laniaverunt, Saturninum quendam, & Ophitas, & Gnoitam, Carpocratem, & Cerinthus, & hujus successorem Hebionem, & cæteras pestes, quorum plurimi vivente adhuc Ioanne Apostolo eruperunt ; & tamen nullum eorum legimus rebaptizatum. At id est contra adversariorum systema, & contra apertam ipsiusmet Hieronymi sententiam, qui ad calcem libri adversus Luciferianos sic loquitur : Sicubi audieris, eos qui dicuntur Christi, non à Domino Iesu Christo, sed à quodam alio nuncupari, utputa Marcionitas, Valentinianos, Montenses, sive Campitas; scito, non Ecclesiam Christi, sed Antichristi esse synagogam.*

Resp. 2. concessâ majore, neg. min. Ad cujus probationem, neg. maj. Ratio est, quia ex suppositione, quod injusti & peccatores sint (ut fatebantur Luciferiani, cōtra quos agit Hieronymus) veræ Ecclesiæ membra, rectè sequitur, valere baptismum datum ab hæreticis ; nempe, si non valere (hæc erat ratio Luciferianorum, quam antea Cyprianus contra Stephanum agens protulerat) maximè quia hæretici, cum non habeant Spiritum Sanctum, cum vacui sint charitate, non possunt per baptismum conferre Spiritum sanctum, conferre charitatem, tribuere remissionem peccatorum : Sed (argumentum est Hieronymi, quo S. Augustinus, contra Donatistas agens, pariter usus fuit) illa ratio nulla est ; valet enim baptismum datum in Ecclesiâ ab impiis, qui, licet in ejus sinu existentes, nec charitatem, nec Spiritum sanctum habent : ergo valere debet datum etiam extra Ecclesiam ab iis, qui tum Spiritu sancto, tum charitate vacui sunt. Vide Augustinum lib. 6. de baptismo cap. 8. cap. 16. cap. 18.

Objicies . S. Basilii in epistolâ canonicâ ad Amphiloichium expressè docet, schismaticos esse in Ecclesiâ : ergo aliqui ex iis, qui anathemate dam-

damnantur, sunt veræ Ecclesiæ membra. Probatur ant. Ubi S. Basilius distinxit inter hæreses, schismata & illegitimos conventus, sic loquitur canone 1. *Visum est ergo antiquis, hæreticos quidem omninò rejicere: qui se autem absceiderunt, qui schismatici dicuntur, ut qui adhuc sint Ecclesiæ, admittere.*

Resp. 1. negando, Basilium eo sensu, quo à Calvinistis asseritur, docuisse, schismaticos esse veræ Ecclesiæ membra: Scilicet hodierni Calvinistæ eo sensu volunt, schismaticos esse veræ Ecclesiæ membra, quòd illi se conjungere non teneantur, quòd in suo schismate salutem consequi possint: Basilius verò contrarium expressè profitetur; hæc enim habet de Novatianis, qui circa præcipuos fidei articulos non errabant: *Cathari sunt & ipsi ex iis, qui sunt abscessi quoniam separationis quidem principium per schisma; qui autem se ab Ecclesia abjunxerunt, non habent amplius in se gratiam spiritus: Defecit enim traditio, quòd discissa sit consequentia. Qui enim primi recesserunt, ordinationem à Patribus habebant, & per manuum impositionem habebant spiritualem gratiam. Qui autem abrupti sunt, laici effecti, nec baptizandi, nec ordinandi habent potestatem, ut qui non possint amplius Spiritus sancti gratiam aliis quoque præbere, à qua ipsi exciderunt.*

Resp. 2. Basilium censuisse, schismaticos non re ipsa, sed tantum nomine tenus, esse in Ecclesiâ; nam expressè asserit, eos post pœnitentiam, admitti debere in Ecclesiam; docet, eos esse ab Ecclesiâ separatos: *Qui autem (inquit) se ab Ecclesia abjunxerunt, non habent in se amplius gratiam Spiritus;* indèq; idem Basilius concludit, eos non habere baptizandi potestatem. Verum cum ea Basilii loquendi ratio æquivocum sensum præbere videretur, eam correxit prius Concilium Constantinopolitanum; siquidem can. 6. schismaticos ad hæreticorum classem reducit: *Hære-*

ticos

eo erant mecum . Evangelium utrique legebamus , erant in eo mecum . Festa martyrum celebrabamus , erant ibi mecum . Paschæ solemnitatem frequentabamus , erant ibi mecum . In multis mecum , in paucis non mecum . Sed in his paucis , in quibus non erant mecum , non eis prosunt multa , in quibus mecum . 3. Idem S. Doctor libro de fide & symbolo rationem reddit , cur hæreticorum ac schismaticorum in aliquibus capitibus cum Ecclesiâ conjunctio , satis non sit , ut sint in Ecclesiâ ; ut quæ nobiscum habent communia , eis profint : Credimus (inquit cap. 10.) & sanctam Ecclesiam , utique Catholicam ; nam & hæretici , & schismatici congregationes suas Ecclesias vocant . Sed hæretici de Deo falsa sentiendo , ipsam fidem violant , schismatici autem discissionibus iniquis à fraterna charitate dissiliunt , quamvis ea credant , quæ credimus . Quapropter nec hæreticus pertinet ad Ecclesiam Catholicam , quæ diligit Deum , nec schismaticus , quoniam diligit proximum . 4. Non minùs clarè idem S. Augustinus libro de Unitatæ Ecclesiæ cap. 4. docet , conjunctionem imperfectam , seu secundùm aliqua tantùm capita , quam hæretici & schismatici habent cum Ecclesiâ , non satis esse , ut sint in illius sinu ; sic enim loquitur : Quicumque credunt quidem , quòd Christus Iesus in carne venerit , &c. sed tamen ab ejus corpore , quod est Ecclesia , ita dissentiunt , ut eorum communio non sit cum tota quacumque diffunditur , sed in aliqua parte separata inveniatur , manifestum est eos non esse in Catholica Ecclesia .

Objicies 4. Ii sunt veræ Ecclesiæ membra , quorum societas filios parit Christo : atqui societas , sive hæreticorum , sive schismaticorum , Christo filios parit ; nempè per sacramentum baptismatis delet in infantibus peccatum originale , confertque gratiam , per quam verè sunt filii Dei : ergo manifesti hæretici , & publici schismatici , sunt veræ Ecclesiæ membra .

Resp. dist. maj. Ii sunt veræ Ecclesiæ membra ,
quo-

quorum societas filios Christo parit, tanquam ipsius Christi sponsa, conc. maj. tanquam Ecclesiæ ancilla, neg. maj. Distinguo pariter min. Atqui societas, sive hæreticorum, sive schismaticorum, Christo generat filios, tanquam Ecclesiæ ancilla, conc. min. tanquam Christi sponsa, neg. min. In baptismo reperitur semen Christi, qui sponsus est Ecclesiæ; societates sive hæreticorum, sive schismaticorum, sunt veluti Ecclesiæ ancillæ; unde cum baptisma parvulis conferunt, in suo veluti utero excipientes Christi semen, fœtum, non sibi, sed Ecclesiæ, quæ sola est Christi sponsa, pariunt: *Ecclesia quippè omnes* (inquit Augustinus lib. i. de Baptismo contra Donatistas, cap. 15.) *per baptismum parit, sive apud se, id est, ex utero suo, sive extra se de semine viri sui, sive de se, sive de ancilla*. Cum autem adulti voluntariè adhæreant schismati, è contra verò infantes illi adhærere non possint, istis non nocet, quòd ex ancillæ utero nascantur, illis verò nocet quàm maximè: *Sed & Esau* (inquit idem Augustinus) *de uxore natus, propter fraternam discordiam separatus est à populo Dei. Et Aser per uxoris quidem potestatem, sed ex ancilla natus, propter fraternam concordiam terram repromissionis accepit. Idem declarat Hismaelis exemplo: Vnde (ait) & Hismaeli, ut separaretur à populo Dei, non obfuit mater ancilla, sed obfuit fraterna discordia; non profuit potestas uxoris, cujus magis filius erat & ex ancilla susceptus. Sicut apud istos Ecclesiæ jure, quod est in baptismo, nascuntur quicumque nascuntur; sed si concordant cum fratribus, per unitatem pacis ad terram veniunt repromissionis, non de materno utero rursus ejiciendi, sed in paterno semine agnoscendi. Si autem in discordia perseverant, ad Hismaelis funiculum pertinebunt.*

Objicies 5. Vera Christi Ecclesia debet esse ubiq; diffusa; id enim expressè docent theologi, cum agunt de Ecclesiæ notis: atqui si omnes societates Christianæ, quæ credunt fundamentales

fidei

fidei articulos, non essent illius membra, non esset ubique diffusa; nempè constat, nullam esse Christianam societatem seorsim sumptam, ne Romanam quidem, quæ ubique diffusa sit.

Resp. *primò*, neg. min. Nam 1. ad veram Ecclesiam pertinent ii omnes, qui in aliis societatibus Christianis per baptismum regenerati, nondum schismati aut hæresi consensum præbuerunt: vera scilicet Ecclesia ex semine sui sponsi filios parit per ancillarum uterum, ut mox ostensum fuit ex Augustino. 2. Licet fortè sint aliqui orbis anguli, in quibus non reperiantur, qui sint veræ Ecclesiæ membra, & sic, metaphysicè loquendo, Ecclesia non sit ubique; moraliter tamen (ut plerumque scripturæ loquuntur) nullus est locus in quo non reperiat: eminet enim, & quidem visibiliter, Catholica societas in præcipuis orbis partibus, tanquam civitas supra montem posita: Id verò satis est, ut in sensu morali asseratur eam ubique esse diffusam.

Resp. *secundò*, dist. maj. Vera Christi Ecclesia debet esse ubique diffusa, hoc est, debet esse corpus, quod amplitudine sua superet sectas omnes distributivè ac seorsim sumptas, conc. maj. quæ superet sectas omnes collectivè, ac conjunctim sumptas, neg. maj. Ecclesia Romana hoc secundo sensu latius se diffundit, quàm sectæ Christianæ, quæ ex illius sinu exierunt; illæ enim sectæ aliquibus tantùm provinciis, aut regnis conclusæ sunt, cum è contra Ecclesia Romana in majori orbis parte ita emineat, ut sit civitas supra montem posita; quæ hominum, qui sectis dederunt nomen, oculos percellere possit. Quæ mox data est responsio, desumpta est ex Augustino; ad hanc enim Cresconii quæstionem: *Quomodo totus orbis communionem vestram plenius est, ubi tam multæ sunt hæreses, quarum nulla vobis communicat?* hisce verbis respondet lib. 3. contra Cresconium cap. 66. *Christianorum cum sint hæreses plures, atque omnes se Catholicos velint videri,*

ri, aliosque præter se hæreticos nominent, una est Ecclesia, ut omnes concedunt, si totum orbem consideres, refertior multitudine. Hæc iterum habet ejusdem libri capite 67. Ubique est illa, de qua exierunt, qui esse ubique minime potuerunt. Alii hoc loco, alii alias variarum præsumptionum, vel potius amputationum proprias particulas æstimantes, &c.

Objicies 6. *Ex societates sunt veræ Ecclesiæ membra, in quibus populi salutem consequi possunt; nec enim salus haberi potest ab iis, qui sunt extra veræ Ecclesiæ sinum: atqui populi salutem consequi possunt in societatibus hæreticis, & schismaticis. Nam 1. in schismate decem tribuum sub Jeroboamo, plures fuerunt viri pii, plures electi, plures prophetæ. 2. In schismate, quo ipsamet Ecclesia Romana decimo quarto sæculo laboravit, plures ex utràque parte viri sancti, ac docti floruerunt: ergo, &c.*

Resp. ad 1. neg. min. Ad 2. dist. ant. Et illi viri pii non consenserunt schismati, conc. ant. Et consenserunt schismati, neg. ant. Et sanè prophetæ, qui in regno Israelitico visi sunt, apertè damnarunt cultum vitulorum aureorum, quos Jeroboamus rex erexerat. Qui in regno fidem integram servarant, plerumque prophetarum domos adibant sabbati diebus, ut publicæ orationi, ac Scripturarum lectioni vacarent: id videre est lib. 4. Regum cap. 4. vers. 23. Nec audiendi sunt adversarii, cum reponunt, regni Israelitici prophetas non communicasse cum populo, qui regibus Juda parebat: Quamvis enim adorationis ac sacrificii causâ singulis annis (ut jubebat lex) in urbem Hierosolymitanam, justo timore impediti, non proficiscerentur; fraternitatis tamen vinculo cum eâdem tribu conjuncti erant; idque probant hæc Elisei verba ad Joram regem Israel lib. 4. Regum cap. 4. *Vivis Dominus exercituum, in cujus conspectu sto, quod si non vultum Iosaphat regis Juda erubescerem, non*
at-

attendissem quidem te, neque respexissem. Ad 3. dicendum est, utramque diversorum Pontificum obedientiam inter se mutuò, schismatum tempore, communicasse; non quidem immediatè, cū Pontifices in se invicem anathematis fulmen intorquerent, sed mediatè tantum. Utraque nimirum, licèt dubio Pontifici, ac illi adhærentibus sese non subjiceret, sese tamen toti Ecclesiæ ad Concilium legitimum adunatæ subiciebat; ac proindè mediante illo Concilio, servabat fraternitatis vinculum: è contra verò, qui propriè sunt hæretici, aut schismatici, nec Ecclesiæ parti, nec toti ejusdem Ecclesiæ corpori, sive ad Conciliū adunato, sive per singularum Ecclesiarum consensum firmato, sese subjiciunt; imò & ab ipso Ecclesiæ corpore, & à singulis ejus membris sese præscindunt, sibi que principes ac pastores constituunt.

Objicies 7. Qui supra fundamentum, quod est Christus Jesus, superædificat ligna, fœnum, stipulam, salutem consequi potest: *Sicujus opus arserit* (inquit Apostolus 1. ad Corinth. 3.) *detrimētum patietur; ipse autem salvus erit; sic tamen quasi per ignem*. Sed ejus nomine, qui supra fundamentum superædificat ligna, fœnum, stipulam, intelligitur is, qui salvis articulis fundamentalibus, Christi nimirum divinitate, aliisque capitibus ad ipsum spectantibus, hæreses apertis Conciliorum generalium definitionibus oppositas, etiam cum pertinaciâ, propugnat: ergo manifestus hæreticus circa articulos minimè fundamentales, salutem consequi potest; ac proindè membrum est veræ Ecclesiæ.

Resp. neg. min. Ratio est, quia nullum sexdecim seculorum authorem reperire est, qui ejus nomine, qui supra fundamentum superædificat ligna, fœnum, stipulam, intellexerit eum, qui volūtariè adhæret damnatis erroribus, quos hodierni sectarii errores non fundamentales appellant. Dicendum est igitur, per lignum, fœnum, stipulam

iam intelligi humanas opiniones, quæ Scripturæ, aut traditionis autoritate minimè nituntur, quæque aut Ecclesiarum unanimi consensu, aut Conciliorum definitionibus proscriptæ non fuerunt. Confirmatur ex eo, quod Apostolus fundamenti nomine intelligat totum Christum, proindèque Christum cum suis membris, seu cum Ecclesiâ, cujus est caput; unde cum, ipsomet Christo teste, Ecclesia sit columna & firmamentum veritatis, qui apertæ definitioni Ecclesiæ contradicit, aliud fundamentum ponit præter id, quod positum est. Eâ de causâ Patres quovis sæculo anathema dixerunt iis, qui apertis Ecclesiæ definitionibus adhærere detrectarent; seu pronuntiarunt, eos extorres esse ab Ecclesiæ sinu.

C A P U T II.

De Notis Ecclesiæ.

Not. **V**arii varias proferunt veræ Ecclesiæ notas. Nos quatuor exponemus, quæ symbolo Constantinopolitano continentur, & ad quas (ut nobis videtur) cæteræ reducuntur: Itaque ostensuri sumus, veram Ecclesiam ab hæreticorum & schismaticorum Synagogis discerni, quod sit Una, Sancta, Catholica, Apostolica.

A R T I C U L U S I.

De unitate Ecclesiæ.

Not. **Q**Uæremus hic 1. utrùm Ecclesia Christi sit una: 2. in quo posita sit ea unitas: 3. quodnam sit ejusmodi unitatis centrum.

CONCLUSIO I. Ecclesia Christi una est, non multiplex.

Pro-

Probatur 1. ex Scripturâ. *Primò*, Ecclesia se habet respectu partium, quæ eam componunt, sicut ovile respectu ovium, ex quibus constat: *Alias oves habeo* (inquit Christus Joannis 10.) *quæ non sunt ex hoc ovili*: atqui ovile respectu ovium, ex quibus constat, unum est: *Oportet* (ait ibidem Christus) *me illas adducere, & fiet unum ovile, & unus pastor*: ergo Ecclesia una est, non multiplex. Confirmatur: Quoties Christus de Ecclesiâ locutus est, eam semper expressit tanquam unicam: *Si quis* (inquit) *Ecclesiam non audierit, sit tibi sicut ethnicus & publicanus*; nusquam de eâ locutus est in plurali numero, sed in singulari tantum. *Secundò*, Christus est sponsus Ecclesiæ, & vicissim Ecclesia est sponsa Christi: *Sacramentum hoc magnum est* (ait Apostolus de matrimonio loquens ad Ephesios 5.) *ego autem dico in Christo & in Ecclesia*: ergo quemadmodum unicus est sponsus, ita una tantum est sponsa. Nec obstat, quod singulæ fidelium animæ sint sponsæ; omnium enim animarum collectio unam efficit sponsam: *Despondi vos uni viro virginem castam exhibere Christo*; verba sunt Apostoli 2. ad Corinth. 11. *Tertio*, Canticorum 6. exhibetur sub unius columbæ figura: *Vna est columba mea, perfecta mea, una est materis meæ*. Ad Ephesios capite 2. asseritur, Ecclesiam tanquam unam ædificationem, ex Judæis & gentilibus coalescere: *Ipsò summo angulari lapide Christo Iesu, in quo omnis ædificatio constructa crescit in templum sanctum in Domino, in quo & vos* (hoc est, Gentiles) *in habitaculum Dei in spiritu*. *Quartò*, Ecclesia est mysticum corpus Christi: *Vos autem* (ait Apostolus 1. ad Corinth. 12.) *estis corpus Christi, & membra de membro*: atqui mysticum Christi corpus est unum tantum: *Sicut enim* (inquit idem Apostolus) *corpus unum est, & membra habet multa; omnia autem membra corporis cum sint multa, unum tamen corpus; ita & Christus*. Etenim in uno spiritu omnes nos in

unum

unum corpus baptizati sumus, sive Iudæi, sive Gentiles, sive servi, sive liberi.

Probatur 2. ex Patribus. S. Patres Ecclesiam compararunt cum Arcâ Noe, cum domo, in quâ Agnus Paschalis comedi jubebatur, cum Christi veste, quæ inconsutilis erat, cum domo Rahab; in eâ enim (inquit Cyprianus) Ecclesia præformabatur: Atqui non multiplex, sed una tantum fuit arca Noe, una erat domus, in quâ Agnus Paschalis comedi debebat, una fuit ac indivisa Christi vestis: ergo pariter Ecclesia non est multiplex, sed una tantum.

Quæres, an alicujus momenti sit quæstio de unitate Ecclesiæ.

Resp. magni esse momenti; nempè extra unam illam Christi Ecclesiam, nemo potest consequi salutem: *Quicumque* (ait Hieronymus epist. 57.) *extra hanc domum agnum comederit, prophanus est. Si quis in arca Noe non fuerit, peribit regnante diluvio.* Nec mirum; neq; enim ii, qui extra Ecclesiam versantur, habere possunt charitatem: *Ipsa est charitas* (ait Augustinus tractatu de symbolo cap. 11.) *quam non habent, qui ab Ecclesiæ Catholicæ communionem præcisi sunt.* Idem asseritur ab eodem S. Doctore lib. 3. de Baptismo cap. 16. *Quodlibet hæretici & schismatici accipiant, charitas quæ operit multitudinem peccatorum, donum est Catholicæ unitatis & pacis.* Eodem spectant hæc verba Enchyridii c. 63. *Qui præter illam est, nec cum Deo est.... ipsa namque propriè Spiritum Sanctum pignus accipit, sine quo non remittuntur ulla peccata.*

Confirmatur responsio ex eo, quòd violare Christi fidem per crimen hæreseos, aut illius vinculum scindere per schisma, non minus sit crimen, quàm sint adulterium & scandalum; sed qui, aut adulterium commisit, aut incidit in peccatum scandalum, nisi resipiscat, nusquam æternam salutem consequetur: *Si quis templum Dei violaverit* (ait Apostolus) *disperdet illum*

lum Deus . Qui talia agunt , regnum Dei non possidebunt .

Confirmatur iterum ex eo , quod hæresis , vel schisma , non unum , sed multiplex peccatum complectantur : complectuntur nimirum 1. voluntariam rebellionem in Ecclesiæ ministros , de quibus ipse Christus ait : *Qui vos audit , me audit ; qui vos spernit , me spernit .* Complectuntur 2. calumniæ crimen ; nempè hæretici & schismatici ab Ecclesiâ discedentes , eam corruptionis ac prostitutionis insimulant . Complectuntur 3. furti peccatum ; nam hæretici & schismatici ministerium , quod ad solam Ecclesiam jure spectat , per summum nefas vindicant sibi . Complectuntur 4. scandali peccatum , scilicet hæretici & schismatici suâ apertâ in Ecclesiam rebellionem & fidei corruptionem , sunt offendiculo populis fidelibus ; mirum igitur non est , quod salutem consequi non possint , nisi ad fidem & unitatem redierint .

CONCLUSIO 2. Unitas Ecclesiæ in tribus posita est .

Probatur enumeratione . Ecclesiæ unitas dicit unam , ac eandem fidem ; eadem omninò sacramenta ; eosdem ministros ac pastores . *Primò* , dicit unam , ac eandem fidem : *Vna fides , unum baptisma* . Hinc verò sequitur , quod superius fusè probatum est , hæreticos non esse veræ Ecclesiæ membra ; neque enim eandem in omnibus habent fidem cum Ecclesiâ Catholicâ . *Secundò* , dicit eadem sacramenta ; per ea nimirum tantum Christi sanguis hominibus ad justificationem applicatur : hinc qui aliis utitur , quàm iis , quibus utitur Ecclesia Catholica , aut qui ex iis aliquod tanquam inutile rejicit , non est in Ecclesiæ unitate . *Tertio* , dicit eosdem pastores , non quidem numero , sed missione , sed successione , sed ministerio : *Et ipse dedit quosdam quidem Apostolos , quosdam autem prophetas , alios pastores & doctores ad consumma-*

tionem sanctorum in ædificationem corporis Christi, donec occurramus omnes, &c. Verum de hoc argumento sermo redibit inferiùs; hìc satis sit ex illo principio colligere, schismaticos, licet fidem non temeraverint, non esse in Ecclesiâ; nempe non habent legitimos pastores, seu qui missione, & successionem pastoratûs officio fungantur.

CONCLUSIO 3. Unitatis Ecclesiæ centrum, Sedes est Romana.

Probatur 1. Ea sedes est centrum unitatis Ecclesiæ, quæ jure divino primatum habet in omni Ecclesiâ: atqui sedes Romana primatum habet in omni Ecclesiâ; siquidem primatum habet, quem habuit Petrus; nimirum Romani Pontifices succedunt Petro, ut inferiùs dicitur: Sed Petrus (ut ostendemus quæstione 5.) jure divino primatum habuit in omni Ecclesiâ: ergo, &c.

Probatur 2. Patres expressè asseruerunt, sedem Romanam esse centrum unitatis Ecclesiæ: *Navigare audent* (inquit Cyprianus epist. 55.) *ad Petri Cathedram, atque ad Ecclesiam principalem, unde unitas sacerdotalis exorta est.* Optatus lib. 2. contra Parmenianum, hæc habet in eundem finem: *Negare non potes, scire te in urbe Roma Petro primò Cathedram Episcopalem esse collatam... in qua una Cathedræ unitas ab omnibus servaretur, nec ceteri Apostoli singulas sibi quisque defenderent, ut jam schismaticus & peccator esset, qui contra singularem cathedram, alteram collocaret.* Hieronymus non minùs clarè loquitur ad Damasum Papam, scribens de hypostasis nomine: *Hic (inquit) in tres partes scissa Ecclesia, me ad se rapere festinat; ego autem clamito: Si quis Cathedræ Petri jungitur, meus est.*

Quæres, utrùm Sedes Romana, & Ecclesia Romana sint unum & idem.

Resp. Sedem Romanam, & Ecclesiam Romanam esse unum & idem, si nomine Ecclesiæ Romanæ

manæ intelligatur illa particularis Ecclesia, quæ Romæ constituta est; è contra verò differre tanquam includens ab incluso, si Ecclesiæ Romanæ nomen sumatur pro eâ fidelium societate, quæ per totum orbem diffusa, sedem Romanam agnoscit pro sede, cui à Christo concessus est primatus in omni Ecclesiâ, seu cui aliæ omnes particulares Ecclesiæ secundum canonicas sanctiones obedire tenentur. Quod mox traditum est sedis Ecclesiæ Romanæ discrimen, diligenter observandum est; nempe hæretici, ut Catholicos facilius calumniari possint, plerumque Romanam Ecclesiam per totum terrarum orbem longè latèque diffusam solent confundere cum Romanâ curiâ, seu Ecclesiâ particulari, quæ extra territorium Romanum non diffunditur.

ARTICULUS II.

De sanctitate Ecclesiæ.

Not. 1. **C**ertum est, in Ecclesiâ militante non reperiri sanctitatem, quæ sit absq; omni maculâ, & absque omni rugâ; nempe ejusmodi sanctitas soli Ecclesiæ triumphanti convenit; nullum enim est Ecclesiæ militantis membrum, in quo locum non habeat illud primæ Joannis 1. *Si dixerimus, quia peccatum non habemus, ipsi nos seducimus, & veritas in nobis non est.*

Not. 2. Certum est iterum, Ecclesiam non eo sensu esse sanctam, quòd singula illius membra prædita sint sanctitate, seu charitate, quæ eos Dei filios efficiat; sunt enim in Ecclesiâ (ut superius ostensum est) boni & mali. Quæstio igitur est de sanctitate, tum vocationis, tum professionis; de internâ sanctitate, quæ non in omnibus quidem, sed in pluribus Ecclesiæ membris reperiatur.

CONCLUSIO 1. Tota Ecclesia, sancta est sanctitate vocationis.

Probatur. Sanctitas vocationis posita est in vocatione ad sanctitatem: atqui tota Ecclesia, vocata est ad sanctitatem. Nempè id docet Apostolus ad Ephesios 1. *Elegit nos in ipso ante mundi constitutionem (inquit) ut essemus sancti & immaculati in conspectu ejus*. Ad Romanos 1. idem Apostolus eos, ad quos scribit, vocat sanctos: *Vocatis sanctis*. Eodem spectant hæc primæ Petri 1. *Vos autem genus electum, regale sacerdotium, gens sancta, populus acquisitionis*. Christus præcipuè passus est, ut suæ Ecclesiæ sanctitatem conferret: *Iesus, ut sanctificaret populum per sanguinem suum, extra portam passus est*; unde ipse Joannis 17. sic loquitur: *Pro eis sanctifico me ipsum, ut sint & ipsi sanctificati in veritate*.

CONCLUSIO 2. Tota Ecclesia, sancta est sanctitate professionis.

Probatur. Ea societas est sancta sanctitate professionis, quæ fidem sanctam & mores sanctos profitetur: Atqui tota Ecclesia fidem sanctam & mores sanctos profitetur: quisquis nimirum, cum initiatur baptismo, regulas profitetur, quæ in Scripturis & traditione continentur; ex autem regulæ sunt verissimæ & maximè sanctæ, cum è contra in societatibus, quæ sunt extra Ecclesiam, plurima sint falsa, multa sint principia, quæ bonis moribus adversentur: v.gr. apud Calvinistas, dogma de inamissibilitate justitiæ, quod in eorum Synodo Dordretanâ, tanquam fidei articulus definitum est.

Quæ de sanctitate, quam Ecclesia profitetur, hic breviter dicta sunt, fusè pertractata legere est apud Justinum in utrâque apologiâ, apud Tertullianum in libro apologetico cap. 36. apud Arnobium lib. 1. 2. & 3. contra Gentes, apud Augustinum in libris de Civit. Dei: *Nihil (inquit lib. 2. cap. 28.) in Christianis Ecclesiis turpe & fla-*

& flagitiosum spectandum, imitandumque proponitur, ubi veri Dei aut præcepta insinuantur, aut miracula narrantur, aut dona laudantur, aut beneficia postulantur.

CONCLUSIO 3. Ecclesia in pluribus suis membris internam habet sanctitatem.

Probatur 1. Infantes, qui baptismate regenerati sunt, verè sunt filii Dei. Lapsi, qui in poenitentiae sacramento absolutione donati sunt, consecuti sunt peccatorum remissionem, ipsomet Christo teste: *Quorum remisistis peccata, remittuntur eis*. Plures sunt alii, qui ex iustitiâ per baptismum acceptâ nunquam exciderunt: ergo Ecclesia in pluribus membris internam habet sanctitatem: Nec mirum; in Ecclesiâ enim reperitur Spiritus sanctus. Ipsa est Christi sponsa, adversus quam portæ inferi prævalere non possunt; cum quâ ipsemet Christus erit usque ad consummationem sæculi. Hæc Ecclesiæ nota, seu sanctitas, ita propria est veræ Ecclesiæ, ut nulli alteri societati convenire possit; nec enim voluntariè jacentibus extra Ecclesiam, per baptismum aut alia sacramenta datur Spiritus Sanctus. Vide Cyprianum iis in locis, in quibus pro rebaptizatione scripsit; Augustinum in libris, quos de Baptismo contra Donatistas exaravit.

Probatur 2. In Ecclesiâ visi sunt innumerabiles martyres, quorum constantia maximum fuit sanctitatis argumentum. In eâ floruerunt quamplurimi Doctores, de quorum sanctitate nec ipsi etiam hæretici dubitare possunt; ejusmodi verò fuerunt Justinus, Irenæus, Cyprianus, Athanasius, Hilarius, Ambrosius, Basilus, Chrysostomus, Augustinus, Bernardus, innumeri alii, qui scientiâ, pietate, miraculis, fidelium societatem exornarunt. In Ecclesiâ videre est plures Episcopos, in quibus ex dotes elucet, quas Apostolus ad Timotheum scribens, requirit: *Quàm enim multos Episcopos* (in-

quit Augustinus lib. 1. de Moribus Ecclesiæ cap. 33.) *optimos viros, sanctissimosque cognovi, quam multos presbyteros, quam multos diaconos, & hujusmodi ministros divinarum sacramentorum, quorum virtus eò mihi mirabilior, & majore prædicatione dignior videtur, quò difficilior est eam in multiplici hominum genere, & in ista vita turbulentiore servare. In eadem Ecclesiâ videre est sanctas congregationes cœnobitarum, qui contemptis sæculi divitiis, honoribus, illecebris, totos se tradunt penitentia, ac rerum divinarum contemplationi. Augustinus illud argumentum Manichæis opponit lib. de Moribus Ecclesiæ cap. 31. Quis (inquit) illos non miretur & prædicet, qui contemptis, atque desertis mundi hujus illecebris, in communem vitam castissimam, sanctissimamque congregati, simul ætatem agunt, viventes in orationibus, in lectionibus, in disputationibus; nulla superbia tumidi, nulla pervicacia turbulenti, nulla invidia lividi; sed modesti, verecundi, pacati, concordissimam vitam, & intentissimam ad Deum, gratissimum munus ipsi offerunt, à quo ista posse meruerunt? Sunt etiam in Ecclesiâ innumerabiles laici, qui hoc mundo utuntur tanquam non utentes: Nec ideo (ait Augustinus eodem lib. cap. 31.) laudabile Christianorum genus contempserim, eorum scilicet, qui in civitatibus degunt, à vulgari vita remotissimi. Vidi ego diversorium sanctorum Mediolani, non paucorum hominum, quibus unus presbyter præerat, vir optimus, & doctissimus. Romæ etiam plura cognovi, in quibus singuli gravitate, atque prudentia & divina scientia præpotentes, cæteris secum habitantibus præsunt, Christiana charitate, sanctitate, & libertate viventibus; ne isti quidem cuiquam onerosi sunt, sed Orientis more, & Pauli Apostoli auctoritate manibus suis se transigunt.... Neque hoc in viris tantum, sed etiam in fœminis, &c. Tam probatæ castitatis, tantæ temperantiæ, tantæ penitentia, tantæ virtutis viros, ac mulieres hæ-*

retici

retici in suis sectis ostendant, proferantque, ut suæ pseudo-ecclesiæ sanctitatem probent.

Objicies 1. Ea societas non est sancta, quæ identidem indiget reformatione: atqui Ecclesia identidem indiget reformatione; si enim non indigeret, frustra ab Apostolorum ætate, ad hæc usque tempora, tot editis canonibus reformatio præscripta fuisset: ergo, &c.

Resp. dist. maj. quæ indiget reformatione in rebus, quæ ad fidem, aut morum regulas spectant, conc. maj. in rebus, quæ spectant ad solam disciplinam, neg. maj. Ecclesia nusquam indiguit reformatione in iis, quæ ad fidem, aut morum regulas spectant; eandem enim fidem, easdem morum regulas professæ est, quæ ab Apostolis post Christi in cælos ascensionem edocta est; nempe sectarii nullam in iis capitibus novitatem probare possunt; nusquam ostendent tempus, locum, occasionem, causam, quibus doctrina vetus ab Apostolis per orbem sparsa, primùm innovata ac adulterata fuerit; unde contra eos, qui Ecclesiam insimulant tanquam ream novitatis in fide, aut in moribus, intorqueri possunt hæc Augustini verba lib. de utilitate credendi cap. 14. *Vos autem & tam pauci, & tam turbulenti, & tam novi, nemini dubium est, quàm nihil dignum auctoritate proferatis.* Identidem tamen propter hominum corruptionem innovari oportuit eas morum regulas, sanciri que novam disciplinam: Sicut enim cymba proprio pondere rapidissimi fluminis cursum sequens, deorsum labitur (verba sunt authoris Spongiæ, pag. 31.) nisi remis, velisque studio non intermissio in partem adversam agas; ita homines corruptæ naturæ impetu in carnis & sanguinis corruptelas, & disciplinæ relaxationem proni sunt, nisi legibus identidem renovatis, quasi repagulis quibusdam coerceantur. Hinc illud non solum Tridentinæ, sed omnium penè Synodorum studium in condendis canonibus, quibus disciplina restauretur: Hinc il-

læ querelæ, imperatorum, regum, principum, Cleri, Cardinalium de necessitate reformationis, sed quæ ad disciplinam, non autem ad doctrinam pertineat.

Objicies 2. Ecclesia variis sæculis plurium errorum infimulata est : ergo eorum rea fuit, aut saltem aliquod accusationi ejusmodi fundamentum præbuit.

Resp. dist. ant. Infimulata est ab hæreticis, conc. ant. à catholicis, neg. ant. & conseq. Et sanè Manichæi (Augustino teste lib. 1. de moribus Ecclesiæ cap. 24.) Catholicis objiciebant hypocrisim, superstitionem, sepulchrorum adorationem, luxuriam, aliaque ejusmodi scelera. Luciferiani (ut testatur Hieronymus contra eos agens) dicunt, universum mundum, (hoc est Ecclesiam) esse diaboli, & factum de Ecclesiâ lupanar. Donatistæ (ut scribit Augustinus lib. 1. contra litteras Petiliani cap. 51.) Cathedram Romanam nuncupabant cathedram pestilentie : *Cathedra tibi quid fecit Ecclesiæ Romanæ, in qua Petrus, &c. Quare appellas cathedram pestilentie Cathedram Apostolicam ?* Vocabant eam meretricem : *Ipsa* (inquit apud Augustinum lib. 1. contra Cresconium cap. 5.) *meretrix est, asylum Romuli*, hoc est, refugium sceleratorum omnium. Pelagiani propter dogma de propagatione peccati originalis, apud Augustinum lib. 2. contra Julianum, vocabant Ecclesiam, *confusionem pudendam Babylonis, impudentissimam, contumacissimam, in Deum prophanissimam, & in quâ adeptæ essent stultitia & turpitudine dominatum*. Tandem (inquit author Spongiæ pag. 544.) quis hæreticus quindecim sæculis ebulliit, qui non Ecclesiam, quam schismate laceraverat, de gravissimis criminibus accusaverit ? de erroribus magnis, corruptâque Christi doctrinâ ream fecerit ? neque enim sine prætextu aliquo se ab Ecclesiæ communione præsciderunt. Sed contigit illis, quod navigantibus, qui eum è

por-

portu solvunt, terram, à quâ recedunt, non se ipsos, moveri putant: vel potius id, quod atrabile laborantibus, qui suas insanas imaginationes non dubitant ipsissimam esse veritatem. Sic etiam ipsi soli armati pertinaciâ, clamoribus suis impudentibus sine ullâ probatione credi volunt, Ecclesiam erroribus, hæresibus, & apostasiis esse fœdatam, purpuratamque meretricem, & Antichristi sedem, vel reformandam esse, vel deferendam.

ARTICULUS III.

De Catholicitate Ecclesiæ.

Not. **U**T cum methodo pertractetur argumentum de Catholicitate Ecclesiæ, quærendum est 1. utrùm nomen hoc *Catholica*, veræ Ecclesiæ conveniat: 2. An ex voce *Catholica*, firmum argumentum desumatur pro verâ Ecclesiâ: 3. Utrùm Catholicitas soli Ecclesiæ Romanæ propria sit.

CONCLUSIO I. Nomen hoc *Catholica*, soli veræ Ecclesiæ convenit.

Probatur 1. autoritate Augustini, qui contra epistolam Fundamenti cap. 4. sic loquitur: *Tenet* (me in Ecclesiæ gremio) *ipsum Catholicæ nomen, quod non sine causa inter tam multas hæreses, sic ista Ecclesia sola obtinuit, ut cum omnes hæretici se Catholicos dici velint, quærenti tamen peregrino alicui, ubi ad Catholicam conveniant, nullus hæreticorum vel basilicam suam, vel domum audeat ostendere.* Eâdem ratione loquitur sermone 131. de tempore: *Sola igitur* (inquit) *vera Christi sponsa Ecclesia nominis Catholici honorem semper & ubique retinuit.* Idem pariter docet lib. de verâ religione cap. 7. *Tenenda est nobis* (ait) *Christiana religio, & ejus Ecclesiæ communicatio, quæ Catholica est, & Catholica nominatur.*

Probatur 2. testimonio S. Cyrilli Hierosolymitani, qui Catechesi 18. sic loquitur : *Si fortè veneris in civitates , non simpliciter interroga , ubi sit Dominicum , seu domus Domini ; nam etiam hæretici suas speluncas domum Domini nominare volunt : nec petas , ubi sit Ecclesia Dei , sed ubi Catholica Ecclesia ; hoc enim nomen proprium est hujus sanctæ Ecclesiæ matris omnium nostrorum .*

Probatur 3. autoritate S. Paciani , qui epistolâ 1. ad Simpronianum , ut significet se in verâ esse Ecclesiâ , sic loquitur : *Christianus mihi nomen est , Catholicus verò cognomen . Illud me nuncupat , hoc ostendit . Hoc prodor , inde significor .* Paulò post addit, veram Ecclesiam à sectariorum synagogis per idem nomen, *Catholica* , distingui : *Ego fortè (inquit) ingressus populosam urbem , hodie quam Marcionitas , quam Appellecianos , Cataphrygas , Novatianos , & ceteros hujusmodi comperissem , qui se Christianos vocarent , quo cognomine congregationem meâ plebis agnoscerem , nisi Catholica diceretur ?*

Quæres 1. quo tempore vera Ecclesia cœperit vocari *Catholica* .

Resp. 1. scriptores, quibus persuasum est, Apostolos esse non tantum quoad substantiam , sed etiam quoad ordinem & verba , authores symboli , quod inscribitur eorum nomine , censere Ecclesiam ipsâ Apostolorum ætate vocatam fuisse *Catholicam* ; nempè (aiunt) nomen illud symbolo à se edito inseruerunt : *Credo sanctam Ecclesiam Catholicam* ; quòd scirent (inquiunt) eam ubique diffundi debere .

Resp. 2. plures ex Patribus docuisse, post Apostolorum ætatem tantum Ecclesiam vocatam fuisse *Catholicam* . Idque necessarium fuit (inquiunt) ut Ecclesia ab hæreticis , qui se Christianos dicebant , distingueretur : *Cum post Apostolos (ait Pacianus epistolâ 1. ad Sympronianum) hæreses existissent , diversisque nominibus colum-*
bam

bam Dei, atque reginam lacerare, & per partes scindere niterentur, cognomen suum plebs Apostolica postulabat, quo incorrupti populi distingueret unitatem.

CONCLUSIO 2. Ex hac voce *Catholica*, firmum pro verâ Ecclesiâ argumentum desumitur; seu certò demonstratur; societatem Christianam, quæ verè est *Catholica*, esse veram Christi Ecclesiam.

Probatur. Primò, ita docet Augustinus: *Tenet me* (inquit contra epistolam Fundamenti cap. 4.) *ipsum Catholicæ nomen, quod inter tam multas hæreses, sic ipsa sola Ecclesia obtinuit.* Secundò, Patres quovis sæculo usi sunt Ecclesiæ Catholicitate, ut probarent schismaticorum, aut hereticorum societates non esse veram Ecclesiam Christi. Vide Cyrillum catechesi 18. Pacianum epistolâ 1. ad Sympronianum, Augustinum libro de unitate Ecclesiæ, pluribusque aliis locis, in quibus probat, Donatistarum societatem non esse Christi sponsam; veram illius Ecclesiam, quòd non esset *Catholica*.

Objicies. Donatistæ, Ariani, alique veteres hæretici nonnunquam vocati sunt *Catholici*; ex eo tamen nomine, quod sibi tribuebant, desumi non potest argumentum, quo probetur, Donatistarum, Arianorum, aliorumque hæreticorum societates fuisse veram Christi Ecclesiam.

Confirmatur ex eo, quòd arbitrarius sit loquendi modus, proindèquè nihil certi ex eo colligi potest.

Resp. dist. ant. A seipsis vocati sunt *Catholici*, conc. ant. ab aliis societatibus Christianis, neg. ant. Ariani v. gr. nusquam Donatistas appellarunt *Catholicos*, nec vicissim Donatistæ Arianos; è contra omnes omninò sectæ Christianæ societatem, quæ pro unitatis centro habet Apostolicam sedem, vocarunt semper, & nunc etiam vocant Ecclesiam *Catholicam*. : *Tenet me ipsum Catholicæ nomen* (verba sunt Augustini)

Z 5 quod

quod non sine causa inter tam multas hæreses; sic ista sola Ecclesia obtinuit, ut cum omnes hæretici, se Catholicos dici velint, quærenti tamen peregrino alicui, ubi ad Catholicam conveniant, nullus hæreticorum, vel basilicam suam, vel domum audeat ostendere.

Ad confirmationem dico, quòd licèt nihil certi colligi possit ex privatorum quorundam hominum loquendi modo, colligatur tamen ex usu loquendi ubique semper recepto; qui enim ubique semper receptus fuit loquendi modus, certam ac evidentem significationem supponit, quam privati homines in alienam detorquere non possunt. Unde licèt Lutherani, Calvinistæ, Soci-niani, aliique sectarii conentur Catholicæ nomen eripere societati, quæ communionē conjuncta est cum Romano Pontifice, illudque sibi tribuere; nusquam tamen impiedient, ne eadem Romanæ communionis societas intelligatur, cum simpliciter & absolutè *Catholicæ* nomen usurpabunt coram iis, qui suæ sectæ nomen non dederunt.

CONCLUSIO 3. Catholicæ nomen soli Ecclesiæ Romanæ convenit.

Probatur. Ei soli societati convenit *Catholicæ* nomen, quæ per totum terrarum orbem diffusa est; nempe (Augustino teste epist. 107.) *Ecclesia Catholica appellatur, quòd per totum terrarum orbem diffundatur*; unde ex eodem Augustino, Donatistarum adversarii, non autem ipsi Donatistæ, meritò Catholici dicebantur, quòd toti orbi communicarent: *Quia* (inquit S. Doctor in Breviculo Collationis diei tertiæ cap. 3.) *Ecclesiæ toto orbe diffusæ, cui testimonium perhibet Scriptura divina, ipsi, non Donatistæ, communiceant; unde Catholici meritò & sunt, & vocantur*: Atqui sola Ecclesia Romana per totum orbem terrarum diffusa est. Eminent nimiràm in Asiâ, in Americâ, in Japoniâ, in Brasiliâ, in Europâ, in Africâ: è contra verò Christianorum so-

cie-

cietates, quæ cum eâ non communicant, in aliquibus tantum, aut Europæ, aut aliarum orbis partium angulis reperiuntur.

Objicies. Ecclesiæ Romanæ diffusio multum imminuta est schismatibus, tum Græcorum, tum Lutheranorum; ita ut multæ sint, etiam in Europâ, provinciæ, ubi nulli ferè Catholici reperiuntur: ergo Ecclesia Romana non est ubique diffusa; ac proindè non debet appellari Catholica.

Resp. 1. imminutionem, quæ per schismata, tum Græcorum, tum Lutheranorum, accidit Ecclesiæ diffusioni, abundè resarcitam fuisse Barbararum nationum conversione. Scilicet eo tempore, quo Græci conflagrant schisma, Septentrionales populi, Hungari, Sueci, Dani, Christianæ ac Catholicæ religioni dederunt nomen. Non multò post Lutheri defectionem, Indi Orientales & Occidentales, Japonenses, Brasilienses, innumeræque aliæ gentes Catholicam fidem amplexæ sunt.

Resp. 2. dist. ant. Ecclesia Romana non est ubique diffusa, physicè loquendo, conc. ant. sunt enim nonnullæ gentes, quibus Evangelium nondum fuit annuntiatum; moraliter loquendo, neg. ant. scilicet Ecclesia Romana (ut jam superius de unitate Ecclesiæ differentes observavimus) in præcipuis orbis partibus ita eminent, ut diffusior sit quâlibet aliâ sectâ seorsim, ac separatim sumptâ; nec, sicut sectæ particulares, quibusdam provinciis, aut regnis coarctetur.

Confirmatur responsio ex eo, quòd prioribus Ecclesiæ sæculis pauciores non essent hæreses, quàm nunc sint, ut patet ex Irenæo & Epiphany; nec plures erant Catholici, quàm sint modò, cum urbes paganis repletæ essent; nec plures erant regiones Christo servientes, quàm sint jam temporis: Et tamen Ecclesia jam tunc vocabatur Catholica. Nemo dubitat, quin Augustini tempore innumeræ essent gentes, quæ nihil au-

dierant de Euangelio. Constat, plurimas hæreses tunc in orbe Christiano grassatas fuisse; & tamen id non impediit, quin Ecclesia ab Augustino, cæterisque ejus ævi Patribus Catholica diceretur: *Diversorum hæreticorum Ecclesiæ* (ait Augustinus serm. 137. de tempore) *ideò Catholica non dicuntur, quòd per loca, & per suas quæque provincias continentur; hæc verò ab ortu solis usque ad occasum unius fidei splendore diffunditur.*

Quæres, utrùm per vocem *Catholica*, intelligatur sola Ecclesiæ per totum orbem terrarum diffusio.

Resp. i. vocem hanc *Catholica* significare triplicem universalitatem, Doctrinæ nimirum, Communionis permanentis, & Communionis successivæ.

Primò, quidem significat universalitatem doctrinæ; siquidem (ut agentes de Ecclesiæ unitate diximus) Catholicus non est, sed hæreticus, qui vel unum errorem contra fidem animo pertinace defendit, sive ille error sit (ut loquuntur heterodoxi) fundamentalis, sive non sit fundamentalis: Propter unum verbum, aut duo (apud Hieronymum lib. 3. adversus Rufinum) *quæ contraria fidei sunt, multæ hæreses abjectæ sunt ab Ecclesia.* Idem videre est apud Augustinum ep. 119. cap. 10. ubi sic loquitur: *Ecclesia, quæ sunt contra fidem, vel bonam vitam, non approbat, nec tacet, nec facit.* Idem innuunt hæc alia ejusdem S. Doctoris verba libro de hæresibus: *Possunt & aliæ hæreses, quæ in hoc opere commemoratæ non sunt, vel esse, vel fieri, quarum aliquam quisque tenuerit, Christianus Catholicus non erit.*

Secundò, vox *Catholica*, includit universalitatem communionis permanentis, id est, constantem cum fidelibus per totum orbem dispersis communionem, à quâ si quis seipsum separaverit, hæreticus est, schismaticus, non catholicus, scilicet eam veræ Ecclesiæ dotem, seu diffusionem

nem per totum orbem prædixit lex : *In semine tuo* (Christo, ut explicat Paulus ad Galatas 4.) *benedicentur omnes gentes* ; pollicitus est Christus : *Eritis mihi testes* (ait Actorum cap. 1.) *in Hierusalem & usque ad extremum terræ* ; idem habetur Lucæ 24. *Quoniam sic scriptum est : Opportebat Christum pati, & prædicari pœnitentiam per omnes gentes, incipiens à Hierusalem* . Vide ea, similiaque scripturæ loca apud Augustinum libro de Unitate Ecclesiæ cap. 11. & 12. Vide etiam Vincentium Lirinensem Commonitorii cap. 31. ubi sic loquitur : *Id teneamus, quod ubique, quod semper, quod ab omnibus creditum est, hoc est, verè proprièque catholicum* .

Tertiò, eadem vox *Catholica*, dicit universalitatem communionis successivæ, quæ ab Apostolorum Principe ad nos usque sine intermissione pervenerit. Nempè tum hæretici, tum schismatici sunt posteriores Ecclesiâ, nullamque cum eâ, quæ illorum ortum præcessit, communionem habent : *Ante Valentinum* (ait Irenæus lib. de hæresibus cap. 4.) *non fuerunt, qui sunt à Valentino, neque ante Marcionem erant, qui sunt à Marcione* . Clemens Alexandrinus 7. Stromatum pag. 764. Idem his verbis docet : *Quòd in Ecclesia Catholica posteriora fuerint sua conciliabula, non est opus multis probare : Catholica verò Ecclesia semper fuit* . Huc referri possunt, quæ de Ecclesiæ Apostolicitate dicuntur inferiùs.

Ex iis, quæ hucusque dicta sunt, patet, nemini, ut suam Catholicitatem probet, satis esse, quòd fidem suam expendat ad Scripturarum normam ; quòd credat se profiteri doctrinam, quam vetus Ecclesia professâ fuerit ; sed prætereà requiritur, ut communicet in fide, sacramentis, synaxibus, pastoribus, cum eâ fidelium societate, quæ per totum terrarum orbem diffusa est. Hinc (ait author Spongiæ pag. 465.) *Antistites Africani cum tempore Augustini demonstrare vellent se esse*

esse Catholicos, non doctrinæ suæ veritatem, fidei consensum, vel sacramentorum unitatem protulerunt; sed tantummodò communionem cum Ecclesiâ Catholicâ, quæ ista omnia, & alia plura suâ generalitate complectitur; nam Augustinus quadringentorum circiter Episcoporum Africanorum personam, & causam agens in collatione cum Donatistis, cum Petilianus de Catholici titulo litem moveret, hæc ait: *Afrorum Christianorum Catholicorum hæc vox est: Nos universo orbi Christiano communionem coheremus.*

ARTICULUS IV.

De Apostolicitate Ecclesiæ.

Not. **E**cclesia duobus modis potest esse Apostolica: 1. doctrinâ: 2. authoritate. Hic igitur quærendum est, utrùm Ecclesia duobus illis modis sit Apostolica.

CONCLUSIO 1. Ecclesia est Apostolica secundum doctrinam.

Probatur. Illa societas est Apostolica secundum doctrinam, quæ nihil credit, quàm quod Apostoli docuerunt: atqui Ecclesia nihil credit, quàm quod Apostoli docuerunt; nihil enim credit, quàm id, quod Apostolis revelatum est; id verò, & non aliud, docuerunt Apostoli, quàm quod ipsis fuit revelatum, juxta illud Christi promissum: *Ipse (Spiritus Sanctus) vos docebit omnia*; nec non juxta illud Tertulliani lib. de Præscriptionib. *Apostoli Ecclesias apud unamquamq; civitatem considerunt, à quibus traducem fidei & semina doctrinæ, cæteræ exinde Ecclesiæ mutuata sunt, ac per hoc & ipsæ Apostolicæ deputantur, ut soboles Apostolicarum Ecclesiarum.* Vide quæ de Traditione superiùs à nobis dicta sunt.

CONCLUSIO 2. Ecclesia est Apostolica secundum authoritatem.

Pro-

Probatur. Illa societas est Apostolica secundum auctoritatem, quæ regitur à legitimis Apostolorum successoribus: ii scilicet, qui succedunt Apostolis, auctoritate Apostolis divinitus concessâ potiuntur, de quâ hæc habentur ad Ephesios 4. *Et ipse dedit quosdam Apostolos ad consummationem sanctorum in ædificationem corporis Christi*; perdurare enim debuit data semel Apostolis præfecturæ & regiminis auctoritas, quamdiù Ecclesia perduratura est: atqui vera Christi Ecclesia regitur ab Apostolorum successoribus, Episcopis nimirum, sine quibus Ecclesia, nec esse, nec concipi potest: *Ecclesia* (inquit Cyprianus epist. 69.) *plebs sacerdoti adunata, & pastori suo grex adherens. Vnde scire debes, Episcopum in Ecclesia esse, & Ecclesiam in Episcopo; & si quis cum Episcopo non sit, in Ecclesia non esse.*

CONCLUSIO 3. Sola Ecclesia Romana est Ecclesia Apostolica.

Probatur. Primò, est Apostolica ratione doctrinæ; neque enim aliam profitetur, quàm quæ ab Apostolis tradita est. Hæretici novitatem in aliquo dogmate ipsi non possunt objicere; nempe omnium suorum dogmatum antiquitatem legitimâ præscriptione demonstrat; è contra verò hæreticis meritò in omnibus capitibus, in quibus ab ipsâ dissentiant, novitatem opponit, evidenterque probat, quo tempore, à quibus, quâ arte invecata fuerint. Secundò, sola Ecclesia Romana est Apostolica secundum auctoritatem: scilicet Episcopi, à quibus regitur, ab Apostolis primùm constituti sunt, ipsisque non interruptâ serie, ad hæc usque tempora, successere. E contra, qui aliis ab Ecclesiâ Romanâ societatibus præsumunt, non sunt ab Apostolis, nec mediatè, nec immediatè, constituti; continua ab Apostolis Episcoporum series, in iis societatibus non reperitur: *Edant ergo* (inquit Tertullianus lib. de Præscriptionibus cap. 32.) *origines Ecclesiarum suarum, evolvant Ordinem Episcoporum suorum,*

ita

ita per successiones ab initio decurrentem, ut primus ille Episcopus aliquem ex Apostolis, vel Apostolicis viris, qui tamen cum Apostolis perseveraverint, habuerit auctoritatem & antecessorem. Hoc enim modo Ecclesiæ Apostolicæ census suos deferunt: Sicut Smyrnæorum Ecclesia habens Polycarpum ab Ioanne conlocatum refert: Sicut Romanorum Clementem à Petro ordinatum edit; proinde utique & ceteræ exhibent, quos ab Apostolis in Episcopatu constitutos, Apostolici seminis traduces habent.

Confirmatur argumentum. Ut societas aliqua sit Apostolica, duo requiruntur, ministrorum missio & successio: atqui aliæ à Romanâ communionem, ac præsertim, Lutherana, Calviniana, Anglicana, & aliæ, quæ elapso proximè sæculo schisma fecerunt, nec missionem habent, nec successionem: ergo non sunt Apostolicæ. Minor propositio subsequenter momentis per partes sic ostenditur.

Primò, Ministri societatum, de quibus agitur, non habent missionem; nam missio duplex est, ordinaria & extraordinaria. Prior est, quâ Deus mediantibus ministris jam constitutis alios mittit, eisque potestatem largitur: Sic filii Aaron olim ad Sacerdotium per generationum successionem vocati sunt, sic jam temporis Episcopi & presbyteri per impositionem manuum ordinantur, & mittuntur. Altera missio est, quâ Deus per seipsum absque medio aliquem ad ministerium vocat, eique potestatem immediatè largitur; sic Moyses & Aaron missi sunt; sic Christus misit Apostolos tanquam radicem, ac fontem totius propagationis ministrorum novæ legis. Atqui hæretici, & ii præsertim, qui elapso proximè sæculo ab Ecclesiâ Romanâ schisma fecerunt, nec ordinariam, nec extraordinariam missionem habent.

Non quidem ordinariam: hæc enim includit duplicem collatam potestatem, Ordinis & Juris-

di-

ditionis; Calvinus v.gr. ministris à se constitutis conferre non potuit potestatem Ordinis; hæc enim (ut tum Scripturâ, tum traditione docemur) non confertur, nisi ab iis, qui sunt Episcopi: *Quid facit excepta ordinatione Episcopus* (verba sunt Hieronymi in epist. ad Evagrium) *quod presbyter non facit?*

Nec communio Anglicana, nec Lutherus, nec alii schismatici, aut hæretici, licet (ut supponitur) validè per Episcopatum manuum impositionem ordinati, ministris à se constitutis conferre potuerunt potestatem jurisdictionis; id nimirum conferre non potuerunt, quo ipsi caruerunt; at Episcopi communionis Anglicanæ, Lutherus & alii schismatici, & hæretici caruerunt potestate jurisdictionis: *Episcopi* (inquit Cyprianus epist. 32.) *nec potestatem possunt habere, nec honorem, qui Episcopatus nec unitatem voluerunt tenere, nec pacem.* Et sanè jurisdictionem à Deo immediatè non habuerunt; hæc enim missioni extraordinariæ, de quâ mox dicetur, propria est: Non habuerunt etiam ab Ecclesiâ Romanâ, quia propter temeratam in capitalibus articulis fidem, deserat (inquiunt) esse vera Christi sponsa, factaque fuerat diaboli lupanar; ac proindè exciderat quâlibet jurisdictionis potestate.

Confirmatur. Si, cum Lutherus, Zuinglius, & Episcopi Anglicanæ communionis consecrati sunt, Ecclesia Romana integram habuisset potestatem jurisdictionis, tunc fuisset vera Dei Ecclesia, vera Christi sponsa; quippè certo certius est, auctoritatem Ecclesiastici ministerii, hoc est, erigendi, formandi, regendi Ecclesiam Dei, mittendi operarios in Christi vineam, non nisi veræ Christi Ecclesiæ esse concessam; non enim schismaticis, aut hæreticis, sed Apostolis, veræque Ecclesiæ dictum est: *Tibi dabo claves regni cælorum: Sicut misit me Pater, & ego mitto vos.* Verùm, si Ecclesia Romana tunc esset vera Christi Ecclesia, potestatem tunc habuit auferendi mi-

nisse.

nisterium, quemadmodum potestatem habuit conferendi; scilicet eidem Ecclesiæ, cui dictum est: *Tibi dabo claves regni cælorum, quodcumque solveris, &c.* dictum est etiam: *Quidquid ligaveris super terram, erit ligatum & in cælis.* De eâ pariter dictum est: *Si Ecclesiam non audieris, sit tibi sicut ethnicus & publicanus;* ac proinde cum eadem Ecclesia, Luthero, Zuinglio, eorumque sectatoribus anathema dixerit, ab eisque abstulerit ministerium, reverà missionem ordinariam habere non potuerunt, nec fungi ecclesiastico ministerio, & à fortiori, nec adversus eandem Ecclesiam Altare erigere.

Ministri aliarum à Romanâ societatum, Lutherani præsertim & Calvinistæ, non habent missionem extraordinariam. Nempè missio extraordinaria probari debet signis mirabilibus, seu testimoniis miraculosis; peccat enim contra prudentiæ ac sapientiæ regulas, qui credit cuivis de seipso prædicanti: *Præcessisse debuerat mittentis patrocinium* (inquit Tertullianus lib. 3. contra Marcionem cap. 2.) *in testimonium missi, quia nemo veniens ex alterius auctoritate, ipse eam sibi ex sua affirmatione defendit, sed ab ipsa defensione potius expectat, præeunte suggestu ejus, qui auctoritatem præstat.* Unde ipse Christus ait: *Si de me ipso testimonium perhibeo, testimonium meum non est verum.* Judæis petentibus, quâ potestate hoc faceret, probat suam missionem Joannis testimonio: *Baptismus Joannis unde erat?* Probat etiam editis à se miraculis: *Si opera non fecissem, quæ nemo alius fecit, peccatum non haberent.* Joannis 6. iisdem miraculis in eundem finem utitur: *Opera quæ ego facio, testimonium perhibent de me, quia Pater me misit.* Eo argumento usi sunt Patres, ut omnium Novatorum missionem elevarent: Novatianus (inquit Pacianus in epistolâ contra Novatianos) *linguis locutus est, prophetavit, suscitare mortuos potuit?* Atqui nulli ex hæreticis, qui

qui ex Ecclesiæ Romanæ sinu prodierunt, nec Lutherani, nec Calvinistæ, nec Zuingliani, nec Anglicanæ communionis Episcopi, nec Sociniani, nec tandem aliqui ex iis, qui elapso proximè sæculo Altare adversus Ecclesiam Romanam erexerunt, portentis, signis, miraculis, se à Deo extraordinariè ad reformandam Ecclesiæ fidem, ad exercendum sacrum ministerium missos probarunt: ergo non habuerunt extraordinariam missionem; proindeque meritò hisce Tertulliani verbis libro de Præscriptionibus cap. 30. compellendi sunt: *Pro bent se novos Apostolos esse... Volo igitur & virtutes eorum proferre, nisi quòd agnosco maximam virtutem eorum, qua Apostolos in perversum æmulantur: Illi enim de mortuis vivos faciebant, isti de vivis mortuos faciunt.*

Secundò, Hæretici, Lutherani, v. g. Calvinistæ, Episcopi Anglicanæ communionis, non habent successionem; neque enim aliquos pastores laudare possunt, quibus non interruptâ serie successerint: Sicut ante Valentinum non erant, qui sunt à Valentino, neq; ante Marcionem, qui sunt à Marcione; sic ante Calvinum non erant, qui sunt à Calvino, neque ante Lutherum, qui sunt à Luthero; nec ante Episcopos communionis Anglicanæ, qui sunt ex Anglicanâ communione. De iis omnibus dici possunt, quæ Cyprianus ep. 76. de Novatiano dicit: *Novatianus in Ecclesia non est, nec Episcopus computari potest, qui Evangelica & Apostolica traditione contempta, nemini succedens, à seipso ortus est.*

Objicies I. Qui ordinati sunt in Ecclesiâ Romanâ, ordinariam missionem habuerunt; nempe per ordinationem presbyteris confertur potestas consecrandi, remittendi ac retinendi peccata, prædicandi Verbum Dei; unde in Pontificali sic ordinans alloquitur eos, quibus manus imponit: *Sit doctrina vestra spiritualis medicina populo Dei, ut prædicatione, atq; exemplo ædificetis domum Dei:* Atqui Lutherus, & Zuin-

Zuinglius, ordinati fuerunt in Ecclesiâ Romanâ; ergo Lutherus, & Zuinglius, missionem ordinariam habuerunt.

Resp. 1. Illud argumentum non favere Calvinô, ipsique adhærentibus; nec enim Calvinus, aut ministri, qui primùm ipsi adhæserunt, ordinati fuerant in Ecclesiâ Romanâ; imò nec ab Episcopis, sed tantùm à viris laicis, à quibus manuum impositionem acceperunt; unde tum in Calvinum, tum in adhærentes illi pseudoministros intorqueri possunt hæc Cypriani verba libro de Unitate Ecclesiæ: *Hi sunt, qui se ultrò apud temerarios convenas, sine divina dispositione præficiunt, qui se præpositos sine ulla ordinationis lege constituunt; qui nemine Episcopatum dante, Episcopi sibi nomen assument.*

Resp. 2. dist. maj. Qui ordinati sunt in Ecclesiâ Romanâ, missionem ordinariam habuerunt quoad aliqua pastorum officia, conc. maj. quoad omnia, neg. maj. Per sacerdotalem ordinationem, ministri mittuntur ad consecrandum Christi corpus, & ad remittenda, aut retinenda peccata, non mittuntur verò ad aliquod aliud pastorum officium; hæc enim verba, quæ à Pontifice sacerdotum consecratore proferuntur: *Sit doctrina vestra, &c.* non continent alicujus potestatis collationem, cum proferantur ante ritum quo ordinatio perficitur; sed tantùm regulam, ad quam sacerdotes, ubi postea ad prædicandum Dei verbum ab Episcopis missi fuerint, concionandi modum, ac vivendi rationem exigere debeant. Præterea, dato quòd presbyteris detur in ordinatione concionandi potestas, certum tamen est, non dari reliqua pastorum officia, exercendi nimirum jurisdictionem extrinsecam, consecrandi ministros, regendi Ecclesiam Dei, erigendi societatem cui ministri præficiantur.

Resp. 3. dist. maj. Qui ordinati sunt in Ecclesiâ Romanâ, missionem ordinariam habuerunt, quam in hæresim, aut in schisma incidentes non retine-

nuerint, conc. maj. quam retinuerint, neg. maj. Lutherus, Zuinglius, & alii prætenſæ reformationis authores, per ſchiſma, quod conſtarunt adverſus Eccleſiam, à quâ (ut falſò ſupponunt) ad paſtoratûs officium miſſi fuerant, exciderunt à jure fungendi miniſterio Eccleſiaſtico; unde eadem Eccleſia, quæ (ut contendunt) eis miniſterium contulerat, illud ab ipsis abſtulit per anathematis decretum, quod in eos intorſit. De Luthe-ro, Zuinglio aliisque elapſi proximè ſæculi novatoribus, idem ferri debet judicium, ac de Neſtorio, Dioſcoro, Celeftio, Pelagio, aliisque quos Eccleſia proſcripſit: ſcilicet quamvis in eâ conſecra-ti fuiſſent, ac paſtoratu donati, miniſterio tamen poſt ſuam ab eâdem Eccleſiâ damnationem fungi minimè potuerunt.

Objicies 2. Deus unicuique mandavit habere curam de proximo ſuo: ergo Lutherus, Zuinglius, & alii, cum temeratam in Eccleſiâ fidem, ac corruptos mores perſpicerent, potuerunt eccleſiam reformare abſque ullâ aliâ miſſione: Sic enim vetus Synagoga identidem à piis regibus fuit reformata.

Reſp. ad 1. neg. conſeq. Ratio eſt, quia cura quam divino jure debemus proximo, exigit quidem, ut ei impendamus charitatis officia; ſed non dat jus ad officia authoritatîs, cujuſmodi ſunt ea, quæ paſtoratui alligata ſunt: non enim omnibus, ſed Epîſcopo ſolùm Apoſtolus ad Titum 3. dixit: *Huius rei gratia reliqui te Cretæ, ut ea, quæ de ſunt corrigas, & conſtituas per civitates præſbyteros, ſicut & ego diſpoſui tibi.* Ad 2. dicendum eſt, pios reges in veteri teſtamento, non eo ſenſu Synagogam reformaviſſe, quòd ſacerdotium uſurpaverint, ſed quòd ſuis edictis curaverint, ut ſacerdotes ad legis normam ſuis officiis fungerentur: *Dixitque ſacerdotibus filiis Aaron* (inquit Scriptura lib. 2. Paralipomenon cap. 29. referens reformationem ab Ezechîâ rege invectam) *ut offerrent ſuper altare Domini; &c.*

Con-

Confirmatur responsio ex eo, quòd Deus tum in antiquo, tum in novo testamento, immutabili lege sanciverit, ut nemo sibi sumat honorem, sed qui vocatur à Deo tanquam Aaron; unde nec Christus, nec Apostoli seipsos constituerunt Pontifices, sed id honoris ex Dei vocatione & missione consecuti sunt: *Sicut misit me Pater, & ego mitto vos.*

Objicies 3. Illi divinitus missionem habuerunt, qui veritatem populos docuerunt; eo nimirum argumento Christus utitur, ut damnet Judæos, qui divinam illius missionem agnoscere detrectabant: *Si veritatem dico vobis, quare non creditis mihi?* Atqui tum Lutherus, tum Zuīglius, tum alii novatores veritatem populos docuerunt: ergo veram habuerunt missionem.

Resp. ad 1. neg. maj. seu solam prædicationem veritatis esse vocationis ac missionis notam. Ratio est, quia schismatici plerumque (saltem suæ defectionis initio) veritatem annuntiant; & tamen (ut superius ex Augustino demonstratum est) missionem non habent. Confirmatur ex eo, quòd Core, Dathan & Abiron, non propter prædicationis falsitatem, sed propter ministerii usurpationem perierint. Ad 2. dicendum est, Christum, antequam diceret: *Si veritatem dico vobis, &c.* suam innocentiam tum miraculis, tum vitæ sanctitate comprobasse: *Quis ex vobis arguet me de peccato?* Lutherani verò, Zuīgliani, Calvinistæ, aut alii quicumque sint sectarii, nec miraculis, nec vitæ sanctitate innocentiam suam probare possunt: è contra Ecclesia, in cujus sinu nutriti fuerunt, eos & impietatis & sacrilegii propter usurpatum ministerium arguit.

Confirmatur responsio. Si sola prædicationis veritas esset divinæ vocationis ac missionis argumentum, nullus hæreticus insinulari posset usurpati sacri ministerii; nempe nullus est, qui non se jactet de veritatis prædicatione.

Ob-

Objicies 4. Fideles, licet laici, Actorum 8. per regiones Judææ & Samariæ evangelizarunt Verbum Dei : *Facta est autem in illa die persecutio magna in Ecclesia, quæ erat Ierosolymis, & omnes dispersi sunt per regiones Judææ & Samariæ, præter Apostolos Igitur qui dispersi erant, pertransibant evangelizantes Verbum Dei*. Præterea Edeusius & Frumentius adolescentes Ægyptii, licet nullo consecrati fuissent ordine, Christum Indis prædicarunt : ergo absque ullâ missione quisque potest fungi ministerio Ecclesiastico.

Resp. dist. ant. Fideles, licet laici, evangelizarunt Verbum Dei, nec sibi cathedram erexerunt, conc. ant. & sibi cathedram erexerunt, neg. ant. Ut quis ex charitatis motivo doceat ignorantes (ut factum est à fidelibus, de quibus agitur in argumento) non est opus externâ seu vocatione, seu missione, quæ tamen absolute requiritur, ut sibi cathedram erigat ; ut populum fidelem regat, ut eum pascat sacramentis, ut fiat animarum pastor. Eam veritatem perspectam habuerunt Edeusius & Frumentius, hoc est, tanquam homines privati, ex solius charitatis motivo, Indos docuerunt Euangelium ; sed sibi cathedram non erexerunt, nisi acceptâ per ordinationem missione. Theodoretus narrat Frumentium retulisse Athanasio, quanto divinæ legis desiderio Indi, apud quos captivus fuerat, tenerentur : *Quæ cum audisset Athanasius (verba sunt Theodoreti lib. 1. Hist. cap. 23.) ei sacrosanctum Episcopatus munus impertit, mittitque ad animas illius gentis doctrina pietatis excolendas*. En ordinaria missio, quæ etiam extraordinariâ, seu miraculis, confirmata fuit : *Ad gentem (ait ibidem Theodoretus) contendit culturæ divinæ penitus expertem, & eam excoluit. Nam miraculis, quæ more Apostolorum edebat, sua dicta confirmans, &c.* Cuique Novatori hæc, aut similia exempla proferenti objici possunt hæc

Au-

Augustini verba lib. I. Operis imperfecti contra Julianum: *Videres ista, si oculos haberes, & careres, si frontem haberes.*

Objicies 5. Patres plerumque utuntur subitanâ ac numerosâ infidelium conversione, ut Christianæ religionis veritatem asserant; nec enim (inquiunt) sine miraculo tot populi intra brevissimum tempus ubique fidem christianam amplecti potuerunt: Sed pariter intra brevissimum tempus ingens populorum multitudo Lutheranismum & Calvinismum amplexa est; proindeque Lutheranismi & Calvinismi auctores divinitus ad Ecclesiæ reformationem missi sunt.

Resp. neg. conseq. Ratio disparitatis est, 1. quia Lutheranismus & Calvinismus principum autoritate; vi & armis plerumque in regnis obtinuerunt; è contra verò Euangelium, stabilitum fuit martyrum patientiâ, inermium ac simplicium hominum prædicatione. 2. Cum infideles Christianæ religioni dederunt nomen, nuntium remiserunt honorum, divitiarum, voluptatum amoris: è contra cum Catholici Lutheranismum, aut Calvinismum amplexi sunt, ab austeriore vivendi modo ad liberiores transierunt; nempe virgines Deo sacræ, relictis monasteriis, publicas nuptias celebrarunt; Monachi votorum, quæ prius emisserant, jugum excussere; presbyteri antea cœlibes, contraxerunt matrimonia; laici jeuniis, satisfactoriis operibus, confessionis auricularis debito liberati sunt; Principes autoritatem omnem non in temporalibus modò, sed etiam in spiritualibus vindicarunt sibi; Ecclesiastici proventus magistratuum, ac aliorum laicorum hominum præda fuerunt. Verum opus non est miraculo, ut quis relicto austeriore vivendi modo, amplectatur eum, qui cupiditati magis favet. Vide Augustinum lib. I. de Moribus Ecclesiæ cap. 31.

Objicies 6. Missio divina deest Pontificibus

Ro-

Romanæ communionis . Nam 1. Episcopi plerumque à regibus eliguntur . 2. Romani Pontifices eliguntur à Cardinalibus, quorum institutio non est divina, sed humana tantum . 3. Nonnulli per simoniam in cathedras involant : ergo divina missio deest Pontificibus Romanæ communionis .

Resp. conc. antec. neg. conseq. Ratio est 1. quia aliud est electio, aliud ordinatio; per istam, non autem per aliam, datur missio; unde Pontifices à laicis electi, sed nondum consecrati, nullam habent jurisdictionem. 2. Episcoporum electio convenit laicis ex Ecclesiæ concessione; proindèq; ipsa Ecclesia Episcopos per laicorum suffragia eligere videtur . 3. Qui per simoniam promoti sunt, si factum constet, possunt quidem deponi; sed eis ante depositionem, reverentia ac obedientia tanquam veris Pontificibus debetur; scilicet quamdiu ab Ecclesiâ tolerantur, ab eâ acceptantur pro legitimis pastoribus, & eo nomine in auctoritatem, & venerationem veniunt.

Objicies 7. Plures sunt Antistites in Ecclesiâ Romanâ, qui per avaritiam, & per ambitionem sedes Episcopales invadunt; sed ii divinitus non mittuntur, de eisque dici potest, quod Deus per Prophetam olim edixit : *Currebant & non mittebam eos* : ergo, &c.

Resp. conc. maj. dist. min. Sed ii divinitus non mittuntur interiore missione, quæ fit per gratiam internam, conc. min. exteriori missione, quæ fit per veram ordinationem, neg. min. Hæc, non autem illa, absolutè requiritur; per istam, non autem per aliam, jurisdictio confertur . Similium pastorum respectu locum habent hæc Evangelii verba : *Quaecumque dixerint vobis facite, secundum autem opera eorum nolite facere*.

C A P U T IV.

De proprietatibus Ecclesiæ.

Not. **T**RES sunt Ecclesiæ proprietates, visibilitas, indefectibilitas, infallibilitas : de his subsequentiis articulis nobis dicendum incumbit.

A R T I C U L U S I.

De visibilitate Ecclesiæ.

Not. **N**OVATORES, qui elapso proximè sæculo visi sunt, docuerunt, veram Christi Ecclesiam esse invisibilem. : *Quis* (inquit Lutherus in libro de abrogandâ Missâ privatâ par. I.) *Ecclesiam nobis monstrabit, cum sit occulta in spiritu, & solum credatur ? Sicut dicitur : Credo Ecclesiam sanctam.* Calvinus non dissimili loquendi modo utitur in præfatione Institutionum : *Sed non parum à verò aberrant, dum Ecclesiam non agnoscunt, nisi quam præsentis oculo cernant.* Cohæret id cum eorundem novatorum principiis ; nempe docent, solos justos, ac proinde prædestinatos (cum in eorum systemate nulli sint verè justī, nisi qui prædestinati sunt) esse veræ Ecclesiæ membra. Commentum est illud dogma, ut declinarent vim argumenti, quod Catholici adversus eos petūt ex defectu successionis, tum in doctrinâ, tum in pastore ; seu ubi ab eis quæritur, ut in sæculis, quæ præcesserunt, prodant fideles, qui eorum dogmata professi sint, pastores quibus successerint, respondent se, sive in dogmatis, sive in pastore successisse viris piis, qui tunc in medio Romanæ communionis delitescabant. E contra

tra Catholici omnes docent, ac docuerunt semper, veram Christi Ecclesiam esse, ac fuisse semper visibilem, ita ut societatem constituat, quæ ipsis etiam sensibus pateat.

CONCLUSIO. Vera Christi Ecclesia est visibilis.

Probatur 1. ex Scripturâ. Ea societas est visibilis, de quâ Scriptura ubique loquitur tanquam de congregatione visibili: atqui Scriptura ubique loquitur de Ecclesiâ tanquam de congregatione visibili. Numerorum 20. populus, qui exierat de Ægypto, dicitur Ecclesia: *Cur eduxistis Ecclesiam Domini in solitudinem?* Tertii Regum 8. Ecclesia sumitur quoque pro visibili multitudine: *Convertitque rex faciem suam, & benedixit omni Ecclesiæ Israel; omnis enim Ecclesia Israel stabat.* Matthæi 18. hæc verba: *Dic Ecclesiæ: Si Ecclesiam non audierit, &c.* de visibili cœtu intelliguntur, quomodo enim, quis peccata fratris ad cœtum invisibilem deferre posset? De cœtu quoque visibili, necessariò debent intelligi hæc verba Actorum 28. *Attendite vobis & universo gregi, in quo vos Spiritus Sanctus posuit Episcopos regere Ecclesiam Dei;* scilicet, si per Ecclesiam societas invisibilis intelligeretur, regi non posset ab Episcopis; nec enim grex, qui non cognoscitur, regi potest à pastore. Eodem sensu sumenda sunt hæc alia Actorum 15. *Illi quidem deducti ab Ecclesia, pertransierunt Phœnicem.* Cap. 18. *Ascendit Paulus, & salutavit Ecclesiam.* Tandem alium sensum pati non possunt hæc 1. ad Timoth. 3. *Hæc tibi scribo, fili Timothee, ut scias, quomodo oporteat te in domo Dei conversari, quæ est Ecclesia Dei vivi.*

Probatur 2. comparisonibus, quibus Scriptura utitur, cum de Ecclesiâ loquitur. Cyprianus lib. de Unitate Ecclesiæ, eam comparat cum arcâ Noe; Hieronymus in dialogo contra Luciferianos, cum domo, in quâ Agnus Paschalis edi debebat; Augustinus asserit, eam esse ci-

vitatem, quam Euangelium dicit esse supra montem positum : Nulla (inquit lib. 3. contra epistolam Parmeniani cap. 5.) est securitas unitatis, nisi ex promissis Dei, Ecclesiæ declarata, quæ supra montem (ut dictum est) constituta abscondi non potest. Tractatu 1. in epist. Joannis sic loquitur : Nunquid digito ostendimus Ecclesiam, fratres mei ? nonne aperta est ? Tractatu 2. hæc etiam habet : Quid amplius dicturus sum, quàm cæcos, qui tam magnum montem non viderint ; qui contra lucernam in candelabro positam, oculos claudunt ?

Probatur 3. ex rationibus theologicis. Primò, ex dictis, Ecclesia est societas hominum sub Christo capite, & legitimis pastoribus Deo servientium. Secundò, tenetur quisque audire Ecclesiam, ad illam redire, si per schisma, aut hæresim sit extra illius sinum ; neque enim aliquis extra Ecclesiam positus, salutem consequi potest : At quomodo quis Ecclesiam audire, illi adhærere, ad illam redire poterit, si Ecclesia non sit visibilis ?

Objicies 1. Ecclesia Christi & novum testamentum idem sunt : atqui novum testamentum est invisibile, juxta illud Hieremiæ 31. *Dabo legem meam in cordibus eorum, & erunt eis in Deum, & ipsi erunt mihi in populum* : ergo, &c.

Resp. 1. neg. maj. nempe novum testamentum, & Ecclesia differunt tanquam fœdus & personæ ; cum quibus fœdus initum est ; proindèq ; quamvis daretur illud fœdus esse invisibile, non sequeretur Ecclesiam esse invisibilem. Resp. 2. neg. min. Ratio est, quia Christus publicum fœdus iniit cum Ecclesiâ, exterius nimirum eam docuit, promissa confirmavit sanguinis effusione. Nec obstant laudata Hieremiæ verba : *Dabo legem meam in cordibus eorum* ; non enim aliud significant, quàm quòd Deus Ecclesiæ Christi charitatem collaturus sit, cum è contra externum tantum legis corticem Judæis, prout Judæis, hoc

hoc est, prout ad solùm vetus testamentum pertinentibus, concesserit.

Objicies 2. Mons, de quo Apostolus loquitur, ad Hebræos 12. est Christi Ecclesia : atqui mons ille non est visibilis : *Non enim (inquit) accessistis ad tractabilem montem, & accessibilem ignem, sed ad Sion montem & civitatem Dei viventis*: ergo nec Ecclesia est visibilis.

Resp. dist. maj. Mons ille est Ecclesia triumphans, conc. maj. Ecclesia militans, neg. maj. Sensus est, Christianos in novo testamento spe accessisse ad intuitivam Dei visionem, cum è contra Judæi carnales non aliud sperarent,quàm corporea bona ; unde Apostolus laudatis in argumento verbis hæc alia subjicit : *Et multorum milium Angelorum frequentiam, & spiritus iustorum & perfectorum*.

Objicies 3. Quod creditur, non est visibilè : sed Ecclesia creditur ; nempè illius existentia constituit unum de articulis symboli : *Credo sanctam Ecclesiam*. Ita ratiocinatur Lutherus in libro de abrogandâ Missâ privatâ par. 1.

Resp. 1. neg. min. quod enim in symbolo profiteamur, non est Ecclesiæ existentia, sed sanctitas, quæ haud dubiè invisibilis est. Resp. 2. conc. maj. dist. min. Ecclesia creditur, hoc est, hunc cœtum visibilem hominum, esse Christi Ecclesiam, conc. min. scilicet sunt evidentia motiva, propter quæ credimus, illum in particulari cœtum esse veram Ecclesiam Christi. Ecclesia creditur, hoc est, existere hominum cœtum, qui sub iisdem pastoribus, ac cum eorundem sacramentorum usu profitentur Christi fidem, neg. min. Igitur unum videtur in Ecclesiâ, cœtus hominum Christi fidem, exterius saltem, profitentium, & aliud creditur ; nempè illum cœtum esse veram Christi Ecclesiam. Sic in baptismo videmus elementa, ex quibus constat, & credimus illa elementa constituere verum Christi baptismum.

ARTICULUS II.

De indefectibilitate Ecclesiae.

Not. 1. **E**cclēsia duobus modis spectari potest, scilicet secundum partem invisibilem, & secundum partem visibilem. Sumpta priore modo, est cœtus hominum justorum; posteriore autem modo, est cœtus hominum qui fidem Catholicam exterius profitentur, abstrahendo an sint iusti, vel impii.

Not. 2. Calvinistæ fatentur quidem, Ecclesiam sumptam secundum partem invisibilem, & interiorem, esse indefectibilem; sed contendunt sumptam pro parte visibili, & exteriorē, esse defectibilem, & reverā nonnumquam omninō defecisse. Commentisunt illud systema, ut declinent vim argumenti, quod Catholici adversus eos desumunt ex defectu successionis; nempe ubi ab eis quæritur, quibus Christianis successerint, respondent se non successisse quidem cœtui alicui visibili qui exterius profiteretur omnes articulos quos defendunt, sed cuidam hominum cœtui invisibili, in quorum cordibus Deus veram fidem, veramque charitatem in medio corruptæ Babylonis, seu Romanæ Ecclesiæ, conservaverit. E contra omnes Catholici docent, Ecclesiam esse indefectibilem, non tantum secundum partem invisibilem & internam, sed etiam secundum partem visibilem, & externam.

C O N C L U S I O . Ecclesia est indefectibilis, etiam secundum partem visibilem, & externam.

Probatur 1. ex Prophetarum vaticiniis. Prophetæ prædixerunt, Ecclesiam Christi fore indefectibilem. Isaias cap. 6. sic loquitur: *Fœdus perpetuum feriam eis: & scietur in gentibus semen eorum, & germen eorum in medio populorum. Omnes*

nes qui viderint eos, cognoscent illos, quia isti sunt semen, cui benedixit Dominus. Locus ille intelligitur de Ecclesiâ Christi; ipsa enim est semen cui benedixit Dominus, est semen quod scitum est gentibus: atqui ea Ecclesia, illud semen sunt quid visibile, & externum; neque enim quod internum est tantum, cognosci potest, aut videri. Ezechielis cap. 37. eadem legitur loquendi ratio: Et scient gentes, quia ego sanctificator Israel, cum fuerit sanctificatio mea in medio eorum in perpetuum. Hæc quoque leguntur Danielis cap. 2. In diebus autem regnorum illorum suscitabit Deus cæli regnum, quod in æternum non dissipabitur, & regnum ejus alteri non tradetur. Illud regnum haud dubiè est Ecclesia Christi, quæ post Romanum imperium incæpit: ergo quemadmodum imperia, quæ præcesserant, fuerunt visibilia: ita & illud quod Propheta successurum prædixit.

Probatur 2. ex parabolis euangelicis & literis Apostolicis. Ecclesia est area, in quâ sunt boni & mali: sed illa area perdurabit semper; scilicet in fine tantum sæculi Christus, Matthæi 3. *Aream suam permundabit, & congregabit triticum in horreum suum, paleas autem cumburet igni inextinguibili.* Ecclesia est ager, in quo bonum semen, & zizania reperiuntur: atqui ager ille stabit usque ad mundi finem: *Sinite* (inquit Christus) *utraque crescere usque ad messem. Messis autem consummatio sæculi est.* Apostolus Timotheum sic monet: *Vt scias* (inquit) *quomodo oporteat te in domo Dei conversari* (Ecclesiâ nimirum visibili, cum invisibili enim cœtu non est conversatio) *quæ est columna, & firmamentum veritatis: at si visibilis domus Dei sit columna, & firmamentum veritatis, deficere non potest.*

Probatur 3. ex iis, quæ à Christo ordinata sunt ad constituendam Ecclesiam. 1. Voluit, ut in ecclesiâ pastores essent usque ad sæculi consummationem: *Et ipse* (ait Paulus ad Ephesios 4.) *dedit*

quosdam quidem Apostolos, alios Prophetas, alios Evangelistas, alios Pastores & Doctores ad consummationem sanctorum in opus ministerii, in edificationem corporis Christi, donec occurramus omnes in unitatem fidei, & agnitionis Filii Dei, &c. Atqui pastores non dantur, nisi visibili gregi; proindèque cum pastores (ex Apostolo) debeant esse perpetui, grex visibilis debet quoque esse perpetuus. 2. Præcepta, quæ pastoribus imposita sunt, non sunt ad tempus, sed ad ipsiusmet Christi adventum: *Præcipio tibi* (ait Paulus 1. ad Timoth. 6.) *ut serves mandatum sine macula, irreprehensibile usque in adventum Domini nostri Iesu Christi.* 3. Christus sacramenta instituit, quæ perduratura sunt usque ad sæculi consummationem: *Docete omnes gentes, baptizantes eos, &c. Et ecce ego vobiscum sum usque ad consummationem sæculi.* Eucharistia edi debet usque ad mundi finem: *Quotiescumque* (ait Apostolus) *manducabitis panem hunc & calicem bibetis, mortem Domini annuntiabitis, donec veniat.* Tandem remissio peccatorum per sacramentum pœnitentiæ, & ordinatio sacerdotum permanebunt inter fideles usque ad Christi adventum; non enim ad aliquod tantum tempus, sed ad illud omne, quod erit usque ad mundi finem, extenduntur hæc Christi verba: *Quorum remisistis peccata, remittuntur eis, &c.*

Probatur 4. ex Patribus. Augustinus variis in locis docet, visibilem fidelium cœtum nusquam defuturum. In Psalm. 105. disputans contra Donatistas, qui totam Ecclesiam visibilem, Cæciliani tempore, periisse, ac in paucis iustis in Africâ permansisse contendebant, hæc scribit: *Sed illa Ecclesia, quæ fuit omnium gentium, jam non est; perit: hoc dicunt, qui in illa non sunt. O impudentem vocem! illa non est, quia tu in illa non es. Vide, ne tu idèò non sis; nam illa erit, etsi tu non sis.* Idque probat sanctus Doctor hæc Christi promissione: *Ecce ego vobiscum sum usque*

usque ad consummationem sæculi : Chrysostomus Homil. 4. in Isaiam idem docet : *Facilius est (inquit) extinguere solem , quàm Ecclesiam obscurari* . Idem apud Bernardum legere est serm. 89. in Cantica .

Probatur 6. ratione theologicâ . Si Ecclesia perire possit secundum partem exteriorem , perire quoque poterit secundum interiorem ; siquidem est de Christianæ Ecclesiæ essentiâ , ut exteriùs habeat pastores , ut singula illius membra visibilia sacramentorum vinculo conjungantur , & publicè Christi fidem profiteantur : atqui si omninò pereat secundum visibilem , & exteriorem sui partem , interior , quæ remansura supponitur , nullos exteriùs habebit pastores , nullis sacramentis colligabitur , publicè Christi fidem non profitebitur : ergo non erit vera Christi Ecclesia .

Objicies 1. Ecclesia defecit 1. in Adamo & Evâ , quando peccarunt : 2. defecit sæpiùs in lege naturæ , seu ante Moysen ; nempe perpauci tunc fuerunt homines pii . 3. Defecit Moyses tempore cum Aaron vitulum aureum proposuit adorandum , totusque populus Exodi 32. clamavit : *Hæ sunt Diæ tui Israel* . 4. Heliæ tempore , in solo Heliâ visibiliter remanserat : *Derelictus sum* (inquit 3. Regum 19.) *ego solus* .

Resp. ad 1. Adamum & Evam non constituisse Ecclesiam , sed fuerunt Ecclesiæ initium . Resp. ad 2. argumentum probare , perpaucos tunc fuisse veri Dei cultores ; quod non negamus , sed illi perpauci cultores constituebant veri Dei Ecclesiam . Resp. ad 3. totum populum Israeliticum non consensisse adorationi vituli aurei , eam è contra ultus est Moyses , qui tunc solus erat summus Israelitarum sacerdos ; nondum enim Aaron inauguratus fuerat Pontifex Maximus , eam quoque ultus est tota tribus Levi : *Si quis est Domini* (verba sunt Moysis , Exodi 40.) *jungetur mihi , congregatique sunt ad eum omnes filii Levi* .

Aa 5 Resp.

Resp. ad 4. Dato, quòd Ecclesia in solo He-
liâ visibiliter in regno Israel remansisset, non se-
queretur tamen eam omninò periisse; nam re-
manserat integra in regno Juda; in eo enim
Asa, ac postea Josaphat optimi reges, numero-
sissimusque populus sacrificia ad legis normam
Hierosolymis offerebant: Præterea Helix qua-
renti, quòd solus remansisset, Deus sic respon-
dit: *Derelinquam mihi septem millia virorum in*
Israel, quorum genua non sunt incurvata ante
Baal. Iis responsionibus addendum est, quòd
quamvis daretur Ecclesiam in totâ Judæorum Re-
publicâ nonnunquam visibiliter periisse, idem
tamen dici non deberet de Ecclesiâ Christianâ.
Ratio est, quia Deus Ecclesiæ Judaicæ perpe-
ruam stabilitatem non promiserat, quam tamen
Christianæ expressè pollicitus est.

Objicies 2. Apostolus 2. ad Thessalonicen-
ses 2. prædixit generalem apostasiam futuram
in Ecclesiâ, Antichristi tempore: *Ne quis (in-*
quit) vos seducat ullo modo; quoniam nisi vene-
rit discessio primum, & revelatus fuerit homo pec-
cati, filius perditionis, qui adversatur & extolli-
tur supra omne, quod dicitur Deus, aut quod coli-
tur, ita ut in templo Dei sedeat, &c.

Resp. 1. negando Antichristi tempore futu-
ram esse generalem populi fidelis discessio-
nem. Siquidem (ipsomet Christo teste) pro-
pter electos breviabuntur dies illi. 2. Disces-
sio, quæ (ut ait Scriptura) futura est, erit
apostasias à trunco, proindeque vera Ecclesia
superstes erit in trunco. 3. Homo peccati di-
citur quidem sessurus in Dei templo, sed non
dicitur, quòd interrupturus sit pontificum suc-
cessionem. 4. Dicitur exaltandus super omne,
quod colitur Deus; tunc igitur adhuc Deus pu-
blicè coletur.

Objicies 3. Arianorum tempore, Ecclesia
Catholica defecit; nam 1. Hilarius in epist. ad
Constantium scribit, paucos admodum fuisse Ca-
tho-

tholicos in Oriente. 2. Hieronymus in dialogo adversus Luciferianos, agens de Concilio Ariminensi, sic loquitur : *De Vſiæ verò nomine abjiciendo , verisimilis ratio præbatur : Quia in Scripturis (aiebant) non invenitur , & multos simpliciores novitate sua scandalizat , placuit auferri His ita gestis Concilium solvitur Ceperunt postea Valens & Vrsacius palmas suas jactare , dicentes se Filium non creaturam negasse , sed similem cæteris creaturis . Tunc Vſiæ nomen abolitum est . Tunc Nicænæ fidei damnatio conclamata est . Ingemuit totus orbis , & Arianum se esse miratus est .*

Resp. neg. ant. Ad cujus priorem probationem dicendum est 1. ex paucitate Orthodoxorum in Oriente malè colligi visibilem Ecclesiam periisse ; nempè satiserat , ut tunc emereret in Occidente . Dicendum est 2. plures Episcopos , tunc etiam in Oriente , defendisse fidem Orthodoxam . Nempè ab Athanasii partibus stabant Gaius , Ammonius , Adelphius , Marcus , Paphnutius , aliiq; tam Africæ , quàm Orientis antistites , partim in loca desertæ relegati , partim spontaneâ fugâ dispersi . His addi debent Philo Lybiæ Episcopus , Dracontius quem S. Hilari-
on exulantem vidit , Serapion Tmensis , Eusebius Samosatenus , Cymatius , pluresq; alii , quos S. Athanasius in Apologiâ pro suâ fugâ scribit , exules fuisse propter fidei Catholicæ confessionem .

Ad alteram ejusdem antecedentis probationem distinguendus est Hieronymi textus : Ingemuit totus orbis , & Arianum se in specie esse miratus est , conc. antec. à parte rei , neg. antec. Mox allatæ solutionis explicationem & veritatem lector fusè pertractatas reperiet hujusce tomi pag. 206. & 207. In eundem sensum sumi debent hæc Augustini verba epist. 50. Sic (Ecclesia) multitudinibus per schismata & hæreses pereuntibus subvenire consuevit .

Hoc displicuit Lucifero, quia factum est in eis suscipiendis, atque sanandis, qui veneno perierant Ariano.

ARTICULUS III.

De Ecclesiæ infallibilitate.

Not. 1. **E**cclesia duobus modis considerari potest: 1. prout per Episcopos in Conciliis generalibus repræsentatur: 2. prout per varias orbis regiones dispersa est. Quæri igitur potest, utrùm Ecclesia, sive in Conciliis generalibus, sive dispersa per varias orbis regiones, sit infallibilis.

Not. 2. Agentes superiùs de Conciliis in genere, fusè probatum est, Ecclesiam, quæ per Episcopos in Conciliis generalibus repræsentatur, esse infallibilem: superest igitur, ut hîc expendamus utrùm dispersa per orbem eodem jure gaudeat; hoc est utrùm Ecclesiarum particularium, quæ per orbem dispersæ sunt, in unum dogma consensus unanimis, fidei articulum efficiat. Negativam sententiam defendunt heterodoxi, affirmativam verò omnes Catholici.

CONCLUSIO. Unanimis omnium particularium Ecclesiarum consensus in unum dogma, efficit articulum fidei, hoc est, omnes orbis Ecclesiæ simul sumptæ errare non possunt.

Probatur 1. Ideò Episcopi in Conciliis generalibus errare non possunt, quòd universam Ecclesiam repræsentent: ergo nec errare potest ipsa universa Ecclesia; sed omnes Ecclesiæ particulares simul sumptæ universam Ecclesiam constituunt: ergo earum unanimis in aliquod dogma consensus, non minùs est infallibilis, quàm consensus Episcoporum, qui ad Concilia generalia congregati sunt.

Probatur 2. Ecclesiæ per orbem terrarum disper-

persæ, unam Christi sponsam constituunt, juxta illud Apostoli : *Despondi vos uni viro virginem castam exhibere Christo* : atqui Christi sponsa est infallibilis; nempe cum eâ Christus semper erit : *Ecce* (inquit Matthæi 28.) *ego vobiscum sum usque ad consummationem sæculi* . Eadem Ecclesiæ non minùs sunt domus Dei , quàm Ecclesia in Conciliis generalibus per Episcopos repræsentata . Sed domus Dei , 1. ad Timotheum 3. *est columna & firmamentum veritatis* ; ac proindè infallibilis : quomodo enim ea erit firmamentum veritatis , quæ filios suos in errorem inducere poterit ?

Probatur 3. Ille consensus est infallibilis, cui oppositum dogma judicatum fuit hæresis: atqui dogma oppositum unanimi omnium Ecclesiarum consensui, judicatum fuit hæresis; ut subsequentibus momentis patebit.

Primò, Quæ per duo priora sæcula exortæ sunt hæreses, tales judicatæ sunt, quòd unanimi Ecclesiarum consensui essent oppositæ : Ecclesiæ (inquit Eusebius Hist. lib. 4. cap. 7. agens de Saturnini ac Basilidis erroribus) *per universum orbem instar clarissimorum siderum fulgent, & viget in omne genus humanum fides Christi, &c. Plurimi Ecclesiastici viri patrociniū veritatis suscipiunt, & pro Ecclesiastica, Apostolicaque doctrina disertissimè decertant, &c. Et adversariorum quidem inventa à semetipsis confutata, confestim extincta sunt* . Idem scriptor cap. 11. recenset Valentini, Cerdonis, Marcionis & Marci mendacia, innuitque, ea solo Ecclesiarum consensu dissipata fuisse .

Secundò, Irenæus Florino hæretico non aliud opponit, quàm unanimem Ecclesiarum consensum : Hæc dogmata (inquit) *dissentiunt ab Ecclesia, &c. Hieronymus eundem Ecclesiarum consensum, nullâ factâ mentione synodorum, opponit Vigilantio : Malè* (inquit) *facit ergo Episcopus Romanus, qui super mortuorum hominum*

Pe-

Petri & Pauli, secundum nos, ossa veneranda, secundum te, vilem pulvisculum, offert Domino sacrificia, & tumulos eorum Christi arbitrat^{ur} Altaria? Et non solum unius urbis, sed totius orbis errant Episcopi, qui cauponem Vigilantium contemnentes, ingrediuntur basilicas mortuorum?

Tertio, Quædam privatæ synodi œcumenicarum vim habuerunt, quod eas postmodum confirmaverit idem Ecclesiarum consensus; sic quæ labente secundo sæculo contra Montanistas in Asiâ celebratæ sunt, summæ fuerunt auctoritatis, quod (ut ait Eusebius Hist. lib. 4. cap. 16.) universa per orbem terrarum sparsa Ecclesia illis consensisset. Propter eandem rationem maximi ponderis fuerunt, quæ tertio sæculo contra Novatianos habitæ sunt. Cornelius in epistolâ ad Fabium Antiochenum refert consensum, quem totius Occidentis Antistites præbuerant synodo, quam ipse Romæ celebrat: Cum Romæ (inquit Eusebius Hist. lib. 6. cap. 43.) congregata esset synodus, in qua sexaginta quidem Episcopi, presbyteri verò, ac diaconi multo plures convenerunt. Cumque in provinciis Antistites, quid agendum esset, singuli consultassent, huiusmodi decretum cunctis promulgatum est, &c. Extant epistolæ Cornelii Papæ ad Fabium Antiochenum, in quibus & Romæ synodi gesta, & omnium per Italiam, & Africam, aliasve locorum illorum provincias sententiæ declarantur.

Quinto, Eundem Ecclesiarum consensum Cyprianus iis opponit, qui Novatiano favebant: Quàm vanum est (ait lib. 3. epist. 13.) ut Novatiano nuper retuso & refutato, & per totum orbem à sacerdotibus Dei abstento, nunc adulatores adhuc vobis patiamur illudere, & de maiestate, ac dignitate Ecclesiæ judicare?

Sexto, Augustinus lib. 4. ad Bonifacium cap. ult. negat synodum generalem concedi
de-

debere Pelagianis , quòd eorum hæresis per synodos in provinciis habitas , ac Ecclesiarum consensu confirmatas , sat superque damnata intelligeretur : *Aut verò* (ait) *congregatione synodi opus erat , ut aperta perniciēs damnaretur , quasi nulla hæresis aliquando sine synodi congregatione damnata sit ? Cum potius rarissimæ inveniantur , propter quas damnandas necessitas talis extiterit ; multòque sint , atque incomparabiliter plures , quæ ubi extiterunt , illic improbari , damnarique meruerunt , atque inde per cæteras terras devitandæ innotescere potuerunt .*

Septimò , Eundem in unum dogma Ecclesiarum consensum maximè commendat Vincentius Lirinensis Commonit. 1. cap. 3. In ipsa (inquit) Catholica Ecclesia magnoperè curandum est , ut id teneamus , quod ubique , quod semper , quod ab omnibus creditum est .

Quæres , an sit aliquod discrimen inter definitionem Concilii generalis , & unanimem Ecclesiarum particularium consensum .

Resp. hoc esse discrimen , quòd non solum synodus generalis universam Ecclesiam repræsentet , sed etiam quòd universæ Ecclesiæ sensum præsentem habeat , illumque expressè declaret , ac manifestet . Nempè ideò ex universo orbe Episcopi ad Concilium generale congregantur , ut intelligi possit , quæ sit circa propositum articulum singularum orbis Ecclesiarum sententia ; unde quilibet Episcopus in Concilio generali fidem facit , Ecclesiam cui præest , articulum , de quo agitur profiteri ; testatur , se eum per traditionem ab antecessoribus accepisse ; hincque sequitur Concilium generale nihil , quoad substantiam , novi definire ; sed declarare tantum , quid Ecclesiæ per totum orbem dispersæ , saltem implicite , crederent : *Quid Ecclesia* (inquit Vincentius Lirinensis Commonit. 1. cap. 32.) *unquam aliud Conciliorum decretis enixa est , nisi ut , quod antea sim-*
pli-

Q U Æ S T I O V.

De Romano Pontifice.

Not. **Q**Uæ ad Romanum Pontificem spectant, ad duo capita reducemus: quæremus nimirum 1. utrum, & quo jure primatum habeat in totâ Ecclesiâ: 2. an illius de fide ac moribus solemne judicium, sit locus theologicus.

C A P V T I.

Vtrum, & quo jure Romanus Pontifex primatum habeat in Ecclesia.

Not. **J**Oannes Vviclef negavit (teste Thomâ Vvaldensi) Romanum Pontificem habere primatum in Ecclesiâ. Lutherus post suam à Leone X. damnationem asseruit, quòd tantum abest, ut Papa sit visibile Ecclesiæ caput, & primatum habeat, quin potius sit Antichristus. Luthero adhæserunt Zuinglius, Calvinus, aliiq; recentiores sectarii. Iis præiverant Græci, qui Constantinopoli sedente Photio, schisma adversus Ecclesiam Romanam conflaverant.

CONCLUSIO. Romanus Pontifex jure divino primatum habet in tota Ecclesiâ.

Probat. Ille divino jure primatum habet in totâ Ecclesiâ, qui legitimus est Petri successor: atqui Romanus Pontifex est legitimus Petri successor: ergo divino jure primatum habet in totâ Ecclesiâ. Ambæ argumenti præmissæ sigillatim probandæ sunt.

Pri-

Primò, Eum ; qui legitimus est Petri successor , divino jure habere primatum in totâ Ecclesiâ, sic ostenditur. Qui est legitimus Petri successor, eandem habet in totâ Ecclesiâ potestatem , quam in eâ Petrus habuit ; sic qui succedit regi, eâdem quâ rex autoritate fruitur : atqui Petrus jure divino primatum habuit in totâ Ecclesiâ . Siquidem Christus primum in Ecclesiâ locum ei contulit; nempè eum ipsi locum contulit, quem fundamentum habet respectu ædificii : *Tu es Petrus* (inquit Christus Matthæi 16.) & *super hanc Petram ædificabo Ecclesiam meam* ; at fundamentum primum occupat locum in ædificio, cum totum ædificium ab eo sustentetur . Ita ratiocinantur Ambrosius serm. 47. & Gregorius Magnus lib.4. epist.32.

Præterea , Ille primatum divinitus habuit , qui non agnorum tantum, seu fidelium , sed ipsarum etiam ovium , seu pastorum , qui Christo per Evangelium filios generant , pastor constitutus est : Sed Petrus à Christo constitutus est pastor non agnorum tantum , seu fidelium , sed etiam ovium , seu pastorum ; ubi enim interroganti Christo ter respondisset, se eum diligere : *Tu scis, quia amo te* ; hæc ab ipso audivit Joannis cap.21. *Pasce agnos meos, pasce oves meas* . In quæ quidem verba sic Chrysostomus loquitur : *Aliis omiſſis, Petrum dumtaxat affatur, fratrum ei curam committit* . Eodem modo eundem locum explicant Theophylactus & Bernardus lib.2. de Consideratione , & alii plures, quos Peronius recenset.

Addendum est, idem innuere varias prærogativas, quas Evangelium Petro tribuit. 1. A Christo mutatum est illius nomen : *Tu es Simon filius Jonæ : tu vocaberis Cephæ* , quod interpretatur Petrus, hoc est, petra, saxum. 2. Primus inter Apostolos semper recensetur, licet Andreas eo major esset ætate , & prior vocatione : *Duodecim autem Apostolorum nomina hæc sunt* (verba sunt Matthæi

thæi 10.) *Primus, Simon, qui dicitur Petrus*. 3. Primum Apostolorum Concilium convocavit, primus in eo suum suffragium tulit, in ejusque sententiam abiit tota multitudo. Quæ à Petro fundatæ sunt Ecclesiæ, Antiochena nimirum, Alexandrina, & Romana, solæ prioribus sæculis Ecclesiæ Patriarchales habitæ sunt.

Patres in Petro divinitus concessum in totâ Ecclesiâ primatum agnoverunt. Cyprianus in epistolâ ad Quintum laudat Petrum, quod in Legalium disceptatione, Paulo, à quo arguebatur, primatum suum non objecerit: *Nam (inquit) nec Petrus, quem primus Dominus elegit, & super quem edificavit Ecclesiam suam, cum secum Paulus de circumcisione disceptaret, postmodum vindicavit sibi aliquid insolenter, aut arroganter assumpsit, ut diceret se primatum tenere, & obtemperari à novellis & posteris sibi debere*. Leo Magnus sermone de suâ ad Pontificatum assumptione, sic loquitur: *De toto mundo unus eligitur Petrus, qui & universalium gentium vocationi, & omnibus Apostolis, cunctisque Ecclesiæ Patribus præponatur; ut quamvis in populo Dei multisacerdotes sint, multique pastores, omnes tamen propriè regat Petrus, quo principaliter regit & Christus*.

Secundò, Romanum Pontificem esse legitimum Petri successorem, sic ostenditur. Ille est legitimus Petri successor, qui cathedram habet, in quâ Petrus sedit, & mortuus est; nempe cum primatus Petro concessus sit propter Ecclesiam, ut inter Apostolos unitas constitueretur, necesse est propter eandem rationem, ut primatus in Ecclesiâ sit perpetuus; proindeque oportet, ut aliquis in primatu Petro succedat: At is est Romanus Pontifex: Nam 1. Nullus unquam Episcopus, alius à Romano, se Petri successorem prædicavit: 2. Tota traditio alle-

ruit,

ruit, Pontificem Romanum esse Petri successorem : Ita enim docent Tertullianus lib. de Præscript. cap. 36. Irenæus lib. 3. cap. 3. Cyprianus lib. 1. epist. 3. Epiphanius hæresi 27. Augustinus, qui lib. 2. contra litteras Petiliani cap. 52. sic loquitur : *Cathedra tibi quid fecit Ecclesiæ Romanæ , in qua Petrus sedit , & in qua nunc Anastasius sedet ?*

Probatur iterum conclusio ex Conciliis . Hæc habet Canon secundus prioris Concilii Constantinopolitani : *Constantinopolitanus habeat primatus honorem post Romanum Episcopum .* Tunc igitur Græcis Patribus persuasum erat Romanum Pontificem in totâ Ecclesiâ primatum habere . Concilium Chalcedonense hæc etiam habet : *Perpendimus omnem quidem primatum , & honorem præcipuum secundum Canones antiquæ Romæ , Dei amantissimo Episcopo conservari .* In Concilio Constantiensi damnatus est iste Vviclefi articulus : *Non est de necessitate salutis , credere Romanam Ecclesiam esse supremam inter alias Ecclesias .* Hanc etiam legimus in Concilio Florentino , Græcis consentientibus , definitionem : *Definimus sanctam Apostolicam sedem & Romanum Pontificem in universum orbem tenere primatum , & ipsum Pontificem Romanum successorem esse B. Petri Principis Apostolorum , & verum Christi Vicarium .*

Ex iis, quæ hucusque dicta sunt , evidenter patet, Patres, sive extra Concilia, sive in Conciliis adunatos , ubique semper Romanum Pontificem agnovisse pro vero ac legitimo Petri successore .

Solvuntur adversariorum objectiones .

Objicies 1. Hæc Christi verba : *Super hanc petram ædificabo Ecclesiam meam* , non referuntur ad Petri personam , sed ad hanc illius confessionem : *Tu es Christus filius Dei vivi* ; ita ut
sen-

sensus sit, fidem de Christi divinitate esse fundamentum Ecclesiæ ; ita enim Hilarius lib. 6. de Trinitate , Ambrosius in cap. 2. epist. ad Ephesios , Cyrillus Alexandrinus lib. 4. de Trinitate, Chrysostomus homil. 55. in Matthæum , locum illum interpretati sunt . Præterea alii Patres *Petræ* nomine ipsummet Christum intellexerunt; ita ut voluerint, hūc esse sensum verborum Christi: *Tu es Petrus, & super hanc petram quam confessus es, ædificabo Ecclesiam meam, petra enim erat Christus* ; ita Augustinus tractatu 124. in Joannem , nec non serm. 13. de verbis Domini .

Resp. ad 1. dist. antec. Hæc verba, *super hanc petram* , intelliguntur de confessione Petri tanquam de causâ meritoriâ, conc. ant. tanquam de causâ subjectivâ, neg. ant. hoc est, Petrus per illam confessionem aliquo modo meritus est, ut esset petra, super quam Ecclesia ædificaretur : *Mercedem* (ait Hieronymus in illum locum) *recepit vera confessio* . Ad 2. dist. antec. Patres per *petram* intellexerunt Christum, & non excluderunt Petrum, conc. ant. & excluderunt Petrum, neg. ant. Idè Augustinus *petram* explicuit de Christo, quòd judicaret, eam expositionem minùs favere Donatistis contendentibus, ministrorum probitatem ad sacramentorum virtutem requiri : Verùm non exclusit aliam explicationem, quæ *petram* de Petro interpretatur; imò lib. 1. Retractat. cap. 21. asserit, postremam hanc explicationem non minùs esse probabilem, quàm alteram : *Harum* (inquit) *autem duarum sententiarum, quæ sit probabilior, eligat lector* . Cum igitur Augustinus lectori suo facultatem fecerit judicandi, quænam ex duabus illis sententiis sit probabilior, theologi qui per *petram* censent Petrum intelligi, non peccant contra reverentiam Augustino debitam . Expositionem verò confirmant ex eo, quòd vox *Petra* referatur ad *petram*, de quâ Christus antea immediatè locutus fuerat;

at

at non de seipso , sed de Petro antea locutus fuerat immediatè : *Tu es Petrus , & super hanc petram ædificabo Ecclesiam meam .* Præterea , cur Christus in mercedem confessionis dixisset Petro : *Et ego dico tibi , quia tu es Petrus , & super hanc petram , &c.*

Objicies 2. Hæc verba : *Tibi dabo claves regni cælorum : Quodcumque ligaveris , &c.* dicta sunt Petro non in propriâ ejus personâ , sed quatenus gerebat Ecclesiæ figuram : *Petrus* (inquit Augustinus tractatu 50. in Joannem) *quando claves accepit , Ecclesiam sanctam significavit .* Ergo ex his verbis : *Tibi dabo claves , &c.* colligi quidem potest , penès Ecclesiam esse regimen populi fidelis , non autem penès Petrum : quemadmodum ex eo , quòd regis procurator nomine regis claves alicujus urbis accipiat , malè infertur , illius urbis administrationem ad illum pertinere .

Resp. dist. ant. Quatenus gerebat figuram Ecclesiæ sub ratione rectoris , conc. ant. sub ratione procuratoris , neg. ant. seu Petrus repræsentabat Ecclesiam , quemadmodum Princeps , dum civitatis claves recipit , repræsentat Rempublicam cui præficitur : *Petrus Apostolus* (inquit Augustinus tractatu 124. in Joannem) *propter Apostolatus sui primatum , Ecclesiæ gerebat figurata quadam generalitate personam .*

Objicies 3. Cyprianus asserit , parem fuisse Apostolorum potestatem : *Hoc erant utique cæteri Apostoli , quod fuit & Petrus , pari consortio præditi & honoris , & potestatis :* ergo Cyprianus censuit , Petrum non habuisse primatum inter Apostolos .

Resp. dist. ant. Cyprianus asseruit , parem fuisse Apostolorum potestatem & honorem , quoad amplitudinem rerum gerendarum , conc. ant. scilicet singuli ubiq; gentium poterant Euangelium annuntiare , erigere ac fundare Ecclesias , fungi Episcopatus ac presbyteratus potestate , ac honore

re

re quoad ordinem, & modum gerendi, neg. ant. nempè cæteri Apostoli Apostolatûs ministerio fungebantur cum subodinatione ad Petrum, quem eis Christus præfecerat tanquam centrum unitatis, seu qui suâ authoritate impediret, ne quis schisma conflaret in Ecclesiâ : *Quamvis Apostolis omnibus* (inquit Cyprianus) *post resurrectionem suam parem potestatem tribuat, & dicat : Sicut misit me Pater, & ego mitto vos ; tamen ut unitatem manifestaret, unitatis ejusdem originem ab uno incipientem sua authoritate disposuit.*

Instabis . Cyprianus libro de unitate Ecclesiæ sic loquitur : *Episcopatus unus est, cujus à singulis in solidum pars tenetur* : ergo Apostoli erant cum Petro æquales potestate .

Resp. dist. antec. Episcopatus unus est ratione Ordinis, conc. antec. seu unus est ordo Episcopatus, qui omnibus Episcopis æqualiter tribuitur : Ratione jurisdictionis, neg. antec. hoc est, non tam latè patebat singuli cujusque Apostoli jurisdictio, quàm jurisdictio concessa Petro ; hæc enim in ipsos etiam erat Apostolos, illa verò in reliquos tantùm fideles, aut ministros : *Vnum tamen* (inquit ibidem Cyprianus) *caput est, & origo una.*

Objicies 4. Patres non rarò asserunt, Paulum Petro fuisse prorsus æqualem : scripserunt enim 1. Romanam Ecclesiam ab utroque fuisse fundatam ; ita Leo Magnus serm. 1. de natali Apostolorum : 2. docuerunt, Romanos Pontifices non minùs esse in Cathedrâ Romanâ successores Pauli, quàm Petri ipsius : 3. Paulus Papa III. in bullâ convocationis Concilii Tridentini sic loquitur : *Authoritate Beatorum Apostolorum Petri & Pauli, qua nos quoque in terris fungimur, &c.*

Resp. Patres illos intelligi debere de authoritate Apostolatus, excepto tamen (ut supra dictum est) primatu . Ad confirmationem verò di-

dicendum est, Petrum & Paulum eo sensu fundasse Romanam Ecclesiam, quod uterque Romæ fidem annuntiarit, uterque in eâ urbe Episcopatus munia obierit; ita tamen, ut Paulus Petro subordinatus fuerit. Unde Gregorius Magnus lib.2. in Ezechielem, hom.18. de Petri à Paulo reprehensione tractans, Petrum Pauli superiorem vocat: *Ecce (inquit) à minori suo reprehenditur, & reprehendi non dedignatur; non ad memoriam revocat, quod claves regni cælorum acceperit.* Quod verò spectat ad constitutiones, quibus Romani Pontifices profitentur se autoritate Apostolorum Petri & Pauli convocare Concilia, dicendum est, id non intelligi de autoritate, cui Pontifices Romani successerint, sed de autoritate præsidii, quod implorant; unde non pauci Romani Pontifices in suis diplomatis, non Petri & Pauli tantum meminerunt, sed plurium aliorum Sanctorum, ipsius etiam B. Mariæ Virginis: *Sit Dei omnipotentis (inquit Nicolaus Papa I. in depositionis sententiâ contra Photium latâ) & BB. Apostolorum Principum Petri & Pauli, & omnium simul sanctorum, atque venerandorum sex universalium Conciliorum autoritate, nec non & Spiritus sancti per nos iudicio, ab omni sacerdotali honore alienus.* Eadem loquendi ratio reperitur quoque in epist. 9. Alexandri Papæ II.

Objicies 5. Petrus nusquam Romam profectus est. Nam 1. dici non potest, quo tempore profectionem illam suscepit, & quot annis Romæ commoratus sit. 2. Paulus ad Romanos scribens, multos Christianos salutatur; at Petri non meminit, eum alioquin, cum esset Summus Pontifex, nequaquam prætermisurus. 3. Actorum 28. Lucas narrat, fratres obviam ivisse Paulo, qui illuc vinctus rapiebatur. 4. Ubi Paulus Romam pervenit, rogatus est à Judæis, ut de Christianâ religione mentem aperiret suam (ut ex Actis constat) sed id eum non rogassent, si prius Euan-

Euangelium audiissent à Petro . 5. Paulus in 2. epistolâ ad Timotheum ex urbe Româ scribens , hæc ait : *In prima mea defensione nemo mihi adfuit , sed omnes me dereliquerunt ;* verùm si Petrus tunc Romæ versatus fuisset , opem suam Paulo contulisset .

Resp. neg. ant. Nam 1. Petrum Romæ commoratum fuisse , ostenditur ex prioris illius epistolæ cap. 1. ubi hæc habentur : *Salutat vos Ecclesia , quæ est in Babylone ;* quippè Papias Polycarpi discipulus apud Eusebium lib. 2. Historiæ cap. 14. S. Hieronymus in catalogo scriptorum Ecclesiasticorum , Tertullianus lib. adversus Judæos cap. 9. S. Augustinus lib. 18. de Civitate Dei cap. 22. Babylonis nomine Romam intellexerunt . 2. Petrum fundasse Romanam Ecclesiam , in eâque Episcopatum gessisse ad mortem usque , testantur Irenæus lib. 3. adversus hæreses cap. 3. Tertullianus lib. de Præscriptionibus , Cyprianus epist. 55. Optatus Milevitanus lib. 2. contra Parmenianum , Hieronymus epist. 57. Augustinus epist. 263. quæ est ad Generosum , innumerique alii ; unde vel factum illud est verum , vel nulla unquam de facto aliquo poterit haberi certitudo .

Ad priorem antecedentis , quod negatum est , confirmationem , dicendum est , Petrum quinque fermè annis post Christi mortem in Judæâ mansisse . Nempe Paulus ad Galatas 1. testatur , se anno tertio post conversionem , quæ contigit post primum annum à Christi passione , vidisse Petrũ Hierosolymis : *Abii (inquit) in Arabiam , & iterũ reversus sum Damascum . Deinde post annos tres veni Hierosolymam videre Petrum .* Paulò post illud tempus Petrus Antiochiam se contulit , ubi sedit annis septem . Anno post Christi mortem undecimo , cum Hierosolymam rediisset , ab Agrippa rege conjectus est in vincula , viderique iterũ potuit à Paulo , qui ex urbe Antiochiâ elemosynas ad fideles , qui Hierosolymis erant , detu-

le-

lerat ; nam postquam Lucas Actorum 12. retulit Petrum vinculis liberatum , hæc subjicit : *Barnabas autem & Saulus reversi sunt ab Hierosolymis expleto ministerio .* Eodem anno , hoc est , post Christi mortem undecimo , Claudii Imperatoris secundo , Romam profectus , in eâ urbe sedem suam in ævum permansuram fixit . Eiusdem Claudii anno nono , æræ vulgaris 49. Judæis publico edicto Româ ejectis , adfuit Concilio de Legalibus , quod anno sequenti Hierosolymis habitum est . In eum etiam annum incidit , quod Paulus scribit ad Galatas 2. *Deindè post annos quatuordecim* (à primâ suâ in urbem Hierosolymitanam profectiônem numerandos) *iterum ascendit Hierosolymam cum Barnaba , assumpto & Tito .* Claudio è vivis sublato Romam rediit , ibique diem extremam clausit : *Simon Petrus* (inquit Hieronymus lib. de Scripturis Ecclesiasticis) *post Episcopatum Antiochen- sis Ecclesiæ ... secundo Claudii anno , ad expugnandum Simonem Magum Romam pergit , ibique viginti quatuor annis Cathedram sacerdotalem tenuit , usque ad ultimum Neronis , id est , decimum quartum .*

Ad alteram ejusdem antecedentis probationem , dicendum est , epistolam ad Romanos scriptam fuisse eo tempore , quod à Hierosolymitano Concilio ad Claudii mortem fluxerat ; Corintho nimirum scripta est ultimâ vice , qua (ut patet ex capite 15.) Paulus per eam urbem transiens Hierosolymam profectus est ; ac proindè Petrus tunc Romam nondum redierat .

Ad tertiam probationem dici potest 1. cum Paulus Romæ vicinus esset , Petrum fortè Romæ non versatum fuisse ; neque enim erectâ Romæ Episcopali Cathedrâ , ita urbi affixus erat , ut in vicinioribus urbibus , ac provinciis , Evangelium non annuntiaret ; idque confirmatur ex Epiphanio , qui hæresi 27. scribit , Petrum Lino & Cleto , cum Româ ad tempus discessisset , suas partes de-

mandasse. Dici potest 2. non omnem fidelem populum Paulo ivisse obviam; nempè periculum fuisset, ne, cum Christianum nomen jam malè apud Romanos audiret, seditionis suspicionem suâ multitudine præberent: igitur verisimile est, aliquos tantum ex Ecclesiâ Romanâ selectos, Paulo, aliorum nomine, obviam processisse, ac proindè mirum non est, quòd Petrus tunc Romæ Paulum expectarit.

Ad quartam probationem dicendum est, Judæos rogasse Paulum, ut de religione Christianâ mentem suam aperiret, indicaretque, cum legis peritissimus esset, an cum legis figuris, ac vaticiniis cohæreret; non rogarunt verò, ut ab eo docerentur Christianam fidem, quasi de eâ nihil prius audissent; alioquin enim immeritò Paulus ad eos pluribus ante annis scribens, laudasset Romanorum fidem: *Fides vestra annuntiatur in universo mundo.*

Ad postremam probationem respondendum est, Paulum loqui de iis tantum, qui causam ejus apud Cæsarem tueri potuissent, cui quidem juvandæ impar erat Petrus, cum propter eandem fidem non minùs quàm Paulus invisus esset Neroni. Vide Perronium paginâ 182. & sequentibus.

Objicies 6. Cyprianus in Epistolâ ad Quintum, hæc ait: *Neque enim quisquam nostrum Episcopum se Episcoporum constituit*; ac proinde Romanus Pontifex non habet primatum inter Episcopos. Confirmatur. Idem Sanctus Doctor ibidem asserit, Episcopos à solo Deo judicari: *Expectemus (inquit) universi iudicium Domini nostri Iesu Christi, qui unus, & solus habet potestatem, & præponendi nos in Ecclesiæ suæ gubernatione, & de actu nostro judicandi.*

Resp. dist. ant. Neque quisquam nostrum
Epif-

Episcopum se Episcoporum constituit , in Africâ , conc. ant. extra Africam , neg. ant. scilicet Cyprianus eâ loquendi ratione voluit innuere , nulli Episcopo in Concilio Carthagenensi vim illatam fuisse , ut rebaptizationi , quæ in eo decreta est , faveret , aut non faveret ; sed quemque liberrimè suam de proposito argumento sententiam aperuisse : *Supereſt (ait) ut de hac ipsa re singuli quid sentiamus , proferamus , neminem judicantes neque enim quisquam nostrum , &c.* Ad confirmationem resp. verba quæ ex eodem Sancto Doctore laudantur , intelligi quoad occulta cordis , seu ad intentionem , quam quisque ad Synodos vocatus , sibi indicendâ sententiâ proponit , non autem quoad actus manifestos , & exteriores . Nam 1. Cypriano persuasum erat , ad primates in Africâ , & ad synodos provinciales spectasse de Episcopis iudicium . 2. Ratum erat ei , idem iudicium ad Romanum Pontificem pertinere : eo nimirum principio nixus , Stephanum Papam I. hortatur , ut Marcianum Arelatensem Episcopum , qui ad Novatianos defecerat , jubeat in ordinem redigi : *Dirigantur (inquit) à te literæ in Provinciam , & ad plebem Arelate constitutam , quibus abſtento Marciano , alius in locum ejus ſubſtituatur .*

Objicies 7. Canon sextus Concilii Nicæni I. non omnes Ecclesias , sed aliquas tantum Romano Pontifici subjicit : *Et ut apud Alexandriam* (verba sunt Canonis , juxta versionem , aut expositionem Ruffini lib. 1. Histor. Ecclesiast. cap. 6.) *& in urbe Roma vetusta consuetudo ſervetur , ut vel ille Ægypti , vel hic Suburbicariarum Ecclesiârum ſolicitudinem gerat :* Ergo ex Concilio Nicæno I. Romanus Pontifex , non habet primatum in totâ Ecclesiâ .

Resp. 1. versionem Ruffini non tam esse canonis versionem , quàm illius interpellationem ; un-

de nihil simile apud alios Concilii interpretes legere est; nempe sic habet canonis lectio apud Dionysium Exiguum: *Antiqua consuetudo servetur per Ægyptum, Libyam & Pentapolim; ita ut Alexandrinus Episcopus horum omnium habeat potestatem, quia & urbis Romæ parilis mos est.*

Resp. 2. admissâ Ruffini versione, neg. consequ. Ratio est, quia canon, etiam in mente Ruffini, non confert Alexandrinum Episcopum cum Episcopo Romano secundum omnia jura, quæ Episcopo Romano conveniunt; sed tantum secundum ea, quibus fruitur, quatenus est Patriarcha, seu, prout pluribus diocesium, seu pluribus Ecclesiasticis provinciis præficitur. Jubet igitur, ut Alexandrinus Patriarcha iisdem juribus in Ægypto, Libyâ & Pentapoli potiatur, quibus Romanus Patriarcha potitur suburbicariarum Ecclesiarum respectu; hoc est, præcipit, ut Alexandrinus Episcopus Ægypti, Libyæ & Pentapoleos ordinet Metropolitanos, de eorum causis judicet, vocet eos, cum opus fuerit, ad Concilium, compellat, etiam per censuras, ut canones observent, quemadmodum Romanus Episcopus ordinat, vocat ad Concilia Metropolitanos variarum dioceseon, seu Ecclesiasticarum provinciarum, quibus tanquam Patriarcha præficitur.

Quæres. Quid Ruffinus intellexerit Ecclesiarum Suburbicariarum nomine.

Respondet Morinus noster *lib. I. Exercitationum Ecclesiasticarum. Exercitatione 30.* per Ecclesias Suburbicarias intelligi omnes Occidentis Ecclesias. Responsionem suam confirmat ex eo, quod ab Augusto Cæsare usque ad Imperium Constantini Magni omnes imperii Romani provinciæ respectu urbis Romæ dicerentur Suburbicariæ, hoc est, urbis Romæ potestati ac moderationi subditæ; nulla enim tunc temporis divisum habuit cum Româ imperium. Verum post extructam à Con-

stan-

stantino Magno Constantinopolim, Byzantium cum Româ divisit; ita ut dicta sit: *Regia civitas, nova Roma, Civitas imperans*. Ea autem Imperii Romani distinctio (inquit Morinus) maximè enituit sub Constantini filiis, inter quos divisum fuit imperium; enituit quoq; sub Valentiniano & Valente fratribus, sub Valentiniano II. & Theodosio juniore, ac tandem sub Arcadio & Honorio, quibus imperantibus Ruffinus scribebat. Hinc factum est, ut ejusdem Ruffini temporibus totus orbis desisset, Romæ respectu, Suburbicarius esse, idque tunc soli Occidenti conveniret.

Aliam Suburbicariarum Ecclesiarum ideam tradit Illustrissimus Petrus de Marcâ lib. 1. *De Concordia Sacerdotii & Imperii cap. 7.* Nempè scribit, Suburbicariarum Ecclesiarum nomine eas intelligi, quæ decem Provinciis Urbicariis, seu à Præfecto Prætorio per urbis Vicarium administratis, parebant; erant autem subsequentes: *Campania, Tuscia, Umbria, Picenum, Suburbicarium, Sicilia, Apulia, Calabria, Brucii, Lucania, Samnium, Sardinia, Corsica, Valeria*. Aliarum autem Occidentis provinciarum sextus Nicænus Canon non meminit, quòd licèt Episcopus Romanus illas tanquam Patriarcha regeret, jura tamen Patriarchica non eadem ratione, quâ in decem illis provinciis, non exercebat; sed plura permittebat consuetudinibus, quæ apud ea loca invaluerant.

Objicies 8. Ille non habet primatum in totâ Ecclesiâ, qui non potest dici Episcopus universalis: atqui Romanus Pontifex non potest dici Episcopus universalis: Siquidem Gregorius Magnus lib. 4. epist. indict. 13. epist. 32. Joannem Constantinopolitanum insectatur, quòd se diceret Episcopum Oecumenicum, aitque nomen illud esse nomen blasphemix. Epistolâ 36. ad Eulogium Alexandrinum datâ scribit, nullum decessorum suorum prophano illo nomine usum fuisse. Ergo, &c.

548 Instit. Theolog. Prolegomena.

Resp. distin. min. Non potest dici Episcopus universalis, seu solus universæ Ecclesiæ Episcopus, ita ut alii Episcopi sint tantum Vicarii Romani Episcopi, conc. min. Non potest dici Episcopus universalis, seu, qui regat singulas orbis Ecclesias, servatâ singulorum Episcoporum jurisdictione, neg. min. Nomen Episcopi universalis priore tantum sensu sumptum, non autem posteriore, repudiat Gregorius: *Sed absit (inquit epist. 32.) à cordibus Christianorum nomen istud blasphemiae, in quo omnium sacerdotum honor adimatur, dum ab uno sibi dementer arrogatur.*

Objicies 9. Si Romanus Pontifex haberet primatum in totâ Ecclesiâ, posset 1. Canones ab Ecclesiâ conditos abrogare; posset 2. Episcopos prohibito deponere. Sed falsum est consequens: ergo, & antecedens.

Resp. neg. antec. Ratio est, quia ipsi Romani Pontifices asseruerunt, sui primatus partem esse canonum executionem: *Canones Ecclesiasticos (inquit Martinus Papa I. epist. 9.) solvere non possumus, qui defensores & custodes canonum sumus, non transgressores.* Hinc cum canones præscribant formam, ad quam exigi debet Episcoporum depositio, eam Romani Pontifices non tentant, nisi servatis Canonibus. Vide quæ de eâ formâ Canones Sardicenses decernunt.

Objicies 10. Primatus non jure divino, sed humano tantum, delatus est Episcopo Romano; nimirum propter Romanæ urbis amplitudinem cæteris orbis præsulibus præpositus fuit ab Imperatoribus & Conciliis: *Antiquæ Romæ (inquit canon 28. Concilii Chalcedonensis) throno, quod urbs illa imperaret jure, Patres privilegia tribuerunt.*

Resp. neg. antec. Ad cujus probationem dist. Concilii Chalcedonensis verba: Privilegia patriarchica concesserunt, conc. antec. prima-

matum in totâ Ecclesiâ, neg. antec. Ratio est 1. quia ipsum Concilium Chalcedonense, cum primum à Romano Pontifice locum Episcopo Constantinopolitano tribuit, hâc ratione utitur, quòd sit *Nova Roma*; quemadmodum igitur ea ratio movit Concilium, ut Patriarchalem dignitatem Episcopo Constantinopolitano concederet; ita & quondam Patres movit, ut Episcopum Romanum totius Occidentis Patriarcham constituerent: sed inde desumpta non est dignitas primatûs, quem Episcopus Romanus habet in totâ Ecclesiâ, sed ab ipsomet Christo originem ducit suam: *Privilegia sua* (inquit Nicolaus Papa I. epistolâ ad Galliarum Episcopos) *per Petrum à Christo consecuta est Romana Ecclesia*.

C A P U T II.

Vtrum Romani Pontificis judicium sit locus theologicus.

CONCL. **R**Omani Pontificis de aliquâ controversiâ judicium, locus est theologicus.

Probatur. Locus theologicus est fons, ex quo ad probandam fidem, & regulandos mores argumenta desumi possunt: atqui reverà desumi possunt ex judicio Romani Pontificis: ergo Romani Pontificis de aliquâ controversiâ judicium, locus est theologicus. Minor argumenti propositio variis momentis ostendi potest.

Primò, cum Romanus Pontifex (ut præcedenti conclusione dictum est) Primatum in totâ Ecclesiâ divinitûs habeat, jus habet docendi eos omnes, quibus à Christo præpositus fuit, seu solveadi dubia, quæ circa

Scripturarum sensum nasci possunt; proponendi traditionem Patrum; præcipiendi, ut ubique terrarum Canones observentur, imò & per censuras, ipsam etiam excommunicationem, compellendi singulos fideles, ipsos quoque præcipuarum sedium Episcopos, ut sanam fidem profiteantur; ut ad Evangelii & Canonum normam mores suos componant. Jus illud in Pontifice Romano quovis sæculo venerata est Ecclesia Catholica.

Altero Ecclesiæ sæculo Victor Papa excommunicationis minas Asiaticis intentavit, quòd Pascha cum Judæis celebrarent. Asiatici, ut se ipsos tuerentur, non causati sunt, Romano Pontifici jus non fuisse excommunicandi tot Orientis Ecclesias, sed hoc uno se tuiti sunt; nempe praxim, quam sequebantur, se habere ex Apostolicâ traditione; ac proinde non esse causam, cur excommunicatione mulctarentur. Irenæus Lugdunensis Antistes eandem in Victore potestatem agnovit scribens, ut dispensatione potius, quàm potestate uteretur, nec (ut ait apud Eusebium Hist. lib. 5. cap. 24.) universas Ecclesias abscinderet.

Natum tertio sæculo Novatianorum schisma, autoritate Cornelii Papæ compressum est: Decreti, quod Romæ in Novatianum tulerat, ubique habita est ratio: *Cumque* (ait Eusebius Hist. lib. 6. cap. 43.) *in provinciis Antistites, quid agendum esset, consultassent, hujusmodi decretum cunctis promulgatum est, &c.*

Eâdem Romanorum Pontificum autoritate proscripti sunt Pelagiani ineunte quinto sæculo, latum in eos ab Apostolicâ Sede decretum omnes orbis Ecclesiæ summâ cum reverentiâ amplexxæ sunt: *Iam enim* (ait Augustinus sermone 2. de verbis Apostoli) *de hac causa duo Concilia missa sunt ad Sedem Apostolicam, inde etiam rescripta venerunt, causa finita est; utinam aliquando finiatur error.* Subsequentibus sæculis Damasus

sus Macedonium , Nestorium Cœlestinus , Leo Eutychetem , Monothelitas Agatho , damnarunt ; damnationique omnes orbis Ecclesiæ subscripserunt . Ex eâdem autoritate emanarunt tot leges, tot constitutiones, quæ tum in Gratiani Decreto , tum in Gregorii IX. Decretalibus leguntur , quasque tótus orbis Christianus summâ cum reverentiâ veneratus est.

Secundò . Majores nostri in causis dubiis Romanum Episcopum consulere solebant , ejusque responsis omninò stare : *Mirari non possumus* (inquit Innocentius Papa I. epist. 4.) *dilectionem tuam sequi instituta majorum , omniaque quæ possunt aliquam dubitationem recipere , ad nos quasi ad caput , atque ad apicem Episcopatus referre , ut consulta videlicet sedes Apostolica , ex ipsis rebus dubiis certum aliquid faciendum pronuntiet*. In ejusdem Innocentii, Siricii, aliorumque etiam anteriorum Pontificum epistolis nihil aliud ferè legere est , quàm eorumdem Pontificum responsa ad varias Episcoporum , imò & particularium synodorum consultationes ; adeo omnibus retrò sæculis persuasum fuit , maximi esse momenti Episcoporum Romanorum decisiones.

Tertiò . Iidem majores nostri non rarò fidem , quam profitebantur , tuiti sunt suâ cum Episcopo Romano consensione : *Aut si eis placeat* (inquit Hieronymus in epistolâ ad Marcum Presbyterum Celedensem) *hæreticum me cum Occidente , hæreticum cum Ægypto , hoc est cum Damaso , Petroque , condemnent*. Idem , ad Damasum scribens , à quo sciscitatus fuerat , an tres hypostases , an verò unam tantum in Trinitate admittere deberet , sic loquitur : *Beatitudini tue , id est , Cathedræ Petri communionem confocior Dignare scripta transmittere*. Hæc etiam habet de suâ cum Antiochenis Episcopis communione : *Simul etiam , cui apud Antiochiam de-*

beam communicare significes Ego interim clamito: Si quis Cathedræ Petri jungitur, meus est.

Ex iis, quæ hucusque dicta sunt, colligitur 1. Romani Pontificis in totâ Ecclesiâ primatum semper in omnibus orbis Christiani provinciis enituisse. Colligitur 2. Eorundem Romanorum Pontificum decreta apud primarum etiam sedium Episcopos, ipsas quoque variorum locorum synodos, magno semper in pretio fuisse. Colligitur 3. eadẽ decreta locum esse theologicum, ex quo tum ad stabiliendam fidem, tum ad regulandos mores argumenta desumantur; & quidem, fatentibus omnibus catholicis, ineluctabilia ac infallibilia, ubi Ecclesiarum consensus accesserit. Colligitur 4. recentiorum hæreticorum, Lutheri, Zuinglii, Calvini, Episcoporum Anglicanæ communionis, praxim distare quàm maximè à praxi fidelium, qui præteritis sæculis, & quidem purioribus vivere. Nempe illi recentiores hæretici Pontificum Romanorum responsa, decreta, constitutiones, definitiones nihili faciunt; imò probris ac dictæis non rarò laceffunt; cum è contra apud omnes, tum Orientales, tum Occidentales, sive clericos, sive laicos, magno semper in pretio fuerint.

Q U Æ S T I O V.

De Episcopis.

Not. I. **A**ltero tomo nostri Commentarij Historici & Dogmatici de Sacramentis, plura de Episcopis dicta sunt, quæ necesse non est, ut hîc inserantur; nimirum ostendimus 1. Episcopos divinæ esse institutionis; 2. eos divino jure presbyteris esse superiores; 3. eos suam jurisdictionem in creditum sibi po-

populum immediatè accipere à Christo : 4. eos ita Ecclesiis necessarios esse, ut eorum ordo nec à Conciliis, nec à Summo Pontifice possit aboleri : 5. varios esse in Episcopatu gradus, quos tum ad sui dignitatem, tum ad utilius regimen Ecclesia vetus instituit.

Not. 2. Omisissis igitur iis quæstionibus, quæremus hîc 1. utrùm Episcopi iudices sint controversiarum fidei : 2. cujus ponderis sit latum ab eis de ejusdem fidei controversiis iudicium.

CONCLUSIO I. Jure divino quisque Episcopus iudex est controversiarum fidei.

Probatur. Quislibet Episcopus considerari potest, vel in Conciliis, vel extra Concilia : atqui sive in Conciliis, sive extra Concilia, est iudex controversiarum, tum fidei, tum morum.

Et quidem *primò*, in Conciliis ; neque enim (ut de Conciliis in genere differentes diximus) Episcopi in Synodis sedentes, sunt consiliarii, sed veri iudices ; unde doctrinis variis ac peregrinis censuras inurunt, eorumque authores, si contumaces fuerint, anathemate feriunt.

Secundò, Extra Concilia quislibet Episcopus positus est à Spiritu sancto (ut ait Scriptura) regere Ecclesiam Dei : at regimen illud stare non potest, nisi doctrinam falsam damnare, & è contra veram probare possint ; unde Christus vult, ut quisque fidelis suum Episcopum audiat, licèt plerumque illius facta non debeat imitari : *Super Cathedram Moysi sederunt Scribæ & Pharisei . Omnia ergo quæcumque dixerint vobis facite , secundum opera verò eorum nolite facere .*

Eo jure Episcopi sæpiùs usi sunt : Sic Dionysius Alexandrinus (Eusebio teste hist. lib. 7. cap. 6.) hæresim Sabellianam proscripsit, prolixasque de suo iudicio dedit litteras ad Sixtum Pontificem maximum . Sic etiam Galliarum Episcopi nuper plerosque recentiorum Casuistarum errores damnarunt . Sic etiam anno 1699.

Galliarum Episcopi, sive in suis Dioccesibus, sive ad Synodos Provinciales congregati, acceptâ Innocentii XII. in formâ *Brevis* constitutione, quâ damnatur & prohibetur liber: *Explication des Maximes des Saints sur la vie intérieure*, laudati Pontificis censuræ adhærentes, cum ipso judicarunt librum illum continere, propositiones, sive in obvio eorum verborum sensu, sive attenta sententiarum connexionem, temerarias, scandalosas, malè sonantes, piarum aurium offensivas, in praxi perniciosas, ac etiam erroneas respectivè.

Tertiò. In obscurioribus tamen causis, hoc est, ubi quæstionis solutio minùs est liquida ac minùs aperta, necessarium est Concilium provinciale. Sic in causâ Montanistarum pleraque quondam habita sunt: Nam cum fideles, qui in Asia erant (inquit Eusebius Histor. lib. 3. cap. 16.) sæpiùs & in plurimis Asiæ locis convenissent, novamque illam doctrinam examinassent, & prophanam atque impiam judicassent, damnata hæresi, isti ab Ecclesia & fidelium communionem expulsi sunt. Plurima quoque, sive in Oriente, sive in Occidente, celebrata sunt in causâ Pelagianorum.

Ex verò particulares Synodi latum à se iudicium mittere solent ad Summum Pontificem, ut illud suo assensu comprobet, promulgetque in aliis provinciis, ubi id expedire judicaverit: id videre est in plerisque Conciliis provincialibus, quæ post Tridentinum in Galliis celebrata sunt. Nonnunquam etiam particulares Synodi non tantùm Summo Pontifici, sed & aliis locorum Episcopis suam sententiam significare solent, sicut & solebant antiquitus; sic Ario in synodo Alexandrinâ damnato, Alexander Episcopus ad omnes Episcopos synodi sententiam retulit per Epistolam, quam sic inscripsit: *Dilectis ac reverendissimis comministris ubilibet per Ecclesias constitutis.*

Ubi

Ubi autem Episcopi ad synodos convenire non poterant, ad eas mittebant iudicium, quod in suâ diœcesi tulerant; cuius quidem iudicii eadem habebatur ratio, ac si in ipsomet Concilio latum fuisset. Ad eam praxim alludit August. lib. 4. ad Bonifacium cap. ult. ubi sic de Pelagianis per Episcoporum subscriptiones damnatis loquitur: *Quid est ergo, quod dicunt: De simplicibus Episcopis, sine congregatione Synodi in locis suis sedentibus, extorta subscriptio est?*

CONCLUSIO 2. Licet irrefragabile non sit iudicium ab Episcopis extra concilia generalia de fide, aut moribus latum; ejus tamen, nisi evidens sit error, haberi debet ratio.

Probatur prior pars. A iudicio privati cujuslibet Episcopi provocare licet, aut ad Metropolitanum, aut ad Synodum provincialem, aut ad Summum Pontificem: ergo cujusque privati Episcopi iudicium non est irrefragabile. Confirmatur ex eo, quod plures Episcopi, quibus non accessit aliorum consensus, aliquoties errarint, ut in Cypriano circa baptismum ab hæreticis datum, Nestorio, Macedonio, pluribusque aliis videre est.

Probatur altera pars 1. autoritate Cypriani, qui epist. 55. sic loquitur: *Neque enim aliunde hæreses obortæ sunt, aut nata sunt schismata, quàm inde, quod sacerdoti Dei non obtemperatur.* 2. Episcopi, utpotè præpositi à Deo superioris, est legem, ubi dubia est, explicare: non enim minori pollet autoritate, quàm sacerdotes Levitici ad quos (scripturâ teste) spectabat legis explicatio. 3. Si lati vel ab uno Episcopo iudicii haberi debeat ratio, major haud dubiè haberi debet, cum plures in unam sententiam nullo reclamante consentiunt: Hincque patet, quantum aberrant quidam recentiores, qui probabilitatem, aliasque molliores doctrinas, licet à quinquaginta, & amplius Episcopis juridicè damnatas, iterum typis mandare, & populos docere præsumunt. Eorundem

dem autem Episcopaliū iudiciorum maxima ratio debet haberi, ubi omnium Episcoporum consensus accesserit; siquidem (ut jam superius observatum est) irrefragabile est argumentum, quod ex illo unanimi singulorum Episcoporum consensu desumitur : *Aut verò* (inquit Augustinus lib. 4. ad Bonifacium cap. ultimo) *congregatione Synodi (generalis) opus erat, ut aperta perniciēs damnaretur ; quasi nulla hæresis aliquando sine Synodi congregatione damnata sit. Cum potius rarissimè inveniantur, propter quas damnandas necessitas talis extiterit ; multæque sint, atque incomparabiliter plures, quæ ubi extiterunt, illic improbari, damnarique meruerunt, atque inde per ceteras terras devitandæ innotescere potuerunt.*

Q U Æ S T I O VI.

De auctoritate Patrum.

Not. 1. **Q**Uæ ad Patrum auctoritatem spectant, ad quatuor capita reduci possunt. Nam 1. quæri potest, utrū unius, aut alterius sententia, aliis reclamantibus, aut silentibus, vim multam habeat : 2. cuius sit ponderis plurium in unum dogma consensus, aliis ex aliâ parte reclamantibus : 3. quæ ratio haberi debeat Patrum, ubi unanimi consensu in eandem veritatem conspirant : 4. utrū in omni argumentorum genere æqualis sit authoritas Patrum : 5. quænam cautiones in legendis Patribus adhibendæ sint.

Not. 2. Non est hæc quæstio de auctoritate Patrum in iis, quæ naturali lumine continentur, seu quæ, aut non sunt clarè revelata, aut ex revelatis minimè sequuntur ; nempè apud
om-

omnes constat, in ejus generis argumentis tantum valere auctoritatem Patrum, quantum valet ratio, quantum nituntur: nec id mirum est; siquidem Patres ut plurimum neglexere philosophiæ, aliarumque scientiarum studium, ut totos sese divinæ sapientiæ traderent. Gregorius Nazianzenus & Basilus (Ruffino teste Histor. lib.2. cap.9.) per tredecim annos solius Scripturæ studio vacarunt. Hieronymus in proœmio in epistolam ad Galatas hæc de seipso scribit: *Plusquam quindecim anni sunt, ex quo manus meas nusquam gentilium litterarum quilibet auctor ascendit; & si quid fortè inde, dum loquimur, obrepit, quasi antiqui per nebulam somni recordamur.* Igitur quæstio est de iis solum, quæ spectant ad theologiam, seu ad fidem, aut ea, quæ ex fide sequuntur.

CAPUT PRIMUM.

De auctoritate unius, plurium, omnium Patrum.

CONCL. I. **U**Nius, aut alterius Patris, de rebus theologicis sententia, aliis de eâ silentibus, firmum argumentum non sufficit.

Probatur I. In tantum in rebus theologicis valet Patrum auctoritas, in quantum fidem facit, aliquem articulum traditione contineri, seu à Christo, aut à Spiritu Sancto post Christi Ascensionem Apostolis fuisse revelatum; ita enim Augustinus docet lib.3. de Peccatorum meritis, cap.7. ubi adductis in medium testimoniis quorundam veterum, sic loquitur: *Hæc non ideò commemoravi, quòd disputatorum quorumlibet sententiis tanquam canonica auctoritate nitamur, sed ut appareat ab initio usque ad præsens tempus, quo ista novitas orta est, hoc de ori-*

originali peccato apud Ecclesiæ fidem tanta constantia custoditum, ut ab eis, qui Dominica tractarent eloquia, magis certissimum proferretur ad alia refutanda, quam id tanquam falsum refutari ab aliquo tentaretur. Atqui unius & alterius patris auctoritas, aliis silentibus, certam non facit fidem, quòd aliquis articulus Apostolis revelatus fuerit; neque enim concipi potest, revelationis depositum, quod universam spectat Ecclesiam, post Apostolorum tempora uni tantum & alteri testi creditum fuisse.

Probatur 2. Eorum auctoritas firmum argumentum non sufficit, quorum sententiam improbare, ac rejicere licet: atqui unius & alterius patris, aliis silentibus, sententiam improbare, ac rejicere licet: Neque enim (ait Augustinus epist. cxl.) *quorumlibet disputationes velut Scripturas Canonicas habere debemus; ut nobis non liceat, salva honorificentia, quæ illis debetur hominibus, aliquid in eorum scriptis improbare, atque respuere, si fortè invenerimus, quòd aliter senserint, quam veritas habet, divino adjutorio, vel ab aliis intellecta, vel à nobis. Talis ego sum in scriptis aliorum, tales volo esse intellectores meorum.*

CONCLUSIO 2. Plurium Patrum in unum dogma consensus, aliis ex alterâ parte reclamantibus, multum quidem probabile, sed non omnino certum argumentum sufficit.

Probatur prior pars. Id sufficit argumentum multum probabile, quo efficitur, ut multum sit probabile, articulum aliquem Apostolis fuisse revelatum: atqui plurium Patrum consensione id efficitur; nempe, quòd articulus aliquis fuerit revelatus, est aliquod factum: Sed plurium testium consensione, factum aliquod redditur multum probabile, licet alii ex alterâ parte testes reclamant: ergo, &c.

Probatur altera pars. Fieri potest, ut ii qui ex alterâ parte reclamant, præsertim si sancti-

etate & eruditione sint insignes, affecuti fuerint germanum, aut Scripturæ, aut traditionis sensum; proindèque non est certum certitudine fidei, quòd alii, qui contrarium docuere, non erraverint.

Quæres, quid eo in casu à theologo sit agendum.

Resp. theologum tunc debere expendere: 1. quid docuerint Patres, qui ante illos, de quibus agitur, scripserint: 2. quid de eodem articulo major & præcipua Ecclesiarum pars docuerit, ac doceat. Si id Theologus non potest assequi, majori parti debet adhærere, donec Ecclesia per expressam aliquam definitionem, quid de eo articulo credendum sit, ex Scripturâ, vel traditione eruerit. Vide quæ superiùs dicta sunt pag. 137. & sequentibus.

CONCLUSIO 3. Unanimis Patrum in unum dogma consensus, certissimum argumentum sufficit.

Probatur 1. Unanimis Patrum in unum dogma consensus certissimum est divinæ traditionis testimonium; neque enim aliâ viâ, quàm per patres, qui singulis sæculis scripsere, Ecclesia potest scire, quid Apostoli tradiderint: atqui certissimum divinæ traditionis testimonium, certissimum argumentum sufficit, cum traditio non minùs sit Dei Verbum, quàm quod in libris Canonicis scriptum legitur: ergo, &c.

Probatur 2. autoritate Concilii Tridentini prohibentis, ne quis contra unanimem Patrum sensum Scripturas audeat exponere: *Ad coercenda petulantia ingenia* (inquit Sacra Synodus sess. 4.) *decernit, ut nemo suæ prudentiæ innixus in rebus fidei & morum, ad ædificationem doctrinæ Christianæ pertinentium, Sacram Scripturam ad suos sensus contorquens, contra eum sensum, quem tenuit & tenet sancta mater Ecclesia, cujus est judicare de vero sensu, & interpretatione Scripturarum Sanctarum, aut etiam contra una-*
ni.

nimem consensum Patrum, ipsam Scripturam Sacram interpretari audeat.

Ex duplici argumento, quod in conclusionis defensionem protulimus, patet, audiri non debere Cajetanum, cum hæc scribit initio Commentariorum in Genesim : *Si quando occurrerit novus sensus textui consonus, quamvis à torrente doctorum sacrorum alienus, æquum se præbeat lector censorem Nullus detestetur novum Sacrae Scripturae sensum ex hoc, quòd dissonat à priscis doctoribus; non enim alligavit Deus expositionem Scripturarum Sacrarum priscorum doctorum sensibus, sed Scriptura ipsi integræ sub Catholicae Ecclesiae censura.* Confirmatur ex eo, quòd ea Cajetani sententia invehat in Ecclesiam novitates omnes, enervetque argumenta omnia, quæ adversus hæreticos extråditione desumuntur.

Quæres, utrùm Patres, etiam probatissimi, in omnibus fidei controversiis, æqualis sint auctoritatis.

Resp. negativè. Ratio est, quia Deus nonnullos Patres elegit, ut præ cæteris certas Catholicæ fidei veritates adversus hæreticos propugnarent : Sic Athanasius adversus Arium, Augustinus adversus Pelagium, Cyrillus Alexandrinus adversus Nestorium, Leo Magnus contra Eutichetem specialiter electi sunt. 2. Ecclesia nonnullorum Patrum scripta expressè probavit, declaravitque iis contineri fidem, quam Apostoli prioribus fidelibus commendarunt. Ejus verò generis sunt libri, quos Augustinus contra Pelagianos & Semipelagianos de prædestinatione & gratiâ exaravit, ut in nostro tractatu de gratiâ fusè probabitur.

C A P U T II.

De cautionibus in legendis , aut laudandis Patribus , adhibendis .

CONCL. **I**N legendis ac laudandis pro fide Patribus, nonnullæ cautiones servandæ sunt.

Probatur enumeratione . *Primò* , si aliquis è Patribus id docuerit, quod Ecclesia Catholica postea rejecit tanquam unanimi aliorum consensui contrarium ; non ipsum Patrem , sed errorem , & quidem cum præfatione veniæ , theologus refellere debet , imitatus Augustinum , qui lib.6. de Baptismo contra Donatistas cap. 2. sic de Cypriani circa rebaptizationem errore loquitur : *Quapropter reddens debitam reverentiam , dignumque honorem , quantum valeo , persolvens pacifico Episcopo , & glorioso martyri Cypriano , audeo tamen dicere , eum aliter sensisse de schismaticis , vel hæreticis baptizandis , quam postea veritas prodidit .*

Secundò , Theologus in primis cavere debet , ne quempiam ex Patribus temerè erroris insinulet ; unde si quæ in ejus libris ambiguè dicta leguntur , ex aliis illius sententiis , quantum fieri potest , explicari , excusarique debent . Regulam illam tradit Facundus Hermianensis lib. 9. de tribus capitulis cap. 5. *Quemadmodum calumniantium hæreticorum est , ex dubiis & obscuris , quæ certa & manifesta sunt , malè interpretari ; ita solitum est prudentiæ , ac pietatis catholicæ , ex indubitatis atque evidentibus , & firmare ambigua , & latentia declarare . Ideoque melius facimus , si virorum doctissimorum in pace Ecclesiæ mortem obeuntium scripta melius interpretemur .*

Tertiò , Plurium Patrum (ut jam superiùs ob-

ser-

servatum est) sententiam paucorum aliorum (nisi tamen intervenerit Ecclesiæ judicium) opinioni theologus debet antepone; ita ut hæc tria, quantum fieri potest, semper sequatur, universitatem, antiquitatem, consensionem : *Sequemur autem universitatem hoc modo* (inquit Vincentius Lirinensis) *si hanc unam fidem veram esse fateamur , quam tota per orbem terrarum consistitur Ecclesia . Antiquitatem verò ita , si ab his nullatenus sensibus recedamus , quos sanctos majores ac Patres nostros celebrasse manifestum est . Consensionem quoque itidem , si in ipsa vetustate , omnium vel certè penè omnium sacerdotum pariter ac magistrorum definitiones , sententiasque sectemur . Vide similia Patrum loca , quæ de traditione superius agentes laudavimus .*

Quarò , Patres , qui ante exortas hæreses scripsere , simplicius ac proindè minùs cautè nonnunquam locuti sunt , quàm qui post exortas hæreses : Didicimus (ait Augustinus lib. de dono perseverant. cap. 20.) singulas quasque hæreses intulisse Ecclesiæ proprias quæstiones , contra quas diligentius defenderetur Scriptura divina , quàm si nulla talis necessitas cogeret .

Quintò , Patres in impugnandis erroribus nonnunquam usi sunt terminis , qui in speciem quidem erroribus oppositis faverent , sed re ipsa , & secundùm sensum ab eis intentum , omninò differrent : Sic qui Sabellianos impugnarunt , aliquando visi sunt destruere divinarum personarum consubstantialitatem , quam tamen (ut de Trinitate differentes ostendemus) re ipsa propugnabant .

Inter eos Patres , qui in speciem in errorem oppositum ei , quem impugnabant , declinare visi sunt , Augustinus (ut ostendetur in tractatu de gratiâ) cum de prædestinatione & gratiâ contra Pelagianos & Semipelagianos differit , numerari non debet ; nempè sæpiùs asserit se , cum Pelagianos impugnavit , cavisse sedulò , ne quidquam

quam proferret, quod vel in speciem Manichæismo, hæresi Pelagianæ circa liberum arbitrium prorsus opposito, faveret : *Illa* (inquit lib. 4. contra duas epistolas Pelagianorum cap. 3.) *nefaria & damnabilia dogmata in hac tripartita divisione quisquis mente Catholica exhorret, illius quinquepartitæ latebras, insidiasque devitet, atque ita inter utrumque sit cautus, ut sic declinet Manichæum, ne se inclinet in Pelagium, rursusque ita se sejungat à Pelagianis, ne se conjungat Manichæis, aut si in alterutris jam tenetur, nec sic se à quibuslibet alteris servet, ut in alteros irruat.*

Eandem Augustini Pelagianos, Manichæos, aut alios hæreticos impugnantis cautionem observavit Pomerius lib. 3. de vitâ contemplativâ cap. 31. ubi de eodem sancto Doctore sic loquitur : *S. Augustinus Episcopus, acer ingenio, suavis eloquio, sæcularis litteraturæ peritus, in Ecclesiasticis laboribus operosus, in quotidianis disputationibus clarus, in omni sua actione compositus, in expositione sua fidei nostræ Catholicus, in questionibus absolvendis acutus, in revincendis hæreticis Circumspectus, & in explicandis Scripturis Canonicis Cautus.*

Ex his patet, quàm immeritò recentiores quidam Augustinum traducant, quasi excesserit in suis contra Pelagianos & Semipelagianos disputationibus ; quàmque falsa sint hæc, quæ de eodem sancto Doctore quidam scriptor, cujus nomini ac instituto parcimus, scribere non erubuit : *Nunquam tamen longius zeli ardore Augustinus abreptus est, quàm ubi Pelagianos impugnavit : dum enim ab eorum loquendi ratione, & erroribus longissimè recedere intendit, in periculosos excessus incidit, ut hinc aliqui theologi doctrinæ & pietate insignes dixerint, eum veritatis limites transgressum esse, nimio disputationis calore accensum fuisse, aut visum fuisse favere hæreticis. Verba hæc (pergit idem scriptor) insolent-*

lentia & impudentia essent, nisi vera essent.
Sed hæc satis sint; nempe (ut jam monuimus) de Augustini auctoritate fusè dicemus in tractatu de gratiâ, & in tractatu de prædestinatione.

Q U Æ S T I O VII.

De auctoritate Scholasticorum.

Not. 1. **S**cholastici sunt, vel antiqui, vel recentiores. Sive illi, sive isti, vel Scripturâ & traditione nituntur, ut suas assertiones confirmant; vel solâ humanâ ratione, aut gravium (ut loquuntur) aliorum theologorum sententiâ.

CONCLUSIO 1. In iis, quæ ad fidem, aut mores pertinent, nulla debet haberi ratio scholasticorum, qui nec Scripturâ, nec traditione, sed solâ humanâ ratione, & recentiorum auctoritate, sua placita confirmant.

Probatur 1. Nec humana ratio, quæ post peccatum originale tam facilè fallitur, nec recentiorum sententia, quæ sæpiùs maximè temeraria est, leges sunt, ad quas sive fidem, sive mores exigere debeamus; id nimirum juris Scripturæ tantum est, ac traditionis.

Probatur 2. Si scholasticorum, de quibus agitur, haberi deberet ratio, liceret in Moralibus sequi opinionum portenta, quæ ab Alexandro Papâ VII. Innocentio Papâ XI. & pluribus variarum provinciarum Episcopis proscripta sunt, tanquam quæ exitiosa sint ac scandalosa; ea enim opinionum in Moralibus portenta non ab uno tantum, sed ab innumeris ferè recentioribus, qui petrarè Scripturam aut traditionem laudant, propugnata sunt.

De iis authoribus audiendus est pius, ac doctus

Etus scriptor è familiâ Dominicanâ Vincentius Contensonius. Tom. 3. diss. præambulâ cap. 2. Specul. 3. sic loquitur : *Vidimus his temporibus Casuistarum (quos eruditissimos morum doctores indocti prædicant) fluxam auctoritatem à Religiosis & Sacerdotibus quamplurimis , ab Episcopis sine numero , & à Romano Antistite , nedum contemptam , sed damnatam , ut exitiosam . Unde de illis potissimum testibus , eorumque testimoniis , juxta Augustini regulam , tantum credere , vel non credere , licet , quantum momenti ad faciendam fidem habere , vel non habere perpenderimus . Cum enim non è puris Ecclesiæ fontibus conclusiones suas derivent , sed iis neglectis , turbidis se proluant probabilissimis fluentis , unde in tam horrida inciderunt opinionum portenta .*

Ei theologorum generi adscribendi sunt quidam alii , de quibus Melchior Canus , lib. 8. de locis theologicis cap. 1. sic loquitur : *Intelligo autem fuisse in schola quosdam theologos adscriptitios , qui universas quæstiones theologicas frivolis argumentis absolverint Et cum in his Sacrorum Bibliorum testimonia rarissima sint , Conciliorum mentio nulla , nihil ex antiquis sanctis oleant Scholastici tamen , si superis placeat , theologi vocantur quos ego probare , nec deo , nec possum .*

CONCLUSIO 2. Plurium scholasticorum ex iis etiam , qui placita sua ad Scripturæ & Patrum normam exigere profitentur , consensus in aliquod dogma , si alii insignes , licet numero pauci , dissentiant , non majoris est ponderis , quàm rationes , quibus nituntur .

Probatur 1. Scholastici non sunt à Christo , aut Ecclesiâ constituti controversiarum judices ; id nempe juris solis Episcopis , populos sibi creditos docentibus , divinitus concessum est : *Qui vos audit , me audit ; qui vos spernit , me spernit .* Unde cum in Synodis expenditur aliquod dogma , Patres non multum moventur opinioni-

nibus, quæ in scholis hinc & inde agitantur, sed Scripturam tantum & traditionem consulant. Igitur Scholastici, de quibus est quæstio, se habent sicut causidici, seu causarum patroni; quemadmodum ergo causidici solius consultationis, non autem decisionis, vim habent, ita & scholastici.

C O N C L U S I O 3. Unanimis scholasticorum omnium in unum dogma consensus, theologo suppeditat magni roboris argumentum.

Probatur 1. Id magni roboris argumentum suppeditat, quod Ecclesia nusquam explosit: error enim, cui non resistitur, approbatur: atqui Ecclesia nunquam explosit scholasticorum omnium in unum dogma consensum, seu Ecclesia, sive in Synodis adunata, sive extra Synodos divisa, nunquam rejecit dogma, in quod omnes scholastici uno ore consentirent. 2. Unanimis omnium scholasticorum consensus, est testimonium plusquam probabile, articulum, in quem consentiunt, esse traditum. Quod enim (ait Tertullianus lib. de Præscriptionibus) apud multos unum invenitur, non est erratum, sed traditum.

Quæres 1. quodnam censuræ genus debeat dogmati, quod adversatur unanimi scholasticorum omnium consensui.

Respondet Melchior Canus, dogma, de quo agitur, si hæresis non est, proximè accedere ad hæresim. Respondent alii, esse saltem erroneum. Contendunt alii, esse temerarium tantum. Verum cum omnes scholastici vix unanimiter consentiant in dogmata, quæ ab Ecclesiâ definita non sint, inutilis ad praxim nobis videtur quæstio, de quâ agitur.

Quæres 2. quam rationem theologus habere debeat judiciorum, quibus facultates theologicæ nonnunquam certas propositiones, aut approbant, aut rejiciunt.

Resp. 1.

Resp. 1. theologum debere seriò attendere ad rationes, quibus nititur doctrinale judicium, de quo est hìc quæstio: quò enim ex rationes majoris fuerint ponderis, eò etiam majoris momenti erit doctrinale judicium à theologicis facultatibus latum.

Resp. 2. secluso etiam examine rationum, quibus facultatis theologicæ judicium doctrinale fulcitur, in pretio apud theologum esse debere judicium latum ab iis facultatibus quæ sapientiæ & eruditionis famâ commendantur, quæque solent fidei, ac morum quæstiones, non ad gravium (ut loquuntur) authorum placita, sed ad scripturæ, & traditionis normam expendere: Inter eas autem non ultimum locum tenere facultates theologicas Parisiensem, & Lovaniensem, is non inficiabitur, qui noverit, quot annis, quo labore, quibus Scripturæ & Traditionis studiis opus sit, ut quis in iis facultatibus doctoratus gradum adipiscatur.

Confirmatur mox data responsio ex eo, quòd apud eas facultates receptus sit mos non ferendi doctrinale judicium, nisi post maturum examen, nisi auditis Magistrorum omnium votis, ac rationibus, nisi etiam major pars consentiat: Unanimi Magistrorum consensu anno 1631. Parisiis edita est censura, quâ duo libri Anglicani percelluntur. Sic etiam anno 1611. edita fuit ea quâ *Philippi Mornæi mysterium iniquitatis* damnatum est. Sic quoque anno 1526. edita est quæ Erasmi colloquia proscripsit. Sic tandem prodiit ea quâ anno 1521. Lutheri dogmata profligata sunt. Unanimi quoque consensu editum est judicium, quo facultas Lovaniensis anno 1587. probavit ac suam esse declaravit doctrinam de gratuitâ prædestinatione ad gloriam, & necessitate gratiæ per se efficaciæ ad singulos pietatis actus. Sic etiam editum est, quod ab eâ ann. 1662. latum est pro necessitate inchoatæ saltem charitatis Dei super omnia ad recipiendâ gratiâ in sacramento penitentiæ:

tiae : *Facultas Theologica Lovaniensis unanimi consensu censuit*, &c. Sic quoque editum est, quod anno 1653. ab eâdem facultate latum est adversus septendecim propositiones ad Moralem spectantes, de quibus ab Illustrissimo Mechliniensium Archiepiscopo consulta fuerat. Sic tandem, seu *unanimi Magistrorum consensu*, prodiit censura, quam eadem facultas anno 1657. tulit adversus viginti sex alias propositiones sibi ab Illustrissimo Gandavensium Episcopo oblatas.

Q U Æ S T I O V I I I.

De Historia humana.

Not. **D**E humanâ historiâ hîc tria quæremus: 1. utrûm illius cognitio theologo sit utilis: 2. an aliquæ sint regulæ, quibus veræ à falsis historiis dignoscantur: 3. quænam sit historiæ humanæ autoritas.

CONCLUSIO I. Historiæ sive prophanæ, sive ecclesiasticæ cognitio, theologo perutilis est.

Probatur prior pars. Cognitio historiæ prophanæ plurimûm confert ad Scripturarum, aut ecclesiasticorum monumentorum intelligentiam: *Quidquid igitur* (ait Augustinus lib. 2. de doctrinâ Christianâ cap. 28.) *de ordine temporum transactorum indicat ea, quæ appellatur Historia, plurimûm nos ad sanctos libros intelligendos, etiamsi præter Ecclesiam puerili eruditione discatur.*

Probatur altera conclusionis pars. Theologus ex historiâ ecclesiasticâ discit 1. quid antiquum sit, quidve novum; quæ dogmata, sive fidei, sive morum, quæ disciplinæ capita in Conciliis determinata fuerint. Discit 2. quid in arduis religionis negotiis agendum sit; pauca nimirum nunc occurrunt, quæ aliàs non occur-

re-

rerint : *Nihil sub solenorum* (ait Scriptura Ecclesiast. 1.) *nec valet quisquam dicere : Ecce hoc recens est ; jam enim præcessit in sæculis , quæ fuerunt ante nos .* Discit 3. quâ occasione nonnulla in Conciliis statuta fuerint , quam ob causam aliqua à Patribus scripta sint ; ac proindè , quinam sit germanustum Conciliorum , tum Patrum sensus . Discit 4. præclara sanctorum gesta , ad quorum normam mores suos componat : *Exempla servorum tuorum* (inquit Augustinus lib. 9. Confess. cap. 2.) *quos de nigris lucidos , & de mortuis vivos feceras , congesta in sinum cogitationis nostræ urebant , & absumebant gravem torporem , ne in ima vergere- mus .*

CONCLUSIO 2. Nonnullæ sunt regulæ , quibus veræ à fictis historiis dignoscuntur .

Probatur enumeratione . Primò , vera est non ficta historia , quæ enarrat factum aliquod contigisse coram ingenti multitudine , quæ licèt illius interesset falsum manifestare , si quod fuisset , ipsum admisit , tradiditque posteris tanquam certum . Hinc colligitur , maximam esse certitudinem historiarum , quibus veteris legis miracula recensentur ; scilicet patrata dicuntur coram sexcentis millibus testium , qui ea non modò pro veris habuerunt , sed & posteris tradiderunt libros , quibus continebantur ; quamvis facta narrarent , quæ sibi ac toti Judaicæ genti parùm essent honorifica . Idem dici debet de miraculis , quæ referuntur in novâ lege ; eorum enim testes oculati pro defendendâ illorum veritate mortem obierunt .

Secundò , Econtrà cum factum aliquod non fuit evulgatum eo tempore , quo contigisse scribitur , sed tantùm multis post annis , fidem non meretur . Hincque patet , vel eo solo titulo rejici debuisse historiam de Joannâ Papissâ , quam ducentis & amplius annis , postquam contigisse fertur , tandem Marianus Scotus evulgavit .

Tertiò, Factum quod non refertur ab insigni & fideli alioquin historico, cujus plurimum intererat ipsum referre, quodque eum, si reverà contigisset, non potuisset latere, fictitium censerì debet, quamvis à pluribus historicis tempore posterioribus referatur.

Quartò, Veritas factorum quæ secretò, hoc est, coram uno teste contigisse dicuntur, pendet ab illius hominis fide, coram quo ejusmodi facta contigisse narrantur. Unde de iis factis non habetur certitudo, nisi in quantum certum est, eum hominem nec deceptum fuisse, nec voluisse ceteros decipere. Hincque patet, quàm inane sit ac fluxum totius religionis Mahumetanæ fundamentum.

CONCLUSIO 3. Præter authores Sacros nullus historicus certus esse potest eâ certitudine quæ fidem generet.

Probatur. Quilibet privatus homo præter eos quos ex evidentibus motivis credibilitatis constat scripssisse ex motu Spiritûs sancti, absolute loquendo, falli potest ac fallere: ac proinde nullus potest facere certitudinem, quæ generet fidem & cui, absolute loquendo, non possit subesse falsum.

CONCLUSIO 4. Historici graves, ac fide digni, quales sive in ecclesiasticis, sive in secularibus nonnunquam reperire est, theologo argumentum probabile suppeditant.

Probatur. Probabile est, historicos de quibus agitur, nec falli, nec fallere velle: prudenter nimirum se gerit, qui credit homini fide digno, affirmanti se, aut rem vidisse, aut accepisse ab hominibus sapientibus, qui illius oculati testes extiterint. Hinc patet imprudentem ac temerarium fore, qui fidem detraheret miraculis, quæ S. Augustinus in inventione corporis S. Srephani se vidisse testatur.

CONCLUSIO 5. Omnes probati, ac graves historici, nullo contradicente, factum aliquod enar-

enarrantes, theologo certum argumentum suppeditant.

Probatur. Id certum argumentum theologo suppeditat, de quo nemo qui sapiens sit, dubitare potest: atqui de facto quod ab omnibus probatis, ac gravibus historicis, nullo contradicente, refertur, nemo qui sapiens sit, dubitare potest. Nemo v.g. nisi desipiat, dubitare potest, Concilium Nicænum I. imperante Constantino Magno celebratum fuisse. Eo argumenti genere nituntur fideles, ut judicent quædam Concilia esse œcumenica, seu universam Ecclesiam repræsentare; ac proinde se prudenter fide divinâ credere, quæ in eis definita fuerunt.

Quæres, quid facto opus sit ad judicandum, an historicus aliquis sit de fide dignus.

Resp. expendendum esse 1. an sit coætaneus rei, quam enarrat; si enim multo post tempore vixerit, tantam fidem non meretur: 2. an in rebus etiam non multum intricatis, nonnunquam deceptus sit: 3. an ipsius inter sit facta sic extitisse, quemadmodum ab eo referuntur. Ob eam rationem Eusebii Cæsariensis fides in rebus quæ ad Arianos spectant, dubia est, Arianismi nimirum fuligine aspersus fuisse creditur: sic etiam Socratis, ac Sozomeni testimonia non sunt omnino certa in rebus, quæ pertinent ad Novatianos; nempe Novatianorum schismatis rei fuisse perhibentur. Vide Melchiorem Canum lib. II. de Locis Theologicis.

Q U Æ S T I O IX.

De ratione naturali.

N^{ot}. **D**E ratione naturali quæri potest 1. utrum à theologis consuli debeat : 2. quam vim, ac auctoritatem habeat.

C O N C L U S I O I. Ratio naturalis utiliter à theologis consulitur.

Probatur. Quod à Deo datum est homini ad comparandam veritatis cognitionem, utiliter à theologo consulitur : atqui ratio naturalis ad eum finem homini à Deo data est ; est enim quædam divini luminis participatio, juxta illud Psalmistæ : *Signatum est super nos lumen vultus tui, Domine.*

Quæres, utrum ratio naturalis se habeat per modum principii respectu theologiæ.

Resp. negativè. Ratio est, quia unum est tantum theologiæ principium, divina scilicet revelatio, quæ aut Scripturâ, aut traditione continetur; & per hoc theologia (ut hujusce tomi initio dictum est) differt à Philosophiâ, aliisque disciplinis naturalibus. Dicendum est igitur, rationem naturalem eo sensu ad theologiam conferre, quod ex principii revelatis conclusiones eliciat, aut exponat motiva credibilitatis, quibus fit, ut prudenter credamus, scripturam & traditionem esse verum Dei verbum.

Hinc sequitur *primò*, eos abuti ratione, qui in rebus theologicis primas partes ei tribuunt; *Oportet* (inquit S. Thom. 1. p. q. 1. ar. 8. ad 2.) *quod naturalis ratio subserviat fidei.* Ejusmodi autem abusus rei sunt hæretici omnes: ii enim ad præconceptarum quarundam opinionum normam de vero scripturarum sensu judicare soliti sunt,

sunt, cum è contra germanus illarum sensus ex terminis quibus constant, ex Ecclesiæ ac sanctorum Patrum consensione desumi debeat.

Sequitur *secundò*, in eundem scopulum incidisse præsertim Socinianos, qui persuasi Deum nihil revelasse, quod humana ratio capere non valeat, in sensum metaphoricum detorquent omnia Scripturæ loca, quæ sumpta in literali, continerent dogma, quod hominis captum superat, aut rationi naturali oppositum esse videtur. Eò nimirum nixi principio, Trinitatis, Incarnationis, aliorumque difficilium mysteriorum existentiam inficiati sunt.

Sequitur *tertiò*, ejusdem culpæ reos esse nonnullos hujus ævi conscientiæ casuum arbitros, qui Dei ipsius judices se ipsos constituentes affirmant: *Hæc aut illa ejus præcepta, si ad litteram sumerentur, non satis fore attemperata infirmitati humanæ: ex eo nimirum temerario judicio argumenta petunt, quibus præcipua mandata clarè alioquin Scripturis expressa convellunt. Idem in iis contingit, qui præconcepto hoc axiomate nixi: Præceptum non obligat per se, quando tempus obligationis non exprimitur, contendunt, primum Decalogi mandatum nusquam hominem in vitâ obligare: Homo (inquiunt) nullo umquam vitæ suæ tempore tenetur elicere actum Fidei Spei, & Charitatis ex vi præceptorum divinorum, ad eas virtutes pertinentium.*

CONCLUSIO 2. Communia principia rationis naturalis certum theologo argumentum sufficiunt: conclusiones verò quæ aliâ viâ, quàm per demonstrationem, ex illis inferuntur, argumentum tantum probabile.

Probatur prior pars. Communia principia rationis naturalis, siue ad mores, siue ad alias veritates pertineant, certa sunt ac evidentia, ut patet in istis: *Totum est majus sua parte. Impossibile est idem simul esse & non esse. Bonum est fac-*

ciendum, ac malum fugiendum. Alteri ne feceris, quod tibi fieri non vis.

Probatur altera conclusionis pars. Conclusiones, quæ per demonstrationem non eliciuntur ex communibus principiis rationis naturalis, inferuntur tantum per medium probabile: ergo solum argumentum probabile theologo sufficient.

Quæres, quænam conclusiones ex communibus principiis inferantur per medium demonstrativum, quænam verò per medium probabile.

Resp. conclusiones, quæ immediatè eliciuntur ex primis principiis, plerumque inferri per medium demonstrativum; sic ex isto moralis disciplinæ principio: *Alteri ne feceris, quod tibi fieri non vis*; demonstrativè colliguntur plura ex præceptis, quæ vetant, ne proximo damnum inferatur: Econtrà, quæ mediatè tantum, & remotè ex iisdem rationis naturalis principiis inferuntur, plerumque probabiliter tantum colliguntur, quia semper clarè non videtur connexio, quam remotæ conclusiones habent cum primis principiis, præsertim in rebus, quæ ad mores spectant; idque contingit, aut Deo nonnunquam (ut ait Augustinus) spargente pœnales cœcitates super illicitas cupiditates; aut propter præjudicia, vel propter pravum aliquem affectum, quo mens inclinatur ad judicandum pro iis rebus, quæ cupiditatem fovent, ac nutriunt.

Confirmatur responsio ex S. Thomâ, qui 1. 2. q. 94. artic. 6. sic loquitur: *Ad legem naturalem pertinent primò quædam principia communissima, quæ sunt omnibus nota: Quædam autem secundaria præcepta magis propria, quæ sunt quasi conclusiones propinquæ principiis. Quantum ergo ad illa principia communia, lex naturalis non potest à cordibus hominum deleri in universali; deletur tamen in particulari, secundum quod ratio impeditur applicare commune principium ad particul-*
la-

Differt.V. De proposition.Censur. 575

lare operabile propter concupiscentiam, vel aliquam aliam passionem . Quantum verò ad alia principia secundaria , potest lex naturalis deleri de cordibus hominum, vel propter malas persuasiones, eodem modo, quo etiam in speculativis contingunt errores circa conclusiones necessarias , vel etiam propter pravas consuetudines & habitus corruptos , sicut apud quosdam non reputabantur latrocinia peccata, vel etiam vitia contra naturam , ut Apostolus dicit ad Romanos .

Confirmatur 2. eadem responsio ex excessibus authorum , qui hoc sæculo ad normam solius rationis per peccatum corruptæ de moribus scripserunt. Scilicet neminem latet, nullum esse præceptum in decalogo , quod suis ratiociniis ex primis principiis (ut iis videbatur) deductis non labefactaverint . Unde Alexander Papa VII. in decreto dato Romæ die 25. Septembris anni 1665. ejusmodi scriptorum placita meritò dixit, *opiniones Christianæ disciplinæ relaxativas, & animarum perniciem inferentes, natas ex summa luxuriantium ingeniorum licentia.*



DISSERTATIO QUINTA.

De propositionum Censuris .

Not.I. **S**atis non est theologo notitia locorum, ex quibus argumenta pro confirmandâ fide & regulandis moribus desumenda sunt ; sed prætereâ requiritur, ut noverit , quibus Censuris affici debeant propositiones, quæ iisdem sive fidei, sive morum regulis oppositas esse judicaverit. De primo, seu de locis theologicis, fusè totâ præcedenti dissertatione diximus : par est igitur, ut in istâ de propositionum censuris disseramus .

C c 5 **Not.2.**

Not. 2. Octo passim recensentur damnabilium propositionum censuræ. Alia nimirum est propositio hæretica, alia erronea, alia scandalosa, alia blasphemæ, alia piarum aurium offensiva, alia temeraria, alia seditiosa, alia denique suspecta. Septem priores censurarum species legere est in Concilio Constantiensi sess. 8. ubi recensitis Vvicleffi articulis, hocce de illis iudicium latum est: *Quibus examinatis articulis, fuit repertum, (prout in veritate est) aliquos, & plures ex istis fuisse & esse notorie hæreticos, & à pluribus sanctis Patribus reprobatos, alios non Catholicos, sed erroneos, alios scandalosos, & blasphemos, quosdam piarum aurium offensivos, nonnullos eorum temerarios, & seditiosos.* Octava censuræ species reperitur in Bullâ Pii Papæ V. quâ proscribuntur quædam propositiones, quas nonnulli scriptores Michaeli Bajo tribuunt: nempe laudatus pontifex asserit, quædam ex iis propositionibus esse hæreticas, erroneas, suspectas, temerarias, scandalosas, immittentes offensionem in aures pias. Nonnulli scriptores relatis propositionum censuris addunt subsequentes. Præterea (inquiunt) aliquæ propositiones sunt proximæ hæresi, quædam sapiunt hæresim, quædam suspectæ sunt de hæresi, quædam improbables, aliæ malè sonantes, & tandem aliæ damnabiles. De variis illis propositionum censuris, hîc à nobis breviter est agendum.

Q U Æ S T I O P R I M A.

De propositione hæretica.

CONCL. I. **P**ROPOSITIO hæretica rectè definitur, ea quæ adversatur, aut expresso Dei verbo, aut expressæ definitioni Ecclesiæ.

Explicatur. Propositio hæretica dicitur adversari 1. *Dei verbo*, quia Dei verbum, seu scriptura, & traditio continent omnes articulos, qui ad fidem, aut mores spectant: non enim (ut superius dictum est) alii sunt fidei Christianæ fontes.

Dicitur 2. adversari Dei verbo *expresso*, hoc est, veritati quæ *expressè* Dei verbo continetur: ut sunt Christi mors, sepultura, resurrectio. Hinc patet, hanc propositionem quæ inter quinque damnatas ab Innocentio X. numero 2. legitur: *Interior gratiæ in statu naturæ lapsæ numquam resistitur*, meritò tanquam hæreticam fuisse proscriptam, contradictoriè nimirum opponitur huic expressæ Scripturarum sententiæ: *Vos semper Spiritui sancto resistitis*. Patet iterum, hanc aliam: *Homo non tenetur amare Deum, neque in principio neque in decursu vitæ suæ moralis*, esse quoque formaliter hæreticam, quippè quæ contradictoria sit expresso Dei verbo: *Diliges Dominum Deum tuum ex toto corde tuo*; ac proinde sub eâ qualificatione meritò damnata fuit ab Alexandro Papâ VIII.

Dicitur 3. adversari expresso Dei verbo, aut expressæ definitioni Ecclesiæ: siquidem propositio quæ implicitè tantum continetur Dei verbo, postquam Ecclesia declaravit eam illo revera contineri, fide divinâ expressè credi debet ab iis qui-

bus sufficienter innotuit latum ab Ecclesiâ iudicium ; propter eam rationem hæc propositio : *Baptismus, qui datur ab hæreticis in nomine Patris, & Filii, & Spiritus Sancti, cum intentione faciendi, quod facit Ecclesia, non est verus baptismus* ; ea (inquam) propositio est hæretica , quamvis olim , seu antequam Ecclesia in Concilio plenario (ut loquitur Augustinus) de eâ sententiam suam expressè tulisset, nequaquam esset hæretica ; nec enim tunc omnibus Ecclesiis constabat, contrariam propositionem contineri , vel etiam implicite, in Dei Verbo sive scripto , sive tradito .

Sic explicatæ conclusionis veritas hoc argumento probatur . Ea propositio rectè dicitur hæretica , quæ evidentur contradictoria est propositioni Catholicæ : Ideò enim hæc propositio : *Christus non est homo*, est hæretica , quòd isti Catholicæ : *Christus est homo*, evidenter sit contradictoria : atqui propositio , quæ adversatur, aut expresso Dei Verbo , aut expressæ definitioni Ecclesiæ, est evidenter contradictoria propositioni Catholicæ ; siquidem propositio Catholica definitur ea, quæ explicitè Dei Verbo continetur, aut si implicite tantum , ab Ecclesiâ declarata fuit reverà eodem Dei Verbo contineri : ergo, &c.

Quæres, ejus naturæ debeat esse res aliqua, ut sit materia propositionis hæreticæ .

Resp. hæretis materiam esse, vel quæstiones juris, quæ ad fidem, aut mores pertinent , aut quæstiones facti, quæ Dei Verbo scripto, aut tradito continentur ; nam aliæ quæstiones facti, quæ in Dei Verbo, aut scripto, aut tradito nullâ ratione continentur, possunt quidem esse materia erroris ad fidem minimè spectantis , sed non possunt esse materia , aut erroris ad fidem spectantis, aut alicujus hæreseos . Ratio est, quia propositio hæretica (ut dictum est) est ea, quæ opponitur propositioni explicitè revelatæ, aut quam, si
impli-

implicitè tantùm revelata sit , Ecclesiâ solemni
judicio declaraverit sequi ex revelatâ . Proposi-
tio erronea (ut infrâ dicetur) est ea, quæ oppo-
nitur veritati implicitè revelatæ , seu, quæ ex expli-
citè revelatâ colligitur , quam tamen Ecclesiâ
nondum declaravit ex eâ sequi .

Confirmatur argumentum . Materia hæresis,
aut erroris ad fidem spectantis, debet esse res, cir-
ca quam Ecclesiâ sit infallibilis, seu, de quâ absq;
erroris periculo judicare possit : atqui Ecclesiâ
est solùm infallibilis circa ea, quæ revelatione
aut explicitâ, aut implicitâ continentur ; econtrâ
verò falli potest circa res & facta , quæ revela-
tione nullo modo continentur : *Generale Conci-
lium* (inquit Bellarminus lib. 4. de Romano Pon-
tifice cap. 11.) *cui Romanus Pontifex per se , vel per
suos legatos præsidet , in questionibus facti errare
potest .* Addit idem Cardinalis, Concilium sextum
œcumenicum de facto errasse : *Quòd si aliquis ad-
huc non potest induci , ut credat corruptam esse sex-
tam synodum , accipiat alteram solutionem , quæ
est Ioannis à Turrecremata lib. 2. de Eccles. cap.
93. qui docet , Patres sextæ synodi damnasse qui-
dem Honorium , sed ex falsa informatione ; ac
proinde in eo iudicio errasse . Quamvis enim Ge-
nerale Concilium legitimum non possit errare , ut
neque erraverit hoc sextum , in dogmatibus fidei
definiendis , tamen errare potest in questionibus de
facto . Itaque tutò dicere possumus , hos Patres de-
ceptos ex falsis rumoribus , & non intellectis Hono-
rii epistolis , immeritò cum hæreticis commemoras-
se Honorium .*

Q U Æ S T I O II.

De propositione erronea.

Not. **N**on conveniunt authores, in quo præcisè posita sit erroneæ propositionis natura.

Melchior Canus lib. 12. de Locis theologicis cap. XI. docet, propositionem erroneam, esse eam quæ adversatur quidem alicui veritati Catholicæ, seu quam universa tenet Ecclesia, sed tamen quâ fides non evertitur, licèt aliqua ei labe inferatur; & in hoc (inquit) propositio erronea, est opposita propositioni hæreticæ, per hanc enim Catholica fides planè subvertitur. Propter eam rationem (ait) hæc propositio, *Verbum non est consubstantiale Patri*, est propositio hæretica, ista verò, *Speciales orationes applicatæ uni personæ per prælatos, vel religiosos, non plus ei prosunt, quàm generales*, est propositio erronea.

Nonnulli theologi contendunt, propositionem erroneam esse eam quæ repugnat veritati, quæ sequitur ex unâ præmissâ de fide, & ex alterâ quæ sit evidens. Propter eam rationem (inquit) hæc propositio, *Christus non est risibilis*, est erronea, quia (addunt) repugnat veritati, quæ sequitur ex hac præmissâ quæ est de fide, *Christus est homo*: repugnat quoque alteri huic propositioni, *Omnis homo est risibilis*, quæ est omninò evidens.

Alii tandem volunt, propositionem erroneam esse eam quæ negat doctrinam communi Ecclesiæ consensu ita receptam, ut nullus pius & verè doctus de eâ dubitare audeat propter affinitatem quam in eâ invenit cum doctrinâ fidei. Ob id (inquit) ista propositio: *Maria Virgo non fuit*

fuit semper immunis à quolibet peccato actuali, est erronea, quia (addunt) proximè accedit ad propositionem quæ negat Mariam Virginem esse verè Dei matrem.

CONCLUSIO I. Propositio erronea non est solùm ea quæ adversatur propositioni, quâ Catholica fides non evertitur. Est contra Melchiorum Canum.

Probat. Per propositionem quâ fides Catholica non evertitur, vel Canus intelligit eam quæ non versatur circa mysteria Trinitatis, & Incarnationis, Christi mortis, Gratiæ; vel solùm eam, quæ circa illa mysteria versatur. Si primum, propositiones de peccato originali, de justificatione, de sacramentis, ac multis aliis, quæ cum anathemate damnatæ sunt in Concilio Tridentino, non essent hæreticæ; quod est absurdum. Si secundum, solæ propositiones quæ propugnatae sunt à Sabellianis, Arianis, Macedonianis, Pelagianis, Nestorianis, Eutychianis, Monothelitis essent hæreticæ. Sed hoc absurdum est: siquidem plures sunt propositiones quæ licèt circa illa mysteria non versentur, tamen repugnant veritatibus quæ à Deo Apostolis, ac proinde Ecclesiæ, aut immediatè, aut mediatè, revelatæ fuerunt.

CONCLUSIO 2. Propositio erronea non est solùm ea quæ repugnat veritati, quæ sequitur ex unâ præmissâ de fide, & alterâ evidente per rationem naturalem.

Probat. Propositio quæ repugnat veritati, quæ sequitur ex unâ præmissâ de fide, & alterâ quæ est evidens ratione naturali, formaliter est hæretica; nam propter eam rationem ista: *In Christo non fuit humana voluntas*, est hæretica, & sic in sexto Concilio Generali damnata contra Monothelitas: & tamen (ajunt aliqui) non repugnat veritati quæ sequatur ex duabus præmissis de fide, sed tantùm ex unâ de fide: *Christus est homo*, & ex alterâ quæ evidens est ratione natura-

turali : *Omnis homo habet humanam voluntatem* . Idem iudicium ferri debet de hâc aliâ propositione : *Petrus non resurget* ; est enim formaliter hæretica , quamvis non adversetur duplici propositioni de fide , sed uni tantum ; nimirum repugnat veritati , quæ sequitur ex hâc præmissâ de fide : *Omnis homo resurget* ; & ex hâc aliâ , quæ est evidens ratione naturali : *Petrus est homo* .

CONCLUSIO 3. Propositio erronea non est solùm ea , quæ negat doctrinam communi Ecclesiæ consensu ita receptam , ut nullus pius & doctus de eâ dubitare audeat .

Probatur . Ea definitio non valet , quæ convenit alteri , quàm definito ; nempè accurata definitio debet convenire omni & soli definitio : atqui ea , de quâ agitur , non convenit soli propositioni erroneæ , sed prætereâ convenit propositioni scandalosæ ; nam propositio scandalosa à nemine pio & verè docto propugnatur . Confirmatur argumentum ex eo , quodd neminem pium & doctum reperire sit , qui dubitare audeat de falsitate omnium ac singulorum articulorum , quos Concilium Constantiense adversùs Vicleffum proscripsit ; & tamen omnes ac singuli illi articuli non sunt erronei , sed aliqui (ut ipsummet Concilium loquitur) sunt hæretici , alii erronei , alii scandalosi , alii blasphemii , alii piarum aurium offensivi .

CONCLUSIO 4. Propositio erronea strictè sumpta , est ea , quæ negat veritatem , quam communis Ecclesiæ consensus judicat esse mediâtè revelatam , quamvis Ecclesia id nondum expressè definierit .

Probatur . Per eam definitionem propositio erronea differt ab hæreticâ ; nimirum hæretica negat veritatem , aut immediâtè revelatam , aut mediâtè solùm , sed additâ solemnî Ecclesiæ definitione . Differt quoque (ut subsequenti quæstione dicetur) à cæteris propositionibus
dam-

Dissert.V. *De proposition.Censur.* 583
damnabilibus, quas Concilium Constantiense
recenset. Hinc patet, opinionem Cypriani de
invaliditate baptismatis ab hæreticis collati, er-
roneam fuisse, antequam Ecclesia definiisset eam
repugnare veritati, quæ continebatur Verbo Dei
non scripto, seu traditione, quæ docebat, inter-
nas dispositiones baptizantis non nocere validi-
tati baptismatis. Verum post Ecclesiæ definitio-
nem est formaliter hæretica, ut jam superius di-
ctum est.

Q U Æ S T I O III.

*De propositionibus scandalosa,
& blasphema.*

CONCL. I. **P**ROPOSITIO scandalosa strictè
sumpta, rectè definitur: Pro-
positio, quæ per se nata est parere spiritualement
proximi ruinam, licet in eâ nec error, nec hæresis
apertè notari possint.

Explicatur definitio. Propositio, de quâ agi-
tur, dicitur 1. parere spiritualement proximi rui-
nam; hoc enim fert ipsum *Scandalis* nomen, quod
quidem secundum grammaticos non aliud signifi-
cat, quàm offendiculum, quod ante pedes alicujus
positum, est causa, cur cadat. Dicitur 2. quod *per*
se nata sit parere spiritualement proximi ruinam; nē-
pè *per accidens* est, hoc est ex parte subjecti pe-
titur ratio, cur ejusmodi ruina non sequatur.
3. Adduntur hæc verba: *Licet in ea nec hæresis,*
nec error apertè notari possint; per quæ quidem
verba propositio scandalosa strictè sumpta, seu,
prout specialem censuræ notam continet, differt
à propositione hæreticâ & erroneâ; in iis enim
hæresis & error apertè notari possunt. In exem-
plum propositionis scandalosæ referri potest ista:
Ex auriculari confessione gravissima sequuntur
in-

incommoda. Recenseri potest etiam hæc alia: Sancti Mystici excluserunt à statu animarum transformationum exercitationes virtutum; per senimirum inclinât animas, quæ sibi videntur esse transformatae, ad dimittendas virtutum exercitationes.

CONCLUSIO 2. Propositio blasphema est ea, quæ aliquod aut in Deum, aut in Sanctos convicium continet.

Explicatur. Per eam definitionem propositio blasphema differt ab aliis propositionibus, quibus specifica aliqua alia censura debetur; neque enim aliæ propositiones continent convicium aut in Deum, aut in Sanctos; hoc est, nec Deo, nec Sanctis aliquid tribuunt, quod eos dedecet, aut ab eis detrahunt perfectionem, quæ debeatur. Hinc patet, hanc propositionem ab Innocentio Papâ XII. proscriptam: *Inferior Christi pars in Cruce non communicavit superiori suas involuntarias perturbationes; esse non solum erroneam, sed etiam blasphemam; scilicet multum detrahit ex perfectione, quæ Christo debetur, seu multum est ipsi injuriosa.* Patet 2. proptereandem rationem, hanc aliam propositionem, quæ primo est loco inter quinque ab Innocentio Papâ X. damnatas: *Aliqua Dei præcepta hominibus justis volentibus & conantibus, secundum præsentem quas habent vires, sunt impossibilia: deest quoque illis gratia, qua possibilia fiant; non solum esse temerariam, impiam, & hæreticam; sed etiam (ut idem Innocentius in sua Constitutione datâ Romæ anno 1653. pridie Kalendas Junii declaravit) blasphemam. Nempè Deum reddit injustum legislatorem, qui ea præcipiat, quæ justis volentibus & conantibus, secundum præsentem quas habent vires, sint impossibilia.*

Q U Æ S T I O IV.

*De propositionibus malè sonante , &
piarum aurium offensiva .*

CONCL. I. **P**ROPOSITIO malè sonans rectè definitur propositio , quæ licet duplicem habeat sensum , unum bonum , & alium malum , absolutè tamen & sine distinctione proferitur .

Explicatur . *Primò* , quatenùs propositio , de quâ agitur , dicitur habere duplicem sensum , unum bonum , & alium malum , differt ab hæreticâ & erroneâ ; illæ enim propositiones non habent aliquem sensum bonum , saltem qui sit obviuſ , hoc est , quem verba , ex quibus constant , præferant : 2. quatenùs dicitur absolutè & sine distinctione proferri , differt à propositionibus , ex quibus pravus sensus excluditur , per explicationem ac restrictionem terminorum .

CONCLUSIO 2. Propositio piarum aurium offensiva , definitur propositio , quæ aliquid absonum , & subjecto , de quo fertur , indignum continet .

Explicatur. Propositio , de quâ agitur , dicitur 1. offensiva *aurium* , non quidem propter sensum , quem à parte rei continet , sed propter modum , quo ille sensus exprimitur . Dicitur 2. offensiva *aurium* , non quarumcumq; sed *piarum* ; neque enim (ut olim in Pharisæis accidit) si impii aliquâ veritate offendantur , ob id propositio , quæ illam veritatem continet , dici debet per se *aurium offensiva* . Addendum est , eam quoque *per se* , non debere dici *aurium piarum offensivam* , quæ pios quidem , sed indoctos offendit ; siquidem (ut observat Melchior Canus) ad ferendum iudicium de aliquâ propositione-

fitione, consuli non debet promiscuum vulgus, licet pietatem præferat; sed consuli debent viri, qui cum pietate doctrinam conjunxerunt. Scilicet non rarò contingit, ut propositio, quæ piæ plebis aures offendit, viros peritos, ac sapientes non tantum non offendant, sed etiam nec moveat. Id præsertim videre est in propositionibus, quæ enuntiant abusus, aut superstitiones, quæ ab hominibus, piisquidem, sed parum peritis, nonnunquam admittuntur in quarumdam imaginum, aut quorumdam sanctorum cultu. Dicitur 3. nonnihil continere absonum, seu in subjectum, de quo profertur, non satis honorificum; ac per hoc patet, propositionem, de quâ agitur, non tam peccare in sensu, quàm in modo, quo ille sensus exprimitur; hincque colligitur, cavendum esse theologo, cum de partu B. Mariæ Virginis loquitur, ne circumstantias explicet, quæ exprimi non possunt, nisi terminis, qui minimè deceant.

Q U Æ S T I O V.

De propositionibus temeraria, & seditiosa.

CONCL. I. **P**ROPOSITIO temeraria, est propositio, quæ in materiâ fidei, aut morum profertur absque auctoritate, aut Scripturæ, aut unanimis traditionis, aut saltem aliquorum Patrum; & à fortiori, si major episcoporum & theologorum pars judicet, eam aut Scripturæ, aut traditioni, aut doctioribus Patribus adversari.

Probatur. Temerarium dicitur, quod absque fundamento asseritur, ac profertur in medium; sed propositio, quæ in materiâ fidei, aut morum pro-

profertur absque auctoritate, aut Scripturæ, aut unanimis traditionis, aut saltem aliquorum Patrum, asseritur ac profertur sine fundamento; cum (ut jam sæpiùs dictum est) non aliud sit fundamentum fidei ac morum, quàm Scriptura, traditio, & Patres.

Inde verò colligitur 1. hoc Casuistarum axioma: *Honor potior est, quàm vita*; non solùm esse scandalosum & perniciosum, sed etiam temerarium; siquidem nullo, aut Scripturæ, aut traditionis, aut Patrum testimonio nititur. Colligitur 2. plures ex propositionibus, quæ circa cultum Deo debitum, charitatem exhibendam proximo, homicidium vitandum, à recentioribus prolatae sunt in medium, esse temerarias; nempe, ne minimo quidem, aut Scripturæ, aut traditionis fundamento nituntur, sed levissimis tantùm ratiunculis. Ejusmodi verò sunt ex omnes, quas Alexander Papa VII. & Innocentius XI. publicis decretis damnarunt.

Quæres, utrùm quælibet propositio temeraria sit hæretica, aut erronea; & vicissim utrùm omnis hæretica, aut erronea, sit temeraria.

Resp. ad primum negativè. Ratio est, quia propositio hæretica (ut supra dictum est) est ea, quæ contradictoriè opposita est veritati expressè revelatæ; erronea, quæ opposita est veritati implicitè tantùm revelatæ, seu, quæ per argumentationem (secluso solemni Ecclesiæ judicio) ex expressè revelatâ colligitur: atqui quælibet propositio temeraria non est ejusmodi; nempe nonnullæ sunt propositiones temerariæ, quæ respiciunt facta, quæ multò post Apostolorum ætatem contigerunt; ac proindè, quæ, cum propter eam rationem revelata non fuerint, non possunt (ut supra dictum fuit) esse hæresis, aut erroris ad fidem pertinentis materia.

Resp. ad 2. omnem propositionem formaliter hæreticam, seu, quæ adversatur veritati, quæ explicitè & immediatè Dei Verbo, sive scripto, sive tra-

tradito, continetur, aut quæ per solemne Ecclesiæ judicium declarata fuit eo contineri, semper esse temerariam: non enim major temeritas fingi potest, quàm quæ aut expressio Dei verbo, aut apertæ definitioni Ecclesiæ contradicit.

Resp. iterum ad eandem propositæ quæstionis partem, quamlibet propositionem erroneam, non semper esse temerariam: nempe licet veritas cui opposita est, sit mediatè & implicitè revelata; nonnunquam tamen multi sunt, & quidem primi ordinis doctores, qui negant eam veritatem, cui opponitur ea quam defendunt, esse, etiam mediatè, revelatam. Id videre est in quæstione de baptismo ab hæreticis dato, & in quæstione de visionis beatificæ dilatione usque ad corporum resurrectionem: ex enim quæstiones ante Ecclesiæ definitionem, non ultimos, sive pro affirmativâ parte, sive pro negativâ, patronos habebant, ac proinde propositionibus, quæ de eis proferebantur, tunc temeritatis nota inuri non poterat.

CONCLUSIO 2. Propositio seditiosa, est ea quæ per se apta est parere seditionem.

Evidens est ea definitio ex ipsâ nominis etymologiâ. Contendunt aliqui, propositionem seditiosam, nisi aliunde opponatur doctrinæ fidei, vel morum, vel disciplinæ, non videri inter censuras theologicas comprehendi debere, licet ab Ecclesiâ prohiberi possit. Volunt alii eo sensu illam inter theologicas notas comprehendi, quòd ad scandalosam propositionem reducatur: nempe (ajunt) seditio, ad quam illa propositio movet, contingere non potest absque spirituali multorum ruinâ, & plurium peccatorum lethali commissione.

Q U Æ S T I O VI.

*De propositionibus, suspecta de hæresi,
sapiente hæresim, hæresi
proxima.*

CONCL. I. **P**ROPOSITIO suspecta de hæresi re-
ctè definitur, propositio quæ
multâ cum probabilitate judicatur hæretica.

Explicatur definitio. *Primò*, propositio de quâ
agitur, judicatur *hæretica*, hoc est, contradicto-
riè opposita veritati, quæ aut explicitè & imme-
diatè revelata est, aut si implicitè tantùm & me-
diatè, ab Ecclesiâ solenni judicio declarata fuit
revelata. *Secundò*, judicatur hæretica *cum pro-
babilitate*, id est, ex hæreticâ infertur per argu-
menta, quæ licèt certitudinem moralem generèt,
non excludunt tamen omne dubium: unde pro-
positio de quâ est quæstio, non potest dici abso-
lutè hæretica, sed tantùm suspecta de hæresi.
Tertiò, judicatur hæretica cum multâ probabili-
tate; neque enim aliqua propositio propter le-
vem probabilitatem, cum fundamento adduci
debet in hæresis suspicionem: æquitati nimirum
repugnat, ut propter leve fundamentum, tam
gravis censura alicui propositioni inuratur: gra-
vis autem fundamenti nomine hîc intelliguntur
rationes petitæ ex scripturâ & traditione, quæ
non unum, & alterum tantùm doctorem ad as-
sensum moveant, sed ingentem magistro-
rum numerum, paucis exceptis, determi-
nent.

CONCLVSIO 2. Propositio quæ sapit hæ-
resim, definitur, propositio quæ multò majori
cum probabilitate, quàm suspecta de hæresi, ju-
dicatur hæretica.

Ex-

Explicatur definitio . Probabilitas gradus quosdam habet, seu major est, vel minor pro majori, vel minori pondere rationum, quibus nititur: igitur quando magna est probabilitas, quod aliqua propositio sit hæretica, tunc (ut conclusione præcedenti dictum est) constituitur propositio suspecta de hæresi: quando autem est maxima probabilitas, seu vehemens suspicio, tunc constituitur propositio sapiens hæresim, quia ea quæ per gustum exploramus, nobis magis certa sunt, quàm quæ per solum intellectum suspicantem attingimus. Hinc igitur patet, idem fundamentum, sed sumptum secundum diversos gradus, constituere propositionem, aut quæ de hæresi suspecta sit, aut quæ sapiat hæresim.

Quæres, an, ut propositio dicatur suspecta de hæresi, aut hæresim sapere, attendenda sit conditio scriptoris, in quo reperitur; seu utrum habenda sit ratio sectæ cui scriptor nomen dedit, an verò propositio in se solâ considerari debeat.

Respondent nonnulli, propositionem, ut ei inurantur censuræ de quibus est quæstio, considerari debere in se ipsâ, & independenter à sensu quem author in libro, in quo propositio continetur, sibi proponere potuerit.

Respondet Melchior Canus lib. 12. de Locis Theologicis, cap. XII. attendi debere conditionem proferentis, seu ut suspicio de hæresi alicui propositioni inuratur, attendendum esse ad mentem scriptoris, à quo prolata fuit in medium. Melchiori Cano hæc in parte subscribimus, eò quod suspicio, sapor, ex adjunctis desumantur; iis enim adjunctis seu circumstantiis nititur probabilitas, propter quam propositio, aut sapit hæresim, aut in hæresis suspensionem adducitur.

Ex postremâ illâ responsione colligendum est
1. attendi debere ad conditionem, & fidem proferentis, si propositio quæ suspecta est de hæresi,
aut

aut quæ sapit hæresim, consideretur in ordine ad puniendum, vel absolvendum proferentem. Ratio est, quia dubium est eo in casu, an propositio prolata fuerit in hæretico sensu; illud autem dubium solvi non potest, nisi ex statu, & conditione proferentis, seu si proferens sit hæreticus, moralis erit certitudo, quòd in suâ propositione sensum hæreticum intellexerit: Hinc ista propositio: *Non oportet Eucharistiæ sacramentum solenni ritu per vias publicas circumferre*, in ore Lutherani qui negat Christum esse in Eucharistiâ corporaliter præsentem extra actualem illius usum, aut in ore Calvinistæ qui contendit Christum ne in ipso quidem actuali usu, Eucharistiâ substantialiter contineri, esset hæretica: è contra suspecta non esset in ore Catholici qui timeret, ne propter aliquam peculiarem circumstantiam debita reverentia sanctissimo Sacramento per vias publicas delato non exhiberetur. Sic etiam hæc alia: *Vna natura Dei Verbi incarnata*, est hæretica cum profertur ab Eutychianis; eâ nimirum significare intendunt, unam tantum esse in Christo naturam post unionem: cum è contra sit Catholica, cum à viro Catholico profertur; nam in illius mente significat non duas, sed unam tantum personam, Verbi nimirum, esse in Christo. Sic denique hæc alia: *Vnus è Trinitate passus est*, quæ tot olim turbas movit, in Ecclesiâ non est suspecta de hæresi, cum à Catholico profertur, cum è contra certò sit hæretica in sensu Eutychianorum, in quo eam Hormisda Papa proscripsit.

Colligendum est 2. attendi debere ad antecedentia & consequentia, si sit quæstio de propositione, quæ in aliquo libro continetur. Quamvis enim secundum terminos quibus constat, & separata à restrictionibus quæ illam in eo libro aut præcedunt, aut subsequuntur, sit aliquando non solum de hæresi suspecta, sed etiam certò hæretica; nihilominus poterit esse sana in sensu autho-

592 Instit. Theolog. Prolegomena.
ris, seu habitâ ratione connexionis, quam in libro
quo continetur, habet cum antecedentibus &
consequentibus.

CONCLUSIO 3. Propositio hæresi pro-
xima definitur ea, quam major & sanior docto-
rum pars ex Scripturâ & traditione judicat esse
hæreticam, licet non audeat eam dicere simpli-
citer hæreticam, quod aliqui non infimi nomi-
nis theologi contendunt, ipsi censuram hujusmo-
di inuri non debere.

Ex eâ definitione patet, propositionem hæresi
proximam idem esse omnino cum propositioni-
bus suspectâ de hæresi, sapiente hæresim; non
enim aliud dicit, quàm summam probabilitatem,
quod reverâ sit hæretica.

Quæres, an propositiones suspectæ de hæresi,
sapientes hæresim, hæresi proximæ, semper certo
mereantur aliam censuræ speciem.

Resp. affirmativè. Ratio est, quia ejusmodi
propositiones semper sunt temerariæ, & nonnun-
quam etiam scandalosæ, cum semper multum sit
probabile, eas contradictoriè oppositas esse veri-
tati, quam tenet Mater Ecclesia.

Q U Æ S T I O VII.

*De propositionibus improbabili, &
damnabili.*

CONCL. I. **P**ropositio probabilis est ea,
quæ nullo Scripturæ, aut tra-
ditionis, aut rationis theologicæ fundamento ni-
titur.

Explicatur. Probabilitas in rebus, quæ ad f-
dem, aut mores spectant, non nascitur, nisi ex ar-
gumentis, quæ petuntur, aut ex Scripturâ, aut ex
traditione, aut rationibus theologicis: ergo pro-
po-

positio, quæ ejusmodi argumentis non nititur, rectè dicitur improbabilis.

Quæres, utrùm improbabilitas sit species censuræ, quæ à temeritate distincta sit.

Respondent nonnulli negativè; nimirùm (inquiunt) propositio, quæ nec Scripturâ, nec traditione nititur, est nova; ac proindè in rebus, quæ ad fidem, aut mores spectant, est semper falsa ac temeraria; nempè (ut supra dictum est) omnes veritates, quæ ad fidem, aut mores spectant, Apostolis, saltem implicite, revelatæ sunt; ac proindè quod est novum, semper est falsum ac temerarium.

Respondent alii theologi, improbabilitatem esse censuram specie distinctam à temeritate; nam (aiunt) temeritas non tantùm in propositione dicit defectum argumentorum, quibus nitatur; sed præterea dicit positiva argumenta, quibus impugnetur. Priori sententiæ adhæremus.

CONCLUSIO 2. Propositio damnabilis est ea, quæ prohiberi debet, abstrahendo à speciali censurâ, quâ affici potest.

Ex eâ definitione patet 1. propositionem damnabilem differre à propositionibus, quibus specialis censura jam iniusta est; hæc enim abstrahit à quâlibet censurâ, quæ jam iniusta fuerit; patet 2. propositionem damnabilem se habere per modum generis respectu omnium propositionum, quibus aliqua censura debetur.

Quæres 1. quas ob causas aliqua propositio dici possit damnabilis.

Resp. dici posse damnabilem 1. quoties fundamentum est ei inurendi aliquam ex censuris, quæ in hâc dissertatione relatæ sunt. 2. Cum ea propositio inurit censuram alteri propositioni, quæ licet falsa sit, non meretur tamen censuram: Hujusmodi est hæc, quæ in Pii Papæ V. bullâ, quæ incipit: *Ex omnibus*, numero 22. legitur: *Cum Pelagio sentiunt, qui textum Apostoli ad*

Dd 2 Rom. 2.

Rom. 2. *Gentes, quæ legem non habent, naturaliter quæ legis sunt, faciunt, intelligunt de gentibus fidei gratiam non habentibus.* 3. Cum aliqua propositio injuriosè rejicit oppositam, licèt falsam, ut videre est in istâ, quæ in laudatâ Pii V. bullâ, numero 30. legitur: *Fures sunt & latrones, qui docent, tentationi ulli, sine gratiæ ipsius adjutorio resistere hominem posse, sic ut ab ea non superetur.* 4. Cum propositio detrahit famæ alicujus; nam propter eam rationem, libri famosi jure, ac meritò ab Ecclesiâ proscribuntur.

Quæres 2. quid per adverbium *respective*, significetur, cum reperitur in decreto, in quo dicitur has, & illas propositiones esse *respective*, hæreticas, erroneas, temerarias, scandalosas, perniciosas, blasphemias, &c.

Resp. eum loquendi modum, quem Summi Pontifices mutuati sunt ex Concilio Constantiensi, significare, aliquam ex recensitis notis afficere unamquamque ex propositionibus disjunctivè; ita ut nulla sit, in quam non cadat una saltem ex notis, quæ in condemnationis decreto referuntur.

Quæstionibus de propositionum censuris addenda est prohibitio Innocentii Papæ XI. quæ legitur in decreto, quo 65. propositiones ad moralem spectantes proscripsit; sic autem habet ea prohibitio: *Tandem ut ab injuriis contentionibus Doctores, seu scholastici, aut alii quicumque in posterum se abstineant, & ut paci & charitati consulatur, idem sanctissimus in virtute sanctæ obedientiæ præcipit, ut tam in libris imprimendis, ac manuscriptis, quàm in thesibus, disputationibus, ac prædicationibus, caveant ab omni censura & nota, nec non à quibusvis convitiis contra eas propositiones, quæ adhuc inter Catholicos hinc inde controversantur, donec à S. Sede recognita, super iisdem propositionibus judicium proferatur.*



DISSERTATIO SEXTA.

De Theologia partibus.

Magister Sententiarum totum suum opus theologicum in quatuor libros partitur. Libro primo agit de Deo, & quidem in primis de SS. Trinitatis mysterio. Libro secundo disserit de Angelis, de creatione hominis, ac illius lapsu. Libro tertio agit de Christo hominis lapsi redemptore. Libro quarto tractat de Sacramentis, quibus Christi redemptoris sanguis hominibus per peccatum vulneratis, ad sanitatem & vitam applicatur.

S. Thomas suam Summam theologicam in tres partes dividit. In primâ parte agit de Deo Uno, Trino, Creatore. In secundâ, de Deo ultimo fine, nec non de mediis, quibus creatura rationalis, aut ad illum finem perducitur, aut ab eo averti potest, virtutibus nimirum & vitiis. In tertiâ denique de Deo Salvatore & Sacramentis ab eo institutis. Eâ methodo S. Doctor complexus est omnia, quæ ad Deum, qui (ut suo loco fuit dictum) est objectum theologiæ, sive in se, sive extra se consideratum, referuntur.

Ab eo S. Doctoris ordine non discrepat is, quem in hisce Institutionibus servabimus. Octo scilicet erunt illarum partes. Prior ea complectitur, quæ ad Deum unum spectant; altera, quæ ad Deum Trinum; tertia, quæ ad Deum mundi Creatorem; quarta, quæ ad Deum incarnatum; quinta, quæ ad Deum authorem gratiæ; sexta, quæ ad Deum authorem legum; septima, quæ ad Deum ultimum finem; octava denique; quæ ad Deum authorem Sacramentorum.

*Octo igitur existunt harum Institutionum
Theologicarum partes.*

- I. DE DEO UNO.
- II. DE DEO TRINO.
- III. DE DEO CREATORE.
- IV. DE DEO INCARNATO.
- V. DE DEO AUTHORE GRATIAE.
- VI. DE DEO AUTHORE LEGUM.
- VII. DE DEO ULTIMO FINE.
- VIII. DE DEO AUTHORE SACRAMENTORUM.

Verùm cum in dissertatione præcedenti designati fuerint fontes, ex quibus hauriri debet theologia, par est, ut nunc differamus de mediis, quibus scientiam illam adipiscamur in terris, quæ (ut scribit Hieronymus ad Paulinum) nobiscum perseveret in cœlis.

Ea verò media ad theologiam acquirendam necessaria, plura sunt. Necesse nimirum est *primò*, ut concupiscentiæ refrænentur. Ratio est, quia corrupti mores intellectum ita excœcant, ut in iis, in quibus creaturarum amor dominatur, non rarò dicat bonum malum, & malum bonum. Impediunt quoque ne mens attendat ad rationes, quibus damnatur objectum, cui corrupta voluntas inhæret; imò efficit, ut totus sit in perpendendis quibusdam ratiunculis, quibus honestum & licitum probetur, quod placet voluntati. Unde notum est illud adagium: *Vnusquisque iudicat, prout est affectus*. Sic (inquit in suis thesibus anni 1685. pius quidam & doctus theologus) Pharisei, quòd essent avari, de eleemosynæ præcepto malè sentiebant, irridebantque Christum de eo differentem ad veritatis normam. Cum superbia in eis dominaretur, humilem Salvatoris doctrinam de non ambiendis primis cathedris, nec capere, nec ferre poterant. Sic (prosequitur idem author) de sobrietate rectè sentire non solent

lent potatores, nec de castitate libidinosi, nec de necessitate divinæ vocationis ambitiosi, nec de religiosâ paupertate proprietarii, nec denique de bonorum ecclesiasticorum dispensatione, beneficiorum accumulatores: *Excavavit eos enim (ait Scriptura Sapientia 2.) malitia eorum. In iis locum habet illud Augustini: Lege infatigabili spargit Deus pœnales cæcitates super illicitas cupiditates.*

Neceffe est secundò, ut theologiæ studio incumbens, charitate flagret, saltem inchoatâ; nam (ut sæpè ait Augustinus) *non intratur in veritatem, nisi per charitatem. Per charitatem pervenitur ad plenitudinem scientiæ. Si ergo in charitate proficiatis, quam diffundit in cordibus Spiritus Sanctus, docebit vos omnem veritatem.*

Neceffe est tertio, ut theologiæ candidatus humili vacet orationi; scilicet oratio confert in primis ad cognitionem rerum divinarum, de quibus theologia tractat. Hinc Psalmista divinam illam scientiam sæpiùs à Deo postulat: *Illumina (inquit) oculos meos, ne unquam obdormiam in morte.* Hinc ipsa etiam Ecclesia in suis orationibus sæpiùs per annum à Deo petit, ut fideles, quæ agenda sunt videant, & ad implenda, quæ viderint, convalescant. *Ut terrenis affectibus mitigatis, facilius cœlestia capiamus. Ut cogitemus te inspirante, quæ recta sunt, & te gubernante, eadem faciamus.* Inde verò colligitur, quantum aberrant ii theologi, qui sibi videntur terere tempus, quod impenderint orationi; quasi verò inutile sit, ac noxium illud Jacobi monitum, Epistolæ Canonicae cap. I. *Si quis autem vestrum indiget sapientia, postulet à Deo, qui dat omnibus affluenter.*

Neceffe est quartò, ut theologus in diligenti studio, quod debet adhibere, rectum sibi finem proponat, suam scilicet & proximi salutem; nec ex iis sit, de quibus Bernardus serm. 36. in Cantica sic loquitur: *Sunt qui scire volunt, ut sciunt, & tunc*

& turpis curiositas est . Et sunt qui scire volunt , ut sciatur ipsi , & turpis vanitas est . Et sunt item qui scire volunt , ut scientiam suam vendant , verbi causa pro pecunia , pro honoribus , & turpis quaestus est . Dare econtra debet operam , ut ex iis sit , de quibus idem S. Pater hæc habet : Sed sunt quoque , qui scire volunt , ut ædificent , & charitas est . Sed sunt quoque , qui scire volunt , ut ædificentur , & prudentia est .

Necesse est quinto , ut theologus in iis inprimis det operam , quæ ad suam & proximi salutem magis conferunt : *Quid est autem (ait loco proximè laudato idem Bernardus) sapere ad sobrietatem ? Vigilantissimè observare , quid scire magis priusve oporteat . Tempus enim breve est . Est autem quod in se est , omnis scientia bona , quæ tamen veritate subnixa sit ; sed tu , qui cum timore & tremore tuam ipsius operari salutem pro temporis brevitate festinas , ea scire prius , ampliusque curato , quæ senseris viciniora salutis .*

Sed jam tempus est , ut Prolegomenis nostris finem imponamus , ac operi proposito admoveamus manum ; lectorem interim admonentes , ut si quid , vel in hocce priore tomo , vel in sequentibus reprehensione dignum notaverit , illud pro indicto , à me jam haberi sciat , præsertim , si utique invito , exciderit , quod S. Romanæ Ecclesiæ fidei adversetur .

Primi Tomi Institutionum Theologicarum Finis .

Errata pro Tomo Primo.

Pag. 27. lin. 25. proveuiens.	lege: proveniens.
Pag. 43. lin. 19. Cresci Tresii,	lege: Crespi. Tres ii.
Pag. 55. lin. 20. opinionem probabilium.	lege: opinionum probabilium.
Pag. 68. lin. 7. opinionum.	lege: opinionem.
Pag. 73. lin. 27. doctrinam.	lege: doctrina.
Pag. 73. lin. 34. signum.	lege: sinum.
Pag. 82. lin. 1. cap. 2. nu. 48.	lege: cap. 4. nu. 18.
Pag. 90. lin. 1. opinionem.	lege: opinionones.
Pag. 99. lin. 5. iudicis.	lege: iuridicis.
Pag. 109. lin. 4. mortali.	lege: mortalis.
Pag. 117. lin. 7. liberationis.	lege: deliberationis.
Pag. 147. lin. penult. Tom. 4.	lege: Tom. 5.
Pag. 153. lin. 15. leges.	lege: lege.
Pag. 155. lin. 12. vendidisset.	lege: vendidisset.
Pag. 157. lin. 1. Architectori.	lege: Architecto.
Pag. 159. lin. 10. necesse.	lege: necesse est.
Pag. 174. lin. 5. legem.	lege: legum.
Pag. 184. lin. 12. vigorosi.	lege: rigorosi.
Pag. 194. lin. 19. est.	lege: ratio autem quia iste potest repetere, est.
Pag. 216. lin. 5. consumatur.	lege: consumantur.
Pag. 227. lin. 28. lucrum ea.	lege: lucrum ex.
Pag. 231. lin. 36. Tom. 5.	lege: Tom. 6.
Pag. 247. lin. 38. quodlibet.	lege: quolibet.
Pag. 260. lin. 1. conventu.	lege: convento.
Pag. 263. lin. 5. computari.	lege: computa re.
Pag. 269. lin. 26. fructuum.	lege: fructum.
Pag. 270. lin. 4. licito.	lege: lucro.
Pag. 278. lin. 1. Societatem.	lege: Societates.
Pag. 278. lin. 34. servantur.	lege: servetur.
Pag. 291. lin. 37. contrarium.	lege: contrariam.
Pag. 320. lin. 10. possint.	lege: possunt.
Pag. 332. lin. 25. centusilum.	lege: centuplum.
Pag. 334. lin. 12. æqualitate.	lege: æquitate.
Pag. 335. lin. 20. quis eas.	lege: qui eas.
Pag. 336. lin. 37. quacumque.	lege: quamcumque.
Pag. 338. lin. 19. rerum.	lege: reum.
Pag. 339. lin. 36. fortis.	lege: foris.
Pag. 344. lin. 8. tenerur.	lege: tenetur. ne.
Pag. 347. lin. 25. quæ iudicii.	lege: quæ iudici.
Pag. 348. lin. 30. casu depositarius.	lege: casu si depositarius.
Pag. 351. lin. 35. depositatum est.	lege: depositi actum est.
Pag. 353. lin. 14. non debeat.	lege: non debet.
Pag. 355. lin. 10. rectè commodatio.	lege: rectè commodati.
Pag. 363. lin. 23. Hæc posito.	lege: Hoc posito.
Pag. 365. lin. 34. polliceretur.	lege: pollicetur.
Pag. 370. lin. 18. ex taxa rei.	lege: ex natura rei.
Pag. 373. lin. 34. ne quodcumque.	lege: ne quemcumque.
Pag. 381. lin. 32. alii casu.	lege: alii casus.

3

i

005678008



